

შალვა ამონაშვილი

ნაღნ-ჩა
ღაჟანესა ჟჟიღ ზღჯანჯღ

შალვა ამონაშვილის
საგამომცემლო სახლი

მოსკოვი - თბილისი

2007

ავტორი დიდ მადლობას უხდის
ლამარა იანვარაშვილს,
ვალერია ნიორაძეს,
ნათელა ამონაშვილს,
პაატა ამონაშვილს,

რომელთა შრომითაც გამოიცა ეს წიგნი.

რედაქტორი
ლამარა იანვარაშვილი

შ. ამონაშვილი, ამონ-რა, ლეგენდა ქვის შესახებ.

„იყოს შენი გზა მოკლე და უსასრულო, ეკლიანი და აღმავალი“, – ეს ამოიცნო პატარა ბიჭმა ამონ-რამ საკუთარ ქვაწერილში. იგი შეხვდა იესო ქრისტეს, განიმსჭვალა მისი მოძღვრებით და გაიარა საკუთარი გზა. ეს არის ნამდვილი ზღაპარი, რომელსაც შეუწელებელი ინტერესით წაიკითხავს დიდიც და პატარაც. ყოველი გვერდი მკითხველს განაცდევინებს სიხარულს, შფოთსა და გულისტკივილს.

© შალვა ამონაშვილი

© „შალვა ამონაშვილის საგამომცემლო სახლი“, მოსკოვი 2007
დაბეჭდილია შპს „თობალისში“

ISBN 978-99940-942-1-9

ამონ-ჩა მთელი გულით უძღვნის
ამ წიგნს ყველას, ვინც მას მიიღებს

2003-2007 წლებში წიგნი მოსკოვში გამოიცა ოთხჯერ.

„ამონ-რას“ გამომცემის ცხოვრება გრძელდება ავტორის შემდეგ წიგნებში: „სალომეა“, „ილია“, „სინათლე წყვდიადში“, „წინამძღოლი“.
(გამოიცა ქ. მოსკოვში)

ბიჭი კაკასიის მთათა ღრუბლებიდან

კაკასიის მთები არსაიდან ჩანან ისე კარგად, როგორც ბუშეტში ჩემი სახლის ვერანდიდან. უყურე მათ, ესიყვარულე და მოგივა შთაგონება.

კაკასიის მთები იმიტომ არსებობენ, რომ კეთილ საქმეთათვის აღძრან ადამიანები: მევენახე — მზით სავესე და თაფლივით ტკბილი მტევნების მოსავლის მისაღებად; მჭედელი — ჩვეულებრივი, ზოგჯერ ჟანგიანი რკინისაგან ბედნიერებისა და სიხარულის ნალების გამოსაჭედად; მწყემსი — ციური და ღვთიური სალამურის დასაკრავად; მექოთნე — სიცოცხლისადმი სიყვარულით სავესე ღოქებისა და ჯამების გამოსაძერწად; ბავშვი — უხილავი ცისფერი ფრინველის საძებნელად; პოეტი — სულის ფრთების, წმინდა სტრიქონების შესაქმნელად; მასწავლებელი კი სიტყვა „მასწავლებელში“ ჩაქსოვილი უდიდესი საიდუმლოს ამოსაცნობად.

ღრუბლები მთების ფიჭრიაო, პოეტს უთქვამს. ღრუბლები ინახავენ ყველაფერს, რაც ნახეს და განიცადეს მთებმა. ღრუბლები — მთების სიბრძნეა. მათშია ჩამალული სამყაროს წუხილი და სიხარული, მათ იციან წარსული და მომავალი ადამიანებისა, რომლებიც სახლობენ ვარსკვლავთა უსასრულო სივრცეში მქროლავ პატარა დედამიწაზე.

ჩემი ვერანდიდან კაკასიის მთებს ლამის ხელით შეეხები. ერთხელ ისე შემიპყრო მათ სიახლოვემ, ისე მომინდა მოვფერებოდი მათ, რომ ველარ მოვითმინე, ეზოში გავიქეცი და მანქანა დაექოქე. „პაპა, სად მიდიხარ?“ — მომცვივდნენ შვილიშვილები. „დასხედით!“ — გავეცი განკარგულება და გზას მივაშურე. „მალე, ძალიან მალე, აი ამ მანქანით ავალწევ რომელიმე მთის მწვერვალს, — ვფიქრობდი ჩემთვის, — ხელს შევახებ მარადიულ თოვლს, ცისარტყელის ფერებით რომ თამაშობენ, განვიბანები ღვთიურ ღრუბლებში და ვეტყვი შვილიშვილებს: „აი, აღსრულდა თქვენი პაპის ოცნება!“

მაგრამ მთები რატომღაც სულ უფრო და უფრო შორს გამიბოლოდნენ, უფრო და უფრო მალლა მიიწვიდნენ, მერე კი სულაც გამიქრნენ თვალიდან, თითქოსდა უსასრულობაში ჩაიკარგნენო. „სად არიან მთები, კაკასიის მთები?“ — ვეკითხებოდი ყველას, ვინც კი ახლო-მახლო ცხოვრობდა. ისინი

მხრებს იჩეჩავდნენ: „რა მთები? არ არიან აქ კავკასიის მთები!“

და მხოლოდ ერთმა ბრძენმა მოხუცმა, — ბრძენმა იმიტომ, რომ თოვლივით სპეტაკი გრძელი წვერი ჰქონდა, ხელში კი კვერთხი ეჭირა, — თავისი უძირო თვალები ცისკენ აღაპყრო და წარმოთქვა: „მთები იქ არიან, შვილო!“

მაშინ პირველად ჩემს ცხოვრებაში გულით შემებრაღნენ აღამიანები, რომლებიც მათათა ფერხთით ცხოვრობენ, მთებს კი ვერ ხედავენ.

ზაფხულის ერთ მშვენიერ დღეს ისევ გაველი ჩემს ვერანდაზე და მათათა სილუეტებს გავხედე. იმედი მქონდა, რომ მთები გამომიგზავნიდნენ შთაგონების ნაპერწკალს, მიწყალობებდნენ თავიანთ სასწაულებრივ ძალას, რომ სწრაფად და უშეცდომოდ განველო მასწავლებლის რთული ცხოვრება. მთების თავზე უზარმაზარი, ღრუბლები მოძრაობდნენ, ფორმასა და ფერს იცვლიდნენ. აშკარა იყო, მთები ფიქრობდნენ.

უცბად ღრუბლებში პატარა ბიჭის სახე აღმოვაჩინე. რაღაც საოცრებით ბიჭმა ღრუბლებიდან ჩემს ვერანდაზე გადმონაცვლა და წყნარად მითხრა: „დაწერე ჩემზე!“

„ვინ ხარ? ან რა უნდა დავწერო შენზე, როცა არაფერი ვიცი?“ ანგელოზივით ბიჭს გაოგნებული შეეყურებდი.

„მე ჩემს ცხოვრებას შენს ფიქრებსა და წარმოსახვაში გავივლი, შენ კი დაწერე, როგორც გულმა გიკარნახოს!“

ბიჭმა ისევ უზარმაზარ ღრუბლებს მიაშურა და გაუჩინარდა.

რაღაც შინაგანმა მოუსვენრობამ დაძაბა. მაშინვე მაგიდას მიუჯექი და წერა დავიწყე. მაგრამ კი არ ვწერდი, არამედ გადმოვიწერე მოვლენები, რომელთა მხილველიც ბედის წყალობით გავხდი. მე ვხარობდი პატარა ბიჭის სიხარულით და მტკიოდა მისი ტკივილები, ვსწავლობდი მისგან სიყვარულს და სიკეთის გაცემას...

მე არ მინდა ფსევდონიმს ამოვეფარო. ამიტომ ვაცხადებ: კარგად ვიცი, ყველა როდია ავტორი იმისა, რასაც წერს, რადგან არსებობენ უხილავი თანამემშენი და მოკარნახენი. ასე მომაქვს თქვენთან ისტორია პატარა ბიჭისა, რომელიც ათასი ლეგენდისა და ზღაპრის ჭეშმარიტებად იქცა.

არ ვკარგავ იმედს, რომ მთები, რომლებიც არ აპირებენ ჩემი საყვარელი კავკასიის დატოვებას, — რადგან მათ

ადამიანთა შთაგონების გარდა სხვა დავალებაც აქვთ: თავიანთი ყოველისშემძლე მხრებით დაიკავეთ ცის უზარმაზარი ნაწილი ვარსკვლავებითა და თანავარსკვლავედებით, — ოდესმე გამახარებენ და ღვთიურ ნაპერწკალს მიბობებენ. მე კი ეს ნაპერწკალი ძალიან მჭირდება, რათა ჩავწვდე ერთი სიტყვის საიდუმლოებას. ეს სიტყვაა „მასწავლებელი“.

მთმინებით ველოდები ამ ნაპერწკალს ბუშეტში ჩემს ვერანდაზე.

დაბადების დღე

რას დილაადრიან გაეღვიძა, მაგრამ ადგომა არც განუზრახავს.

— რა! — ალერსით ჩასჩურჩულა დედამ და თან საბანი გადახადა.

რამ თავი მოიმძინარა. დედამ ისევ წააფარა საბანი და ეზოში გავიდა.

დღეს რას დაბადების დღეა, შვიდი წლის ხდება. რამდენ რამეს დაპირდნენ უფროსები! — ბიჭი ოცნებას მიეცა.

დედამ უთხრა, ნამცხვრებს გამოგიცხობ და ვინც გინდა, ის მოიწვიო.

„ვინ დაეპატიჟო? — ფიქრობს რა, — ილიას დაუუძახებ, მართალია, ჩემზე უფროსია, მაგრამ ჩემთან მეგობრობს, ხშირად ერთად ვთამაშობთ. სალომესაც მოვიწვევ, უბანში ყველაზე ლამაზი გოგოა, დიდი თვალები აქვს და ხალისიანი კისკისი იცის. იქნებ ცოლად შევიერთო, როცა გავიზრდები!.. კიდევ ვინ, ვინ დაეპატიჟო?“

რას ფიქრებმა ახლა მამაზე გადაინაცვლა. კარგი მამა ჰყავს რას — მალალი, ღონიერი, ლამაზი. ბუხუნა ხმა აქვს, მაგრამ მეტად კეთილია. მამა საუკეთესო მეზადურად არის ცნობილი ქალაქში.

მამა ძველი მეომარი იყო, მაგრამ როცა რომაელმა ლეგიონერებმა ამონელები დაჩაგრეს, მამაცი მეომარი ტყვედ ჩაიგდეს და სამშობლოდან შორს — იუდეაში გაასახლეს.

აქ შეირთო მამამ გრძელნაწნავიანი მარა. ქალიშვილი ბევრს მოსწონდა, მაგრამ მან ახალგაზრდა მეომარი ამჯობინა, მამაცი და კეთილშობილი. მამას ამონს ეძახდნენ, მაგრამ ეს არ იყო მისი ნამდვილი სახელი. ნამდვილი სახელით იუდეაში მას არვინ იცნობდა. არც რამ იცოდა მამის ნამდვილი სახელი. რას დედისგან ჰქონდა გაგონილი, რომ ქვეყანას, რომელსაც მამა იცავდა და უყვარდა, ამონი ერქვა, იქ ამონელები ცხოვრობდნენ. ამიტომ იუდეაში მამას ამონი ღარქვეს.

ბევრმა შეიყვარა კუნთმაგარი მებაღური, რომელიც დაჭერილი თევზიდან ნახევარს ყოველთვის გაჭირვებულებს, ხეიბრებს, ქვრივობლებს ურიგებდა. ოჯახში კი იმდენი მიჰქონდა, რამდენიც არსებობისათვის იყო საჭირო. მამას ეამაყებოდა, რომ თავისი სამშობლოს სახელს ეძახდნენ და ხშირად ნატრობდა, ნეტავ ისეთი დრო დადგეს, ჩემი ცოლშვილით ამონეთში დაებრუნდეთ.

საბნის ქვეშ ჩამალული რა მამის დაპირებას იხსენებდა, ზღვაზე წაგიყვან და ბადით ერთად დავიჭიროთ თევზიო. რასთვის ეს ღიღი ბედნიერება იყო, ხშირად უოცნებია, როდის იქნება მამასთან ერთად ნავში ჩავეჯდე და თევზის ჭერაში დავეხმაროო. დღეს რა თევზაობასაც ისწავლის და კაცურ საქმესაც გააკეთებს. რაც მთავარია, მამასთან ერთად გაივლის ქალაქის ქუჩებში და ყველა დაინახავს, როგორ მიაქვს მამაშვილს ბადე, როგორ გაზრდილა რა!

ბიძა ჰყავს კიდევ რას — დედის ძმა. ბიძას ხალხი ფილოსოფოსს ეძახის. რა კი მას ნამდვილი სახელით მიმართავს — ანდრია. არც ბიძა უშლის დისშვილს ანდრია დაუძახოს და არა „ბიძია ფილოსოფოსი“ ან „ბიძია ანდრია“, ან სულაც შემოკლებით — „ბია“. ბიძას ძალიან უყვარს დისშვილი, ანებივრებს და ზოგჯერ საოცარ ამბებს უყვება. ანდრიას ბევრი წიგნი აქვს წაკითხული. ახალგაზრდობისას ეგვიპტეში სწავლობდა და ისეთი საიდუმლოებანი იცის, რაც იუდეაში არავის გაუგია — არც მღვდელმთავრებს და არც მეფეს. იცის, რა არის სამყარო, რატომ არიან ვარსკვლავები ცაზე მიმაგრებულნი, რა არის სული. ისიც იცის, რომ დედამიწა ბრტყელი კი არ არის, მრგვალია და, თურმე, ბრუნავს.

ანდრიამ რამდენჯერმე სცადა, რომ რაც იცოდა, სხვებისთვისაც ესწავლებინა, მაგრამ მღვდელმთავრები და ფარი-სევლები ძალიან გაბრაზდნენ და ჩაქოლვა დაუპირეს. მაშინ ანდრია გაჩუმდა, ჩაიკეტა თავის გამოქვაბულში და წერა დაიწყო. წერდა და წერდა ანდრია... დახვეულ პერგამენტებს კი სკივრში აწყობდა. რას წერდა, არავინ იცოდა. არც არავისთან სურდა საუბარი და აზრის გაზიარება. მარტო ერთ ადამიანს — რას გაუმართავდა ზოლმე საუბარს.

ოთხი წლისა იყო რა, როცა ანდრიამ უთხრა: თვალები დახუჭე, არაფერზე იფიქრო და რასაც დაინახავ, მომიყვიო. თვალდახუჭულმა რამ სახე ჭერისაკენ ალაპყრო და სულაც

არ გააკვირვებია, რომ მართლაც დაინახა. დაინახა ცეცხლის წითელი ალები... ქალაქი იწვოდა. ცხენებზე ამხედრებული მეომრები ერთი მიმართულებით მიჰქროდნენ. ისმოდა ხმლები და შუბების ჭახა-ჭუნი, კენესა... დაინახა უზარმაზარი ურჩხულები, რომლებიც შემზარავი გრუხუნით დაფრინავდნენ ცაში, მათ ქვეშ კი მიწა იწვოდა... ამ ორომტრიალში რამდენიმე მშვიდი სურათიც გამოჩნდა. ადამიანები ზეიმობდნენ, ცეკვავდნენ, მღეროდნენ და ტაძარს აშენებდნენ. მოხუცები ლოცულობდნენ.

ეს ყველაფერი ოთხი წლის რამ ანდრიას უამბო, თუმცა ბევრი რამის თქმა ვერ შეძლო, რადგან ძალიან შფოთავდა და განიცდიდა. ამის გამო თითქოს ენაც ჩაუვარდა. ბევრი რამ, რაც დაინახა, არ იცოდა, რა სიტყვებით გადმოეცა.

ანდრია ჩქარ-ჩქარა იწერდა ყველაფერს, და როცა ბიჭმა თვალები გაახილა, ანდრიას შემფოთებულმა სახემ შეაშინა.

შარშან, ვიდრე ექვსი წლის გახდებოდა, რამ ანდრიას თხოვნით კიდევ დახუჭა თვალები და სულ რამდენიმე წამში იისფერ ცეცხლში ჩაიძირა. ცეცხლი არ იყო მწველი, როგორც წითელმა ცეცხლმა იცის; იისფერმა ცეცხლის ალმა თითქოსდა განბანა და განწმინდა ბიჭი, ალი თითქოს ეფერებოდა რას, რაღაცას ეჩურჩულებოდა. თუმცა ბიჭს არ ესმოდა, რადგან ჩურჩული სხვანაირი იყო — უსიტყვო და უხმო, მაგრამ სიბრძნით სავსე. რა გრძნობდა, რომ ყველაზე დიდი სიბრძნე სიტყვებით არ ითქმის, სმენით ვერ აღიქმება, მარტო გული მისწვდება მას — უსიტყვოს, უხმოსა და ცეცხლოვანს. ეს სიბრძნე ცისფერ ცეცხლსა ჰგავს, თანაც უსაზღვროა, შენ კი ნამცეცი ხარ და შიგ იძირები. ნამცეცი კი ხარ და სიბრძნის უსაზღვროებაში იძირები, მაგრამ ის როგორღა ხდება, რომ უსაზღვროება ნამცეცხლში იძირება? ეს ყველაფერი იგრძნო რამ, ანდრიას კი ვერაფერი უთხრა. მხოლოდ ერთი-ორჯერ წამოიძახა: იისფერი ცაო, ცისფერი ზღვაო, ჩავიძირეო და მეტი ვერაფერი. ცოტა ხნის შემდეგ რას სახე გაუნათდა, თვალწინ დაუდგა დიდებული ხატი კაცისა, რომელიც რაღაცით ანდრიას ჰგავდა, რაღაცით ამონს. დიდებული სახე უღიმოდა რას, ბიჭი მოიხიბლა.

ანდრიამ დისშვილის სახეზე ნეტარება ამოიკითხა.

— რა, ამოიღე ხმა! რას ხედავ? — ჩასძახოდა ანდრია.

ბიჭმა მარტო ერთი სიტყვის თქმა შეძლო, რომელშიც ანდრიას ყველაფერი უნდა ამოეცნო და ამოიცნო კიდევ.

— ი მ ა ს !

ანდრია გაოგნდა და მზერა სივრცის იმ ნაწილს მიაპყრო, საითაც რა იყურებოდა. რა ყველაფერს ხედავდა, ანდრიამ კი მხოლოდ წაშით მოკრა თვალი რაღაც ოვალურ ცისფერ ნათებას — დიდს. ნათება სივრცეში გაიშალა და გაუჩინარდა. რამ თვალი გააყოლა სახეს, რომელიც ნელ-ნელა ქრებოდა, გაუღიმა და ხელი დაუქნია.

„იმასო,“ — თქვა რამ, და ანდრია მიხვდა, ვინც გამოეცხადა ბიჭს, რამ კი მხოლოდ ის იგრძნო, რომ ვიღაც ძალიან ახლობელი იხილა, იხილა ის, ვინც ანდრიასაც უყვარდა, დედასაც და მამასაც უყვარდა, სალომესაც უყვარდა და ვისკენაც თვითონაც მიისწრაფვოდა. მაგრამ ვინ იყო ის ახლობელი და რა ერქვა მას, რამ არ იცოდა.

ამის შემდეგ ანდრიამ კიდევ უფრო დაიახლოვა დის-შვილი და თავისი საიდუმლოებანი გაანდო.

— ჩემი წიგნების სკივრი შენ უნდა დაგიტოვო, შენ გაიგებ, რასაც ვწერ, სხვები ვერ გაიგებენ!

მაგრამ რად გინდა წიგნები, თუ კითხვა არ იცი?

— ხვალღიდან კითხვასა და მეცნიერებას გასწავლი, თეზაობის მერე ჩემთან წაგიყვან და პირველ მეცადინეობას ჩაგიტარებ! — უთხრა ანდრიამ რას.

ეს მისი საჩუქარი იყო დაბადების დღისთვის.

რამ გაიხარა.

„კითხვა და მეცნიერება ჩემი ცხოვრების საჩუქარი იქნება“, — გაიფიქრა თავზე საბანწაფარებულმა რამ. აქაოდა ყველაფერი მოვასწრო და ეს ჩემი დაბადების დღე არ გამეცქესო, საწოლიდან წამოხტა და ეზოში დედას გაეკიდა.

— მამა ხომ არ წავიდა უჩემოდ? სად არის მამა?

— ბაღე მოამზადა მამამ და შენ გელოდება! — დაამშვიდა დედამ.



თუ ვინღა გადარჩე, გამარჯვებაზე იფიქრე

მზე საცაა ამოვიდოდა. მამა-შვილმა მძიმე ბაღე მხრებზე გადაიკიდა. რა წინ წავიდა, მამა უკან გააჰყვა. ამაყად მიბიჯებდა რა, თუმცა ბაღე ადვილი სატარებელი არ იყო.

— ამონ, შვილი წამოგწევია! — უთხრა ოქრომჭედელმა ოსტატმა, როცა მის სახელოსნოს ჩაუარეს.

ამ ოქრომჭედელთან უცხო ქვეყნიდანაც მოდიოდნენ ვაჭრები, მდიდრები, დიდებულთა მსტოვრები და სამკაულებსა და ნაირ-ნაირ ძვირფას ნივთებს უკვეთავდნენ. როცა ზაქარია — ასე ერქვა ოქრომჭედელს — რაიმე ნივთს ქმნიდა, თვეობით გარეთ არ გამოდიოდა. იჯდა თავის ციციქნა ჩაბნელებულ სახელოსნოში და სანთლის შუქზე ადნობდა ოქროს, აწახნაგებდა ძვირფას თვლებს და ქმნიდა ლეგენდას. მისი ყოველი ნამუშევარი მართლაც ლეგენდა იყო, რადგან მუშაობდა ზაქარია და თან განუწყვეტლივ რაღაცა საიდუმლოს ჩურჩულებდა. ხალხში ამბობდნენ: ზაქარიას ნაკეთობას ჯადოსნური ძალა აქვსო, თუ წინასწარ ეტყვი, რისთვის და ვისთვის გჭირდება ნივთი, მაშინ ზაქარია შესაფერის ძალას ჩაადულებს მასშიო. თუ ზაქარიას შეეკითხებოდნენ, მართლა ასეა თუ არაო, ის არაფერს უპასუხებდა, მაგრამ თუ დაინტერესდებოდნენ: როგორ ქმნი ლამაზ ნივთებს მაგ კოტიტა თითებით ან როგორ უძლებს შენი თვალები ამ სიბნელეში, სანთლის შუქზე ასეთი ციციქნა და ერთმანეთში ჩახლართული ხაზებისა და ფიგურების გამოყვანასო, ერთს იტყოდა: თუ გული სიყვარულით გაქვს სავსე, ოქრომჭედლობას ფეხის თითები თაც ისწავლიო.

ახლა ზაქარია თავისი სახელოსნოს წინ იჯდა, იმიტომ კი არა რომ საქმე არაფერი ჰქონდა. იჯდა იმიტომ, რომ მზის ამოსვლას შეჰხაროდა და თავის სანუკვარ სიმშვენიერეზე ფიქრობდა.

რას გაგებული ჰქონდა, ზაქარიას ოქროს ხელები აქვსო. ნაბიჯი შეანელა და ოქრომჭედელს ხელებში დააკვირდა.

დააკვირდა და გაუკვირდა, ხელები არც ოქროსი იყო და არც ლამაზი.

ზაქარიამ თვალი გაადევნა სათევზაოდ მიმავალ მამა-შვილს.

არავინ იცოდა ზაქარიას საიდუმლო — რატომ არ შეერთო ცოლი, რატომ ცხოვრობს ოქრომჭედელი ასე ღარიბად. მარტო თვითონ იცოდა საკუთარი საიდუმლო.

დიდხანს უყურებდა ზაქარია რას, ვიდრე მამა-შვილმა მეორე ქუჩაზე არ შეუხვიეს, და კეთილი სინანულით გაიფიქრა: „ეჰ, ეს ბიჭი ჩემი შვილი შეიძლებოდა ყოფილიყო;“ შემდეგ ისევ ამომავალ მზეს დაუწყო ცქერა და თავისი ოცნებები გააგრძელა: „ამომავალი მზე ოქროსა და ძვირფას თვლებში... ღმერთო ჩემო, ნუთუ ვერ შეეკმინი ჩემი ხელოვნების გვირგვინს?“

მამა-შვილი ახლა მეორე ვიწრო ქუჩას მიუყვებოდა. აქ სხვა ნაცნობები ხვდებოდნენ: მტვირთავები, მექათნეები, თერძები და მეწაღეები, ვაჭრები და მელუქნეები. ვიღაცამ მხრებზე ხელი შემოჰკრა რას — ნამდვილი კაცი ხარო, ვიღაც ამონს გამოელაპარაკა — დაჭერილი თევზი ჩემს ღუქანში მომიტანეო, თან შვილიც შეუქო. სახლიდან გამოსული რა, ვიდრე მამა-შვილი ზღვას მიაღწევდა, თვალსა და ხელს შუა გაიზარდა, თვალეში სიბრძნის ნაპერწკალი ჩაუდგა. და ბიჭმა აშკარად იგრძნო, განიცადა, რომ დღეს მართლაც შვიდი წლის ხდებოდა, დიდი ხდებოდა. ხალხმა მამასთან ერთად სამუშაოდ მიმავალი დაინახა, როცა ზღვიდან დაბრუნდება, ანდრია კითხვისა და მეცნიერების სწავლას დააწყებინებს. მეტი რაღაა დილობა!

მამამ ნავი ახსნა, რა ნავში ჩახტა და ზღვის სივრცეს გახვდა. მოუთმენლობამ შეიპყრო, როდის შევიდოდნენ შუა ზღვაში და ბადეს ჩაუშვებდნენ.

ისინი მარტო არ იყვნენ ზღვაში. აქა-იქ ათიოდ ნავი ჩანდა. ზოგი უკვე შესდგომოდა თევზის ჭერას. ერთმა მეთევზემ ამონს გამოსძახა: დღეს თევზი ცუდად მოდისო, სამჯერ ვისროლე ბადე, ყველა უშედეგოლო.

ამონმა იცოდა, საითკენ უნდა წაეყვანა ნავი, ან იქნებ სულ სხვა რამეც იცოდა, მაგალითად, როგორ უნდა მოეზიდა თავისი ბადისკენ თევზის ქარავანი. რა გაფაციცებით ადევნებდა თვალს მამის მოძრაობებს. მამა ნიჩბებს უსვამდა გაჩ-

ქარებით და თან, ოქრომჭედელი ზაქარიასავით, რაღაცას ბუტბუტებდა. არცერთი სიტყვა არ ესმოდა რას, მაგრამ ხვდებოდა, რომ მამა საიდუმლო ძალას უხმობდა.

ნავი სწრაფად შესრილდა ზღვის სიღრმეში და ამონმა რას დახმარებით ბაღე ჩაუშვა. ბუტბუტი არ შეწყვეტილა, ისე ჩასცქეროდა ზღვას. ოციოდე წუთის შემდეგ რას გადმოსძახა: — აბა, ვაჟკაცო, ამოვწით ბაღე.

ოპ, რა ძნელი ყოფილა ბაღის ამოწევა! რას კუნთები დაეჭიმა. ამოიტანეს მამა-შვილმა ბაღე და ნავში ვერცხლისფერი თევზის გროვა გადმოცალეს. თევზები ხტოდნენ, პირს აღებდნენ, ერთმანეთში ირეოდნენ.

მეორედ ჩაუშვეს ბაღე, მესამედ, და ნავის ფსკერი თევზებით დაიფარა.

ამონი კიდევ აპირებდა ბაღის სროლას, მაგრამ ახლადა შენიშნა, რომ ნაპირიდან მეტად შორს წასულიყო ნავი, ხოლო ჰორიზონტიდან მუქი ღრუბლები მოიწვედნენ, მათ გრიგალი მიაქროლებდა. განა არა, დილით ამონმა გაიფიქრა, ნეტავ დღეს როგორი ამინდი იქნებაო. მშვიდი და კრიალა რიჟრაჟის ცა საშიშს არაფერს ეუბნებოდა და, რაც მთავარია, შვილს დაჰპირდა — სათევზაოდ წაგიყვანო, ეს ჩემი საჩუქარი იქნება დაბადების დღისთვისო. ბიჭი დიდი ხანია ელოდა ამ ბედნიერ დღეს, და ამონს არ შეეძლო გაეცრუებინა მისი მოლოდინი.

ჰორიზონტი ნავისკენ მოიწვედა და ამონი ხედავდა და გრძნობდა მოახლოებულ ბობოქრობას. მეთევზეებიდან ზღვაზე აღარავინ იყო. მათ, როგორც ჩანს, ადრევე შენიშნეს მოსალოდნელი უბედურება და ნაპირს მიაშურეს.

— მაგრად ჩასჭიდე ხელი ნავს! — მკაცრად გააფრთხილა მამამ რა და ნიჩბები ამოძრავა.

რაც ძალი და ღონე ჰქონდა მიაქანებდა ამონი ნავს ნაპირისკენ, მაგრამ ხედავდა, რომ კიდევ უფრო ჩამუქებული ჰორიზონტი სჯობნიდა სისწრაფეში.

„ღმერთო ჩემო, ბავშვი!“ — გაიფიქრა შიშით ამონმა. გამოცდილებით იცოდა, რაც შეიძლებოდა მოჰყოლოდა ამ გრიგალს. ნავმა რყევა დაიწყო, ტალღებმა სიმაღლეს მოუმატეს, ზღვა აგრუხუნდა.

ამონმა ნაპირს გახედა. შორს იყო ნაპირი, თანაც ძლივს ჩანდა მოულოდნელად წამოსულ თქემში.

დაკვირვებული ბიჭი იყო რა. მამის შფოთი არ გამოეპარა. „რალაც საშიში ხდება“, — გაიფიქრა ბიჭმა და, როგორც ანდრიამ ასწავლა, თვალები დახუჭა, სიბნელეს ჩახედა. რამ ყველაფერი დაინახა, რაც კი სულ რამდენიმე წუთში უნდა მომხდარიყო.

მამამ ძლივს დაფარა ზღვის გრუხუნნი და შვილს გააგებინა:

— დაიმახსოვრე, შიში სიკვდილს ვერ იხსნის! მაშინ გადარჩები, თუ გამარჯვებისთვის იბრძოლებ და არა გადარჩენისათვის! გაიგე?.. გაიმეორე, რაც გითხარი!

— გადარჩენის გზა გამარჯვებაა! — რაც ძალი და ღონე ჰქონდა დაიყვირა რამ.

მამამ გაიგო და თავი დაუქნია, კიდევ გაულიმა შვილს, ასე აფორიზმივით რომ გამოთქვა მისი გრძელი დარიგება. რამ მოასწრო ამ ღიმილის დაჭერა და იმავე წამს თავს გადავლებულმა ტალღამ მამა გაიტაცა.

აი, ეს დაინახა რამ ორიოდ წუთის წინ, როცა თავლებდახუჭულმა სიბნელეს ჩახედა.

ტალღის მუცელში ჩანთქმული ამონი ისევ უღიძოდა რას, უკანასკნელ ალერსს უგზავნიდა, უკანასკნელ დარიგებას აძლევდა: „ძლიერია, ვისაც უყვარს, იმარჯვებს, ვინც სიყვარული იცის, გახსოვდეს, ჩემო ბიჭო!“ ზღვამ თითქოს გრუხუნნი შეწყვიტა, რომ ამონის ძახილი მისი მუცლის სიღრმიდან შვილს გაეგო. რას მართლაც ჩაესმოდა ყურში — ნათლად, მკაფიოდ, მშვიდად — მამის მოწოდება, თუმცა ამონი, მისი კეთილი და მამაცი მამა, აღარ ჩანდა, და რამ იცოდა, რომ აღარც არასდროს გამოჩნდებოდა — სხეული მისი ზღვაში ინთქმებოდა, სული კი ძალდა მიიწვედა.

შიში სიკვდილს ვერ იხსნისო, თითქოს ყურში ჩასჩურჩულა მამამ რას. არა, ამონის სული ჯერ ისევ აქვეა და შვილის გადარჩენაზე ზრუნავს. თუ ახლა არ მოვსპობ ჩემს შიშს, მაშინ ვერასოდეს მოვსპობ მას და ვერც გადავრჩები, — გაიფიქრა რამ. რაც უფრო დიდი განსაცდელის წინაშე ხარ, მით უფრო დიდი შიში გიპყრობს. აი, სწორედ ამ ღროს უნდა მოიკრიბო ძალა და გაანადგურო იგი, დაიცალო შიშისგან, ისე რომ ნამცეციც არ დაიტოვო მისი. ბევრჯერ დაუმარცხებია რა შიშს, როცა ელვას ცა გაუპია და ქუხილს დედამიწა დაუნგრევია, როცა წყლის ჩხრიალი მგლის ღრია-

გიქრობდი ლამაზ სიზმრებს და ვამპირებს გისევდი, გავიწყებდი ანდრიასაც და სალომესაც! ო, უსუსურო და უგუნურო ბაღლო, ვერ იხსნი ჩემგან თავს, ვერსად დამემალები, რადგან მე შენში ვარ, შენს გულში ვარ ჩაბუდებული და აქედან გიფორიაქებ სულს და გიმღვრევ სისხლს! შენ უნდა დაგშალო, რომ მე ავშენდე, შენ უნდა დაგამდაბლო, რომ მე ავმალდე! შენით ვიკვებები და ვძლიერდები მე, ხა-ხა! შენს სიხარულს მე ვზრავ, შენს ოცნებებს მე ვსვამ, შენს სიკეთეს ბოროტად ვაქცევ! ასე ვიზივებ შენზე! ტალღა კი არ შეგჭამს შენ! ტალღა ვერც გხედავს და არც უნდინხარ ასეთი ღლაპი! მე გადაგყლაპავ, შენით გაძლიერებული და შენივე საკუთარი შიშის გორგალი! გამოგწოვ ყველაფერს — სულსა და იმედს, ფიქრსა და ოცნებას, სიკეთესა და სიყვარულს, აწმყოსა და მომავალს, ჩერად გაქცევ და მიგაგდებ ტალღას! შენს სხეულს ზღვის მტაცებლები დაფლეთენ, შენს სულს ფრთები ჩამოსცივებდნენ და ისიც ცის მაჯლაჯუნათა კერძი გახდება! მე კი გავძლიერდები, გავდიდდები და შენგან მოცლილი ახლა სხვას, შენსავით უნიათოსა და ბრიყვს ჩაუუსახლდები, იმასაც დავშლი და დავანგრევ; მერე სხვას მივადგები, უფრო გაძლიერებული და გააყვებული! ასე გავიზრდები, გავიშლები და განვეფინები მთელ სამყაროს! ხა-ხა! დადგება ის ბედნიერი დროც, როცა დედამიწაზე მარტო მე — შიში ვიბატონებ! მაშინ ადამიანებს დააფეთიანებს მინდვრის ყვავილიც და კაშკაშა ვარსკვლავიც, მზის სხივიც და თავისი ჩრდილიც, წაყროს რაკრაკიც და დედის ალერსიც, ჩიტების ჟღერტულიც და საკუთარი ხმაც! ადამიანები ღმერთს დაემალებიან, უფლის ანგელოზებს ტალახს ესვრიან! ერთმანეთს ზიზღითა და უნდობლად დაუწყებენ ყურებას! ადამიანებს თვალები საცრისხელა გაუხდებათ, ყურდღლის ყურები და ფეხები გამოესხმებათ და სულ გასაქცევად ექნებათ საქმე, რომ თავს უშველონ! შიში ვარ მე, ბიჭო, შენი საკუთარი შიში! შიში სიკვდილს ვერ იხსნისო, ასე დაგარიგა მამაშენმა, მაგრამ ვერ გამოგადგება მამაშენის სიბრძნე! სიკვდილი ჩემი ტყუპის ცალია! აი, დაგადექით თავს, შიშიც და სიკვდილიც! ხედავ, რამხელა ტალღა მოემართება, რომ ჩაგნთქას! წამიც და არაფერს დავტოვებ შენგან: შენი სხეული — ზღვას, შენი სული — ჩვენ, ხა-ხა! შენ ქვემოთ, ჩვენ ზემოთ! ჩვენი ლუკმა ხარ, უსუსურო! აბა, ჰა, რაღას ელოდები, გასძახე განწირულად:

მესამე თავი

გეყოფა ტირილი, დროა საქმეს შეკუდგეთ

რა გადარჩა. მამა ზღვამ შთანთქა.

მეოთხე დღეს იპოვნეს რა ნაპირზე გამორიყული, თანაც შორს თავისი ქალაქიდან. საიდან სად გაიტაცა ბიჭი ზღვამო, უკვირდით მძებნელებს.

რას ყველაფერი ახსოვდა: მამის უკანასკნელი ღიმილიც, მისი ბოლო დარიგებაც, ტალღაც, რომელმაც მამა გაიტაცა, და ტალღა, რომელსაც შესცინა.

„თუ გინდა გადარჩე, გამარჯვებაზე იფიქრეო,“ — იმეორებდა ბიჭი და ებრძოდა ტალღებს. მისი შიშის გორგალი ზღვამ მოსპო. ბიჭი, რომელსაც დაბადების დღე ჰქონდა და შვიდი წლის გახდა, ზღვის აბობოქრებულ ტალღებზე გამარჯვებას ზეიმობდა, გამარჯვებას საკუთარ შიშზე. შიში დაამარცხა რამ, ამიტომ ზღვის გრუსუნის და ტალღების ხეთქება კიდევ ართობდა ბიჭს. რა მოხდა, რომ ჯერ პატარაა? ან რას ნიშნავს პატარა? განა დიდია თუნდაც ორმოცდაათი წლის კაცი, კურდღლის ფაჩუნზე ვაიმეს რომ გაიძახის? პატარა მაშინ ხარ, როცა შიში გძალავს, როცა ვიღაცის ან რაღაცის გეშინია. დიდი ხარ მაშინ, როცა საკუთარ შიშს წირვას გამოუყვან, თუნდაც ხუთი, ექვსი ან შვიდი წლის იყო.

დაბადების მესამე დღეს, ვიდრე რა ნაპირზე აღმოჩნდებოდა, დელფინები გამოჩნდნენ.

ზღვა ხელ-ხელა დამშვიდდა, მაგრამ რა ნაპირიდან ძალიან შორს იყო. დაღლილ-დაქანცული ზღვაზე გულაღმა იწვა და ისვენებდა.

სამი დღე და ღამე ბობოქარიანი ტალღები ნაფოტივით ისვროდნენ რას ზემოთ-ქვემოთ. მაღლა შესროლილი რა თოლიასავით დაეშვებოდა ხოლმე ტალღაზე, ზღვაში ჩანთქმული კი თევზად იქცეოდა და ზედაპირისაკენ მოისწრაფოდა. გამარჯვების გზას მიჰყვებოდა რა ზღვასთან ჭიდილში. ვინ უფრო ძლიერია, შვიდი წლის ბიჭი თუ აბობოქრებული ზღვა?

ზღვაო, იტყვიან გამოცდილი ადამიანები.

რას ხანგრძლივი ცხოვრების გამოცდილება არა აქვს, მაგრამ ზღვასთან ჭიდილში დიდი გამოცდილება კი ნამდვილად შეიძინა.

შეუძლია თუ არა აბობოქრებულ ზღვას ჩაძიროს ან ჩანთქას ნაფოტი?

ზღვას, მით უფრო, თუ ის აბობოქრებულია, შეუძლია გემები ჩაძიროს, კლდეებს ძირი გამოუნგრეოს, ქალაქები წაღკოს, მაგრამ ნაფოტს კი ვერა და ვერ მოერევა. ნაფოტს არ ეშინია ზღვის, ამიტომ ზღვაც ვერაფერს უშვება მას. ნაფოტს არა თუ არ ეშინია აბობოქრებული ზღვის, არამედ კიდევ მოსწონს ზღვასთან თამაში. ზღვა მას ნაპირისაკენ ისვრის, ის კი უკან ბრუნდება, მაღლა ააგდებს, ის კი ტალღებზე ეშვება, ჩანთქავს, და ისევ ამოტივტივდება. ნაფოტი იცინის, ხალისობს, თამაშობს, ზღვა კი რისხდება და ბობოქრობს.

რამ განიცადა ნაფოტის სიბრძნე და გაიმარჯვა.

ბიჭი ზღვაზე გულაღმა იწვა და ცას შესცქეროდა.

ჯერ კიდევ რიჟრაჟი იყო.

ვარსკვლავები მკრთალად ციმციმებდნენ ცაზე. რა მათ შორის მამის ვარსკვლავს დაეძებდა. რომელ ვარსკვლავზეა ახლა ამონის სული? ან იქნებ ჯერ კიდევ აქ არის, არც გაფრენილა არსად, თავს დასტრიალებს შვილს?

ამ ფიქრებში იყო ბიჭი, როცა დელფინები მოსრიადლდნენ.

რას არ შეშინებია დელფინების, არც იცოდა, რომ ისინი დელფინები იყვნენ. გინდაც მტაცებელი თევზები ყოფილიყვნენ, რას მაინც არ შეეშინებოდა, რადგან შიშის გორგალი ზღვაში მოახრჩო. დელფინებმა ჯერ ქვემოდან შეათვალიერეს რა, შემდეგ რამდენჯერმე ზემოდან გადაახტნენ და, თითქოს იცნესო, გაუღიმეს, წრიანით რაღაც უთხრეს, ფარფლებითა და ცხვირით მიეაღერსნენ. ისინი ოთხნი იყვნენ და ისე შეწყობილად მოქმედებდნენ, თითქოს ერთის ნებას ასრულებდნენ. ორი მათგანი ქვემოდან შეუღვა რას, თითქოსდა ტანტზე დაწვინესო, ორი წინ გაუძღვა და ასე ისრიალეს ნახევარი დღე, ვიდრე ნაპირს არ მიაღწიეს. რას ამასობაში ჩაედინა კიდევც. დელფინებმა ბიჭი ნაპირზე გადაიყვანეს. ისე ფრთხილად იქცეოდნენ, რომ რას არც გაღვიძებია, და უკან გაბრუნდნენ.

სალამო ხანს მძებნელებიც გამოჩნდნენ და რა ქალაქში დედას მიუყვანეს.

დედა უკვე აღარ ტიროდა. ჩაწითლებულ და ჩასიებულ თვალებში ოთხი დღის წარსული იყო ჩახატული. მძებნელებმა რა სახლის წინ კარებთან დააყენეს. მარამ მაღლიერებით გაბრწყინებული სახე ცისკენ აღაპყრო, ორივე ხელი ღმერთს გაუწოდა. შემდეგ მუხლებზე დაეშვა, შუბლი დედამიწას მიაღო და მკლავები ისე შემოხვია მიწის ნაფლეთს, თითქოს მთელი დედამიწის ჩახუტება უნდაო. ასე გარინდებული ეფერებოდა მარა რამდენიმე წუთს დედამიწას, რომლის აბობოქრებულმა შვილმა — ზღვამ — ქმარი წაართვა, მაგრამ შვილი დაუბრუნა. მაღლობას უხდიდა მარა დედამიწასაც და მის შვილსაც, მხურვალედ კოცნიდა და ეფერებოდა მიწას.

შემდეგ წამოდგა, თავსაფარი გაისწორა და ახლა საკუთარი შვილი, სასწაულებრივად გადარჩენილი, გულში ჩაიხუტა.

რას წვეთი ცრემლიც არ გადმოვარდნია თვალიდან, როცა მამა ზღვამ ჩაყლაპა, და არც უფიქრია, რომ მამა მოკვდა, რომ მამის სულს საუკუნოდ გამორდა. ზღვაზე გულაღმა მწოლარემ რამდენჯერმე დახუჭა თვალები და სიბნელეს ჩახედა. ჯერ ოქროსფერი ღრუბელი ამოსრიალდებოდა ხოლმე, შემდეგ კი მამის ღიმილიანი სახე გამოანათებდა. მამა იქ არის, სადაც უნდა იყოს, მამა აქაც არის, მის გვერდით, დედის გვერდით, დედას ეფერება და ამშვიდებს.

ახლა კი გულმდუღარედ ატირდა რა, დედას ჩაეკრა და ცხელი ცრემლებით მკერდი დაუღბო. იმიტომ კი არ ტიროდა რა, რომ მამა დაეღუპა. არც იმიტომ, რომ მამა ეცოდებოდა — საწყალი, რა ადრე წავიდა ამ ქვეყნიდანო; არც იმიტომ, რომ ვინმესთვის თავი შეებრალეინა — ნახეთ, რა ადრე დავობლდიო, არც იმიტომ, რომ დედის დაქვრივებას წუხდა. მოხდა ის, რაც უკვე მოხდა და რაც უნდა მომხდარიყო. წარსულში არაფერი შეიცვლება. შვიდი წლის რამ ეს სიბრძნე ანდრიას დახმარებით უკვე შეიცნო. რა ტიროდა ცხარე ცრემლებით იმის გამო, რომ უყვარდა დედა და უყვარდა მამა, და იმის გამო, რომ დედის სამღლიანი ცრემლების ღვრისთვის ეთანაგრძნო, მისი წუხილი შეემსუბუქებინა.

რატომ ტირიან ბოლოსდაბოლოს ადამიანები, რა არის ცრემლი?

ვინ იმიტომ ტირის და გოდებს, რომ რაღაც ნივთი დაკარგა და მისი დაბრუნება სურს. ვინ იმიტომ, რომ ახლო ადამიანი გარდაეცვალა და მისი ცოლით იწვის, ან თავისი თავი ეცოდება, — უშენოდ მე რა მემკვლევბაო; ვინ იმიტომ, რომ აწყენინეს, რაღაც არ შეუსრულეს, შეურაცხყოფა მიაცენეს — არ გეცოდებითო, არ გრცხვენიათო; ვინ იმიტომ, რომ წაიქცა და რაღაც იტკინა — გამწარდა და ღმერთს უსაყვედურა, რა დაგიშავეო. მოკლედ, ტირიან ადამიანები და საკუთარ თავს იბრალებენ, ან წარსულს ებლაუჭებიან და უკან დაბრუნება უნდათ. ტირიან და გულს იმშვიდებენ, საკუთარ თავს დასტირიან. ეს ცრემლები წარსულის ცრემლებია. ასეთ ცრემლებს რომ გემო გაუსინჯო, სიმლაშეში იქნებ სიმწლაკესა და სიმწარესაც აღმოაჩენ. ეს ცრემლები ადამიანებს თვალებს უბნელებენ და სინათლესაც უკარგავენ.

მაგრამ სხვანაირი ტირილიც იციან ადამიანებმა და სხვანაირ ცრემლებსაც ღვრიან. ეს სხვანაირი ტირილი მაშინ იციან, როცა ცხოვრების გზას იცვლიან, თანაც მოულოდნელად. ამ დროს ცრემლი სეტყვისა და ჭექა-ქუხილის შემდეგ მოვარდნილ ნიაღვარს ჰგავს. იგი გზას ჩაუხერგავს წარსულს, რათა წარსული აწმყოსა და მომავალში არ შემოიჭრას. ან იქნებ სულაც წალეკოს წარსული, რომ კვალიც არ დატოვოს მისი. დარჩება წარსული გაღმა, გამოღმა კი — ახალი ცხოვრება დაიწყება.

წაიქცა კაცი და მოიტეხა ფეხი, გადმოღვარა სიმწრის ცრემლი, მაგრამ რად წავიქეციო, ამას კი არ ნანობს, არამედ როგორ მოვიქცე, რომ ეს აღარ დამემართოსო, ამაზე იფიქრებს.

დაკარგა ნივთი ადამიანმა. უყვარდა ნივთი და აღარ აქვს. გული დასწყდება, იტირებს, მაგრამ თან კი არ გაჰყვება; ალბათ, ახლის შეძენის დრო დადგაო, გაიფიქრებს.

გამოეცალა ხელიდან ძვირფასი ადამიანი — მამა ან მეუღლე, როგორც ეს დაემართათ რას და მარას, მაგრამ ცრემლი იმიტომ კი არ დაღვარეს — შემიცოდეთო, დავობლდი და დავექრივდიო, არამედ იმიტომ რომ სიყვარულს აუგვის ძეგლი. ასეთი ცრემლი ცოტამ იცის, ძნელია ასეთი ტირილი, რადგან იგი ადამიანისგან მსხვერპლს ითხოვს. ეს ცრემლები

მომავალს აშენებს. ასეთი ცრემლები თვალებს კი დაგწვავს, მაგრამ სინათლეს არ ჩაგიქრობს. პირიქით, უფრო ნათლად დაინახავ.

ცხარე ცრემლებით ტიროდა რა, მაგრამ ეს ცრემლები იმედიანი იყო. ის არ მისტიროდა დალუპულ მამას, არც თავის დაობლებას დასტიროდა. აბობოქრებული ტალღების თავზე თოლიასავით ჩამომჯდარ ბიჭს, ამ ზღვის უფსკრულში თევზად ქცეულს წარსულისაკენ მოსაბრუნებელი აღარაფერი ჰქონდა. ან რატომ უნდა ეტირა ამონი, რომელმაც ამაღლებული, გამარჯვებული სიკვდილი იზეიმა. ამონის სული ხარობს და საკუთარი ვარსკვლავისაკენ მიიწევს, გლოვის, სინანულის, ვიშ-ვიშის ცრემლებმა კი შეიძლება დაამძიმოს მისი ფრთები. რას ცრემლები უძირო მდინარე იყო, ტიროდა რა დედის გულის სანუგეშოდ და დასამშვიდებლად.

მარა შვილს ეფერებოდა და, მართლაც, მშვიდდებოდა, ხალისი და იმედი ეძლეოდა.

ალბათ, კიდევ დიდხანს იტირებდა რა, დედის უბეში თავჩარგული, მაგრამ მხრებზე ვილაცის სათუთმა შეხებამ გამოარკვია.

— გეყოფა ტირილი. წამოდი ჩემთან, დროა საქმეს შევუდგეთ!

ეს ანდრიას ხმა იყო.

რა უცბად დამშვიდდა. დედამ გაუღიმა და ხელისგულე-ბით თვალები შეუშრალა.

— გაჰყევი! — უთხრა მშვიდი, კეთილი და იმედიანი ხმით.

რამ დელას აკოცა, შებრუნდა და უკვე ქუჩაში გასულ ანდრიას დაეწია.



მეოთხე თავი

სამყაროს არა აქვს დასასრული, ყველგან ყველაფერია

გრძელი და ვიწრო ქუჩა ნელი ნაბიჯით გაიარეს.

სალამო ხანი იყო. ქუჩაში ბავშვები თამაშობდნენ, ერთ-მანეთს დასდევდნენ, ეჭიდებოდნენ, ან ჯგუფად შეკრულნი მღეროდნენ და ცეკვავდნენ. უფროსები თავიანთი სახლებისა და სახელოსნოების წინ პატარა სკამზე ისხდნენ, ან სულაც ფეხმორთხმით ისხდნენ მიწაზე და საუბრობდნენ.

ქუჩის ყველა უბნის უფროსები და ბავშვები ცნობის-მოყვარე თვალებით აცილებდნენ ფილოსოფოსსა და მის დის-შვილს. ზოგმა გადარჩენა მიულოცა რას და მამის დაღუპვის გამო მიუსამძიმრა. ბავშვები მორიდებით შესცქეროდნენ რას, რომელიც სამი დღე აბობოქრებულ ზღვას ებრძოდა და გადარჩა. ერთგან მოხუცმა ქალმა რა გულში ჩაიხუტა, აკოცა, თავზე ხელი დაადო და რაღაც იჩიფრიფა — შეულოცა, რომ ავი სულებისგან დაეცვა. შემდეგ ახლად გამომცხვარი მთელი პური ჩაუდო ხელში და ჩაულაპარაკა: „შვილო, ღმერთის ნებით გადარჩი. უსმინე ღმერთს!“

ვიწრო და გრძელი ქუჩა დაიღია. ანდრია და რა ქალაქს გასცდნენ და მთაზე ამავე ბილიკს გააჰყვნენ. რამ ვერც შენიშნა, როგორ აღმოჩნდნენ კლდოვან ბილიკზე, როგორ გააღწიეს თავი ეკალ-ბარდებს და, საერთოდ, როგორ მიაღწენ გამოქვაბულებს. ისინი სიბნელეში მიდიოდნენ და რა არც ცდილობდა ნაბიჯი მოეზომა, წინ დაეხედა. ანდრიას ფეხის ხმასა და ჩურჩულს მიჰყვებოდა ბიჭი და საკუთარი ფიქრებისა და განცდების ტვირთი მიჰქონდა. ანდრია რამდენიმე წელი იყო, რაც გამოქვაბულებში ცხოვრობდა.

მას შემდეგ, რაც ხალხს განერიდა და წერა დაიწყო, აღარც ქალაქში გაჩერდა. მთის ძნელად მისასვლელ ადგილას გამოქვაბულები იპოვა და იქ დასახლდა. გამოქვაბული ბევრი იყო. ანდრიამ რამდენიმე შეარჩია. ერთში წიგნებს წერდა, აქვე ედგა სკივრები, რომლებშიც წიგნებსა და ნაწერებს ინახავდა. მეორეში ცდებს ატარებდა, ამიტომ უცნაური მოწყობილობები ჰქონდა გამართული. მესამე კი ანდრიამ იმას მი-

უძღვნა, ვის გამოცხადებასაც ხუთი წელია ელის. ეს გამოქვაბული გამორჩეული სიყვარულით მოაწყო და მოხატა. ანდრიას წარმოდგენაში ის, ვისაც ამ გამოქვაბულში იხილაედა, მოულოდნელად მოვიდოდა მასთან, იქნებ არც ღამეს გაათევედა, იქნებ არც ჩაიმუხლებდა, ასე ფეხზე მდგარი გაუსაუბრებოდა მის მომლოდინე და მონატრებულ ანდრიას, რაღაცას ეტყოდა და ამით მის მთელ ცხოვრებას შეცვლიდა. იმ ერთი გამოცხადებისთვის, იმ წამიერი გამოცხადებისათვის მოამზადა ანდრიამ ეს დარბაზ-გამოქვაბული. ყოველ დილასალამოს შედიოდა შიგ, რომ სანთლები შეეცვალა, ყვავილებისთვის წყალი დაესხა და ელოცა.

ანდრიამ რასთვის ცალკე გამოქვაბული მოაწყო. ერთი კედელი უცნაური სურათებით მოხატა. მეორეზე ასოები და ბრძნული აზრები ამოკვეთა, მესამეზე კი მთელი წიგნი იყო დაწერილი. არც გამოქვაბულის ჭერი დაივიწყა: გუმბათივით ჭერზე მზე, მთვარე, ვარსკვლავები კიაფობდნენ. ლამაზი ფერები ერთმანეთს ერწყმოდა, კედლების ძირზე კი ქოთნებში ყვავილები ყვაოდნენ. გამოქვაბულის შუაგულში ტახტი და პატარა მაგიდა იდგა.

— მოვედით! — რასთვის მოულოდნელად თქვა ანდრიამ.

რამ ირგვლივ მიმოიხედა, მაგრამ უკუნ სიბნელეში ვერაფერი დაინახა.

— ჩემს ხმას გამოჰყევი! — უთხრა ანდრიამ და საიდუმლო სიტყვების ჩურჩულით შევიდა გამოქვაბულში. ჩურჩული შეწყდა. შემდეგ რაღაც ჩხაკუნი გაისმა და ნაპერწკლები აელვარდა. კიდევ, კიდევ და ბოლოს გამოქვაბული სუსტმა ალმა გაანათა. ანდრიას გრძელი ჩხირი ეჭირა ხელში, რომლის ერთ ბოლოს ცეცხლი ეკიდა. ანდრიამ კედლებზე მიმაგრებული სანთლები აანთო და გამოქვაბული განათდა.

— ეს შენი გამოქვაბულია, დღეიდან აქ იცხოვრებ. დაათვალიერე!

რას გაოცებას საზღვარი არ ჰქონდა: სურათებითა და წარწერებით მოხატული კედლები, ცასავით გუმბათი, იატაკზე ხალიჩები და ბალიშები, ტახტი.

— მოგწონს? — ჰკითხა ანდრიამ.

— ძალიან! — უპასუხა რამ. ბიჭს მოუთმენლობა იპყრობდა, — ანდრია, როდის მასწავლი კითხვასა და მეც-

ნიერებას? როდის წავიკითხავ და გავიგებ, რაც ამ კედელზე წერია?

— ეს სამი დღის წინ უნდა დაგეწყო. ამიტომ ნულარ დავიგვიანებთ, ახლავე შევუდგეთ სწავლას! — ღინჯად უპასუხა ანდრიამ.

შემდეგ ღოქიდან ჯამი რაღაც სითხით გაავსო და რას გაუწოდა. ბიჭს სწყუროდა და ეგონა, წყალს მთავაზობსო. მაგრამ როგორც კი ჯამი პირთან მიიტანა, მიხვდა, რომ რაღაც სასიამოვნო რამ იყო: სიამოვნებით გამოცალა ჯამი. სურნელოვანმა და გემრიელმა სითხემ სხუელში დაუარა და ძალა და ხალისი შემატა.

— რა დამალევენე, ანდრია?

— რაც გჭირდებოდა!

ანდრიამ თავადაც გამოცალა ყვავილოვანი სითხით საესე ჯამი. შემდეგ ბიჭი ერთ კედელთან მოიხშო და ჩურჩულით, რომ რას მეტს არავის გაეგო, თითქოსდა გამოქცაბულში კიდევ იყო ვინმე, ჩურჩულითა და საიდუმლო ხმით დაიწყო.

— აი, ეს ის მთაა, რომლის გულშიც ჩვენ ვართ, აქ არის ჩვენი გამოქცაბულები. ამ მთის იქიდან მზე ამოდის, შეხედე მზეს...

მთის წვერი ოქროს სხივებით იყო განათებული, სხივები მაღლა გუმბათისკენ მიიწვევდნენ.

— ეს მზის ამოსვლაა, — დილით ადრე ამ საოცრებას ვიხილავთ!

ანდრიამ ბიჭი საპირისპირო კედელთან მიიყვანა.

— შეხედე, აქაც მთაა, მაგრამ სხვა. ამ მთის იქით მზე ჩადის.

რამ იცნო ჩამავალი მზის სხივები — მოწითალო-მოყვითალო.

„როგორ დახატა ეს ანდრიამ, თითქოს ნამდვილიაო?!“

— უკვირდა ბიჭს, მაგრამ ანდრიას უბრალო კითხვამ კიდევ უფრო გააოცა.

— მითხარი ერთი, როგორ ხდება, რომ მზე ერთი მთიდან ამოდის და მეორე მთის იქით ჩადის?

რამ ვერც მოასწრო რამე მოეფიქრებინა, რომ ანდრიამ მეორე და მესამე კითხვაც მისცა:

— რატომ იბადება ადამიანი, რას ეძებს ამქვეყნად და რატომ ვერ პოულობს, რასაც ეძებს?

რას ძალიან რომ სდომებოდა, მაინც ვერაფერს უპასუხებდა ანდრიას. არც ანდრია ელოდა პასუხს. რა კითხვებმა ჩააფიქრა: ცხოვრობ დედამიწაზე, შექხარი მზეს და არ იცი, ვინ ხარ, საიდან მოხვედი, რას ეძებ და საით მიდიხარ, ყოველდღე შექხარი მზეს და არ იცი, რატომ და როგორ ამოდის და ჩადის მზე.

— გავიდეთ გარეთ! — უთხრა ანდრიამ.

ისინი რასთვის უცნობ ბილიკს გაჰყვნენ და ათიოდ წუთში მთის წვერზე აღმოჩნდნენ. თავზე ვარსკვლავებით მოჭედული ცის გუმბათი ედგათ. ორმტკაველიან მთის წვერზე ანდრია და რა ძლივს ეტეოდნენ. „ნეტავ როგორ ჩანს აქედან ქალაქი? — გაიფიქრა რამ.

— გახედე ცას. მოგწონს?

ბღღვრიალებდნენ და ციმციმებდნენ ვარსკვლავები, დიდები და პატარები. ისე ციმციმებდნენ და ირხეოდნენ, თითქოს ერთმანეთს ელაპარაკებიანო, ერთმანეთს უცინიანო.

— ვინ და რატომ შექმნა ასეთი გუმბათი ჩვენ თავზე? რა ხდება ვარსკვლავებზე?

კარგა ხანს უყურეს ცას ანდრიამ და რამ, ჩუმად უყურებდნენ და ფიქრობდნენ. ანდრია იმაზე ფიქრობდა, როგორ მიეხვედრებინა რა, რომ ყველაფერი ეს უსასრულობაა, რომელშიც აზრი ბატონობს, ხოლო აზრი სიყვარულით სავსე სამყაროს საწყისია. სიყვარული სამყაროს სიმყარე, სამყაროს დედაა. რამდენი წელი უნდა ასწავლოს რას ანდრიამ, რომ ბიჭს გონება გაუნათდეს და შემდეგ თავად გააგრძელოს საიდუმლოთა ამოცნობა. რას ფიქრები კი ვარსკვლავებს უფრენდნენ გარშემო. „რა არის ამ ვარსკვლავების იქით? კიდევ იქით? იქით? — ფიქრობდა რა და ვერ წარმოედგინა, რომ სადღაც ვარსკვლავების მიღმა აღარაფერი იქნება. „სამყაროს არ შეიძლება ჰქონდეს დასასრული! ყველგან ყველაფერია!“ — გაიფიქრა რამ და გაუხარდა, რომ ასეთ აზრს მიაგნო.

როცა ისევ გამოქვაბულში დაბრუნდნენ, ანდრიამ უთხრა:

— უკვე გვიანია. მაგრამ თუ გინდა, ნუ ჩააქრობ სანთლებს, უყურე კედლებს და იფიქრე!

ასე დაიწყო რას პირველი გაკვეთილები კითხვასა და მეცნიერებაში.

მეხუთე თავი

რა საინტერესო ქვაა, თითქოს ზედ რაღაცეები წერია

ანდრია რას გაკვეთილებს უტარებდა დილა-საღამოს, შუადღისას და შუალამისას, გამოქვაბულში და მთის მწვერვალზეც, ხის ძირშიც, როცა ისვენებდნენ, და გზაზეც, როცა სადმე მიდიოდნენ. მთელი დღე და ღამე და ყველაფერი, რაც ირგვლივ არსებობდა, ერთ დიდ გაკვეთილად იყო ქცეული. მოწყურებული ირემივით ეწაფებოდა რა ცოდნას. ცოდნის წყარო კი თურმე ყველგან ყოფილა. ანდრიამ რას სიბრძნის წიგნებად უქცია ჭიანჭველების ბუდე და ღრუბლები, მდინარის ჩხრიალი და სუფთა ჰაერი, ვარდის ბუჩქი და ბულბულის გალობა, ხის ფესვები და ვარსკვლავების ციმციმი, სილის ნამცეცი და აყუდებული მთა, სინათლე და არწივის ფრთები, ადამიანი და სამყარო.

— თუ გინდა ცოდნა ღვარად მოედინებოდეს შენსკენ, სამ რამეს უნდა დაეუფლო: დაკვირვებას, გაკვირვებას და გაოცებას! — ასწავლიდა ანდრია რას.

რამ სწაფად ისწავლა დაკვირვება და გაკვირვება. ამიტომ შენიშნა გზაზე უცნაური ქვა, დასწვდა, შეათვალიერა და გაუკვირდა. ანდრია და რა ამ დროს ქალაქში მიდიოდნენ მარას სანახავად.

— ანდრია, შეხედე, რა საინტერესო ქვაა, თითქოს ზედ რაღაცეები წერია! — უთხრა რამ მასწავლებელს.

ანდრიამ ქვას დახედა. გზის პირას ჩამოჯდა და ისეთი ყურადღებით დაუწყო თვალიერება, რომ შუბლი შეეკრა. კარგახანს იყო ჩაფიქრებული. შემდეგ სახე გაეხსნა და გაიღიმა.

— ეს არ არის უბრალო და შემთხვევითი ქვა, ეს შენი ქვაწერილი უნდა იყოს! — დინჯად თქვა ანდრიამ, თუმცა მის ხმაში რაღაც აღელვებაც იგრძნობოდა.

ქვა რას დაუბრუნა.

— გარეცხე მდინარეში, ნახე, როგორი გახდება!

რამ ქვა იქვე მდინარეში გარეცხა.

ქვამ გაიხარა, გაიცინა. ის რას ხელისგულს ჰგავდა და ხელისგულზე ეტეოდა, ბრტყელი და ქათქათა თეთრი იყო,

და, როგორც ქალაღდზე, ისე ეწერა ზედ რაღაც ასოების მსგავსი; როგორც ხელისგული, ისე იყო დაბილიკებული.

— ანღრია, აქ მართლა წერია რამე თუ ეს ტყუილი ხაზები და ასოებია? — ჰკითხა რამ. იგი სულ უფრო იხიბლებოღა ქკით.

— დაიხსომე, ჩემო ბიჭო, — უპასუხა ანღრიაღ, — სამყაროღ, ბუნებაღ, ქვაღ, მღინარეღ, ვარსკვლავებმა, ღრუბლებმა, ქარმა, მზემ, მთვარემ, ხის ფოთოღმა თუ ფესვმა არ იციან, რა არის ტყუიღ. ბუნება მხოლოღ სიღმართღეს ამბობს და სიღმართღის წიგნებს წერს. არც ცხოვეღებმა, ფრინვეღებმა, ჩიტებმა თუ ჰიანჭვეღებმა იციან ტყუიღის არსებობა. ტყუიღის თქმა ამ უსასუღო სამყაროში მხოლოღ აღამიანმა ისწავღა და ამით თავი შეიღრცხვინა. ქვა, რომეღიც ხელში გიჭირავს, ჰეშმარიტებას ღაღადებს, რაღაც საიღუმღოს გამცნობს.

— მე მამცნობს?! — გაუკვირღა რას.

— კი, შენ გამცნობს.

— რა საიღუმღოს უნღა მამცნობღეს ეს ქვა? — ცნობისმოყვარეობაღ შეიპყრო რა.

ანღრიაღ მშვიღად განუღმარტა.

— ზომ გითხარი, ეგ ქვა იქნებ შენთან მიღიღონი წღის წინ გამოგზავნიღი წერიღია. დაგიღეს გზის პირას, რომ აიღო და წაიკითხო.

რას უცბად მოეღღლა აუარებეღი კითხვა. ანღრია ისეთ რამეს ეუბნებოღა, რომ გაგება გაუჭირღა: „მიღიღონი წღის უკან შენთვის გამოგზავნიღი წერიღიაო.“

— მერე როგორ წავიკითხო ეს ასოები და ხაზები? შენ არ გისწავღებია ჩემთვის ასეთი ნიშნები!

— მე ყვეღაფერს ვერ გასწავღი, ჩემო ბიჭო, თავად არ ვიცი ყვეღაფერი. ღაეღაპარაკე ქვას, სთხოვე ღაგებმაროს.

— ქვას ღაეღაპარაკო?! — გაოცღა რა, — ქვაღ ღაპარაკი იცის?!

— ღაპარაკი ქვაღაც იცის და ხეღაც, წყაღმაც და ჩიტმაღ. ღაპარაკი ყვეღაფერმა იცის. მაგრამ საქმე იმაშია, რომ ქვას არ შეუღღია ისწავღოს აღამიანის ენა. ქვაღ ბუნებისა და სამყაროს ენა იცის. ისწავღე ქვის ენა და გაიგებ, რა წერია მაგ ქვის ორივე მხარეს.

რამ ქვა გადააბრუნა, ორივე მხარეს ერთგვაროვანი ნიშნები და ხაზები იყო გამოყვანილი.

— შენ ამბობ, რომ ეს შეიძლება ჩემთვის გამოგზავნილი წერილი იყოს? — ჰკითხა რამ დაეჭვებით.

— შეიძლება. თუ არა და, რატომ მაინცდამაინც შენ გელოდებოდა ეგ ქვა, რატომ სხვამ არ აიღო? ალბათ, დღეს ბევრმა ჩაიარა ამ გზაზე, ბევრმა მოჰკრა თვალი მაგ ქვას, მაგრამ არვინ დასწვდა. არც შენ იღებ ყველანაირ ქვას, რაც გზაზე გხვდება. აგერ, კიდევ გდია გზის პირას რაღაც მაგ-დაგვარი ქვა, არ გინდა, ისიც აიღო?

— არა, ეს ერთიც მეყოფა.

— მართალს ამბობ, — დაუდასტურა ანდრიამ, — ის ქვა შეიძლება სხვისი ქვაწერილი იყოს. როდისმე ის სხვაც ჩამოვიღის ამ გზაზე და მიიღებს თავის წერილს. შენ კი, დარწმუნებული ვარ, შენთვის გამოგზავნილი წერილი გიჭირავს ხელში.

— თუ ასეა, ვის უნდა გამოეგზავნა ეს წერილი ჩემთვის?

— მაგას კი ნამდვილად ვერ გეტყვი, — უთხრა ანდრიამ, — ალბათ, იმან გამოგიგზავნა ქვაწერილი, ვინც იცის, რომ შენ ხარ, შენზე ზრუნავს და შენი იმედი აქვს. ტყუილად ხომ არ დაწერდა წერილს ქვაზე? რაღაცას მეტად მნიშვნელოვანს გაუწყებს.

რა ჩაფიქრდა, ცდილობდა გარკვეულიყო ყველაფერში, რასაც ანდრია ეუბნებოდა. რამ იცოდა, რომ ანდრია არ ეხუმრებოდა მას, მაგრამ არც ისეთი ადვილი აღმოჩნდა იმ სიღრმეში წვდომა, რასაც იგი განუმარტავდა.

— ანდრია, ხომ იცი, რომ მე შეიდი წლის ვარ. როდის უნდა იყოს ეს ქვაწერილი გამოგზავნილი? განა არ ეტყობა ქვას, რომ ის შეიდი წლის კი არა, იქნებ შეიდასი წლისაცაა. ეს ნიშნები ქვაზე კი არ არის დაწერილი, ქვაშია ჩასმული. გამოდის, რომ მე გაჩენილიც არ ვიყავი, როცა წერილი გამომიგზავნეს! აბა, როგორ მოხდებოდა ეს?

„ოჰო, — გაიფიქრა ანდრიამ, — ბევრ რამეს ხვდება ეს ბიჭი. მაშ, რასაც ახლა ვეტყვი, იმასაც მიხვდება.“

— ჩემო ბიჭო, მომაჰყარ გულისყური. გაჩენა და დაბადება სხვადასხვა რამ არის. ეგ ქვა, ხელში რომ გიჭირავს, შეიდი წლის კი არა, შეიდი მილიონი წლისაც იქნება. შენ

მაგ ქვაზე ადრე ხარ გაჩენილი, დიდი, ძალიან დიდი ზნით ადრე. მაგრამ დედამიწაზე შვილი წლის წინ დაიბადე. ღმერთმა გაგაჩინა, როგორც სამყაროს ნაპერწკალი, უკვდავი სული. დედამ კი დაგბადა, როგორც დედამიწის ადამიანი. გაჩენილი ერთხელ ხარ, როგორც სული, დაბადებული კი, ვინ იცის, რამდენჯერ, იქნებ ასჯერ, იქნებ შვიდასჯერ. ადამიანი იმიტომ იბადება, რომ თავისი ცხოვრებით, მოღვაწეობით, აზრებით საკუთარი სული განავითაროს. ახლა, თავად იფიქრე, რამდენი წლის წინათ იწერებოდა ეგ წერილი, ან ვინ წერდა მას შენთვის, ან რატომ წერდა.

— მაშ, მე ბევრჯერ ვარ დაბადებული ამქვეყნად?! — რას ერთ გოცებას მეორე და მესამე გოცება დაერთო.

— დიან, ასეა!

— მე რომ არაფერი ვიცი და არაფერი მახსოვს ჩემი წარსული ცხოვრებიდან? რატომ?

— არ არის საჭირო და იმიტომ. წარსულ ცხოვრებათა გახსენებამ შეიძლება ხელი შეუშალოს ადამიანს საკუთარი სულის განვითარებაში. შენ არ გახსოვს, მაგრამ შენმა სულმა ყველაფერი იცის. შენს ახლანდელ ცხოვრებას შენი სული ხელმძღვანელობს! — ანდრია მშვიდად ესაუბრებოდა რას, მაგრამ ეტყობოდა, რომ იგი გულდაგულ ეძებდა სიტყვებს, რათა შვიდი წლის ბიჭი მიეხვედრებინა, როგორ იგება სულიერი, უხილავი სამყარო.

— ქვაწერილს ყველა ადამიანს უგზავნიან თუ მარტო ზოგიერთებს? — ჰკითხა რამ ცოტა ხნის ფიქრის შემდეგ.

— ქვაწერილს ყველას უგზავნიან. მაგრამ საკუთარი სულის განვითარების მანძილზე ადამიანი ერთხელ შეხვდება თავის ქვაწერილს. ეს მაშინ მოხდება, როცა ამის აუცილებლობა იქნება. ქვაწერილი გაფრთხილება, რომ ადამიანი არ ასცდეს სულის განვითარების გზას, ან ღირსეულად დაასრულოს ეს გზა. მინდა, კარგად გაიგო, ჩემო ბიჭო, რა დიდი ბედნიერებაა, რომ საკუთარი ქვაწერილი გიჭირავს ხელთ.

— ნამდვილად იცი, რომ ეს ქვაწერილი ჩემია?

— გული მეუბნება, რომ ასეა. შენც მალე გაიგებ! — უპასუხა ანდრიამ.

რას ათასი კითხვა ეძალებოდა თავში. რომელი ერთი ჰკითხოს ანდრიას? ზოგში ალბათ თვითონ უნდა გაერკვეს. ანდრიას ისეთი რამ უნდა ჰკითხოს, რომლის პასუხს თავად ვერ იპოვის. აი, კიდევ ორიოდ ასეთი კითხვა.

— ანდრია, დაგლალე, — მოუბოდიშა რამ, — მაგრამ კიდევ მიხდა გკითხო.

ანდრიამ კეთილად გაუღიმა დისშვილს. უხაროდა ანდრიას, რომ რა ასე გულმოდგინედ იძიებდა ქვაწერილის საიდუმლოს და, საერთოდ, დიდი მონღომებითა და ნიჭით ეწაფებოდა მეცნიერებას.

— მკითხე, თუ ვიცი, გიპასუხებ.

— შენ ამბობ, რომ ეს ჩემი ქვაწერილია, მაგრამ ხომ შეიძლება მოხდეს, რომ ადამიანმა სხვისი ქვაწერილი იპოვოს და თავისი ეგონოს?

— იშვიათად, მაგრამ ხდება. რა თქმა უნდა, არ ივარგებს, თუ ვინმე სხვის ქვაწერილს აიღებს და თავისი ეგონება. ჯერ ერთი, გაუჭირდება წაკითხვა, ადვილად ვერ ამოიცნობს მის აზრს; მეორე, რომც გაიგოს, რა დავალებაა წერილში, სხვისი საქმის კეთებას დაიწყებს და კარგად ვერ გამოუვა. ყველამ თავისი ქვაწერილით უნდა იცხოვროს. სხვისი წერილით ცხოვრება არა მხოლოდ საკუთარი ბედის, არამედ მრავალი ადამიანის ბედის არეუ-დარევასაც გამოიწვევს. თუ გული გეუბნება, რომ ეს ქვაწერილი შენი არ არის, არც ხელი უნდა ახლო და არც ადგილი შეუცვალო. მხოლოდ აუცილებლობა გიკარნახებს, როდის შეიძლება შეეხო და გადაადგილო სხვისი ქვაწერილი, და მაშინ შეიძლება არც იცოდე, რომ რაიმე ქვაწერილთან გაქვს საქმე.

— ანდრია, როგორ უნდა მიხვდეს ადამიანი, რომ აი, თუნდაც ის ქვა, წელან რომ დამანახე, მისი ქვაწერილია? ადამიანებმა ხომ არც იციან, რომ ვინმე მათ ქვაწერილებს უგზავნიან? ჩამოვიღის ქვაწერილის პატრონი ამ გზაზე და ვერ დაინახავს თავის ქვაწერილს, ჩაუვლის გვერდით და წავა თავისი გზით. რა მოხდება მაშინ?

— თუ ადამიანი სულის განვითარებაზე ზრუნავს, ადრე თუ გვიან მიაგნებს თავის ქვაწერილს. მერე რა, რომ არ იცის საკუთარი ქვაწერილის არსებობა. არც შენ იცოდი, მაგრამ მოგეწონა ქვა და აიღე. სხვა ფეხს წამოჰკრავს ქვას და ასე იპოვის თავის ქვაწერილს. მაგრამ გაბოროტებულ ადა-

მიანს გაუჭირდება იცნოს ქვაში ისეთი რამ, რაც მისი სულის განვითარებასთან არის დაკავშირებული. სამწუხაროდ, ხშირად ხდება ასე.

— ვის მიაქვს ქვაწერილი მის პატრონთან? ვინ მომიტანა ეს ქვაწერილი?

— მოდი ასეთი რამ წარმოვიდგინოთ. ნიაღვრებმა, რომლებიც ათიათასი წლების წინათ ხდებოდა, შენი ქვაწერილი მაღალი მთებიდან ხევში ჩამოაგორეს. მიწისმთხრელმა თავისი ნიჩბით შორს მოისროლა. ვიღაც მწყემსმა ხელი დაავლო და მგელს ესროლა. შემდეგ ვიღაც განდევნილი დასწვდა, მიხვდა, რომ წერილი პატრონისკენ მიიწვედა, ადგა და გზისკენ ისროლა. ქვა გზისპირას დავარდა. ამასობაში ათასი, ათიათასი წელი გავიდა. ასე ნელა, მაგრამ ბეჯითად მოემართებოდა ქვაწერილი შენსკენ. ახლა კი ხელში გიჭირავს იგი და რაღაც მეტად მნიშვნელოვანს გამცნობს. სხვასთან ქვაწერილი სხვა გზით მივა, აუცილებლად მივა. ქვაწერილები არ იკარგებიან.

გაოცებული ისმენდა რა ანდრიას საუბარს და თეთრ ქვას უფრო და უფრო ცნობისმოყვარეობით ათვალეიერებდა და ეფერებოდა. მართლაც, ლამაზი იყო ქვაწერილი, ზედ გამოყვანილი ნიშნები ჩუქურთმებს ჰგავდა, ხაზები კი გარშემო არშეიხსავით ევლებოდა.

ბიძამ და დისშვილმა, მასწავლებელმა და მოწაფემ გზა გააგრძელეს.

კარგახანს ჩუმაღ მიდიოდნენ.

— ანდრია, — მიმართა რამ, ვიდრე ქალაქში შევიდოდნენ, — შენც მიიღე ქვაწერილი?

ანდრია შეჩერდა და მკერდზე ჩამოკიდებულ ტოპრაკზე მიუთითა.

— აი, ჩემი ქვაწერილი. მე უკვე წავიკითხე ჩემი საიდუმლო და მიყვები მას.



მეგვსე თავი

შენ ხომ გიყვარს სალომე, მოარჩინე, განკურნე

ნახევარი წელიწადი გავიდა მას შემდეგ, რაც რა სახლიდან წამოვიდა. დედა მოენატრა. თანატოლების ნახვაც მოუწდა.

რა მოხდება, რომ ასწავლოს მათ კითხვა და მეცნიერება? მართალია, ანდრიასავით კარგად ვერ უამბობს და აუხსნის ყველაფერს, მაგრამ ძალიან შეეცდება.

მარას თითქოს გული უგრძნობდაო, სახლის წინ, ქუჩაში პატარა სამფეხა სკამზე იჯდა, წინდას ქსოვდა და თან გზას გასცქეროდა. შორს შენიშნა, რომ ანდრია და რა მოდიოდნენ. ვერ მოითმინა და მათკენ გაიქცა.

— რა, ჩემო საყვარელო, ჩემო ერთადერთო! — შესძახა მარამ და ადგილიდან მოსწყდა. დედა შვილს გულში იკრავდა, სახეს უკოცნიდა, შემდეგ თვალებში ჩახედა და გაოცდა.

— ანდრია, ჩემი ბიჭი ძალიან დაბრძენებული მეჩვენება! მართლა ასეა?

— ასეა, მარა, — დინჯად მიუვო ძმამ, — ნიჭიერია რა, ბევრს კითხულობს, სწრაფად ხვდება, ნათელი სული აქვს რას!

რადგან შაბათი დღე იყო და ხალხი არ მუშაობდა, მარას ეზოში ბევრი მეზობელი შეიკრიბა. ისინი რას სანახავად მოვიდნენ, უფროსები სიყვარულით მხრებზე ხელს უთათუნებდნენ, ეფერებოდნენ, ანდრიას მოწინააღმდეგეობით შესცქეროდნენ. რამ კითხვა ისწავლა, ახლა უკვე წიგნებს კითხულობს და მეცნიერებას ეუფლება. სწავლის გზაზე დამდგარ ყმაწვილს მეზობლები დიდი პატივისცემით შეხვდნენ.

მარას სიხარულს საზღვარი არ ჰქონდა.

როგორ შეძლო ან მოასწრო ამ მარტოხელა ქალმა ნაირ-ნაირი საჭმელების მომზადება?

ციცქნა სახლში ამდენი ხალხი არ დაეტეოდა, ამიტომ მარამ ეზოში გამოიტანა ყველაფერი. სუფრა მიწაზე გაიშალა, ძველი კაკლის ხის ჩრდილქვეშ.

კარგახანს ზეიმობდნენ მეზობლები, კიდევ იმღერეს და იცეკვეს.

რას ეგონა, სალომეც გამოჩნდებოდა, და რადგან დაიგვიანა, დელას ჰკითხა:

— სალომე რატომ არ მოდის?

დელას სახიდან ღიმილი და ხალისი გაუქრა, მოიღუშა.

— რა მოხდა, დელა? — ისევ ჰკითხა რამ შეშფოთებით.

— შვილო, არ მინდოდა შეთქვა, რომ გული არ გტკენოდა, ძალიან ავად არის სალომე, — შემდეგ ყურში უჩურჩულა, — შვილო, ვერავინ შევლის სალომეს, ამბობენ, ვერ გადარჩებაო!

რას გულში ძარღვი ჩაუწყდა. სალომე უყვარს, სალომე კეთილი გოგონაა, ღამაში და ჭკვიანი. რატომ უნდა მოკვდეს სალომე?

— ანდრია, — მივარდა რა მასწავლებელს, — სალომე ავად ყოფილა, ვერ გადარჩებაო, ასე ამბობენ, იქნებ...

ანდრიამ იცოდა, ვინ იყო სალომე, რამ ყველაფერი უამბო, რომ ცოლად შერთვას აპირებს, როცა გაიზრდება. ანდრიამ არ აცალა სიტყვის დამთავრება რას.

— შენ ხომ გიყვარს სალომე, მოარჩინე, განკურნე!

რა გაოგნდა.

— მე განკურნო?! — ბიჭს ეგონა, ანდრია თავად გასინჯავდა სალომეს და უმკურნალებდა, — მე როგორ უნდა განკურნო?!

— შენ გიყვარს სალომე, ამიტომ მართო შენ შეგიძლია მისი განკურნება. სხვა მას ვერ უშველის, რადგან შენზე ძლიერ ის არავის უყვარს. მაგრამ როგორ უნდა უშველო სალომეს, არ ვიცი. მაგას მხოლოდ შენ მიხვდები.

რამ გაუგო ანდრიას. ის ეუბნებოდა: თვალები დახუჭე და რასაც დაინახავ, ისე იმოქმედო. მარა ვერ მიხვდა მათ საუბარს. მან არც იცოდა, რომ რას რალაცის დანახვა შეეძლო.

რამ სახე ანდრიას მკერდში ჩამალა, თვალები დახუჭა და გაირინდა. წუთის შემდეგ მართო ანდრიასთვის გასაგები ჩურჩულით იკითხა:

— ანდრია, მართალია, რასაც ვხედავ?

— შენ მხოლოდ მართალს ხედავ! — უპასუხა ანდრიამ, — ნულარ დააყოვნებ!

რამ დედას სთხოვა სალომესთან გააჰყოლოდა.

როცა სალომეს ჩაბნელებულ ოთახში შევიდნენ, ქალის დახშული ჭკითინი მოესმათ: სალომეს დედა ჯერ კიდევ ცოცხალ შვილს დასტიროდა.

ოთახში თითქმის არაფერი ჩანდა, დღის სინათლე მხოლოდ ციციქნა კარიდან შემოდისოდა. რამ იგრძნო, რომელ ოთახში იდგა სალომეს ტახტი. უფრო სწორედ, იგრძნო და კიდევ დაინახა მბუუტავი ცისფერი ნათება. ეს სალომეს ნათება იყო. იმის მიხედვით, თუ როგორ იდგა ბნელ ოთახში მარა და ნაბიჯის გადადგმას ვერ ბედავდა, რა მიხვდა, რომ სალომეს ცისფერ ნათებას ის ვერ ხედავდა. ცისფერი ცეცხლით იწვოდა სალომე, დედამისი კი თავთან ეჯდა და ჭკითინებდა. რამ გოგონას ტახტთან ჩაიძუხლა, მისი ერთი ხელი ხელში ჩაიღო, მეორე ხელი შუბლზე დაადო.

— სალომე, — ჩასჩურჩულა ყურში გოგონას, — მე ვარ, რა!

სალომემ პასუხი არ გასცა, მაგრამ მისი ცისფერი ნათება გაძლიერდა.

— სალომე, — გააგრძელა რამ ჩურჩული, — შეევედრე, ვისაც ახლა ხედავ, რომ ვაცალოს. უთხარი, რომ მე არ გიმეცხვებ, რადგან მიყვარხარ... შეევედრე, სალომე!

ცისფერი ნათება კიდევ უფრო გაძლიერდა. საკვირველი იყო, რომ ვერცერთი დედა ამას ვერ ხედავდა.

რა დაიხარა გოგონას სახისკენ და მის ცისფერი ალით ანთებულ ტუჩებს ეამბორა.

ეს იყო რას პირველი კოცნა, ნაზი, კეთილი, სიყვარულით სავსე კოცნა.

ეს იყო სამკურნალო კოცნა.

რამ თითქოს თავის თავში შეიწოვა სალომეს ავადმყოფობა და სიყვარულის ძალით მოაშთო.

სალომემ თვალი გაახილა.

— წყალი დამალევინე, დედა! — სუსტი ხმით დაილაპარაკა სალომემ.

დედამ შეჰკივლა: სალომემ ხმა ამოიღო.

— ახლავე, შვილო!

— რატომ ბნელა აქ? სინათლეზე გამიყვანე, დედა! — სალომეს ხმაში ძალა დაეტყო.

— სად არის რა?

— აქ არის, შვილო!

ახლავეო, იძახდა დედა, მაგრამ ისე იყო სიხარულისგან გაოგნებული, რომ ადგილიდან ვერ იძვროდა.

ისევ მარა მოეგო გონს. გოგონა ფეხზე წამოაყენა და დღის სინათლეზე გაიყვანა.

სალომე განხალისდა და ავადმყოფობა გაუქრა.

— რატომ ვიწექი საწოლში, როცა გარეთ ასეთი ლამაზი დღეა? — იკითხა გოგონამ.

— ავად იყავი, შვილო, ძალიან ავად... იმედი გადაწურული მქონდა, მაგრამ სასწაული მოხდა და გადაძირჩი!

ახლა უკვე სხვა ხმით ტიროდა სალომეს დედა. იგი ღვთის სადიდებელ ცრემლებს ღვრიდა.

რა უკან გამოჰყვა სალომეს, მაგრამ ეს ის რა აღარ იყო, ცოტახნის წინათ თანატოლებთან ერთად რომ ცეკვავდა. ეს იყო რა, რწმენით სავსე. ეს იყო რა, რომელმაც შიშის გორგალი ზღვას გაატანა, ხოლო რწმენის ფიალა უკანასკნელ წვეთამდე შეივსო. როცა სალომეს ტუჩებს ეამბოროა, მაშინ იგრძნო, როგორ განდევნა სენი სალომეს სხეულიდან.

— რას მოსვლამ გადაძირჩინა ქალიშვილი! — გაიძახოდა სალომეს დედა, მაგრამ სულაც არ სჯეროდა, რომ ეს მართლაც ასე მოხდა. რა და მარა სწორედ მაშინ მოვიდნენ, როცა ეს სასწაული უნდა მომხარყო, ისინი სასწაულის მოწმენი გახდნენ. — ასე ფიქრობდა სინამდვილეში სალომეს დედა.

სალომე რას მხრებამდე სწვდებოდა, ან რაშხელა იქნებოდა ხუთი წლის გოგო. იგი უცბად შემოტრიალდა რასკენ და ორივე ხელით კისერზე ჩამოეკიდა.

— დამატრიალე, როგორც მაშინ! — შეეხვეწა ბიჭს.

რა დატრიალდა, დატრიალდა და კისერზე ჩამოეკიდე-ბული გოგონა მაღლა აიტაცა. იქნებ კიდევ აფრენილიყო ჰაერში, რომ დედების არ მორიდებოდა. სალომე კი კისკისებდა ისე გულიანად, რომ ვერავინ დაიჯერებდა, თუ ორიოდ წუთის წინ ის სიკვდილს დაეხსნა და, საერთოდ, მძიმე ავადმყოფი იყო.

როცა რა სალომესთან და დედებთან ერთად ეზოში დაბრუნდა, მომხიარულე მეზობლებს თვალები გაუფართოვდათ: სალომე გადარჩაო. სასწაული მოხდაო.

მარტო ანდრიას არ გაჰკვირვებია არაფერი. მასწავლებელი დინჯად მიუახლოვდა მოწაფეს და ჩუმად უთხრა:

— დროა საქმეს შევუდგეთ!

მთელი ქუჩა გამოიფინა რას გასაცილებლად. დედა და ნალვლიანდა. სალომე ისევ კისერზე ეკიდებოდა, კიდევ როდის მოხვალო, ეკითხებოდა.

მეზობლებს ერთი მოხუცი ქალი გამოეყო, მას ყველა ბებიას ეძახდა, რასთან მივიდა და ყველას გასაგონად უთხრა:

— შენ ხარ რა, მამაშენს კი, რომელიც ძალიან გვიყვარდა, ამონი ერქვა. დაე, დღეიდან ყველამ დაგიძახოს ამონ-რა, ეს იყოს შენი სახელი!

— ამონ-რა, ამონ-რა!.. — ხალისით აიტაცეს რას ახალი სახელი დიდებმაც და პატარებმაც.

მარაც განარებული იყო რას ახალი სახელით.

დედამ ქუჩის ბოლომდე გააცილა ანდრია და ამონ-რა და, როცა შვილს ეშვიდობებოდა და გულში იკრავდა, დაეჭვებით ჰკითხა:

— შვილო, მართლა შენ მოარჩინე სალომე?

— სალომე განიკურნა, სალომე დიდხანს იცოცხლებს, დედა!

მარა მიხვდა, რომ შვილი მეტს ვერაფერს ეტყოდა.



მეშვიდე თავი

უებარი ძალამო

რას უყვარდა ღამღამობით დიდხანს ფიქრი და საიდუმლოებათა ამოხსნა.

თავისი გამოქვაბულის კედლების სურათები სანთლის შუქზე შეისწავლა. ტექსტები, ანდრიამ რომ დაუწერა კედლებზე, თითქმის ყველა წაიკითხა. მაგრამ მარტო წაიკითხვა ხომ არ კმაროდა? რა ყოველ აზრს უკვირდებოდა და სიღრმეში ჩაწვდომას ცდილობდა. ეს კი ხანგრძლივ ფიქრს მოითხოვდა.

„ღამე იმიტომ კი არ არის მოგონილი, რომ დახუჭო თვალები და დაიძინო, — ფიქრობდა რა, — ღამით შეიძლება ბევრი იფიქრო, წიგნები წაიკითხო. ანდრია ღამით მუშაობს — ცდებს ატარებს და წიგნებს წერს. ძილშიც უნდა იშრომოს ადამიანმა. გულში უნდა ჩაიყოლო რამე დიდი ფიქრი, რომ უფრო ადვილად ამოიცნო საიდუმლო. ფიქრი ძებნაა. ვინც ეძებს, ის პოულობს, ასე მასწავლა ანდრიამ. ეძებს ის, ვინც ფიქრობს.“

ანდრია და დღეიდან უკვე ამონ-რა დიდი საფიქრალით დაბრუნდნენ თავიანთ გამოქვაბულებში.

ანდრიას საფიქრალი ამონ-რას რწმენა იყო. ანდრიამ რწმენა ჩაუნერგა ბიჭს, მან კი სალომე სიკვდილს გამოსტაცა. „რა ძალა ჰქონია ამ პატარა ბიჭს, ან რა უნდა ვასწავლო კიდე?“ — აი, ანდრიას საფიქრალი და გაღასაწყვეტი.

ამონ-რამ მაინცდამაინც დიდი ყურადღება არ მიაქცია თავის ძალას. არც გაამაყდა, არც გაუკვირდა, დაივიწყა კიდეც. მთავარი ის იყო, რომ სალომე ფეხზე წამოდგა, ყელზე ჩამოეკიდა და დამატრიალეო, სთხოვა. ამონ-რას თვაღწინ ედგა სალომეს გაბრწყინებული სახე და ყურში მისი კისკისი ჩაესმოდა. უყვარს სალომე, სალომე მისი საცოლელა.

დიდი საფიქრალი, რითაც ამონ-რა გამოქვაბულში დაბრუნდა, ქვაწერილი იყო.

ნამდვილად მას ეკუთვნის ქვაწერილი თუ სხვას?

რა წერია მასზე?

როგორ აალაპარაკოს ქვა, როგორ გაიგოს მისი ენა?

ამას ერთი ღამის ფიქრი არ ეყოფა. არც ერთი ღამე ეყოფა და არც ბევრი ღამე, კარგად ხვდებოდა ამონ-რა.

მაგრამ გული იმასაც ეუბნებოდა, რომ საქმის გადაღება არ შეიძლებოდა.

„შეუდექი საქმეს“, — ჩაესმა ყურში ანდრიას შშვილი ხმა.

ამონ-რამ შვიდი ალაპლაპებული სანთელი დაიდგა წინ და მათი სინათლით ალიცლიცებულ თეთრ ქვას ჩაუკვირდა. ჯერ ხაზებს მიაპყრო ყურადღება. „მაღლა მიდიან თუ ქვევით ეშვებიან ეს ხაზები? სწორად მიჭირავს თუ არა ქვა?“ ქვა შემოაბრუნა. ასეც თითქოს სწორადაა ყველაფერი და ისეც. მაგრამ მაინც ამჯობინა ქვა ისევ ისე დაეჭირა, როგორც პირველად. ქვის ქვემოთა ნაპირიდან ერთი ხაზი კლაკნილად მიემართებოდა ზემოთ, მაგრამ მალე ორად იყოფოდა, მარცხენა ხაზი უწყვეტად აღიოდა მაღლა და უფროდაუფრო შორდებოდა მარჯვენა ხაზს, შემდეგ მკვეთრად იხვედა და უკან ბრუნდებოდა, თანაც წყვეტილად, თითქოს წვიმის წვეთებად იქცაო. ქვის შუაგულში ხაზი იკარგებოდა.

მარჯვენა ხაზმა კი ცოტა გზა გაიარა და გაწყდა. შემდეგ, თითქოს მიწისქვეშა გვირაბი გაიარა, ისევ აღმოცენდა და მაღლა-მაღლა გაემართა. ამონ-რას ხელში წვრილი ჩხირი ეჭირა და იმის წვერით მიჰყვებოდა ხაზს. ხაზმა გაიარა ქვის ზემოთა საზღვარი და მეორე მხარეს გადავიდა. ამონ-რამ ქვა გადმოაბრუნა. ხაზი ისევ მაღლა ისწრაფვოდა, წვრილდებოდა, ფერმკრთალდებოდა და რაღაც სივრცეში იკარგებოდა.

„ნუთუ მართლა რამეს ნიშნავს ეს ხაზები? — გაიფიქრა ამონ-რამ, — ან რას უნდა მაუწყებდნენ ისინი?“

ქვა ყურზე მიიღო და გაიჭრუნა. „მითხარი, ჩემი ქვა-წვრილი ხარ თუ სხვისი? ანდრიამ თქვა, რომ ქვამ ლაპარაკი იცისო, ამოიღე ხმა!“ — ფიქრით ეხვეწებოდა ამონ-რა ქვას, მაგრამ ქვა ხმას არ იღებდა. „რა უნდა იყოს ქვის ლაპარაკი? მართლა ხმით ხომ არ ილაპარაკებს? აი, მოგიტანა ხაზები, ნიშნები, გამოიცანი და გაიგებ წვრილის შინაარსს. ქვის ლაპარაკიც ეგ იქნება!“ — მოესმა ამონ-რას ანდრიას ჩურჩული. ამონ-რამ კარგად იცოდა, რომ ანდრია ახლა ლაბორატორიაში ცდებს ატარებდა. მაგრამ მიჩვეული იყო, როცა ფიქრობდა ან რაიმე რთულ ცდას ატარებდა, დროდადრო ჩაეს-

მოდა ხოლმე ყურში ანდრიას ხმა. არც ახლა გაჰკვირვებია ანდრიას ჩურჩული. მასწავლებლის დარიგება მაშინვე მიიღო, ქვა ისევ სანთლების შუქზე დადო და ნიშნებსა თუ ასოებს ჩაუკვირდა. „გამიხსენი შენი საიდუმლო! გამიხსენი საიდუმლო!“ — უხმოდ ევედრებოდა ქვას, ისე, რომ ნიშნებსა და ხაზებს თვალს არ აცილებდა.

ამ მცდელობაში ვერც შენიშნა, ისე ჩაეძინა. უკვე მზე ამოდიოდა, როცა ანდრიამ გააღვიძა: საქმეს შევუდგეთო, უთხრა.

ბიჭს ქვაწერილი გულში ჰქონდა ჩახუტებული.

— ანდრია, ვერაფერი გაუუგე ამ ქვას!

— გაუგებ! — მშვიდად უპასუხა ანდრიამ.

ბიჭს პურის ნაჭერი და ჯამით რძე გაუწოდა.

— ისაუზმე და ლაბორატორიაში მოდი ჩემთან!

ამონ-რამ წუთში გადაყლაპა რძე და პური; იმიტომ კი არა, რომ მშვიერი იყო, არამედ ანდრიას ლაბორატორიაში შესვლას ჩქარობდა. იქ მხოლოდ ერთხელ შეიხედა ამონ-რამ, როცა თვითონ ანდრიამ უთხრა: — აქ ჩემი ლაბორატორიაა და ცდებს ვატარებო. ნახევარი წელი გავიდა მას შემდეგ. ამონ-რამ მხოლოდ ის იცოდა, რომ ანდრია იქ რაღაცას აკეთებდა, მაგრამ რას, ამაზე წარმოდგენა არ ჰქონდა.

ამონ-რა იქ გაიქცა, სადაც ანდრიას საგუბარი ჰქონდა მოწყობილი. ცივ წყალში ჩახტა და სხეულის ყველა ნაწილიდან გააძევა ძილი. რამდენიმე წუთში ბიჭი ანდრიას ლაბორატორიაში იჭვრიტებოდა და ნებართვას ელოდა, რომ შესულიყო.

— შემოდი! — ხმადაბლა მიიხმო ანდრიამ.

ამონ-რა მის გვერდით დადგა.

სანთლებით განათებული გამოქვაბული საკვირველებით იყო სავსე. ბიჭი ცნობისმოყვარეობამ შეიპყრო. ყველაფერი ერთბაშად უნდოდა გაეგო: რატომ არის ეს თინის ჭურჭლები ასეთი უცნაური ფორმის, თანაც ერთმანეთზე გადაბმული? ან რატომ ამოდის ცისფერი ალი ჯამიდან, რანაირი ცეცხლი ანთია შივ? რა ჭურჭელია გაწყობილი კედელში ამოკვეთილ თაროებზე? ეს რა გამხმარი ყვავილები და მცენარეებია, ან ეს ქვის ნატეხები რაღაა და რატომ ბზინავენ? რას აღულებს ანდრია ახლა? მაგრამ ისევე, როგორც საზღვარი არ ჰქონდა ამონ-რას ცნობისმოყვარეობას, უსაზღვრო იყო მისი მოთმინე-

ბის ძალაც. იცოდა, რომ მასწავლებელი ყველაფერს თანმიმდევრობით აუხსნიდა, გააგებინებდა, ასწავლიდა და დაარიგებდა. ამიტომ მორჩილად შეჰყურებდა ანდრიას და თვალს ადევნებდა მისი ხელების მოძრაობას: მარჯვენამ ხის კოვზით ჯამიდან რალაც სითხე ამოიღო და ცეცხლზე მღვარ ჭურჭელში ჩაასხა, მარცხენას კი ამ ჭურჭლის საყურე ეჭირა. ჭურჭლიდან ოხშივარი ამოდიოდა. ანდრია ხის კოვზით ურევდა სითხეს.

— აიღე თაროდან მწვანე ფერის ქოთანნი.

ამონ-რამ სწრაფად მოძებნა ქოთანნი და ანდრიასთან მიიტანა.

— ახადე სახურავი... ხომ ხედავ, შიგ პატარა კოვზია. მაგ კოვზით ამოიღე ქოთნიდან ფხვნილი.

ამონ-რამ დავალება შეასრულა.

— ჩაყარე ქვებში!

ანდრია შეუჩერებლივ ურევდა ხის კოვზით ჭურჭელში სითხეს.

— მთავარია, რომ არ მიიწვას. ძლიერ ცეცხლზე უნდა იდუღოს, მაგრამ არ უნდა მიიწვას. შეგიძლია ურიო ასე?

— ვცდი! — უპასუხა ამონ-რამ და კოვზი გამოართვა.

— იცოდე, კარგახანს მოგიწევს მორევა. სითხე ჯერ გასქელდება და თანდათანობით დაშრება. რაც დარჩება, მზეზე უნდა გააშრო და კარგად დაფქვა. ამასობაში მე ქონს მოვამზადებ.

დღლით დაწყებული საქმე ამონ-რამ შუადღისას დაამთავრა. მარჯვენა ხელის თითები ორთქლით დაეწვა, ბუშტები გაუჩნდა და კანი გადასძვრა, მაგრამ როცა ქვებში ჩამშრალი მასა მზეზე გააშრო და ფქვილად აქცია, კმაყოფილი დარჩა, რადგან დავალება შეასრულა.

ანდრიამ ფქვილი გასინჯა და მოიწონა.

ჯამში ანდრიას ყვითელი ქონი ჰქონდა მომზადებული. ამონ-რა ფქვილს უყრიდა, ანდრია ქონში ზელდა. ერთი საათი იმუშავეს ასე. ქონი გასქელდა. ანდრიამ მთელი მასა ორ მცირე ზომის თიხის ქილაში გაანაწილა და სახურავები დაახურა.

ერთი ქოთანნი ამონ-რას გაუწოდა.

— ეს უებარი ძალამოა, კურნავს ჭრილობებს, მოტეხილობებს, აშუშებს კანზე ჩირქოვან გამონაყარს, აყუ-

ჩებს ტკივილებს. თითით უნდა ამოიღო ცოტაოდენი და მტკივნეულ ადგილზე წაუსვა. წადი ახლა ქალაქში, იარე ქუჩებში და თუ ვინმეს მუხლი გადაუტყავებია ან მუწუკები გამოსვლია, წასცხე ეს მაღამო და მოარჩინე.

ამონ-რამ სინარულით მიიღო მასწავლებლის დავალება და გამოქვაბულიდან სირბილით დაემშვა დაბლა.



მკურნალო, ახლა შენი თავი გექნება სამკურნალო

განაპირა უბნის ბიჭები ქუჩაში ოთურმას თამაშობდნენ: ათიოდე წლის ბიჭი წაკუზული იდგა და სხვები ზედ ახტებოდნენ. ამონ-რამ ბავშვები შეათვალიერა. აგერ იმას, ყველაზე კანჭას, სახეზე მუწუკები აყრია. ნამდვილად სჭირდება მალამო. ვერ მოასწრო ამონ-რამ ბიჭის დაძახება, რომ საშინელი ამბავი დატრიალდა. გამოქანდა ბიჭი, რომელსაც იორამს ეძახდნენ და აქვზებდნენ, — აბა, შენ იციო, — ასხლტა ჰაერში და ის იყო წაკუზულს ხელებით ზურგზე უნდა დაყრდობოდა და გადამხტარიყო, რომ წაკუზულმა უღალატა — მიწამდე დაიხარა და იორამს ზურგი გამოარია. ჰაერში ამხტარი იორამი პირდაპირ მიწას დაენარცხა და შიშველი მუხლებით წვრილქვებიან და მტვრიან გზაზე გასრიალდა.

„თუ ვინმეს მუხლი გადაუტყავებიაო,“ — გაახსენდა ამონ-რას. საიდან იცოდა ანდრიამ, რომ ეს იორამი ორივე მუხლს ისე საშინლად გადაიტყავებდა, რომ მარჯვენა კვირის-ტავიც კი გამოუჩნდებოდა. მუხლებზე აგლეჯილი ხორცი ეკიდა, აბლავლდა ბიჭი სიმწრისგან.

მოდლატემ ჯერ იცინა, მერე კი როცა დაინახა, არავის მოეწონა მისი საქციელი და რამდენიმემ თავშიც წაუთაქა, როგორ გაბედო, ნირი წაუნდა და მობოდიშება დაიწყო.

ბიჭები გარს შემოეხვივნენ დაშავებულს. ამონ-რა პირველი მიიჭრა და დამშვიდება სცადა.

— ნუ გეშინია, იორამ... ახლავე დაგიამებ, იორამ... ნუ ტირი, იორამ...

ზოგმა იცნო ამონ-რა, მაგრამ ზოგმა არ იცოდა, რომ ის კითხვასა და მეცნიერებას სწავლობდა და ფილოსოფოსთან ერთად გამოქვაბულში ცხოვრობდა.

— შენ ვისი ტიკი-ტომარა ხარ! — შეუტია ყველაზე დიდმა ბიჭმა — გაიწიე იქით, ჩვენც კარგად მოვუვლით იორამს!

დიდმა ბიჭმა წიხლი ჰკრა ამონ-რას და წააქცია. ამონ-რა უხერხულად დაეცა და მარცხენა ხელის იდაყვი იორამის მუხლივით გადაიქლისა. ჭრილობამ მიწის მტვერი და წვრილი კენჭები მიიკრო.

ამონ-რა მშვიდად წამოდგა, ვითომ არც არაფერი სტკენია, არც არაფერი სწყენია, ისევ იორამს მიუჩოჩდა და გაუმოხრა:

— ახლავე დაგიამებ, იორამ, ახლავე მოგიჩინე...

— შენ რისი მომჩინი ხარ! — კიდევ უფრო გაბრაზდა დიდი ბიჭი და ისევ წიხლი უნდოდა ეთხლიმა ფერდში.

ამონ-რას სულაც არ უნდოდა დიდ ბიჭთან ჩხუბი, იორამის მორჩენა კი ძალიან უნდოდა. ამიტომ ჩამოვიდა მთიდან ანდრიას დავალებით: ადამიანებს უმკურნალო. და ვიდრე დიდი ბიჭი მეორედ ჩასცხებდა წიხლს, ამონ-რა მის მოქნეულ ფეხს კოჭში სწვდა და ჰაერში შეაჩერა. დიდი ბიჭი გაცეცხლდა: ამ ლაწირაკმა ეს რა გამბედაო. ფეხის გათავისუფლება სცადა, მაგრამ ვერ მოახერხა, ამონ-რას მაგრად ეჭირა ჰაერში მისი ფეხი. დიდი ბიჭი ცალ ფეხზე ხტოდა, ამის მაყურებელი ბავშვები კი ხარხარებდნენ, ჩანდა, კმაყოფილნი იყვნენ, რომ თავხედი ისჯებოდა, თუმცა ამონ-რა სულაც არ სჯიდა მას.

— დამაცდი თუ არა, რომ ვუმკურნალო იორამს?

— გამიშვი ხელი, შე... — დაუყვირა დიდმა ბიჭმა ამონ-რას და უწმაწური სიტყვები მიაყოლა.

— თუ არ დამაცდი, ფეხს მოგიგრეხ, აი ასე! — და ამონ-რამ ცოტათი გადაუგრიხა ფეხი დიდ ბიჭს.

— აბა, აბა... გამიშვი მეთქი ხელი... მე შენ გიჩვენებ... — დაემუქრა დიდი ბიჭი.

— მერე მიჩვენე რაც გინდა, ახლა კი დამაცდი თუ მოგიგრეხო ფეხი? — და ფეხი უფრო გადაუგრიხა, მაგრამ არ წააქცია.

დიდმა ბიჭმა იგრძნო ამონ-რას ხელის ძალა. მოუგრეხდა კი არა, კიდევ მოსტენდა ფეხს, თუ მოინდომებდა. თან შეეშინდა, თან ბოლმით გაივსო.

ამ ამბის მაყურებელი ბავშვები ზეიმობდნენ. აშკარა იყო, რომ დიდმა ბიჭმა ბევრს გაუმწარა სიცოცხლე, ბევრი დაჩაგრა და დააშინა. ახლა ერთი პატარა ბიჭი ყველას უხდიდა სამაგიეროს.

— ჰო, ჰო... გამიშვი... ენახოთ ერთი, როგორ უმკურნა-
ლებ! — ღაისისინა დიდმა ბიჭმა.

— მაშ წადი და ღოქით წყალი მომიტანე, რომ მუხლები
მოვბანო! — მკაცრად უთხრა დიდ ბიჭს ამონ-რამ და ისიც,
რატომღაც, მორჩილად გაიქცა.

ამასობაში იორამი დამშვიდდა. ამ სეირმა ისიც გაამზი-
არულა და ტკივილი ცოტახნით დაავიწყა.

ამონ-რას არ ახსოვდა თავისი ჩამოტყავებული იდაყვი,
საიდანაც სისხლი სდიოდა. მას ახლა საკუთარი იდაყვი კი
არა, იორამის მუხლები სტკიოდა.

დიდმა ბიჭმა მართლა მოიტანა ღოქით წყალი, მაგრამ
გული დაბოღმილი ჰქონდა. ძალიან უნდოდა, რომ იორამი
უარესად გამხდარიყო და მაშინ ამონ-რას ბავშვებს მიუსევდა:
დავცხთო მატყუარა ექიმსო.

ამონ-რამ პერანგის სახელო ჩამოიხია, წყალში დაასვე-
ლა და ფრთხილად მობანა იორამს ორივე მუხლი. ბავშვები
გასუსულები ადევნებდნენ თვალყურს. ზოგმა, ვინც წინ იყო,
ჩაიმუხლა, რომ უფრო ახლოს დაენახა, რას აკეთებდა პატა-
რა მკურნალი. საშინელი სანახავი იყო იორამის მუხლები.
შეძლებდა კი ოდესმე ბიჭი ფეხზე წამოდგომას? შეუხორცდე-
ბოდა კი როდესმე კვირისტავამდე აგლევჯილი ზორცი?
იორამმა გაუძლო მწარე ტკივილებს და თავადაც ინტერესით
ელოდა, რა უნდა მომხდარიყო.

„ბიჭოს! — გაუკვირდათ ბავშვებს, როცა ამონ-რამ აბგი-
დან თიხის პატარა ქოთანს ამოიღო, — ამას რაღაც მაღამო
ჰქონია!“

ამონ-რამ ქოთანს სახურავი მოხადა, თითით მაღამო
ამოიღო და იორამს მუხლებზე მოუსვა. წუთიც არ გასულა,
რომ იორამმა სიხარულით წამოიძახა:

— აღარ მტკივა... გამიქრა ტკივილი...

— ტყუიხარ, გტკივა და გვატყუებ! — თვალები დაუბ-
რიალა დიდმა ბიჭმა, — როგორ შეიძლება არ გტკიოდეს, რო-
ცა ძვლები გიჩანს!

— არ ვგრძნობ ტკივილს, ბიჭებო! — გაიმეორა იორამმა.

„რას იზამს ეს მაღამო, ახლავე შეუხორცებს და გაუქ-
რობს ჭრილობებს, თუ ეს რამდენიმე დღის შემდეგ მოხდება?
ძალიან საჭირო კია, რომ ახლავე ყველას თვალწინ შეუ-
ხორცდეს. მაშინ ყველა დაიჯერებს, რომ ანდრიას მაღამო

მართლა მაღამოა!“ — ფიქრობდა ამონ-რა და თვალს არ აცილებდა იორამის გასაცოდავებულ მუხლებს.

„მარტო ჩემი მაღამო ვერ გაუქრობს იორამს ჭრილობებს, ეგ ძალა შენშია“, — თითქოსდა ყურში ჩაესმა ანდრიას მშვიდი ხმა. „რა ძალაა ჩემში?“ — გაუკვირდა ამონ-რას და გაახსენდა, როგორ განკურნა სალომე — სიყვარულით განკურნა, გულიანი სიტყვით განკურნა, უწამლოდ და უძალადოდ, — „ამ ძალაზე მიმანიშნებს ანდრია?“

და ამონ-რამ, როგორც სალომეს საწოლთან, აქაც გული მოიმარჯვა. იორამის მუხლებს ზემოდან ორივე ხელი დააფარა და თქვა სიტყვები, რომლებიც არავის გაუგია. გულში თქვა სიტყვები, თანამომძისაღმი სიყვარულითა და თანაგრძნობით სავსე. ეს სიტყვები ხმამაღლა ვერც ითქმოდა, რადგან ამ ამბის მაყურებელი ბავშვები ვერაფერს მიხვდებოდნენ და, ალბათ, დასცინებდნენ კიდევ. მაშინ ეს გულიანი და სიყვარულიანი სიტყვები ძალას დაკარგავდნენ. კიდევ იმიტომ ვერ იტყოდა ამონ-რა ამ სიტყვებს, რომ დიდი სიყვარულისა და თანაგრძნობის განცდა მარტო სიტყვებში ვერ ჩაეტეოდა. ამონ-რამ თვალები დახუჭა, ირგვლივ ყველაფერი დაივიწყა, მარტო გული გაივსო პირთამდე ამ გრძნობებით, კიდევ იმედით, ვედრებით და ის, რაც გულში დაუგროვდა, იორამის მუხლებს მოაფრქვია. როცა გამოერკვა და თვალები გაახილა, დაინახა ბავშვების გასუსული სახეები, ყველას თვალები ამონ-რას ხელებს მისჩერებოდა. ამონ-რას ხელები უხურდა, ეწვოდა, თითქოს თვალი მოჰკრა, როგორ ლიცლიცებდა იორამის მუხლებზე მისი ხელისგულებიდან გამოსული ცისფერი ალი. ახლა იგრძნო ამონ-რამ, ორივე მუხლი საშინლად სტეხავდა, და გაუნარდა. იორამს კი მშვიდი ღიმილი დასთამაშებდა, ბიჭი ტკივილებში კი არა, განცხრომაში იყო.

ამონ-რამ ნელი მოძრაობით მოაცილა ხელები იორამის მუხლებს.

— ეს რა მოხდა, ბიჭებო! სასწაული მოხდა! — დაიძახა ერთმა, რომელსაც ლამის ცხვირი ჰქონდა მიდებული იორამის მუხლებზე, — გაქრა ჭრილობები! გაქრა!

ყველამ წინ წაიწია, კისერი წაიგრძელა. ყველას უნდოდა საკუთარი თვალთ ეხილა იორამის მუხლები, ჩამოფლეთილი, დაგლეჯილი, ჭუჭყითა და კენჭით გავსებული. ამონ-რამაც შეხედა იორამის მუხლებს: ჭრილობები მთლიანად

გამქრალიყო, მხოლოდ ერთგან პატარა ზოლი იყო დარჩენილი, როგორც ნიშანი თითქოსდა დიდი ხნის წინათ ნაჭრილობებისა.

— წამოდექი! — უთხრა იორამს.

დაბნეული იორამი თვალს არ აცილებდა ამონ-რას.

— ვინ ხარ შენ? საიდან მოხვედი?

ამონ-რამ პასუხი არ გასცა. ბავშვები ალაპარაკდნენ:

— ეგ მეთევზის შვილია, მაგისი სახელი რაა!

— მაგას რაც ჰქვია და ამონიც დაარქვეს!

— ეგ ის არის, მამასთან ერთად რომ თევზაობდა, მერე ქარიშხალი ამოვარდა, მამა დაიღუპა, ეგ კი გადარჩა.

— ეგ ფილოსოფოსთან ცხოვრობს, ის კითხვასა და მეცნიერებას ასწავლის!

— გამოქვაბულში ცხოვრობენ.

ვისაც რა ჰქონდა გაგებული, იმას ამბობდა ამონ-რაზე.

— შენ ამონ-რა ხარ? — ჰკითხა იორამმა.

— წამოდექი თუ შეგიძლია! — გაუმეორა ამონ-რამ.

— შემიძლია, მაშ! — ხალისით წამოიძახა იორამმა, მკვირცხლად წამოხტა, რამდენჯერმე ფეხები მოხარა და გაშალა, მერე კი ხტუნვაც დაიწყო.

— მოვრჩი... მომირჩა! — ხარობდა ბიჭი.

ამონ-რა კი ძლივს წამოდგა ფეხზე — იორამის მუხლგების ტკივილმა მის ფეხებში გადაინაცვლა. დიდ ბიჭს, სასწაულის მხილველს, სახე გაუასპიტდა. მას ის უფრო გაუხარდებოდა, თუ იორამი ხეებრად დარჩებოდა, მაშინ ამონ-რას, როგორც ცრუ მკურნალს, კინწისკვრით გააძევებდა. მაგრამ მის ბოროტულ სისინს არავინ აქცევდა ყურადღებას.

— ახლა შენ მოდი ჩემთან! — მიმართა ამონ-რამ ბიჭს, რომელსაც სახეზე მუწუკები ვყარა, — არ გინდა, ეგ მუწუკები მოგაცილო?

ბიჭი ნდობით დაუდგა წინ და, რადგან ისე მაღალი იყო, რომ ამონ-რა ვერ მისწვდებოდა, ჩაცუცქდა და სახე მიუშვირა.

— ერთი წელიწადია, ეს მუწუკები მაწუხებს, ამას მომირჩენ?

— მოვირჩენ, მაგრამ უცბად ვერა! — რწმენით უთხრა ამონ-რამ, — სამი დღის შემდეგ გაქრება და სახე გაგისუფთავდება.

... ამონ-რამ ბიჭს ორივე ლოყაზე მალამო გადაუსვა სიყვარულითა და დიდი თანაგრძნობით.

— მაშ საში ღლის მერე მომირჩება? — ჰკითხა ბიჭმა.

— ჰო, მოვირჩება! კვალიც არ დაეტყობა შენს ლოყებს.

ამონ-რა მხრებში გაიმართა. ახლალა შენიშნა, რომ ამ ბიჭების გუნდში ის ყველაზე პატარა იყო ასაკითაც და ტანითაც. თიხის პატარა ქილა აბგაში ჩადო, მხარზე გადაიკიდა და რკალი გაარღვია.

— იდაყვიდან სისხლი გღის, გადატყაული გაქვს, წაისვი შენი მალამო და მოირჩინე! — უთხრა ერთმა.

— არა! — გადაჭრით თქვა ამონ-რამ.

— რატომ? — გაუკვირდა ბიჭს.

— ვაითუ სხვა გაჭირებულისთვის არ მეყოს მალამო, იმიტომ! მშვიდობით!

უკან არ მოუხედავს, ისე გაიარა ქუჩის ბოლომდე.

უცბად ხმაური შემოესმა.

— არ ესროლო, არ გაბედო! — ყვიროდნენ ბიჭები.

— მკურნალო! — გამოსძახა დიდმა ბიჭმა.

ამონ-რა შემობრუნდა.

— მკურნალო, ახლა შენი თავი გექნება სამკურნალო!

ქუჩის ბოლოდან დიდმა ბიჭმა მისკენ დიდი სიპი ქვა გამოსტყორცნა.

— აუჰ, ეს რა ჰქენი! — აღმოხდათ ბავშვებს.

მაგრამ ქვა უკვე მოქროდა, და როცა ნახევარი გზა გაიფრინა, თითქოს ჰაერში შეჩერდა და საცაა დაბლა დაეცემოდა. დიდი ბიჭი დაძაბული მისჩერებოდა ქვის მოძრაობას. და როგორც კი იგრძნო, რომ შეიძლება ქვა ვერ მისწვდებოდა მიზანს, გამწარებულმა და დაბოღმილმა შეჰყვირა:

— მიდი, მიდი... არ გაჩერდე, თორემ დაგფშენი... მიდი, თორემ დაგფშენი!

ჰაერში წამით შეჩერებულმა ქვამ გზა გააგრძელა. ამონ-რას არც უცდია განგზე გამდგარიყო და აეცდინა ქვა, ისიც დაუნდობლად ეძგერა შუბლში. ამონ-რას თვალთ დაუბნელდა, წაბარბაცდა და წაიქცა. როცა გონს მოვიდა, ისევ იმ ბიჭების შეწუხებული სახეები დაინახა, ისინი მის ირგვლივ შეჯგუფულიყვნენ და წამოყენებას ცდილობდნენ. იორამი შუბლს

უწმენდლა. მარტო დიდი ბიჭი არ იყო მათ შორის. ის ქუჩის თავში იღგა და შურისგებით ყვიროდა:

— დაანებეთ თავი, ხომ აქვს მაღამო, წაისვას და მორჩეს!

ამონ-რა ბიჭებმა ფეხზე წამოაყენეს.

— წაისვი მაღამო, ცოლო ხარ! — სთხოვა ისევ იმ ბიჭმა, რომელიც წელანაც ეხვეწებოდა, იდაყვი მონირჩინეო.

— არა, სხვებისთვის არ მეყოფა! — უპასუხა ამონ-რამ.

ამონ-რა სულაც არ იყო გაბოროტებული და შურისძიებით აღვსილი. აბგამში თიხის ქილა მოსინჯა, ხომ არ გატყვდაო, და დამშვიდდა.

— აი, რამხელა ქვა გესროლა მაგ ბოროტმა! — დაანახვა მიწაზე დაგდებული სიპი ქვა მუწუკებიანმა ბიჭმა.

ამონ-რა ქვას დასწვდა და გაოცდა: ქვაზე უცნაური ხაზები და ნიშნები იყო გამოყვანილი. „ქვაწერილია! — გაიფიქრა ამონ-რამ და შეშფოთდა, — იქნებ გამოვეკიდო და ვუთხრა, რომ ეს ქვა შეიძლება მისი საკუთარი ქვაწერილი იყოს? იქნებ გავაგებინო, როგორ აუცილებელია საკუთარი ქვაწერილის წაკითხვა?“ კიდევ დააპირა ასეც მოქცეულიყო, მაგრამ გულის ძახილმა გააჩერა: ეს ბიჭები იფიქრებენ, რომ დიდ ბიჭს სამაგიეროს გადასახდელად გამოეკიდაო; დიდ ბიჭს კი, რა თქმა უნდა, სასაცილოდ არ ეყოფა ქვაწერილის ზღაპარი. ისევ ანდრიას უნდა ჰკითხოს, როგორ მოიქცეს. კისერზე ჩამოკიდებულ პატარა ტოპრაკს პირი გაუხსნა; შიგ თავისი ქვაწერილი ედო, თან დაჰქონდა, როგორც ანდრიას, და თავისუფალ დროს ჩაჰკირკიტებდა. თავის ქვაწერილს დიდი ბიჭის ქვაწერილი ჩაუსვა და პირმოკრული ტოპრაკი ისევ უბეში ჩაიბრუნა.

— მშვიდობით! — უთხრა ბიჭებს და გზას გაუყვა.

უკან იორამი დაეღვენა.

— მეც შენთან წამოვალ, დაგეხმარები!

— როგორც გინდა! — უპასუხა ამონ-რამ.



მეცხრე თავი

ალბათ ბიჭები ექიმობანას თამაშობენ ან მეხუმრებიან

ოქრომჭედელი ზაქარია თავისი სახელოსნოს წინ იჯდა და თავი მუხლებში ჰქონდა ჩარგული. ამონ-რას არასოდეს უსასუბრია მასთან. ახლა კი რატომღაც შეებრალა ძიაკაცი. ამონ-რა და იორამი აქეთ-იქით შემოუსხდნენ ზაქარიას. ოქრომჭედელმა ბიჭებს შეხედა, ამონ-რა იცნო და გაუღიმა.

— კარგი ბიჭი ხარ შენ! — უთხრა თბილი, ალერსიანი ხმით.

— რა იცი? — ჰკითხა ამონ-რამ.

— კარგი ბიჭი ხარ, ჩემს გვერდით რომ ჩამოვექი!

— იმიტომ ჩამოვექი, რომ მგონია რაღაც გაწუხებს, ხელები ხომ არ გტკივა?

— როგორ მიხვდი, ვინმემ გითხრა? — გაუკვირდა ოქრომჭედელს.

— არავისაც არ უთქვამს, ვხედავ შენს ხელებს, დამწვარი უნდა გქონდეს.

ზაქარია ოქრომჭედელმა ამოიოხრა.

— ეჰ, — თქვა ნალვლიანად, — მე მართლაც დამეწვა ხელები, თვეზე მეტია ველარ ვმუშაობ და არც ვიცი, გავაკეთებ კიდევ რამეს, თუ არა. ეს მითხარი, შენ რატომ გაწუხებს ჩემი უბედურება?

— იმიტომ მაწუხებს, რომ შენც კარგი კაცი ხარ. მე მალამო მაქვს, ანდრიას დამზადებულა. ნამდვილად მოგიჩინებს ხელებს, მიჩვენე.

ზაქარიამ გაშლილი ხელები გაუშვირა ამონ-რას და თან გულისტკივილით დასძინა:

— ამას რა მალამო მოარჩენს.

„ეს რა დამართნია ამ კეთილ კაცს?“ — შეწუხდა ამონ-რა.

ოქრომჭედელს ხელისგულები წყლულებით ჰქონდა დაფარული, გადატყავებულ თითებზე ფრჩხილები ძლივს ეკიდა.

ამონ-რას გული შეეკუმშა ზაქარიას საცოდაობით. ოქრომჭედელმა კაცმა თუ ოქროს ხელები დაკარგა, როგორღა

მოქსოვოს და გამოძერწოს სიმშვენიერე ოქროში? თვეზე მეტია ზაქარიას არაფერი შეუქმნია, ზის თავისი სახელოსნოს წინ დაწყლულბულ-დასისხლიანებული ხელებით და ელოდება, რა მოხდება, მოურჩება თუ არა.

„ახლავე უნდა განვკურნო ოქრომჭედლის ოქროს ხელე-ბი, ანდრიას მაღამოც მაქვს და საკუთარი ძალაც,“ — გაიფიქრა ამონ-რამ. იორამს ქილა დააჭვინა, ორი თითით მაღამო ამოიღო და ზაქარიას ხელისგულებს, ფრჩხილებს, თითებს უხვად წაუსვა. რაც ქილაში მაღამო იყო, სულ გამოიყენა. და როგორც წელან იორამს ურჩენდა მუხლებს, ახლაც ისევე დახუჭა თვალები, თავისი ხელები ოქრომჭედლის ხელებს ნაზად შეახო და შეკუმშული გული სიყვარულით, თანაგრძნობით, სიბრალულით, რწმენითა და იმედით გაავსო და გააფართოვა. ასე გარინდებული იყო დიდხანს. თვალებით სიბნელეში ოქრომჭედლის ხელებს დაეძებდა. აი, ხელებიც გამოჩნდნენ, სალ-სალამათი ხელები; ხედავს ამონ-რა, როგორ აღდულებენ ხელები ოქროს, ძაფები გამოჰყავთ; კოტიტა თითები ისე წნავენ ოქროს ძაფებს, თითქოს ლითონს ეალერსებიანო; ძაფებში ფერად ქვებს აქსოვს. ისინიც, ალერსით გახალისებულნი, ლამაზდებიან, ბრწყინდებიან, ამომავალ მზეს ემსგავსებიან; პირველ სხივთა ელვარებამ და სიმშვენიერემ გააოცა ამონ-რა; ოქრომჭედლის ხელისგულზე იშვიათი ნაკეთობა ძვეს.

ოქრომჭედელი ზაქარია გატრუნული იჯდა და, ცოტა არ იყოს, გაკვირებული აღეგნებდა თვალ-ყურს — რას შეება ეს ბიჭიო? ზაქარიას არც ჰქონდა იმედი, რომ ეს ხელები მართლაც მოურჩებოდა. ალბათ, ბიჭები ექიმობანას თამაშობენ, ან მეხუმრებიანო — ასე ეგონა ზაქარიას და ბავშვებს მიენდო. მაგრამ როცა დაინახა, რომ ამონ-რას სახე შეეცვალა და თითქოს სუნთქვაც შეეკრა, შეშფოთდა და ბიჭის გამოფხიზლება მოინდომა. ეს შენიშნა იორამმა და ხელით ანიშნა, გაჩუმდი და არ გაინძრეო. მაშინ ზაქარიასაც მოუნდა თვალების დახუჭვა, ჩათვლიმა და უჩვეულო ტკბილ სიზმარში ჩაიძირა. და ნახა სიზმრად, როგორ აუხდა ოცნება: მიაგნო ამომავალი მზის სხივების მოძრაობას, მიაგნო მზის პირველ ღიმილს და სახეს, რომელიც მასშია ჩამალული. ზაქარია აღნობს ოქროს, სხივებს წნავს, თვლებით აგვირისტებს...

რამდენ ხანს გაგრძელდა ზაქარიას განცხრომა?

კარგახანს. მზე უკვე ჩავიდა.

ამასობაში ამონ-რამ თვალები გაახილა და ისევ ცისფერი ცეცხლის ალები დაინახა; ალები მისი ხელისგულებიდან გამოდიოდნენ და ოქრომჭედლის ხელებს, თითებს გარშემო ევლებოდნენ.

ახლა უკვე მიხვდა ამონ-რა, სად ჩნდებოდა ეს ცეცხლი. ეს გულის ცეცხლი იყო, გულში ანთებული სიყვარულისა და თანაგრძნობის, სიბრალულისა და რწმენის ცეცხლი. იქიდან მოემართებოდნენ ეს საკვირველი ცისფერი ალები, რომლებიც ოქრომჭედლის ხელებს არჩენენ, წელან კი იორამის მუხლები განკურნეს, უფრო ადრე სალომე სიკვდილს გამოსტაცეს. „აი, სად ყოფილა ჩემი ძალა, აი, რა ყოფილა ჩემი ძალა“, — გაიფიქრა ამონ-რამ. და თუმცა დარწმუნებული იყო, რომ ზაქარიას ხელები მთლიანად განიკურნენ, მაინც თავისი ხელები არ მოაცილა, ვიდრე ცისფერი ცეცხლის ენები, რომლებიც ოქრომჭედლის ხელებს ლოკავდნენ და კოცნიდნენ, თანდათან არ განელდა და ჩაქრა.

ამონ-რამ ხელებზე საშინელი წვა იგრძნო. „მაშ, ეშველა ზაქარიას!“ — გაუნარდა ბიჭს, — „საწყალი, თურმე როგორ იტანჯებოდა!“ ახლავდა ასწია თავისი ხელები და ოქრომჭედლის ხელებს დააკვირდა. იორამმა კი პირი დაალო: სადღა იყო წყლულები, სისხლი, მოგლეჯილი ფრჩხილები?! ყველაფერი მთლიანად გამქრალიყო.

ზაქარია ისევ სიზმარში იყო და არც გაუგია, როგორ გადააბრუნეს და გადმოაბრუნეს მისი ხელები ამონ-რამ და იორამმა, შემდეგ მუხლებზე დაუწყვეს და წამოდგნენ.

ანდრიას მალამოსაგან გამოცარიელებული პატარა ქილა ამონ-რამ აბგამი ჩაიღო და იორამს ხელით ანიშნა — წავიდეთო. ასე დატოვეს სახელოსნოს წინ ჩაძინებული ოსტატი.

იორამი მკვირცხლად მიხტოდა, გახარებული იყო, რომ ამონ-რას დაეხმარა და სასწაულის მოწმე გახდა. ამონ-რას კი სიარული უჭირდა, რადგან ისევ სტკიოდა იორამის მუხლები, საკუთარი გადატყავებული იდაყვი და გატეხილი შუბლიც აწუნებდა, ახლა კი ზაქარიას ხელებიც ეწვოდა. მაგრამ არ იმჩნევდა არაფერს, თავს ძალას ატანდა და იორამს ფეხდაფეხ მიჰყვებოდა.

თუ არ გინდათ, ნუ დაიჯერებთ: ისინი ცაში დაფრინავდნენ

დედასთან და სალომესთან მიდიოდა ამონ-რა. დაღამებამდე მათ ნახვასაც მოასწრებდა და გამოქვაბულებშიც დაბრუნდებოდა.

აი, ამონ-რას უბანიც. აქაც თამაშობდნენ ბიჭები ქუჩაში. გოგოები ცალკე თამაშობდნენ, და ამონ-რამ სალომეს კისკისი გამოარჩია. შორიდან დაინახა სალომემ ამონ-რა და მისკენ გამოენთო.

— რა, რა, რა! — იძახდა გახარებული გოგონა.

სალომემ ამონ-რას კისერზე მაგრად მოხვია ხელები და აკოცა, აკოცა, აკოცა.

— დამატრიალე, დამატრიალე! — შეეხვეწა სალომე.

ამონ-რას უცბად გაუქრა მუხლების ტკივილიც, ხელეზის წვაც, აღარც გადატყავებული იდაყვი და გატეხილი შუბლი ახსოვდა. დაავიწყდა ყველაფერი. სალომემ აკოცა, და ესეც საკმარისი იყო, რომ ღონე და ძალა მომატებოდა. დატრიალდა ბიჭი, დატრიალდა. ყელზე ჩამოკიდებული სალომე თითქოს ჰაერში იწვა და კისკისებდა.

— კიდევ, კიდევ! — აქეზებდა ამონ-რას.

და ამონ-რას ძალიან მოუნდა სალომესთან ერთად ცაში აფრენა.

მოუნდა და ვერც შენიშნა, რომ თურმე უკვე ცაში იყვნენ ორივენი, ცაში ტრიალებდნენ, ცაში კისკისებდა სალომე. სახლებსა და ხეებზე მაღლა აფრენილ გოგო-ბიჭს ქვემოდან იორამი შეჰყურებდა და თვალებს არ უჯერებდა. არ იცოდა, ყვირილი აეტეხა, — ბავშვებს უშველეთ, ჰაერში აფრინდნენ და არ ჩამოცვივდნენო, — თუ ეს ყველაფერი მოჩვენება იყო. მაღლე კიდევ ორმა გოგონამ მოირბინა, ოთხი-ხუთი წლისანი თუ იქნებოდნენ, სალომე მაღლა რომ დაინახეს, გაიკვირვეს და შეეშინდათ კიდევც, ამიტომ ყვირილი დაუწყეს:

— სალომე, მანდ რა გინდა! ჩამოდი, სალომე, ჩამოვარდები!

ცაში მოზრიალე გოგონა კი კისკისებდა და კისკისებდა.

ამონ-რამ სალომე ხელში აიყვანა, მერცხალივით შეინავარდა სახლებს ზემოთ, ბავშვების წინ მიწაზე დაეშვა. სალომე ბედნიერი იყო. კიდევ ბევრი აკოცა ამონ-რას.

— ხომ დაინახეთ, ცაში დაფურინავდი! ამონ-რამ ცაში ამაფრინა! ხომ დაინახეთ?! — ეუბნებოდა იორამსა და გოგონებს. ისინი თავს უქნევდნენ — დავინახეთო, მაგრამ სალომეს აღტაცებას ვერ იზიარებდნენ, რადგან დაბნეულები და გაოგნებულები იყვნენ.

ამონ-რაც კმაყოფილი იყო, თუმცა გაოგნებულიც: მონდა ცაში აფრენა სალომესთან ერთად, და სულაც არ ეგონა თუ მართლა აფრინდებოდა. იქნებ მომეჩვენაო, გაიფიქრა ბიჭმა, მაგრამ იორამის კიდევ უფრო გაოგნებულმა გამომეტყველებამ დაარწმუნა, რომ ყველაფერი მართალი იყო. იორამმა ხმის კანკალით ჰკითხა:

— ამონ-რა, როგორ აფრინდი ცაში? ვინ გასწავლა ცაში აფრენა?

აბა რას ეტყოდა ამონ-რა, არავისაც არ უსწავლებია ცაში აფრენა, და არც იცის, როგორ აფრინდა. ამ დროს ქუჩაში ქალებმა ჩამოიარეს, კოკით წყალი მოჰქონდათ. მოდიოდნენ და მოლაპარაკობდნენ. მათ შორის სალომესა და ამონ-რას დედებიც იყვნენ.

სალომე დედას მიეჭრა და ახარა:

— დედა, დედა, ამონ-რამ ცაში ამაფრინა!

ამ ამბის მომსწრე გოგონებიც მისცვივდნენ თავიანთ დედებს.

— დედა, ამონ-რა და სალომე ცაში დაფრინავდნენ!

— დედა, არა გჯერა? მართლა დაფრინავდნენ.

მარამ ყურადღება არ მიაქცია ბავშვების ლაპარაკს, კოკა მიწაზე დადგა და ამონ-რა გულში ჩაიხუტა, მოეფერა. „ნეტავ ვერ შენიშნოს დედამ, რომ შუბლი მაქვს გატეხილი, იდაყვი — გადატყავებული, შეწუხდება, გული ეტკინება,“ — გაიფიქრა ამონ-რამ. აბა, როგორ ვერ დაინახავდა დედა შვილის გატეხილ და დასისხლიანებულ შუბლს! მაგრამ ჩაიხუტა მარამ ამონ-რა, მოეფერა, თავზე ხელი გადაუსვა, თვალებშიც ჩახვდა და ვერაფერი შენიშნა, ვერაფერს მიხვდა.

ამონ-რას ახლა გაახსენდა, რომ არც ოქრომჭედელს უკითხავს, შუბლზე რა დაგემართაო.

„არ მეტყობა არაფერი, თუ ვერ ხედავს დედა?“ — გაუკვირდა ამონ-რას.

— როგორ ხართ შენ და ანდრია იქ, მთებში? — ზრუნვით ჰკითხა დედამ, — იქნებ რამე გიჭირთ? რას ჭამთ, როგორ უკლით თავს?

— კარგად ვართ, დედა, ჩემზე არ იღარდო! — უპასუხა იმედინად ამონ-რამ.

— რას გასწავლის ანდრია, შვილო?

— ბევრ რამეს, დედა! — უპასუხა ამონ-რამ.

ამონ-რა ვერ აუხსნიდა და უამბობდა დედას, რა ასწავლა ანდრიამ. ისეთი რამეები ასწავლა, რაც ამ ქალაქში ალბათ არავენ იცის, არც დიღმა და არც პატარამ. ახლა კი ამონ-რა საკუთარ ქვაწერილს სწავლობს. ვერ ეტყვის ამას ყველაფერს დედას. ზოგი რამის თქმა, როგორც ანდრიამ დაარჩია, არ შეიძლება, საიდუმლოა; ზოლო, რისი თქმის უფლებაც აქვს, იმას ასე უცბად ვერ აუხსნის. ამიტომ ამონ-რამ მოკლედ უთხრა:

— ახლა ვერ გეტყვი, დედა, სხვა დროს გიამბობ!

ბავშვები ერთმანეთს არ აცლიდნენ, ისე უამბობდნენ დედებს, როგორ დაფრინავდნენ ცაში ამონ-რა და სალომე.

— მაშე ფრთები გამოესხათ და ისე დაფრინავდნენ? — იცინოდნენ დედები, არ სჯეროდათ მათი მონაყოლის.

— დიახაც დაფრინავდნენ! — გაბრაზდა ერთი გოგონა, — თუ არ გინდათ, ნუ დაიჯერებთ! ისინი კი ცაში დაფრინავდნენ!..

სალომეს დედა კი შეფიქრიანდა: ბავშვს ახლა სხვა რამ ავადმყოფობა ზომ არ დაემართა, რა ფრენის მოჩვენება დაეწყოო.

— წავიდეთ, შვილო, უკვე ბნელდება, შინ მიაბე ყველაფერი!.. — უთხრა დედამ გოგონას.

სალომემ ამონ-რასთან მიიღბინა.

— კიდევ როდის მოხვალ? ხომ ამაფრენ ცაში კიდევ? — და ფეხის წვერებზე შედგა, რომ ეკოცნა.

— მოვალ, მოვალ! — შეპირდა ამონ-რა.

დედამ ხელი მოკიდა სალომეს და თან გაიყოლა.

ქალებმა ისევ წამოიკიდეს კოკები და გზას გაუყვნენ.

– მივლივარ, დედა! – უთხრა ამონ-რამ დედას.

მარა შეწუხდა.

– ამაღამ დარჩი ქალაქში, შვილო! როგორღა ახვალ გამოქვაბულებში, უმთვარო ღამეებია, როგორ ივლი? – შეეხვეწა შვილს.

„დედასთან თუ მასწავლებელთან?“ – ჰკითხა ამონ-რამ გულს.

„მასწავლებელთან,“ – უპასუხა გულმა.

ამონ-რამ დედას ლოყაზე აკოცა.

– უნდა წავიდე, დედა, ანდრია მელოდება, არ უთქვამს, დარჩიო.

მარამ ისევ ჩაიკრა შვილი გულში.

– კარგი, რაკი ასეა, წადი, მაგრამ ფრთხილად იარე!

ამონ-რა გზას გაუდგა, იორამი მას გაჰყვა.

მარას სიყვარულით სავსე თვალები დიდხანს მიაცილებდნენ აღმართზე მიმავალ ბიჭებს.

ამონ-რა და იორამი ერთხანს ჩუმად მიდიოდნენ.

– იორამ, ვგრძნობ, რაღაცის თქმა გინდა! – დაარღვია სიჩუმე ამონ-რამ.

– ამონ-რა, წამიყვანე შენთან, წამიყვანე ფილოსოფოსთან... – შეევედრა იორამი.

– არ ვიცი, ანდრიას უნდა ვკითხო! – უპასუხა ამონ-რამ, – მშვიდობით, იორამ!

იორამმა ამონ-რა ქალაქის ბოლომდე მიაცილა. უკვე ბნელოდა, და ამონ-რა მალე გაუქრა მხედველობიდან. „როგორ ივლის ამ წყვილიაღში? – გაიფიქრა იორამმა, – მხეცეების, მაინც არ ეშინია?“ ის კი არ იცოდა იორამმა, რომ ამონ-რამ შიშის გორგალი ზღვაში ჩანთქა.



ბოროტი საკუთარ ქვაწერილს ვერაფერს გაუგებს

ანდრიას სანთლები ენთო და წერდა. ფეხის ხმა რომ გაიგო, სანთლით გარეთ გამოეგება ამონ-რას.

— დაიგვიანე... როგორ იარე ამ სიბნელეში? — ზრუნვით ჰკითხა მოწაფეს.

ამონ-რამ გაუღიმა მასწავლებელს.

— ანდრია, შენმა მალამომ სასწაულები მოახდინა!

ანდრიამ ამონ-რა გამოქვაბულში შეიყვანა.

— ჯერ ლუკმა შევჭამოთ, დაისვენე, მერე მიაბე...

ყველი, პური, რძე და ხილი... სწრაფად ივახშმეს.

შემდეგ ამონ-რამ დაწერილებით უამბო მასწავლებელს, როგორ მოურჩინა მის მიერ დამზადებული მალამოთი იორამს გადატყავებული მუხლები, ოქრომჭედელს ზაქარიას კი — დამწვარი, დასნეულებული ხელები.

ანდრია ჩაფიქრდა. „მაშ რა გამოდის? — გაიფიქრა ანდრიამ, — ჩემი მალამო არაფერ შუაშია. ბიჭმა თავადაც არ იცის, რა შეუძლია. როგორ უთხრას ანდრიამ ამონ-რას, რომ მალამო სულაც არ იყო მალამო. ეს იყო კეთილად შეზავებული ნელსაცხებელი. ბიჭი კი ნახევარი დღე იმიტომ აწვალა ლაბორატორიაში, იმიტომ აყურებინა, როგორ მუშაობდა თვითონაც, როგორ ძნელად მზადდებოდა ვითომდა სამკურნალო მალამო, რომ ამონ-რას რწმენა გასჩენოდა და რწმენით წაესვა იგი ჭრილობებზე. ანდრიამ დღეს ამონ-რას რწმენა გამოსცადა, მისი სიყვარულის, თანაგრძნობის, სიკეთის ძალა გამოსცადა, საერთოდ მისი გულის ცეცხლი გამოსცადა. ეს ცეცხლი კი ბლიერზე ძლიერი ყოფილა. „არა, — გადაწყვიტა მასწავლებელმა, — როდესმე თავად მიხვდება ყველაფერს, ჯერ, დაე, ასე იყოს.“

ამონ-რამ დიდ ბიჭთან მომხდარ უსიამოვნებაზეც უამბო და მისი ნასროლი ქვა უჩვენა.

ანდრიამ სანთლის შუქზე გულისყურით დაათვალიერა ქვა და გულისტკივილით ჩაილაპარაკა:

— ეს ქვაწერილია. და რადგან იგი მის ფეხებთან ეგდო, გამოდის, მისი ქვაწერილი ყოფილა. გაბოროტებული რომ არ ყოფილიყო, მოეწონებოდა ეს ქვა, შინ წაიღებდა, მერე, ღრთა ვითარებაში, იქნებ რაღაცასაც მიმხვდარიყო და კიდევ ამოეცნო ქვაწერილის საიდუმლო. აი, რას ჩაადენინებს ადამიანს სიბუღვილი და შური, საკუთარ ბედს ამსხვრევინებს. ახლა ბევრი, ძალიან ბევრი წელი გაივლის, ვიდრე ეს ქვაწერილი ისევ მიაკითხავს მას...

— წავუღებ... ახლავე წავუღებ! — აენტო ამონ-რა, მაგრამ ანდრიამ დაამოშმინა.

— ტყუილი წვალება იქნება, ქვა წაშლილია. მაგ დიდმა ბიჭმა უკვე აირჩია გზა. ამ ცხოვრებაში საკუთარ ქვაწერილს ვერაფერს გაუგებს. შენ მიუტან და მაგ ქვით ახლა სხვას გაუხეთქავს თავს.

— მაშ რა ვუყოთ ამ ქვას? — შეშფოთდა ამონ-რა.

— რაც გულმა გითხრას, ის მოიძოქმედე. როდესმე ქვაწერილი თვითონ გაუღებდა გრძელ გზას და მიაგნებს თავის პატრონს. ვილოცოთ, რომ მაშინ მაინც არ ესროლოს სხვას თავისი ბედი.

ანდრიამ ამონ-რას და სალომეს ცაში აფრენის ამბავიც მოისმინა.

— მოდი ახლაც აფრინდი, გამოქვაბულის ჭერი მაღალია, აბა, სცადე! — სთხოვა მასწავლებელმა.

ამონ-რა წამოდგა და დატრიალდა, როგორც სალომესთან ტრიალებდა, მაგრამ არაფერი გამოუვიდა, ვერა და ვერ აფრინდა მაღლა, ერთი მტკაველითაც ვერ აიწია.

— ანდრია, მართალს გეუბნები, აფრინდი! — შეწუხდა ამონ-რა.

— მჯერა! — მშვიდად უპასუხა ანდრიამ, — სცადე გამოიცნო, როგორ აკეთებ ამას, რომ ყოველთვის გამოგივიდეს.

მასწავლებელი კმაყოფილი იყო მოსწავლის დღევანდელი წარმატებებით. ანდრიას იმედები უმართლდებოდა. ბიჭს შუბლზე ხელი გადაუსვა, შემხმარი სისხლი მოაცილა, იდაყვზეც მოუთათუნა ხელი. ამონ-რა მიხვდა, რომ ანდრიამ ნასროლი ქვის ნაკვალევი წაშალა, იდაყვი შეუხორცა, მაღალი კი არ უხმარია.

— დღეს შენ ბევრი იშრომე, წადი და დაიძინე.

ამონ-რამ მორჩილად მიიღო მასწავლებლის დარიგება.

ვინც კითხვა და მეცნიერება იცის, ის ბავშვი აღარ არის

სიზმარი ნახა ამონ-რამ ყველა სიზმრისგან გამორჩეული.

ნახა, ვითომ ქვაწერილს იკვლევდა. მისი ქვაწერილი სამი მტკაველის ხელა გამხდარიყო, ამიტომ უფრო კარგად შეიძლებოდა ხაზებისა და ასო-ნიშნების დათვალიერება. ქვაწერილის გვერდით მისი გადიდებული ხელისგული იდო. მას-ზეც ხაზები მიდი-მოდოდნენ, იყოფოდნენ და ერთმანეთს კვეთავდნენ. „ჩემი ხელისგული და ჩემი ქვაწერილი ერთმანეთთან არიან დაკავშირებულნი“, — გაიფიქრა ამონ-რამ. ჯერ ხაზები შეისწავლა. „აჰა, მივხვდი!“ — გაუხარდა ბიჭს. შემდეგ ასო-ნიშნებს ჩაუკვირდა. „აჰა, ამასაც მივხვდი, — ისევ წამოიძახა გახარებულმა, — მაღლობა, უფალო!“ მაშ, საიდუმლო უკვე ამოცნობილი ჰქონდა, ახლა საჭირო იყო, რომ ქვა აელაპარაკებინა, ან, უფრო სწორად, ის, რაც ქვაზე ეწერა. ის იყო დააპირა ნიშნების ამოკითხვა, რომ დიდი ბიჭის გადიდებული ქვაწერილი წარმოესახა წინ. „რატომ? — გაუკვირდა ამონ-რას, — რა მესაქმება მე სხვის ქვაწერილთან?“ უყურა მის ხაზებს და ნიშნებს, შეადარა თავისას, მაგრამ ვერაფერი ნახა საერთო. არადა დიდი ბიჭის ქვაწერილი სიზმრიდან არ გადიოდა. რამდენჯერაც სცადა ისევ თავისას დაბრუნებოდა, იმდენჯერ ეს ქვაწერილი ზედ გადაეფარებოდა და წაკითხვის საშუალებას არ აძლევდა. ბოლოს ყველაფერი უცბად გაქრა და ამონ-რას ისევ გაეღვიძა, რომ ამოხსნილი საიდუმლოებანი სიზმარში დარჩა. მარტო ის დაამახსოვრდა, რომ რაღაც იცოდა საკუთარი ქვაწერილის შესახებ, მაგრამ რა? — ყველაფერი პირწმინდად გაქრა.

ამონ-რამ ველარ დაიძინა.

შუალამე გადასული იყო.

სანთელი აანთო და ქვაწერილს მიანათა.

ვერ მოასწრო რამე გაეხსენებინა, რომ ანდრია შემოვიდა და ჩურჩულით უთხრა:

— ადექი და გამოშყვევი!
ამონ-რას ეუცხოვა ანდრიას ხმა. იგი აღელვებული ჩანდა.

სწრაფად წამოდგა და ანდრიას გააჰყვა.

ისინი სასტუმრო გამოქვაბულთან შეჩერდნენ. ამონ-რას იქ არასოდეს შეუხედავს. იცოდა, რომ ანდრიასთვის ეს წმიდათა-წმიდა ადგილი იყო, ერთი სტუმრისათვის შექმნილი. ანდრიამ შესასვლელთან ჩამოკიდებული დიდი ფარდაგი გადასწია და შიგ შევიდა. ამონ-რას ხელით ანიშნა, შემოდით.

ორივემ სანთლები მაღლა ასწიეს, რომ იქაურობა განათებულიყო.

ამონ-რამ მოპირდაპირე კედელზე დიდი სურათი დაინახა და ცნობისმოყვარეობით დააკვირდა. ანდრიამ შვიდი სანთელი აანთო და გამოქვაბულის კედელთან ისე განალაგა, რომ სურათი ნათლად გამოიკვეთა. ამონ-რამ იცნო, ვინც იყო კედელზე გამოსახული. ის იყო, ერთხელ თვალუბრებულმა რომ იხილა და ანდრიას უთხრა: ის დავინახეო. ისიც გაახსენდა, როგორ იძირებოდა მაშინ უსაზღვროებაში, უსაზღვროება კი — მასში.

მოჯადოებულებით უყურებდა ბიჭი დიდებულ სახეს; ის თითქოს ღრუბლებიდან გამოდიოდა და თან ოქროსფერი ნათება მოჰყვებოდა.

ანდრია მუხლებზე დაეშვა.

ამონ-რაც მუხლებზე დაეშვა მის გვერდით.

ანდრიამ სურათს მავედრებელი თვალები მიაპყრო და ლოცვა აღავლინა. დიდხანს ლოცულობდა ანდრია. ამონ-რამ ვერ ხვდებოდა, რა სიტყვებით ლოცულობდა იგი. მასაც მოუნდა ლოცვა, გულში თავად დალაგდნენ სიტყვები, და ამონ-რამ უხმოდ წარმოთქვა ღაღადისი:

—ღმერთო დიდებულო!

თაყვანს ვცემ შენს წმიდათა-წმიდა სახელს.

მიმიღე შენს მონა-შსახურად,

ამკიდე ტვირთი შენი

და ამატანინე ეკლიანი ბილიკებით

მთის მწვერვალზე,

საიდანაც ჩაეწვდები

შენი სიყვარულის უსაზღვროებას

და შევიცნობ

შენი სიბრძნის სიღრმეს.

ამინ!

იმეორებდა და იმეორებდა ამონ-რა ამ ლოცვას. ყველაფერი სხვა დავიწყებული ჰქონდა. მეტყველებდა არა მისი ენა და გონება, არამედ სული და გული. მალე იგრძნო, რომ აუცილებელი არ იყო სიტყვები, გულს უნდა განეცადა ამ სიტყვებში ჩაქსოვილი ვედრება. თანდათანობით მთელი სხეული რაღაც უცნაური ჟრუანტელით გაეცსო. ბევრჯერ ულაპარაკნია ანდრიას სულზე. ახლა მიხვდა, რომ მის სხეულში სული თრთოდა, ცისფერი ცეცხლით ერთო და ამ ცეცხლის ცისფერი ალები, ანდრიას ცისფერ ალებთან ერთად, ანათებდა გამოქვაბულს; ცეცხლი მთელ გამოქვაბულს მოსდებოდა და კედლის სურათი უფრო ცოცხალი და მომხიბვლელი ჩანდა.

მასწავლებელს და მოსწავლეს მთელი ამ ხნის განმავლობაში ხატებისთვის თვალი არ მოუცილებიათ. ასე იდგნენ მუხლებზე, ხელები ღვთიური სახისკენ ჰქონდათ გაწვდილი, იწვოდნენ, ცისფერი ალებით გამოქვაბულს ანათებდნენ.

ვერცერთმა ვერ შენიშნა, როგორ მოხდა, რომ სურათი გაცოცხლდა და მათ წინაშე თავად ის აღიმართა, ნამდვილი, მოძლიმარი, გასხვიოსნებული უფრო დიდებულად, ვიდრე სურათზე. ის ანდრიასთან მივიდა ახლოს, თავზე ხელი დაადო, და ორივემ ნათლად გაიგონა, რაც თქვა:

— მშვიდობა თქვენდა, ანდრია, ნუ დააყოვნებ, წადი შენს ძმასთან.

ანდრიამ ფეხები დაუკოცნა და თრთოლვით ჩაილაპარაკა:

— ჰო, უფალო!

ამონ-რაც დაუკოცნიდა ფეხებს, მაგრამ ვერ გაბედა.

ამასობაში ის თითქოს კედელში შევიდაო, გაქრა, კედელზე კი ისევ აღიბეჭდა მისი დიდებული სახე.

ანდრია ჩოქვით მივიდა სურათთან და ფეხებთან ეამბორა.

— მიყვარხარ, უფალო! — წარმოთქვა გრძნობით, თუმცა ძლივს გასაგონად.

ამონ-რამ გაიმეორა მასწავლებლის მოქმედება.

შემდეგ ანდრია სწაფად წამოღგა და გამოქვაბულიდან გავიდა.

რიყრაუი ახლოვდებოდა, უმთვარო ღამის სიბნელე სა-
შუალებას არ აძლევდა მასწავლებელსა და მოსწავლეს ერთ-
მანეთი დაენახათ. ხანგრძლივი ღუმილის შემდეგ ანდრიამ
ამონ-რა ახლოს მიიზიდა.

— ხომ გაიგონე, რა თქვა მან?

— გავიგე!

— გაიმეორე!

— მშვიდობა თქვენდა! ანდრია, ნუ დააყოვნებ, წადი
შენს ძმასთან!

— ჰოდა, არ უნდა დავაყოვნო!

ანდრია გაჩუმდა. ამონ-რა ვერ ბედავდა რაიმე ეკითხა.
გაგონილი ჰქონდა, რომ მარას კიდევ ერთი ძმა ჰყავდა —
სიმონი. ის გალილეთის ზღვის ნაპირზე ცხოვრობდა, ორი
დღის საუალზე. ძმები მეზადურები იყვნენ და ამით არჩენდნენ
ოჯახს. შემდეგ ანდრია კითხვისა და მეცნიერების შესას-
წავლად სხვადასხვა ქვეყნებში გაემგზავრა, ეგვიპტეშიც იყო,
ბევრი იხეტიალა და ბოლოს გამოქვაბულებში დასახლდა. და
აი, დადგა დრო, როცა ანდრია დაუყოვნებლივ უნდა დაბრუნ-
დეს ძმასთან. ალბათ, ასეა საჭირო.

ამონ-რა ელოდა, კიდევ რას ეტყოდა ანდრია.

— შენ მე აღარ გჭირდები, უჩემოლაც გაიკვლევ გზას! —
ანდრია ქვაზე ჩამოჯდა, ამონ-რა მის გვერდით ჩაიკეცა.
ანდრია თავზე და ბეჭებზე ხელს უსვამდა ამონ-რას, ეფერე-
ბოდა. ეტყობოდა, ღელავდა, მაგრამ მის ხმაში სიმშვიდე და
სიყვარული იგრძნობოდა, — გამოქვაბულში რაც არის, ყველა-
ფერს შენ გიტოვებ, გამოიყენე, როგორც საჭიროდ ჩათვალს.
მე აქ აღარ დავბრუნდები...

ამონ-რას ტირილი მოუნდა.

— ველარასოდეს გნახავ? ანდრია, ძალიან მიყვარხარ!

— მეც მიყვარხარ, ჩემო ბიჭო! ჩვენ კიდევ შევხვდებით
ერთმანეთს. ეცადე დროზე ამოიციო ქვაწერილის საიდუმლო!

— შევეცადები! — დაპირდა ამონ-რა. უნდოდა ეთქვა, რო-
გორი სიზმარი ნახა ქვაწერილთან დაკავშირებით, მაგრამ გა-
დაიფიქრა, სიზმარი ჯერ კიდევ არ ნიშნავდა ქვაწერილის
ამოცნობას. მასწავლებელთან უხმო საუბარი გააბა. სხვა
დროს არაერთხელ ჩაესმოდა ხოლმე ყურში ანდრიას ხმა,
როცა ანდრიასგან სადმე მოშორებით იმყოფებოდა. ახლა კი
მასწავლებელი და მოწაფე უხმოდ საუბრობდნენ.

„შედი ჩემს ლაბორატორიაში, იქ ბევრი მაღამოს დამზადების წესს იპოვი.“

„კარგი, — ფიქრით უპასუხა ამონ-რამ, — შეიძლება იორამს ვასწავლო, რაც შენ მასწავლე?“

„იორამი კარგი ბიჭია. ასწავლე იმდენი, რამდენიც შეგებლოს. გული გეტყვის, რა შეიძლება გაუმზილო მას, — უპასუხა ანდრიამ და გააგრძელა, — დაათვალიერე ჩემი ხელნაწერები. სკივრებში ბევრი წიგნია, გამოიყენე შენი მოწაფეებისათვის“.

„მე რომ მოწაფეები არა მყავს?“ — გაიკვირვა ამონ-რამ.

„გეყოლება.“

„ანდრია, შენი ქვაწერილი ხომ არ გავიწყდება?“

„ქვაწერილს გამოქვაბულში ვტოვებ, ის მე აღარ დამჭირდება, უკვე ყველაფერი მითხრა“.

„ანდრია, სასტუმრო გამოქვაბულში რომ შევიდე, შეიძლება?“

„სასტუმრო გამოქვაბულს უფლის გამოქვაბული დავარქვით. შედი უფლის გამოქვაბულში, როცა გულმა გითხრას.“

„ანდრია, ირიჟრაჟა.“

„ჰო, ირიჟრაჟა, ჩემი წასვლის დროა.“

ანდრია ფეხზე წამოდგა. ამონ-რას თვალებში ჩახვდა. ბიჭის სახეში დილის პირველი ნათება ირეკლებოდა, მისი გული სიყვარულის ცეცხლს აფრქვევდა ანდრიას, გზას ულოცავდა მასწავლებელს.

„ამონ-რა, დაიხსომე, შენ უკვე დიდი ხანია აღარა ხარ პატარა, — ჩაესმა ამონ-რას ანდრიას მშვიდი ხმა, — ვინც კითხვა და მეცნიერება იცის, ის აღარ არის ბავშვი. მიჰყევი შენს გზას, როგორი ძნელიც არ უნდა იყოს იგი.“

ამონ-რას მასწავლებლის დარიგება გულში კეთილ სითბოდ ჩაეღვარა. ხელები კისერზე შემოხვია და ჩაეკრა. გრძობდა ამონ-რა, რომ ანდრიამ ეკლებიანი და გაუკვალავი გზა აირჩია, ეს გზა მაღლა-მაღლა მიემართება. ანდრია ამ ეკლიანი გზის გასატკეპნად მიდის, რომ სხვებსაც გაუადვილდეთ აღმასვლა. ძნელი ცხოვრება ექნება ანდრიას, შეუძლია არ წავიდეს, გამოქვაბულში იჯდეს და წეროს წიგნები, ატაროს ცდები თავის ლაბორატორიაში, გამოიგონოს ახალი სამკურნალო მაღამოები. ანდრიას შეუძლია არ წავიდეს გრძელი გზით, მაგრამ არ შეუძლია, რომ სწორედაც ამ გზით

არ წავიდეს. ეს მისი გზაა. ალბათ, ასე წერია მის ქვა-წერილზე. ანდრიას კიდევ უხარია, რომ დადგა ღრო, და სულ მალე ძნელ გზას გაუყვება. რამდენი წელი ელოდა გამოქვაბულში მოვლენას, რომელიც ახლახანს მოხდა. და აი გამოეცხადა ის, ვინც უნდა გამოცხადებოდა, მას მიყვება მასწავლებელი, კეთილი იყოს შენი ეკლიანი გზა, ანდრია. ამ ფიქრებში ეფერებოდა მოწაფე მასწავლებელს.

— მაღლობა, ჩემო ბიჭო, რომ გიყვარვარ, მენდობი! — ყურში უჩურჩულა ანდრიამ ამონ-რას, — მშვიდობით, ღმერთი გფარავდეს!

მზის პირველმა სხივმა ამოწვერა.

მასწავლებელი თავის გზას დაადგა. წავიდა ისე, რომ უკან არ მოუხედავს. ამონ-რა დიდხანს იდგა გამოქვაბულის წინ.



მეცამეტე თავი

დამეხმარე, ქვაწერილო, გამიხსენი საიდუმლო

მზე კარგახნის ამოსული იყო, მისი ფიქრი კი ისევ ანდრიას უტრიალებდა.

„მაღლობთ, მასწავლებლო, მე უკვე დიდი ვარ, და ეს შენი წყალობითაა!“ — მისძახოდა ფიქრებით ანდრიას.

„ქვაწერილი გამოიცანი!“ — ჩაესმა ყურში ანდრიას ხმა და ამონ-რა მაშინვე ქვაზე ჩამოჯდა, უბიდან ტოპრაკი ამო-აცოცა და ქვაწერილი ამოიღო. იქვე დიდი ბიჭის ქვაწერილიც იღო. ორივე მიწაზე დააწყო და დააკვირდა.

ამონ-რამ სიზმრის გახსენება სცადა. ახსოვდა, რომ საიდუმლოების გასაღებს მიაგნო, მაგრამ ველარ მოასწრო სიზმრიდან მისი გამოტანა, რალაცამ შეუშალა ხელი და გასაღები სიზმარში ჩარჩა. რამ შეუშალა ხელი?

დაჰყურებდა ამონ-რა ქვაწერილს და ისევ სიზმარში შესვლას ცდილობდა.

„რალაცამ შემიშალა ხელი... გასაღები ხელიდან გამაგლებინა... იქნებ, დიდი ბიჭის ქვაწერილმა შემიშალა ხელი? რატომ ვატარებ ამ ორ ქვაწერილს ერთად? ან რატომ დავდე დიდი ბიჭის ქვაწერილი ჩემი ქვაწერილის გვერდით? — გაიფიქრა ამონ-რამ და იმედი მიეცა, დიდი ბიჭის ქვაწერილი მოშორებით დამალა ბურქებში, თავისი კი ხელისგულზე დაიდო და ხაზებს ჩახედა.

ხაზები! რა თქმა უნდა, ხაზები ქვაზე და ხაზები ხელისგულზე! სიზმარში სწორედ ამ ხაზებს ადარებდა ერთმანეთს. ახლაც ეს გააკეთა ამონ-რამ: ხან ხელისგულის ხაზებს აკვირდებოდა, ხან ქვაწერილის ხაზებს. და უცბად სიხარულმა აიტანა: ხაზები ერთმანეთს გვანან, ერთნაირად არის დახაზული ჩემი ხელისგულიც და ქვაწერილიც. მაშ ეს ქვაწერილი ნამდვილად ჩემია!“ აღრეც გრძნობდა, რომ ქვაწერილი მისი იყო, ამჯერად კი საიდუმლოს ფარდა აეხადა.

მთავარი ასო-ნიშნების ამოკითხვაა. სიზმარში ამასაც მიაგნო, მაგრამ რა იყო ეს?

ამონ-რამ ასო-ნიშნებს დაუწყო კირკიტი. „რა ლამაზი ასო-ნიშნებია! რას მაუწყებენ ისინი?“

ასო-ნიშნები ქვის ორივე მხარეს ჯგუფ-ჯგუფად და დახრილად იყო განლაგებული. მათში ამონ-რამ მსგავს ნიშნებს დაუწყო ძებნა და თითოეული მათგანი ჩხირით მიწაზე გამოსახა. სულ ოცდაერთი ასო-ნიშანი გამოვიდა. ზოგი მათგანი ხშირად მეორდებოდა. ანდრიამ ასწავლა, რომ მეტყველებაში ხშირად გრძელი ბგერები მეორდებიან და მეტყველების მუსიკას ქმნიანო. „მაშ თუ ასეა, ეს ოთხი ნიშანი გრძელ ბგერებს უნდა აღნიშნავდეს, — დაასკვნა ამონ-რამ, — დაეუშვათ, ეს ნიშანი არის „ა“, ეს კი „ი“, ვნახოთ, რა გამოვა“. მათი მეშვეობით ამონ-რამ ამოიკითხა:

„ა . . . ა . . . ი . . .“ სხვა ორ ნიშანს „ე“ და „უ“ უწოდა. შემდეგ მოკლე ბგერების ნიშნების დაჯგუფება სცადა. ასე მიაღმა ნიშანთა ჯგუფს, რომელიც მეორე მწოლარე ხაზის ბოლოს იყო გამოყვანილი: „უ . . . უ . . .“

მოკლე ბგერების ჩანაცვლებით მიაკვლია „ს“, და წაიკითხა:

„უსას . უ . . .“

„დამეხმარე, ქვაწერილო, შემეშველე, გამიხსენი საიდუმლო!“ — შეეხვეწა ამონ-რა ქვაწერილს და ამ დროს გაახსენდა, როგორ წამოიძახა სიზმარში: „აჰა, ამასაც მივხვდი! გმადლობთ, უფალო!“ უფალი... უფლის გამოქვაბული, უფალი ეწვია ღამით ანდრიას. „უფალი?!“ — გაუკვირდა ამონ-რას და გულის სიღრმიდან თითქოს ვიღაცამ ამოსძახა: „ჰო, უფალი!“

ამონ-რამ იმ სიტყვას დაუწყო ძებნა, რომელიც „უ“-თი იწყებოდა. მიაგნო კიდეც, ეს ბოლო სიტყვა იყო. დიდი ჯაფა აღარ დასდგომია, ადვილად ამოხსნა ყველა ნიშანი და წაიკითხა: „უფლისა“. გაიხარა ბიჭმა. აი, სიზმარში დარჩენილი გასაღებიც. ექვსი ასო-ნიშანი ნამდვილად იცის. ისევ მიუბრუნდა მეორე მწოლარე ხაზის სიტყვას და ადვილად ამოიკითხა: „უსასრულო“. ექვს ასო-ნიშანს კიდეც სამი მიემატა. ცხრა ასო-ნიშანი გამოცნობილია, ქვაწერილი ლაპარაკს იწყებს. მოუთმენლობამ შეიპყრო ამონ-რა. „რას მეტყვის ჩემი ქვაწერილი?“ გულისძგერით ჩაუკვირდა პირველ სიტყვას და, როგორც კითხულობს ხოლმე ბავშვი, რომელმაც ეს-ეს არის ისწავლა ანბანი, ასო-ასო, ჩათვლით,

ნელა და ბორბიკით, — ისე წაიკითხა ქვაწერილის სტრიქონები, რომლებიც ამონ-რას აუწყებდნენ:

„იყოს გზა შენი
მოკლე და უსასრულო,
ეკლიანი და აღმაველი,
რამეთუ
შენ ხარ ვენახი
უფლისა“.

ამონ-რა სიხარულისგან ფეხზე წამოხტა და ხტუნვა დაიწყო, საზღვარი არ ჰქონდა მის ბედნიერებას. სად არის ანდრია, რომ ისიც გაახაროს. ქვაწერილს ნაზად მოეფერა, როგორც ცოცხალ და საყვარელ არსებას; აკოცა და გულთან მიიკრა. ახლალა შენიშნა, რომ მზე უკვე ჩასული იყო და კიდევ დაღამდა. ირგვლივ არაფერი ჩანდა, მარტო ცაზე ციმციმებდნენ ვარსკვლავები. „როგორ ვკითხულობდი ქვაწერილს სიბნელეში?!“ — გაუკვირდა ამონ-რას და ქვაწერილს დახედა. დახედა და სახტად დარჩა: ქვაწერილზე ხაზებიც და ასოებიც ცისფრად ანათებდნენ, მკრთალად და ნაზად, ქვაწერილი ლაპარაკობდა, დაღაღებდა. როგორ უცბად და შეუმჩნევლად გაიქცა დღე. დილას აქეთ ზის გამოქვაბულების წინ და კოსმოსის სიღრმიდან გამოგზავნილი გამოცანის ამოხსნას ცდილობს. მიაღწია მიზანს, სიზმარიც დაეხმარა, სამყაროც დაეხმარა და წაიკითხა საკუთარი ქვაწერილი. მზე კი ჩავიდა და დაღამდა, მაგრამ ამონ-რას გულში ამოვიდა მზე და განათლდა გულიც და გონებაც. ამონ-რამ ველარ დაიტირა მოზღვავებული სიხარული და მისმა გულმა მასწავლებელს გასძახა: „ანდრიაააა! წავეკითხე ქვაწერილი, ანდრიაააა!“ — და ქვაწერილის ცისფერცეცხლოვანი ასოები კიდევ ერთხელ, იქნებ მეათასედ, გაახშიანა. თავისთვის კი არა, ანდრიას წაუკითხა ხმამაღლა, რომ გაეგო მასწავლებელს, და მასაც გახარებოდა. კითხულობდა ამონ-რა ქვაწერილს და თითქოს სამყაროც მოსძახოდა, ვარსკვლავიდან ვარსკვლავზე გადასცემდა ექოს, რომ იქნებ როგორმე მოსწავლის ძახილი მასწავლებლის ყურამდე მიეტანა: „... რამეთუ შენ ხარ ვენახი უფლისა!“ აი, რა მითხრა ქვაწერილმა, ანდრიაააა!“ ამონ-რამ ყური მიუგდო ვარსკვლავების ექოს და პასუხს დაელოდა. პასუხიც მალე მიიღო. „ამონ-რააა! ვამაყობ შენით! — ჩამოსძახეს ვარსკვლავებმა ანდრიას გახარებული ხმით, — ახლა

ყოველი სიტყვის საიდუმლოს ჩაწვდი, შენი მისია ამოიცანი და მიჰყევი მას, ამონ-რაას! ვარსკვლავები დადუმდნენ, მზოლოდ ბრწყინავდნენ და ციმციმებდნენ. სრულმა დუმილმა დაისადგურა ამონ-რას ირგვლივ. და ბიჭი გრძნობდა, როგორ ივსებოდა მისი სული სამყაროს ცეცხლით. იგი ამ დროს გამოქვაბულის წინ კი არ იდგა და ვარსკვლავებს გასცქეროდა, არამედ უსაზღვროებაში დაჰქროდა და ვარსკვლავებს ეთამაშებოდა. თანდათან გამოერკვა ამონ-რა და ისევ აუღერდა მასში ანდრიას ძახილი — შენი მისია ამოიცანიო. ამონ-რა მიხვდა, რომ წაკითხვა და წაკითხულის გაგება სხვადასხვა რამ არის. სიტყვაში აზრია ჩადებული, საიდუმლოა ჩაკეტილი. ამ საიდუმლოს ანდრიამ მისია უწოდა. ქვაწერილს ბოლომდე არ უთქვამს თავისი სათქმელი. რატომ დატოვა თავისი ქვაწერილი ანდრიამ გამოქვაბულში? იმიტომ რომ ჩაწვდა მის საიდუმლოს, ამოიცნო საკუთარი გზა და მოთმინებით ელოდა გამოცხადებას. რა გაიგო ამონ-რამ თავისი ქვაწერილიდან? იყოს შენი გზა მოკლე და უსასრულოო. მიხვდა განა, როგორ შეიძლება იყოს გზა მოკლეც და უსასრულოც? შენ ხარ ვენახი უფლისაო. რატომ არის ამონ-რა ვენახი და როგორია უფლის ვენახი? ეკლიანი და აღმავალიო. მართლა ეკალ-ბარდები იგულისხმება აქ და აღმართზე მიმავალი ბილიკი? რაც უფრო ღრმად უკვირდებოდა ამონ-რა ამ კითხვებს, მით უფრო რწმუნდებოდა, რომ დიდი არჩევანის წინაშე აღმოჩნდა: ან ამ გზით უნდა წასულიყო, ან იმ გზით. ქვაწერილზე ერთი წერტილიდან ორი ხაზი ამოდიოდა: ერთი მაღლა-მაღლა მიემართებოდა და ღრუბლებში იკარგებოდა, თუმცა დასაწყისში კიდევ წყდებოდა; მეორეც მაღლა მიემართებოდა, მაგრამ ღრუბლებიდან დაბლავე წვიმასავით ეშვებოდა. რა გზებია ეს და რომელ გზას ურჩევს ქვაწერილი?

უკვე გვიანი იყო, და ამონ-რამ გამოქვაბულს მიაშურა. მართალია, ჯერ კიდევ ბევრი რამ ჰქონდა გასარკვევი, მაგრამ სული მაინც ზეიმობდა. ამონ-რას ძალიან მოუნდა უფლის გამოქვაბულში შესვლა. ადვილად მონახა სიბნელეში სანთლები. შვიდი სანთელი ანთო და გამოქვაბულში ისე გააწყო, როგორც ანდრიამ იცოდა. განათდა გამოქვაბული და უფლის დიდებული გამოსახულება. ამონ-რამ მუხლი მოიფარა, ორივე ხელი მისკენ გაიშვირა და წინა ღამით დაბადებული ლოცვით

გული გაივსო. „ღმერთო დიდებულო, — სასოებით დაღაღებდა გული, — თაყვანს ვცემ შენს წმიდათა-წმიდა სახელს. მიმიღე შენს მონა-შსახურად, ამკიდე ტვირთი შენი და ამატანიე ეკლიანი ბილიკებით მთის მწვერვალზე, საიდანაც ჩავწვდები შენი სიყვარულის უსაზღვროებას და შევიცნობ შენი სიბრძნის სიღრმეს. ამინ!“

მთელი დღის უჭმელსა და უსმელს არც უგვრძენია, რომ შია ან წყურია.

არც დაღლა უგვრძენია.

უფლის გამოსახულების წინ ლოცვაში ჩაეძინა ამონ-რას.



მეთოთხმეტე თავი

სული შრომობს და კეთილშობილებით მდიდრდება

სული შრომობსო, ასწავლიდა ანდრია თავის მოწაფეს.
სხვანაირი შრომა სცოდნია სულს.

სული მაშინ შრომობს და ოფლად იღვრება, როცა გწყურია და მაცოცხლებელ წვეთებს მოწყურებულს ასმკვ; როცა გშია და ლუკმას, რომელმაც უნდა გადაგარჩინოს, დამშეულს გაუწვიდ; როცა ავად ხარ და წამალს, რომელმაც უნდა განგკურნოს, შენსავით ავადმყოფს ახმარ.

სული მაშინ შრომობს, როცა არ გინდობენ და ინდობ, არ გითმობენ და უთმობ, არ გახარებენ და ახარებ, არ გესალმებიან და ესალმები.

სული შრომობს, როცა სიკეთეს თესავ, როცა მდაბლდები, რათა აღამაღლო სხვა, როცა ლოცულობ შენი მაწყვერისათვის, როცა სხვის საშველად მიიჩქარი.

სული შრომობს, როცა ქარის ჩურჩულს ისმენ და ეხშიანები, როცა ჩიტი გალობს და ემადლიერები, როცა ძალი დაგყევს და მივალერსები, როცა ვარსკვლავებს გასცქერი და გული მათკენ მიგიწევს.

სული შრომობს, როცა შიშს სობ, პატივმოყვარეობას ცეცხლში ფერფლავ, შურს წყალს გაატან, უნდობლობას ქვასანაყით დანაყავ.

სული შრომობს იქ, სადაც წყვილია და სანთლად აინთები, უწყლობაა და წყლად იქცევი, არ არის ხიდი და ხიდად გაიდეგი, მიუსაფრობაა და თავშესაფრად იქცევი.

სული შრომობს, როცა გაცებს სამყაროს უსაზღვროება და სილის ნამცეცი, მზის სხივი და ციციანათელას ნათება, ღრუბელთა ქარავანი და ახლადდაბადებული ბატკანი.

სული შრომობს, როცა საკუთარ ქვაწერილს ეძებ, მის საიდუმლოს ამოიცნობ და შენს გზას დაადგები.

სული შრომობს, როცა აღიდეგ და თავყვანს სცემ შემოქმედს.

სულის შრომა სიყვარულია.

სულის შრომა სიყვარულში ანთებული ფიქრია.

ფიქრი და სიყვარული სულის ამაღლების საფეხურებია. ლამაზად, გმირულად და სიყვარულით იფიქრეო, არი- გებდა ამონ-რას ანდრია.

სული ტყუილად კი არ შრომობსო, განუმარტავდა ანდრია, შრომობს იმიტომ, რომ ამაღლდეს, გაძლიერდეს, უსაზღვროების სივრცეებს მისწვდეს, ვარსკვლავიდან ვარს- კვლავზე გადაფრინდეს.

სულმა არ იცის დასვენება, შრომობს დღითაც და ღამი- თაც, მაშინაც, როცა სიზმარში ხარ ან ღრმა ძილით გძინავს.

ღრმა ძილით ჩაიძინა ამონ-რამ უფლის გამოქვაბულში, უფლის გამოსახულების წინ, ლაპლაპა სანთლების შუქზე. იწვა მარჯვენა მხარზე, წელში მოხრილი; ხელები სურათის- კენ დარჩა გაწვდილი. სუნთქა შეუნელდა, თითქოს აღარც სუნთქავდა და აღარც გული უცემდა.

ამონ-რას ღრმა ძილით ეძინა, მისი სული კი შრომობ- და.

სული მსუბუქად ამოსრიალდა სხეულიდან; სხეულს არაფერი უგვრძენია.

სულმა ჯერ ხატს სცა თაყვანი, მის ფერხთით განე- ფინა, შემდეგ ნელა ასრიალდა მაღლა, კედლის სურათის გულში გაიარა და გამოქვაბულიდან გარეთ გავიდა.

უმთვარო ღამე კი იყო, მაგრამ სული ყველაფერს ხე- დავდა. ხედავდა იმასაც, რასაც ყველა ადამიანი ხედავს, და იმასაც, რასაც ადამიანები ვერ ხედავენ. სული იქითა, უხი- ლავ სამყაროში იმყოფებოდა.

ამონ-რას სულს დიდი საზრუნავი ჰქონდა.

ამონ-რამ უკვე მიაგნო საიდუმლოს, რომლითაც მალე სრულად შეიცნობს საკუთარ ქვაწერილს. ანდრიამ მოწაფე სწორ გზაზე დააყენა. მაგრამ ვინ იცის, რა სიძნელეები დახვდება გზაზე პატარა ბიჭს? ამონ-რა გაიგებს, რას ნიშნავს ქვაწერილში ნათქვამი — იყოს შენი გზა მოკლე ან იყოს შენი გზა ეკლიანი. როგორ მოიქცევა ამონ-რა, — აირჩევს მოკლე და ეკლიან გზას და გაჰყვება მას ერთგულად, თუ გრძელ და უეკლო გზას ამჯობინებს? ბიჭი ბევრ ცდუნებას შეხვდება ცხოვრებაში. გაუძლებს თუ ვერა მათ?

კოსმოსი კი გაფრთხილებას იძლევა: ადამიანმა თვითონ უნდა აირჩიოს გზა და ბილიკი.

ამონ-რას სულმა საკუთარი ძალების გამოცდა მოიწადინა.

„ენახოთ, სადამდე ავფრინდები?“ — თქვა და ელვისებური სისწრაფით აიჭრა მაღლა. დიდი მთების მწვერვალები ქვევით ღარჩა. თანდათანობით დედამიწაც დაპატარავდა, დაპატარავდა და ციცქნა ვარსკვლავის ხელა გახდა. მიიწევს ამონ-რას სული სანატრელი ვარსკვლავისაკენ. იგი რამდენიმე ათასი წელია ეძახის ამონ-რას სულს, იქ მას სხვა სრულყოფა და განვითარება ელის. მიჭრის სული ვარსკვლავისკენ, ის კი დიდდება, უზარმაზარი ხდება, ფერებს იცვლის, თანდათანობით ცისფერ ცეცხლად იქცევა და სხივებად ცისარტყელებს უშვებს. სული აღტაცებულია, ცოტაც და სულ ახლოს მივა მასთან.

მაგრამ... სანუკვარ ვარსკვლავს ამონ-რას სულმა ვერ მიაღწია, რაღაც ძალა დააკლდა, რომ მის ცისფერ ალს, ცისარტყელის სხივებს შეხებოდა. ამან არ დააღონა სული, პირიქით, ბედნიერება განიცადა, რადგან ამჯერად უფრო მაღლა აფრინდა, ვიდრე ერთი წლის წინ; ამჯერად ცისარტყელის სხივებიც დაინახა. ეს გამარჯვებაა.

მამასადამე, ამონ-რა საკუთარ გზას მიჰყვება, გუმანით მიდის ამ გზით. სული საბოლოო გამარჯვებას მაშინ მიაღწევს, როცა ამონ-რა თავის მოკლე და ეკლიან გზას ბოლომდე გაივლის. აი მაშინ შეიძენს სული იმ ნაკლულ ძალასაც, რაც ახლა დააკლდა. მაგრამ, თუ მოხდა ისე, რომ ბიჭმა შეცდომა დაუშვა, თუ რამე ცდუნებას ვერ გაუძლო, სული იმ სიმაღლესაც დაკარგავს, რასაც მილიონი წლის ცხოვრებითა და შრომით მიაღწია, დაბლა დაეშვება და, ვინ იცის, რამდენი ათასი წელი დასჭირდება, რომ ისევ მოიკრიბოს ძალა.

ამიტომ ზრუნავს ამონ-რას სული: ეს არ უნდა მოხდეს, ბიჭმა ბოლომდე უნდა გაუძლოს ცხოვრების გამოცდას.

ამონ-რას სული მრავალი ათასი წლის განმავლობაში ვითარდებოდა და სინათლის გზას მიჰყვებოდა. იგი მრავალჯერ დაიბადა დედამიწაზე და სხვადასხვა ცხოვრება გაიარა.

ერთ ცხოვრებაში ამონ-რა მწყემსად მოეკვლინა ქვეყანას, მაშინ მას გენადოსი ერქვა, რაც კეთილშობილს ნიშნავს. უკრავდა კეთილი მწყემსი სალამურზე, ზარობდა მთებითა და ველებით, ყვავილებითა და ნაკადულებით. გადაჰყავდა ცხვრის

ფარა ერთი საძოვრიდან მეორეზე, ზრუნავდა თითოეულ ცხვარზე და ახალდაბადებულ ბატკანზე.

მეორე ცხოვრებაში ალექსანდროსს ანუ დამცველ ვაჟ-კაცს ეძახდნენ. იგი მეომარი იყო და სხვათა თავდასხმებისგან იცავდა თავის ტომს. მამაცურად იბრძოდა და ბრძოლაში დაიღუპა.

მესამე ცხოვრებაში ვაჭარი გახდა. მას კონსტანტინე ანუ შეუპოვარი ერქვა. მიჰყავდა კონსტანტინეს აქლემების ქარავანი ერთი ქვეყნიდან მეორეში, მიჰქონდა და მოჰქონდა ადამიანებისთვის სავაჭრო საქონელი, შეუპოვრად სერავდა უდაბნოებს. მაგრამ ერთხელაც უდაბნოში ყაჩაღები დაესხნენ, მეგობრები დაუხოცეს, თვითონ კი მაშინ მოკლეს, როცა ბავშვიან ქალს იცავდა.

მეოთხე ცხოვრებაში იგი იოანეს სახელით გახდა ცნობილი. ეს სახელი ღვთისგან შეწყალებულს ნიშნავს. მას მბრძანებელი განურისხდა, რადგან მისი ბნელი საქმეები და ბოროტებანი აშხილა. მბრძანებელმა იგი დილეგში ჩააგდო. ოცდაათი წელიწადი გაატარა დილეგში. იქ დაიწყო ლექსების წერა და ხალხმა შეიყვარა იგი.

მეხუთე ცხოვრებაში ტაძრის მსახური იყო და სიმონს ეძახდნენ. „ღმერთი ისმენს მის ლოცვას“, — ეს აზრი უღერდა მის სახლში. ტაძრის გარშემო იშვიათი სილამაზის ბაღი გააშენა; უყვარდა და ეფერებოდა ყოველ ბურქს. ვარდის, ლოტოსის, კამელიების სურნელი უხვად იფრქვეოდა ტაძრის ირგვლივ. მხურვალე ლოცვა იცოდა სიმონმა და ღრმად მოხუცმა ლოცვაში დალია სული.

მეექვსე ცხოვრებაში მეფე გახდა, მაქსიმუსს ანუ უდიდესს უწოდებდნენ. ბრძნულად მართავდა დიდ სახელმწიფოს, სამეფოში სამართლიანობა დაამყარა, გაჰყავდა გზები, აშენებდა ხიდებს, ტაძრებს, მეგობრულად ცხოვრობდა მეზობელ სახელმწიფოთა მეფეებთან და ხალხს თავიდან აცილებდა ომებს, სისხლისღვრებს, ნგრევას და ძარცვას.

რომელიღაც ცხოვრებაში ტყვედ ჩაიგდეს და მონად გაყიდეს, მან კი მონები ბატონების წინააღმდეგ ააჯანყა და თავისუფლება მოითხოვა. მოლაღალტეებმა ვერაგულად მოკლეს.

კიდევ რომელიღაც ცხოვრება საშინელ სილატაკეში გაატარა, მაგრამ არ გაბოროტდა, არც ქურდობისა და ყაჩაღობის გზას დაადგა.

ასე გაიარა ბევრმა ცხოვრებამ.

ახლა კი, ახლანდელ ცხოვრებაში, სული პატარა ბიჭის სხეულშია, რომელსაც ამონ-რა ჰქვია.

მისი ცხოვრების ყველა გზა მაღლა და მაღლა მიიწევდა. სული კეთილშობილებით მდიდრდებოდა და ციურ ძალებს იკრებდა. ცოტაც და ამონ-რას სული ცეცხლოვანი სამყაროს მკვიდრი გახდება, სანუკვარ ვარსკვლავს მიაღწევს და განვითარების ახალ გზას დაადგება. მაგრამ პატარა ბიჭმა, რომელსაც მოკლე და ეკლიანი გზა უწერია, შეცდომა არ უნდა დაუშვას.



მეთხუთმეტე თავი

ორივეს ღიმილი რაღაც საიდუმლოს ფარავდა

ამონ-რას სული არ ჩქარობდა გამოქვაბულში დაბრუნებას, იგი ჯერ მძინარე მარასთან მიფრინდა.

მარა ფანჯარასთან იწვა.

შფოთიანად ეძინა.

მთელი დღე მეზობლის ავადმყოფ ბავშვს უვლიდა. ბავშვს დედა არ ჰყავდა, რა უნდა გაეკეთებინა მამას ბავშვისთვის, რომელიც სიცხით იწვოდა და მუცლის ტკივილით იტანჯებოდა. ბავშვი, როგორც იყო, გადაარჩინა მარამ, მაგრამ ნერვიულობამ და დაღლილობამ წელი მოსწყვეტა და არაქათგამოცლილს ჩაეძინა. ჩაეძინა და შფოთიანი სიზმარი დაადგა თავს. ხედავდა, როგორ ბობოქრობდა ზღვა და უზარმაზარი ტალღა ამონს ეჭიდებოდა. „გვევრები, ტალღავ, არ წამართვა ქმარი!“ – შესთხოვდა მარა ტალღას, მაგრამ იგი არ უსმენდა. მარას უნდოდა თავადაც გადაშვებულყო ზღვაში, ამონისთვის ეშველა ან მასთან ერთად დაღუპულიყო, ტალღა კი უკანვე ისროდა ქალს და ამონს არ ანებებდა.

ამ სიზმარში იყო მარა, როცა ფანჯრიდან ამონ-რას სული შემოფრინდა და მის სიზმარში შეიხედა. „საწყალი მარა, საწყალი ქალი, როგორ იტანჯება!“ – შეწუხდა სული და დაუყოვნებლივ გააძევა ცუდი სიზმარი. სამაგიეროდ მარას ახლა შვილის განათებული სახე წარმოუდგა. დედას გაუხარდა, მიუაღერსა შვილს. „როგორ ცხოვრობ, ჩემო ბიჭო, რა გასწავლა ანდრიაშ?“ შვილმა გაუღიმა დედას და უამბო, როგორ იპოვა საკუთარი ქვაწერილი და როგორ ცდილობს ამოიციოს მისი საიდუმლო. მძინარე მარას სახე შეეცვალა – დაუმშვიდდა და სიზმარს მთელი გულით მიეცა.

ამონ-რას სული მოეფერა მარას, სხეულში კეთილი ჟრუანტელი ჩაუღვარა და გაფრინდა.

გაფრინდა, მაგრამ შორს კი არ წასულა.

ქალაქის მეორე უბნის ერთ პატარა ეზოში იორამი იწვანაბადზე.

შუალამე გადასული იყო, ბიჭს კი ძილი არა და არ ეკარებოდა. შესცქეროდა ვარსკვლავებიან ცას და ამონ-რაზე ფიქრობდა.

როცა დედას უამბო, როგორ გადაუტყავდა მუხლები და როგორ მოურჩინა ამონ-რამ, დედამ არ დაუჯერა. მუხლები გაუსინჯა და უთხრა: არაფერიც არ გეტყობა გადატყავებულის და სისულელეებს ნუ ლაპარაკობო. რამდენიც არ უმტკიცა დედას, მართალს გეუბნებითო, არაფერი გამოვიდა. ბოლოს, როცა თავისი დაიჟინა, დედა გაბრაზდა კიდევ.

— იმ ბიჭს ახლოს აღარ გაეკარო, ეშმაკისეულია ეგ ბიჭი, მამამენიც გაგირისხდება! — გააფრთხილა დედამ მკაცრად.

„რატომ უნდა იყოს ამონ-რა ეშმაკისეული?“ — ფიქრობდა იორამი. კიდევ კარგი, რომ დედას ისიც არ უთხრა, როგორ აფრინდა ამონ-რა ჰაერში და სალომეც აიტაცა. „განა მარტო ეშმაკებმა იციან გადატყავებული მუხლების მორჩენა ან ცაში აფრენა? კეთილ ანგელოზებსაც ხომ შეუძლიათ ასეთი რამეები გააკეთონ? ამონ-რა ეშმაკისეული არ უნდა იყოს. მასავით კეთილი სახე მარტო კეთილ ანგელოზებს თუ ექნებათ. ამონ-რა კეთილი ანგელოზია...“ ასე ფიქრობდა იორამი, მაგრამ დედის სიტყვები მაინც ეჭვის ჭიასავით შეუჩნდა და მოსვენებას არ აძლევდა. სად ნახოს იორამმა ამონ-რა, რომ ჰკითხოს, ვინ არის ის. თუ კეთილი ანგელოზია, მაშინ წაიყვანოს თავისთან და ასწავლოს ყველაფერი, რაც თვითონ იცის. თუმცა გაუშვებენ მშობლები იორამს ამონ-რასთან? მშობლებს არც არასდროს უფიქრიათ, რომ ერთადერთი შვილისთვის კითხვა და მეცნიერება ესწავლებინათ. მამა იმასაც კი გაიძახოდა, რომ კითხვა ეშმაკების მოგონილიაო, მეცნიერება ეშმაკების საქმეაო. და ვინც ქალაქში კითხვა იცის, მამა ყველას ეშმაკსა და ჯადოქარს ეძახის. ეგენი ცეცხლში დასაწვავნი არიან თავიანთ წიგნებთან ერთადო. დედაც მამის აზრებს იზიარებს. რას იტყვიან ისინი, როცა გაიგებენ, რომ მათ შვილს იორამს კითხვისა და მეცნიერების შესწავლა სურს.

ამ ფიქრებში იყო იორამი, როცა ამონ-რას სული მის ეზოში შეფრინდა.

უხილავი სული, რა თქმა უნდა, ვერ დაინახა იორამმა, მაგრამ მისი ფიქრები სულ სხვანაირად შეიცვალა.

იორამს უცბად თვალწინ წარმოუდგა ამონ-რას განათებული სახე. ამონ-რა უღიმოდა მას.

„წამოდი ჩემთან, მე შენ მკურნალობას გასწავლი, ადამიანებს გადაარჩენ!“

„შენ საიდან იცი მკურნალობა?! - უკვირს იორამს, - შენ ჯერ პატარა ხარ, ჩემზე უმცროსიც კი ხარ!“

„მე არ ვიცი, მაგრამ აქ ანდრიას ლაბორატორიაა, წიგნები კი ანდრიას ნაწერებია. ერთად ვისწავლით მაღამობის დამზადებასა და გამოყენებას!“

„დღემ თქვა, რომ შენ ეშმაკეული ხარ. ამიკრძალა შენთან შეხვედრა. მართლა ეშმაკეულია ხარ?“

„შენ გულს ჰკითხე, ის გეტყვის“, - უპასუხა ამონ-რამ.

„შენთან რომ მოვიდე, კითხვა და მეცნიერება უნდა ვისწავლო. მამა კი ამბობს, კითხვა ეშმაკის მოგონილიაო, ყველა წიგნი დასაწვავიაო.“

„შენ ხომ თვითონ მთხოვე, წამიყვანე შენთანო, ჰოდა მოდი!“

„გთხოვე, მაგრამ... არ გამომიშვებენ!“ - შეწუხდა იორამი.

„ვინ გაკავებს? ადექი და წამოდი!“

„გამოვიპარო?!“

„ამას გამოპარვა არ ჰქვია. ეს შენი გზაა!“ - რწმენით უპასუხა ამონ-რამ.

იორამი ფეხზე წამოდგა და ირგვლივ მიმოიხედა. სად არის ამონ-რა? ვის ველაპარაკებოდი? მაგრამ ამონ-რა არსად ჩანდა.

ამონ-რას სულმა ბიჭს გულში სიმშვიდე და სითამამე ჩაუნერგა და გადაწვევტილება მიაღებინა.

„როგორ მოვიდე შენთან, გზა რომ არ ვიცი?“ - ჰკითხა იორამმა.

„იარე, როგორც გულმა გატაროს, და მომავნებ!“

იორამი ისე გავიდა ეზოდან და ქუჩას გაჰყვა, რომ სიბნელეზე არც უფიქრია. ამონ-რას სულმა ბიჭი გამოქვაბულების ბილიკამდე მიაცილა და შთააგონა: „არ შეგეშინდეს, რწმენით იარე!“

„არ უნდა შეგეშინდეს, რწმენით უნდა ვიარო!“ - უთხრა თავის თავს იორამმა და ბურქებში შევიდა. აქედან იწყე-

ბოლა მალლა მიმავალი ბილიკი. იგი არ ჩანდა, მაგრამ ფეხებს არ უჭირდათ მისი გაგნება.

ამონ-რას სული ახლა კი სალომესთან მიფრინდა. მიეაღერსა მძინარე გოგონას და თვალებში სიზმარი შეუგზავნა.

— რა, — ჩაილაპარაკა სიზმარში სალომემ, — ძალიან მომენატრე!

დედამ, რომელიც სალომეს გვერდით იწვა, ყური ცქვიტა: ბავშვს ხომ არ აბოდებსო. ბაღში გაუსწორა და შებლზე ფრთხილად აკოცა.

— ამონ-რა, იცოდე, დედას გამოვეპარები და შენს გამოქვაბულში მოვალ!

დედას გაუკვირდა, რას ლაპარაკობს ეს გოგო.

სალომეს სიზმარი კი უფრო ხალისიანი ხდებოდა. ამონ-რამ ხელში აიყვანა სალომე, დატრიალდა და მასთან ერთად ცაში აფრინდა. ისინი მალლიდან დასცქეროდნენ მთებს, მდინარეებს, სოფლებსა და ქალაქებს. შემოიფრინეს ნახევარი დედამიწა. სიზმარში ყველაფერს ცისფერსხივებიანი მზე ანათებდა. აღტაცებული გოგონა ხანდახან წამოიძახებდა:

— რა ლამაზია! კიდევ შემოუფრინე ამ მთებს! კარგად დამანახე ეს სოფელი!

ცისფერ ველზე ბიჭი ცისფერ ცხენებს აძოვებდა და სალამურზე უკრავდა.

— თუ შეიძლება, დავეშვათ იმ პატარა მწყემსთან და მოუუსმინოთ სალამურის ჰანგებს, — შეეხვეწა სალომე ამონ-რას.

სალომეს დედა ისმენდა ამ სიტყვებს და ვერ გაეგო, რანაირ სიზმარს ხედავდა შეილი. ის იყო გოგონას გაღვიძება დააპირა, რომ ამონ-რას სულმა დედას ძილი მოჰკვარა და მის თვალებშიც კეთილი სიზმარი შეუშვა.

სალომემ დიდად გაიხარა, არასოდეს მოუსმენია არც ასეთი მომხიბვლელი მუსიკა, ტანში რომ ჟრუანტელს ჰგვირინდა, და არც ასეთი ცისფერი ცხვრების ფარა უნახავს, სალამურის ხმაზე ტალღასავით რომ ირწყოდა. შემდეგ სალომე მწყემსი ბიჭის სახემ მიიზიდა და გაკვირებით წამოიძახა:

— ამონ-რა, როგორ გგავს ეს ბიჭი შენ, ოღონდ ცოტა უფროსია!

ამონ-რამ გაიღიმა და არაფერი თქვა. მწყემსმა ბიჭმაც გაიღიმა. ორივეს ღიმილი რაღაც საიდუმლოს ფარავდა.

— რა გქვია შენ? — ჰკითხა სალომემ ბიჭს.

„გენილოსი!“ — უპასუხა მწყემსმა. სახეზე კვლავ საიდუმლო ღიმილი დასთამაშებდა.

ამონ-რამ ისევ ღრუბლებში ააფრინა სალომე.

იქ, ძალიან მაღლა, სულ სხვანაირი სოფლები და ქალაქები გამოჩნდა. სალომეს არ შეეძლო სიტყვებით ეთქვა, რას ხედავდა, გული უძგერდა და სიხარულით ვესებოდა.

ამ სიზმარში დატოვა სალომე ამონ-რას სულმა და უფლის გამოქვაბულისკენ გაფრინდა.

ამონ-რა ისევ ისე გაუნძრევლად იწვა, როცა მისმა სულმა გამოქვაბულში შემოანათა. მან ჯერ მაღლი შესწირა უფალს, ხატებს ფეხებზე ეამბორა. შემდეგ ნელი და მსუბუქი მოძრაობით ამონ-რას სხეულში შესრიალდა და გაქრა.

ამონ-რამ გაიზმორა. „სად ვარ და ნეტავ რა დროა?“ — გაიფიქრა ბიჭმა.

გარეთ უკვე რიჟრაჟმა დაისადგურა.

თვალები გაახილა და მის წინ კედელზე უფლის გამოსახულება აღიმართა.

ამონ-რა მუხლებზე დადგა და გულიდან მხურვალე ლოცვა ადავლინა, ანდრიას სიყვარული შეუთვალა, ადამიანებს სიკეთე უსურვა, და ამ ღროს გარედან ფრთხილი ძახილი მოისმა:

— ამონ-რა, მოვედი შენთან!.. ამონ-რა, მოვედი შენთან! იორამი?!

ამონ-რამ ყურებს არ დაუჯერა.

საიდან გაჩნდა იორამი?!

ამონ-რას წარმოდგენაც არ ჰქონდა იმაზე, რომ მისმა სულმა იმოგზაურა და ძალები მოსინჯა, შემდეგ მარას და სალომეს მოველინა სიზმარში, ხოლო იორამს ძნელი, მაგრამ მისთვის მეტად საჭირო გადაწყვეტილება მიაღებინა.

ამონ-რა წამოდგა და იორამის შესახვედრად გაემართა.



თუ შენ გაცემა არ შეგიძლია, გასაოცარს ვერაფერში დაინახავ

ამ ბილიკით იორამს არასოდეს უვლია. ამ მთაზე არასოდეს ასულა.

ბავშვები ერიდებოდნენ ამ მთაზე ასვლას. ჯერ ერთი, უფროსები აშინებდნენ, ქვეწარმავლები და ხვლიკები არიანო, გამოქვაბულში ეშმაკები ცხოვრობენო; მეორეც, რატომ უნდა ასულიყვნენ მთაზე, როცა იქ არაფერს კარგს არ ელოდნენ. ამიტომ ქალაქში ყველას გაუკვირდა, ფილოსოფოსი გამოქვაბულში რომ დასახლდა. მაგრამ როდესაც გაიგეს, რომ მთაში, გამოქვაბულში, ფილოსოფოსთან ერთად, შვიდი წლის ბიჭი ცხოვრობსო და ფილოსოფოსი მას კითხვას და მეცნიერებას ასწავლისო, ყველა ალაპარაკდა, რა უნდა პატარა ბიჭს გველებსა და ხვლიკებში, ეშმაკების სამოსახლოში, რად გაწირა ასე დედამ შვილი? — ამბობდნენ ერთნი, ისინი, ვინც ღარიბ მებაღურს შორიდან იცნობდნენ და რომლებისთვისაც ფილოსოფოსი ეშმაკის მოციქული იყო, — გამოქვაბულების დიდი ეშმაკი პატარა ეშმაკს წვრთენისო, — აყვიობდნენ ისინი.

მაგრამ ვინც მარასა და ამონს იცნობდა, ვინც იცოდა, რა კარგი ბიჭი ჰყავდა მებაღურს, იმას ცუდს ვერ ათქმევინებდი ანდრიასთან სასწავლებლად გადასახლებულ პატარა ბიჭზე. კითხვასა და მეცნიერებას ისწავლის და კაცი დადგებაო, — ამბობდნენ ისინი. იორამი ქალაქის ბავშვებიდან პირველი იყო, ვინც გამოქვაბულებისკენ მიმავალ ბილიკს მიაშურა. „არ შეშინდე, რწმენით უნდა იარო!“ — ეუბნებოდა თავის თავს იორამი და მიდიოდა ზევით-ზევით, უკუნ ღამესა და სიბნელეში. მიდიოდა იმ რწმენით, რომ გული ატარებდა და ბილიკს არ გადაცდებოდა. იორამი აღარ ფიქრობდა იმაზე, რას იტყოდნენ ან რა დღეში ჩაცვივდებოდნენ მშობლები, როცა დილით ვერ იხილავდნენ ბიჭს, ეზოში ნაბადზე მწოლარეს, და როცა გაიგებდნენ, რომ თურმე ფილოსოფოსთან და მის მოწაფესთან, ანუ სატანებთან (აღბათ, ასე იტყოდა მამამისი) გაპარულა. მოიბულებდნენ შვილს, შინ აღარ შეუშ-

ვებდნენ. იორამი განუდგა ამ ფიქრებს. რაც მოსახდენია, უნდა მოხდეს, ამონ-რა კი სატანა არ არის! — ეს ღაიჯურა იორამმა იმ საუბრის შემდეგ, რომელიც მას, ნაბადზე წამოწოლილს, ამონ-რამ გაუმართა. აღარც ის უკვირდა იორამს, როგორ მოხდა, რომ ამონ-რა, რომელიც თავზე ედგა ნაბადთან, უღიმოდა და ესაუბრებოდა, უცბად თვალიდან გაუქრა.

„თვალდასუჭულმა რომ ვიარო, ბილიკს მაინც არ გადავუხვევ“, — ფიქრობდა ბიჭი. არც რამის ფაჩუნის აშინებდა, არც ჭოტის კვილი. ლომიც რომ გამოვარდნილიყო საიდანღაც, იორამი დარწმუნებული იყო, ისიც არაფერს დაუშავებდა კეთილ საქმეზე მიმავალ კაცს, მითუმეტეს ბავშვს, არც ლომი და არც მგელი, არც ქვეწარმავალი არაფერს ერჩის. ამ რწმენით მიაბიჯებდა ბიჭი ფეხშიშველა ფეხით, ეკალ-ბარდებიანი ბილიკით მაღლა და მაღლა და სიბნელეში ვერც ხედავდა, რომ მიდიოდა ტყეში, რომელსაც ქალაქელები ახლოსაც არ ეკარებოდნენ. ფეხებში არ ედებოდა ეკალ-ბარდები, ქვები და კუნძები, რადგან ეს ბილიკი სხვაგვარი ბილიკი იყო, — მას კაცი კითხვისა და მეცნიერების გზით მიჰყავდა.

ირიურაჟა, როცა იორამი გულმა გამოქვამულის წინ დააყენა. ბიჭმა ძლივს დაინახა გამოქვამულებში შესასვლელი. იქიდან არავითარი ჩამიჩუმი არ ისმოდა. იორამმა ფრთხილად და ხმადაბლა დაიძახა:

— ამონ-რა, მოვედი შენთან!.. ამონ-რა, მოვედი შენთან!

იორამმა ცოტახანს მოიცადა, და ისევ აპირებდა დაძახებას, როცა ამონ-რა გამოქვამულიდან გამოვიდა.

— იორამ, როგორ მოხვედი აქ? ვინ გასწავლა გზა? ღამით მოდიოდი?

— შუალამის მერე მოვდივარ! — უპასუხა იორამმა, — შენ ხომ მითხარი, გული გასწავლის გზასო. გულმა მომიყვანა! — უპასუხა იორამმა.

— მერე რატომ მოხვედი?

— როგორ თუ რატომ? შენ ხომ მითხარი, წამოდი ჩემთანო? კითხვასა და მეცნიერებას გასწავლის ანდრიაო. იმიტომ მოვედი, შენ დამპირდი, მკურნალს გაგზდიო!

ამონ-რამ ვერ გაიხსენა, როდის დაპირდა იორამს, მკურნალს გაგზდიო, ან როდის მოიწვია ის გამოქვამულებში.

— ანდრია წავიდა! — ანდრიასაკით მშვიდად თქვა ამონ-რამ, — ანდრია აღარ მოვა!

— მაშ ვინ მასწავლის კითხასა და მეცნიერებას? — შეწყუხდა იორამი.

— არ ვიცი! — დაფიქრებით თქვა ამონ-რამ და ქვაზე ჩამოჯდა. იორამიც მის პირდაპირ დაჯდა ქვაზე.

ალბოსავლეთი მხარე თანდათან წითლდებოდა. მზე ამოსასვლელად ემზადებოდა.

იორამი საგონებელში ჩავარდა. „შინ არ დავბრუნდები, — ფიქრობდა ბიჭი, — მაგრამ სხვაგან ვისთან წავიდე, რომ კითხვა და მეცნიერება მასწავლოს?“

ამონ-რაც ჩაფიქრდა: „ვასწავლი იორამს კითხვას და მეცნიერებას. ანდრიამ თქვა — იორამი კარგი ბიჭია, ასწავლე იმდენი, რამდენსაც შეძლებსო. ვასწავლი, მაგრამ მე ხომ არ ვეტყვი, რომ მისი მასწავლებელი ვიქნები? იორამი ჩემზე უფროსია, შეიძლება ეწყინოს.“

იორამი კი ამ დროს სწორედ ამას ფიქრობდა: „ამონ-რამ უკვე იცის კითხვა და მეცნიერება. ვთხოვ, რომ მასწავლოს.“

— ამონ-რა, იყავი ჩემი მასწავლებელი, — გულწრფელად წარმოთქვა იორამმა, — ერთგული და ბეჯითი მოწაფე გეყოლები!

ამონ-რამ ანდრიასეული სიმშვიდითა და უბრალოებით უპასუხა:

— კარგი, ვიქნები, თუ შენ გინდა!

— მინდა, ძალიან მინდა! — გაუხარდა იორამს.

ამონ-რა წამოდგა და გამოქვაბულში შევიდა. მალე დოქი და ორი ჯამი გამოიტანა. ორივე ჯამი ყვავილოვანი სითხით შეაყსო.

— დალიე! — გაუწოდა ჯამი იორამს.

იორამმა ჯამი გამოცალა და გაბრწყინებულმა შეხედა ამონ-რას.

— რა დამალევენე?

— მოგეწონა?

— ძალიან, მაგრამ რა არის?

— ის, რაც გჭირდებოდა, რომ დამენათეემა და ნამგზავრმა ძალები მოიკრიბო და საქმეს შეეუღლეთ. მაგრამ, ჯერ მითხარი, როგორ მოხვედი ამ სიბნელეში?

ამონ-რა კმაყოფილი იყო, რომ იორამმა სწავლისა და მეცნიერების წადილით ასეთი სიძნელე გადალახა, მაგრამ

გამოუცდელი ბიჭისთვის მთის ბილიკით სიარული საშიში იყო.

— ხომ ვითხარი, გულმა მომიყვანა მეთქი. ასე არ მასწავლე შენ? ჩემს წინ უჩინრად იდექი, მესაუბრებოდი და მარწმუნებდი, მკურნალს გაგზდიო, შემდეგ კი უცბად გაქრი. მეც დაუყოვნებლივ გამოგყევი შენ, მაგრამ როგორ ამომასწარი? ალბათ, სირბილით მოდიოდი!

ამონ-რა ჩააფიქრა იორამის ნათქვამმა. აშკარა იყო, იორამმა რაღაც მოჩვენება იხილა, მაგრამ აღარ გაჰყვა ვითარების გამორკვევას, რადგან ეს მისთვის არ იყო მთავარი.

— კარგი, სხვა დროს გავარკვიოთ ეს, ახლა კი საქმეს შევეუდგეთ. გამომყევი!

ამონ-რამ იორამი თავის გამოქვამულში შეიყვანა, რომლის კედლები და გუმბათი ანდრიას მიერ ასოებით, ტექსტებით, სურათებით, ვარსკვლავებიანი ცით იყო მოხატული. მზის პირველი სხივები გამოქვამულში შემოიჭრნენ და იქაურობა გაანათეს.

იორამი გაოცდა.

— ამონ-რა, ყველაფერს მასწავლი, რაც აქ წერია და ხატია?

— შენ თვითონ ისწავლი. მე მხოლოდ დაგეხმარები. ამას კი არა, ბევრ სხვა რამესაც ისწავლი.

ამონ-რამ აცალა, რომ იორამს კედლები დაეთვალიერებინა. შემდეგ თავისთან მოიხმო და ჩურჩულით, რომ იორამის მეტს არავის გაეგო, თითქოსდა გამოქვამულში მათ გარდა სხვა ვინმეც იყო, ჩურჩულით და ანდრიასეული ხმით დაიწყო:

— ეს ის მთაა, რომლის გულშიც ჩვენ ვართ. აქ არის ჩვენი გამოქვამულები. აი კიდევ სხვა მთა, რომლის იქიდან მზე ამოდის. შეხედე მზეს...

ასე შეუდგა იორამი კითხვისა და მეცნიერების გზას.

ამონ-რამ უკვე იცოდა, რომ ეს გზა იოლი არ იყო, მაგრამ ანდრიასგან ახსოვდა, რომ ამ გზაზე სწრაფად, ხალისიანად და ნაყოფიერად მიდის ის, ვისაც გაოცება შეუძლია. ანდრიამ გაოცების საიდუმლოც აუხსნა ამონ-რას.

ერთხელ ანდრიამ ამონ-რა ბილიკზე გააჩერა და ყვავილი დაანახვა.

— გინახავს ასეთი ყვავილი?

— კი, ჩვენს ბილიკზე ბევრია ასეთი ყვავილი! — უპასუხა ამონ-რამ.

— რა იცი მაგ ყვავილის შესახებ?

ამონ-რამ ვერაფერი უპასუხა: ყვავილის არც სახელი იცოდა და არც სხვა რამ.

— რას ხელავ მასში გასაოცარს? — ჰკითხა ისევ ანდრიამ.

ამონ-რა ყვავილს დააკვირდა.

— არაფერს, ჩვეულებრივი ყვავილია.

— დაიხსომე, ჩემო ბიჭო, — უთხრა ანდრიამ მშვიდი და ალერსიანი ხმით, — არც დედამიწის ზურგზე და მის სიღრმეებში, არც ცასა და სამყაროში არაფერი არ არის ჩვეულებრივი. ირგვლივ ყველაფერი არაჩვეულებრივია. ადამიანებმა ყველაზე ცოტა იციან იმის შესახებ, რაც ჩვეულებრივად ეჩვენებათ და ვერც ვერასოდეს გაიგებენ ბევრს, ვიდრე არ მიხვდებიან, რომ ყველაფერი არაჩვეულებრივია. შენც არაჩვეულებრივი ხარ, აი, ის ღრუბელიც არაჩვეულებრივია, ეგ ყვავილიც არაჩვეულებრივია.

— მაშ, რატომ არ მაოცებს ეს ყვავილი? — ჰკითხა ამონ-რამ.

— რატომ უნდა გაგაოცოს ყვავილმა? ყვავილმა კი არ უნდა გაგაოცოს, არამედ შენ უნდა გაოცდე და ყვავილიც გააოცო. თუ შენ გაოცება არ შეგიძლია, გასაოცარს ვერაფერში დაინახავ და ვერც ვერაფერს ჩაუღრმავდები.

ამონ-რა უცბად ვერ მიუხვდა მასწავლებელს.

ანდრიამ ყვავილთან ჩაიბუხლა.

— მოდი, გაოცება ვისწავლოთ. ჯერ სიტყვის აზრი ამოვიცნოთ: გა-ოც-ება. როცა გა-ოც-ებული ხარ, ეს ნიშნავს, რომ შენში მაშინ ერთი ამონ-რა ოცად იქცა, რადგან ერთმა ამონ-რამ ვერ შეძლო სინამდვილის შეცნობა. ოცად ქცეული ამონ-რას ოცი გულისყური, ოცი თვალი, ოცი ფიქრი ერთად შეესევა საგანს და ყველაფერს მოუსინჯავს, საგანსაც ოცად აქცევს, რომ ყოველმა ამონ-რამ გულისყურით შეიცნოს იგი.

მასწავლებელმა ყვავილი მოწვევითა და მოწაფეს გაუწოდა.

ამონ-რა ყურადღებად იყო ქცეული.

— ამისთანა ყვავილი მართლაც ბევრია ჩვენს ბილიკზე, — გააგრძელა ანდრიამ, — თვალშიც ხშირად გვხვდება, მაგრამ რა ვიცი მის შესახებ? არაფერიც არ ვიცი, გარდა

იმისა, რომ ამ ყვაილს სხვა ყვაილებში არ ავურევთ. თუ არ გაოცდები და ამ ყვაილსაც არ გააოცებ, ჩვენი ცოდნა ამით დამთავრდება. ახლა სცადე, რომ ოცად იქცე და ეს უბრალო და ჩვეულებრივი ყვაილი, რომელიც შენს თვალს არ იზიდავს და არაფრით გაკვირვებს, შენს ოცივე ამონ-რას მიეცი შესასწავლად. ერთი ფერს დაუკვირდეს. რას გვეტყვის ეს ამონ-რა? იმას გვეტყვის, რომ ამ ყვაილს მეტად მდიდარი ფერები აქვს, ხოლო თუ ყვაილს ხელით გასრეს, თითზე დიდხანს ვერ მოიცლი ცისფერ ლაქას. ხომ არ გამოგვადგება ეს ყვაილი საღებავების დასამზადებლად? მეორე ამონ-რამ გემო გაუსინჯოს და გამოიკვლიოს საკვები თვისებები, იქნებ მისგან სანელებლები დამზადდეს? მესამე ყვაილის სურნელი შეისწავლოს – იქნებ ნელსაცხებლების დასამზადებლად გამოდგეს? მეოთხემ ღეროს წვენი იკვლიოს და გამოსცადოს – გამოდგება თუ არა ჭრილობების სამკურნალოდ? მეხუთემ ფესვები შეისწავლოს – გაახმოს, დაფქვას, სხვა მცენარეთა ნაყენში შეურიოს, იქნებ გულის ფრიალის წამლად გამოდგეს? მეექვსემ ადგილი შეისწავლოს – სად და რა პირობებში ხარობს ეს ყვაილი. მეშვიდემ... მერვემ... მეოცემ... ოცივე ამონ-რა შემდეგ მთავარ ამონ-რას მოახსენებს, რა გაიგო და დაადგინა ბილიკის უბრალო ყვაილზე. ამ გზით მთავარ ამონ-რას დაუგროვდება მრავალმხრივი ცოდნა, რომელსაც გაიაზრებს და სხვასაც გაუზიარებს. სხვებიც თავიანთი გაოცებით გაამდიდრებენ მას. ცოდნას მხოლოდ ის ადამიანები აღმოაჩენენ, რომლებმაც გაოცება ისწავლეს. გაოცებული ადამიანი სიღრმეში მიიწევს, ის კი, ვისაც გაოცება არ შეუძლია, ცოდნის სიღრმეში ერთი მისხალითაც ვერ ჩააღწევს.

ანდრია ცოტახანს გაჩუმდა და აცალა ამონ-რას, რომ ნათქვამი შეეთვისებინა. შემდეგ დაასრულა:

– მე კიდევ ბევრჯერ დამჭირდება გაოცება, რომ ეს ბილიკის შეუმჩნეველი ყვაილი უფრო ღრმად შევიცნო. ახლა კი ის ვიცი, რომ ამ ყვაილისგან შეიძლება დამზადდეს სითხე, რომელიც დაღლილობას გაგიქრობს და ძალებს შეგმატებს.

– შენ რომ დამალვეინებ ხოლმე ჯამით? – ჰკითხა გაკვირვებულმა ამონ-რამ.

– ჰო, ის სურნელოვანი, ყვაილოვანი სასმელი აი ამ ვითომდა ჩვეულებრივი ყვაილისგან მზადდება.

ამონ-რამ ყვავილს დასუნა და მის ნაზ სურნელში იგრძნო ნაცნობი, მომხიბვლელი სურნელება.

ამ საუბრის შემდეგ ამონ-რამ უფრო სწრაფად გაამრავლა და გააღრმავა თავისი ცოდნა, რადგან ყველაფერს ოცად ქცეული გულისყურით სწავლობდა.

— ცოდნას ძირი არ ჰქონია, ანდრია! — გაანდო ერთხელ თავისი აღმოჩენა მასწავლებელს.

მაშინ ანდრიამ უთხრა:

— ცოდნას არც ძირი აქვს და არც ნაპირები. მთავარია, ადამიანმა გაორება გადალახოს, როცა დაბნეული იყურება აქეთ-იქით და ვერ გაუგია, რა ზდება მის ირგვლივ. თუ გაორებას გადალახავს, გაოცებას აღვილად მიაღწევს. მაგრამ თუ სინამდვილეს გაასებული და გაათასებული გულისყურით შეხედავ, მაშინ ქვეყანას ბრძენად მოეკვლინები.

ეს ყველაფერი კარგად შეითვისა ამონ-რამ და ახლა იორამს თავად ასწავლიდა გაოცებას.

დღე დღეს მიჰყვებოდა, კვირა კვირას და ექვსი თვე ერთ დიდ გაკვეთილად იქცა.

პატარა მასწავლებელი წინ მიუძღოდა უფროს მოსწავლეს, ხოლო უფროსი მოსწავლე გაოცების კიბეზე სკუპ-სკუპით მიხტოდა.

ამონ-რამ იორამი ანდრიას ლაბორატორიაში გადაიყვანა. აქ მათ ერთად შეისწავლეს სხვადასხვა მაღამოსა და წამლის დამზადება. ანდრიას ყველაფერი ზუსტად ჰქონდა აღწერილი, და ბიჭებს არ უჭირდათ გარკვეულიყვნენ მის რჩევა-დარიგებებში. შუადღემდე ისინი მთის ფერდობზე და ტყეში სამკურნალო ბალახებს აგროვებდნენ, შუადღის შემდეგ კი გვიანობამდე ლაბორატორიაში წამლებსა და მაღამოებს ამზადებდნენ, თიხის პატარა ქილებში ასხამდნენ და თაროებზე აწყობდნენ.

იორამს ძალიან მოსწონდა ეს საქმე და ანდრიას სამკურნალო წიგნები რამდენჯერმე გულმოდგინედ გადაიკითხა.



უკვე რვა წლის გახდი, შვილო, როგორ გაიზარდე

ექვსი თვის თავზე ამონ-რამ იორამს განუცხადა:

— გვეყოფა წამლებისა და მალამოების დამზადება, დროა ადამიანებს ვუძეკურნალოთ.

იორამს გაუხარდა.

იორამმა ამონ-რასგან ისიც ისწავლა, რა უნდა გახარებოდა. ის კი არ გაუხარდა იორამს, რომ ქალაქში თავს გამოიჩინდა თავისი ცოდნით და ყველა მასზე ალაპარაკდებოდა; ან მშობლებს გამოეჭიმებოდა და ეტყოდა: აი, ხედავთ, როგორი ნასწავლი დაგიბრუნდითო; ან მკურნალობისთვის ფულს მისცემდნენ და გამდიდრდებოდა. ამონ-რამ აუხსნა იორამს, რომ მათ მკურნალობის ცოდნა არვისგან უყიდიათ და არც გაყიდვის უფლება ჰქონდათ.

იორამს ის უხაროდა, რაც უნდა გახარებოდა: ავადმყოფს წყლულებისგან გაათავისუფლებდა, ხეიბარს ფეხზე დააყენებდა, ბრძას თვალებს აუხეულდა, ყრუს სმენას მოჰგვრიდა. უხაროდა, რომ ადამიანებს გაახარებდა.

ბიჭებმა წამლებისა და მალამოების ქილები აბგებში ჩააწყვეს და დილაადრიან გამოქვაბულიდან დაღმართს დაუყვინენ. შუადღევ არ იქნებოდა, როცა ქალაქის პირველ უბანში შევიდნენ. აქაურმა ბავშვებმა, რომლებიც კვლავინდებურად ქუჩაში თამაშობდნენ, იცნეს ამონ-რა, და როცა მის გვერდით იორამი დაინახეს, დიდად გაიკვირვეს.

— იორამ, შენ მშობლებს მკვდარი გონიხარ!

— იორამ, ხმა ვავარდა, რომ შენ ღამით მგლებმა დაგვლიჯეს! — ეუბნებოდნენ ბიჭები იორამს.

ზოგიერთები მის მშობლებთან მახარობლად გაიქცნენ. „ცოცხალია თქვენი იორამი, ცოცხალია!“ — უნდოდათ შორიდანვე შეეძახათ, რათა გაეხარებინათ ისინი. ყველას კი ქვასროლია დიდმა ბიჭმა გაუსწრო. გარბოდა რაც ძალი და ღონე ჰქონდა, რომ ყველაზე პირველს დაეყვირა: „თქვენი შვილი სატანასთან გაამხანაგებულა, სატანაა თქვენი შვილი!“

ამონ-რა და იორამი ბიჭების გუნდთან ერთად ქალაქის მთავარ მოედანზე მივიდნენ და ხის ჩრდილქვეშ დაბანაკდნენ.

— შეატყობინეთ ხალხს, ვინც ავადმყოფია, მოვიდეს და ვუძკურნალებთ! — უთხრა იორამმა ბიჭებს და ისინიც მთელს ქალაქს მოედნენ ძახილით: ვისაც რამე გტკივათ და გაწუხებთ, მოედანზე მოდით, მკურნალები მოვიდნენო.

ამონ-რამ და იორამმა აბგებიდან ქილები ამოალაგეს და ფრთხილად დააწყვეს დიდ თეთრ საჯილდოო ქვაზე.

ამასობაში მოედანზე ავადმყოფებიც შეიკრიბნენ და სეირის მოყვარულებიც.

როცა რამდენიმე შუახნის კაცმა და ქალმა მკურნალად პატარა ბავშვები დაინახეს, ძალიან შეიცხადეს და კიდევ გაუბრაზდნენ ბავშვებს: როგორ არ გრცხვენიათ, გვატყუებთ და გვამასხარავენთ, თქვენი ტოლები ხომ არ გგონივართო. უკან გაბრუნდნენ და გზადაგზა სხვებსაც აფრთხილებდნენ: არ დაიჯეროთ, ბავშვების ოინებია ყველაფერიო.

მიუხედავად ამისა, მაინც მოვიდა რამდენიმე ხანდაზმული ადამიანი. მოვიდნენ დედებიც, რომლებმაც ავადმყოფი ბავშვები მოიყვანეს.

— შეილებო, რანაირი მკურნალები ხართ? — დაეჭვებით ჰკითხა ამონ-რას და იორამს ერთმა მოხუცმა, რომელიც ორ ყვარჯენზე იდგა.

— პაპავ, გამოგვცადე! — უპასუხა იორამმა.

— მაშ, აი, სახსრები მტეხავს, დავიტანჯე კაცი, ძლივს მოვალწიე თქვენამდის, მეგონა, მართლა მკურნალები გამოჩნდნენ მეთქი ჩვენს ქალაქში, აქ კი ძუძუმწოვარა ბალები გნახეთ. რას უნდა ველოდო თქვენგან?

— პაპავ, გამოგვცადე! — ისევ გაუმეორა იორამმა.

მოხუცმა ხელი ჩაიქნია:

— კარგი, ეგრე იყოს!

ამონ-რამ და იორამმა მოხუცს სახსრები გაუსინჯეს. „ხელს მაგრად ნუ მიჭერთ, მტკივა!“ — იძახდა მოხუცი. ბიჭებმა ერთმანეთში რაღაც მოითათბირეს. შემდეგ იორამმა ქვაზე დაწყობილი ქილებიდან ერთი ამოარჩია და მოხუცს გაუწოდა.

— პაპავ, შენი ხელით წაისვი ეს მალამო იმ ადგილებში, სადაც გტკივა.

მოხუცმა ეჭვით ჩამოართვა ქილა იორამს და ვიდრე მა-
ლაბოს ისვამდა, ამონ-რა და იორამი ერთ-ერთ დედას მიუტ-
რიალდნენ: რა სჭირს ბავშვს?

ქალს სამიოდე წლის გოგონა ეჭირა ხელში. ბავშვი გა-
დადებულს ჰგავდა, სიცხისგან იწვოდა. მუცელი გასიებული
ჰქონდა.

— უკვე მესამე დღეა, სიცხე არ უვარდება, კუჭიც ვერ
მოქმედებს!

დღეა ტიროდა.

ბავშვი იორამმა გასინჯა. ამონ-რას რალაც უჩურჩულა.
შემდეგ ორი ქილა აიღო. ერთიდან კოვზზე წამალი დაასხა,
ბავშვს პირი გაუხსნა და დააღვინა. მეორედან მალამო
წაუსვა მუცელზე, ბეჭებზე, შუბლზე.

სეირის მოყვარულები ეჭვიანი ღიმილით ადევნებდნენ
თვალყურს ბიჭების მკურნალობას.

ამ დროს ყავარაჯნიანმა მოხუცმა ყველას გასაგონად
დაიძახა:

— ხალხნო, ტკივილმა გამიარა! აი, ნახეთ!

მოხუცმა ყავარაჯნები სხვას დააჭერინა და ნელი მოძ-
რაობით ფეხზე წამოდგა, რამდენიმე ფრთხილი ნაბიჯი გა-
დადგა და ისევ დაიძახა:

— ხალხნო, არ მტკივა! დამიჯერებთ?

მოხუცებული ერთდროულად გახარებულიც იყო და გა-
ოცებულიც.

ამონ-რა და იორამი ისე იყვნენ დაკავებულნი პატარა
გოგონათი, რომ მოხუცს საკმაო ყურადღება ვერც მიაქციეს.
მას კი იორამის გულში ჩახუტება უნდოდა.

— შენ გაიხარე, შვილო! შენ გენაცვალე, ბიჭო! — იძახ-
და მოხუცი და იორამისკენ იწვდიდა ხელებს.

ამონ-რა და იორამი ახლა ქალს სინჯავდნენ. ის თავის
ტკივილებს და გულის ფრიალს უჩიოდა.

ამასობაში გამოირკვა, რომ გოგონას სიცხე დაუვარდა.
ბავშვს მუცლის ტკივილიც გაუქრა და გამოცოცხლდა. ახლა
ბავშვის დედა, გახარებული და გაბედნიერებული, ცდილობდა
ამონ-რასა და იორამს მოფერებოდა.

— გმადლობთ, გმადლობთ, შვილებო, თქვენ გადამირჩი-
ნეთ ჩემი გოგონა! — გაიძახოდა ცრემლმორეული ქალი.

ავადმყოფების რიგი გაიმართა.

ამონ-რა და იორამი დაუღლებლად და ხალისით მუშაობდნენ. სეირის მოყვარულებს ეჭვიანი ღიმილი გაუქრათ და მხოლოდ გაკვირვებას გამოხატავდნენ სახითაც და შემახილებითაც. ამონ-რამ ვერ შენიშნა, რომ ხალხში დედამისიც იღვა და შვილის საქმიანობას აღევნებდა თვალყურს. დედის გული სიამაყით ივისებოდა, როცა განკურნებული მორიგი ვინმე — კაცი თუ ქალი, მოხუცი თუ ახალგაზრდა ყველას ხმამაღლა აუწყებდა: მეშველათ, ღამიამღათ, თავს უკეთ ვგრძნობო. ერთი სული ჰქონდა, როდის დამთავრდებოდა მკურნალობა, რომ შვილს მოფერებოდა და სახე დაეკონა. ამ დროს მოულოდნელი რამ მოხდა: ერთმა ხელკეტიანმა შეკრებილნი გარღვია და იორამს დაადგა.

— მამა! — სიხარულით წამოიძახა იორამმა, მაგრამ ავადმყოფს სინჯავდა და მამას ვერ გადაეხვია. ან როგორ გადაეხვეოდა, როცა ხელკეტიანი რისხვით შესცქეროდა შვილს.

— მამ, შენ ცოცხალი ხარ! — დაუღრიალა კაცმა იორამს, — ცოცხალი ხარ და ხალხსაც მკურნალობ, არა. მამ შენ ამ ეშმაკის ფეხს გადაეკიდე!

— მამი, — შიშითა და მუდარით შესძახა იორამმა, — დამშვიდდი, მამი! ცოცხალი ვარ, ეს კი ეშმაკის ფეხი არ არის, მეცნიერია!

— შენც მეცნიერი გაგხდა მაგან? თავისკენ გადაგიბირა, არა! შენც სატანი გახდი!

ხალხი დაბნეული შესცქეროდა მამა-შვილს.

— მამი, მამი! — ევედრებოდა იორამი და მამის დამშვიდებას ცდილობდა. მაგრამ გააყებულ, გაცოფებულ კაცს არაფერი ეყურებოდა.

— შე შენ გაჩვენებ, რა მეცნიერიც ხარ! — და კეტი გამეტებით მოიქნია, იორამს უმიზნებდა, მაგრამ მის გვერდით მღვარ ავადმყოფ ქალს დასცხო და თავი გაუტეხა.

— მამიიი... რა ჩაიღინე, — სასოწარკვეთით ყვიროდა იორამი.

— მოკლა ქალი... დაიჭირეთ... დაიჭირეთ! — ყვიროდა ხალხი.

მამამ ისევ მოუქნია კეტი შვილს, ისევ ააცდინა და ახლა პატარა ბიჭს მოსტეხა ფეხი.

ბიჭმა გულსაკლავად შეჰკივლა.

ხალხი გამწარდა: ვილაცამ ქვა ესროლა ხელკეტიანს, კიდევ მოარტყა, მაგრამ მას არაფერი უგვრძენია.

— გააჩერეთ ეგ გიჟი... დაიჭირეთ... ნუ გეშინიათ, მიღით... — აქეზებდნენ უკანანი წინ მღვომებს, მაგრამ ხელკეტიანთან და გაცოფებულთან შებმას ვერავინ ბედავდა.

იორამი სულაც არ გაურბოდა მამას, მარტო მუდარით გაიძახოდა:

— მამიიი.. დაწყნარდი, მამიიი..

მამამ საჯილდო ქვაზე დაწყობილ ქილებს მოჰკრა თვალი. მოუქნია კეტი და ყველა ქილა ერთიანად მიღევსა.

— ეს რა ჰქენი, მამიიი... — გამწარდა იორამი და დამსხვრეულ ქილებთან ჩაიჩოქა, — რად გაანადგურე წამლები, მამიიი... როგორღა ვუშველოთ ამ ხალხს?! — ბლაოდა იორამი და ქილების ნამსხვრევებს ეფერებოდა.

მამამ კეტი შემართა და ნამსხვრევებთან დაჩოქილი შვილისაკენ გაიწია.

— გააჩერეთ, გააჩერეთ... — ყვიროდნენ აქეთ-იქიდან, — არ მიუშვათ, მოკლავს...

იორამმა თავი ასწია და სახეში შეხედა მამას — გამძვინვარებული კაცი მხეცს ჰგავდა. იორამს არც უცდია განზე გაწეულიყო და კეტი აეცდინა. კეტსაც თვალი გაუსწორა, მამასაც და ორივეს შეჰღრიალა:

— რას ერჩოდით ამ ქილებს, რად დაამსხვრიეთ?!

და ამ დროს საშინელი დარტყმა იგრძნო, თითქოს საჯილდო ქვა დაეცა შუბლშიო.

იორამი გადაიქცა და გახეთქილი თავიდან სისხლი წასკდა.

— მოკლა შვილი მაგ გიჟმა... შვილი მოკლა... — აყვირდა ხალხი.

— დაიჭირეთ, გათოკეთ!

რამდენიმე ახლგაზრდა უკნიდან მიეჭრა ხელკეტიანს. ის კი ამ დროს ამონ-რას უყვიროდა.

— არც შენ დაგტოვებ ცოცხალს, შე გველის წიწილო!.. — შეუყვირა და მთელი ძალით მოუქნია კეტი.

არც ამონ-რას უფიქრია აეცდინა კეტი, ის მხოლოდ ერთზე ფიქრობდა, იორამისთვის ეშველა.

— მაგასაც მოკლავს... — ყვიროდა ხალხი და ერთმანეთს ეხეთქებოდა.

ამ არეულობაში ვერავინ შენიშნა, როგორ ან რანაირი სისწრაფით გაჩნდა მარა შვილთან და წინ გადაეფარა. კეტმა ქალს საფეთქელი გაუხეთქა და ძირს დასცა.

— დედა, დედა!

ამონ-რამ ძირს დაცემულ ქალს დახედა და კინაღამ თვალთ დაუბნელდა.

— დედა, დედა... — გულზე დაემხო ამონ-რა დედას, — დედა, ჩემო ტკბილო, საყვარელო დედა!

ვიღაცამ მოასწო და გაგიჟებულ კაცს სარმა გამოსდო. კაცი გადაიქცა და კეტი ხელიდან გაუვარდა. რამდენიმე კაცმა მაშინვე მალლა ასწია და მთელი ძალით ზურგით საჯილდოო ქვაზე დაანარცხა. კაცმა ტკივილისგან დაიღრიალა და სცადა ფეხზე წამოვარდნილიყო, რომ ყველასთვის სამაგიერო გადაეხადა, მაგრამ ისევ დაეცა და სიმწრისაგან სახე დაეგრინა.

ვინ იორამს მივარდა და მობრუნება დაუწყო.

ვინ თავგახეთქილ ქალს ასულიერებდა.

ზოგი ფეხმოტეხილ შვილს შეელოდა.

მარას გარშემოც შეიკრიბა ხალხი.

უპატრონოდ მარტო წელგატეხილი კაცი ეგდო და სიმწრისაგან ბლაოდა.

სისხლი მარას თვალებში ჩამოსდიოდა.

ამონ-რა ტიროდა და ხელით უწმენდდა მარას სისხლს.

მარამ სისხლიანი თვალები გაახილა და შვილს გაუღიმა. ამონ-რამ დედის გულიდან წამოსული სიყვარულის ნაკადი იგრძნო.

— დედა, ჩემო კარგო დედა... — ტიროდა ამონ-რა.

მარამ კიდევ გაიღიმა.

— ნუ ტირი, შვილო... — ამოილაპარაკა მან.

ამონ-რა ცოტათი დამშვიდდა.

— უკვე რვა წლის გახდი, შვილო... როგორ გაიზარდე... სინმარში გნახე და მიაბობდი, რა გასწავლა ანდრია... — მარა ნაწყვეტ-ნაწყვეტ ლაპარაკობდა, — ხალხსაც მკურნალობ... —

ამონ-რა ხედავდა, როგორ ჟონავდა მარას სახიდან ცისფერი ცეცხლი.

მარა გაჩუბდა და ძალა მოიკრიბა.

— მაკოცნინე შუბლზე, შვილო....

ამონ-რამ შუბლი დედას ტუჩებთან მიუტანა. დედის ამბორმა გულში სითბო და სინათლე ჩაუღვარა. მარას თავი გვერდზე გადაუვარდა.

— გათავდა... — თქვა ვიღაცამ.

— სული დალია საწყალმა... — წუხილით ჩაილაპარაკა მოხუცმა ქალმა.

— ჰო, მოკვდა... — თითქოს ვიღაცას უხსნისო „სული დალიას“ მნიშვნელობას, ისე თქვა შუახნის კაცმა.

პაპამ კი, რომელმაც წელან ყვარჯნები გადაყარა, მთელი ცხოვრების ფილოსოფია მოიმარჯვა და ღინჯად, ყველას გასაგონად, თანაც ისე, რომ ყველამ იგრძნო, რაღაც საიდუმლოს გვანდობსო, წარმოთქვა:

— არც დაიღუპა, არც სული დალია, არც მოკვდა... ეს ქალი გარდაიცვალა... გარდაიცვალა ეს ქალი... ნათელი დაადგეს, იქ, სადაც გადავიდა...

მაგრამ სად გადავიდა მარა, არც პაპამ იცოდა და არც სხვებმა.

და ვერც ვერავინ დაინახა, როგორ გადადიოდა მარა ციურ სამყაროში.

მარტო ამონ-რას სულმა იცოდა, რაც ხდებოდა.

ამონ-რას თითქოს თვალთ დაუბნელდა და კიდევ დაყრუვდაო — გარშემო ვერაფერს და ვერავის ხედავდა და არც არაფერი ესმოდა. სხვა რამეს ხედავდა ამონ-რა.

მარას სხეულიდან მსუბუქად ამოსრივდა ნაზი, ცისფერი ნათება და ამონ-რას დაადგა თავს. ამონ-რამ გაიღიმა და მისკენ ხელები გაიშვირა.

„დედა, გაფრინდი მალლა, მალლა... სულ მალლა, ყველაზე ლამაზ ვარსკვლავზე... იქ გელიან, დედა, იქ მოფრინდები მეც...“ — უსიტყვოდ, ფიქრით ესაუბრებოდა ამონ-რა მარას სულს, რომელსაც არ უნდოდა შვილთან განშორება. „არ შეგეშინდეს, დედა... სიკვდილი არ არსებობს, ასე მასწავლა ანდრიამ. ეს შენი მიწიერი სხეულია, დედა, აქ რომ წევს. ეს სხეული აღარ გჭირდება, ასე მასწავლა ანდრიამ. შენ სხვა სხეული გაქვს უკვე, დედა, სხვა სახელი გქვია მანდ, აქ მარა იყავი, ციურ სამყაროში კი შენი უკვდავი სახელით გიცნობენ, ასე მასწავლა ანდრიამ... ანდრიამ მასწავლა, რომ ცეცხლოვან სამყაროს მხოლოდ ნათელი სულები აღწევენო, დედა, შენი სული კი ნათელია... უზენაესს ესწ-

რაფევე, დედა, ღმერთს ესწრაფევე, ეს მასწავლა ანდრიაშ... მან ბევრი რამ მასწავლა, ამიტომ შე დიდი ვარ უკვე... გაფრინდი, დედა... ჰო-ჰო, ასე... რა ლამაზად ფრენ... ხედავ, ამონის სულიც გამოჩნდა, შენს შესახვედრად მოფრინდა, დედა...”

ამონ-რას სახე ზღვა სიხარულით ბრწყინავდა. ვინც უყურებდა, გაოგნებული იყო: სად იყურება ეს ბაღლი, ან რა დაემართაო. ზოგმა ჩაიჩურჩულა, ნამდვილად შეიშალაო, და შეშინებულმა უკან დაიხია.

ამონ-რა უცბად გამოერკვა. დედის სხეულს დახედა, სახეზე და თმებზე ხელი გადაუსვა და თვალები დაუხუჭა.

„იორამი“, — გაუელვა თავში და იქ გადაინაცვლა, სადაც ხალხი იორამს ეხვეოდა.

იორამს სიცოცხლის ნიშანწყალი არ ეტყობოდა.

ერთი ქალი შუბლს უწმენდდა, სისხლი კი არ წყდებოდა. მეორე ჩასძახოდა: იორამ, იორამო! ზოგი ჩურჩულით ამბობდა — მოკვდაო.

ბავშვები შეშინებული თვალებით დასცქეროდნენ თავგახეთქილ და დასისხლიანებულ ბიჭს.

— გაიწიეთ! — დინჯად, მაგრამ მკაცრად უთხრა ყველას ამონ-რამ.

ხალხი გაიწ-გამოიწია, და ამონ-რა იორამთან მიუშვეს.

— მაცალეთ! — გააფრთხილა ქალები, რომლებიც თავს ადგნენ იორამს, სისხლს სწმენდნენ და თან ჩასძახოდნენ: იორამ, იორამ!

ამონ-რამ მზერა იორამს მიაპყრო.

„არ შეიძლება იორამი მოკვდეს... გადაარჩინე იორამი! — ჩაესმა ამონ-რას ყურში. ანდრიას ხმას ჰგავდა. ანდრიას ხმა ამონ-რას გულის ძახილი იყო.

„როგორ გადავარჩინო? აღარ მაქვს მალამოები!“ — უპასუხა ამონ-რამ.

„შენ ხარ მალამო. ნუ დააყოვნებ! იმოქმედე!“ — თითქოს უბრძანაო გულმა თუ ანდრიამ.

ამონ-რამ თვალები დახუჭა, ორივე ხელი იორამს თავზე დაადო და გულს მიმართა:

„გადავარჩინოთ იორამი... იორამი კარგი ბიჭია... იორამი მკურნალია...“

ამონ-რამ მთელ კეთილ გრძნობებს — სიყვარულს, სიბრალულს, თანაგრძნობას, იმედს, რწმენას, თავგანწირვას,

ერთგულებას, სიხარულს, აღტაცებას, ზრუნვას, სილამაზეს გულში მოუყარა თავი. სხეული და სული ლიმონივით ჩაწურა გულში. გული გაეცხო. მისმა სხეულმა ცახცახი დაიწყო. ხელებზე თითქოს ცეცხლი წაეკიდა. გულის მთელი განცდა ხელებისკენ მიემართებოდა და იორამს ეფრქვეოდა.

ამონ-რა აღარ იყო ამონ-რა, განცდად და ვედრებად იქცა იგი.

ხალხის თვალწინ ხდებოდა ის, რასაც ვერავინ ხელავდა, ვერც გრძნობდა, ვერც ხვდებოდა და ვერც ისმენდა: ამონ-რას სული იორამის სულს ესაუბრებოდა, ორი ცისფერი ალი ყველას თვალწინ, მაგრამ ყველას უხილავად, ერთმანეთთან საუბრობდა.

„ამონ-რა, ცოდო ხარ, ჩემი გულისთვის ნუ წირავ თავს.“

„იორამ, ცოდო ის არის, ვინც თავს არ წირავს.“

„ამონ-რა, არ გეყოფა ძალა ჩემს მოსაბრუნებლად. შეხედე ჩემს თავს - შუბლი მაქვს გადახსნილი.“

„იორამ, შენც შემეშველე და გავიმარჯვებთ.“

„ამონ-რა, როგორ შემეშველო, შეხედე, რა უსიცოცხლოდ გდია ჩემი სხეული.“

„იორამ, შენც შეხედე, რა უბედურია ის ქალი, საკაცით რომ მოუყვანიათ შენთან სამკურნალოდ.“

„ამონ-რა, მე ველარ ვუშველი მაგ ქალს.“

„იორამ, მაშინ ამ პატარა ბავშვსაც შეხედე, თუ არ უმკურნალებ, რამდენიმე დღეში მოკვდება.“

„ამონ-რა, გული მტკივა მათ გამო.“

„იორამ, შენი გულისტკივილი შენი ძალაა. კარგია, რომ გული გტკივა.“

„ამონ-რა, რა მემართება?“

„იორამ, ბრუნდები... ბრუნდები!“

ამონ-რა გულაღმა გადავარდა. ვიღაცამ დაიყვირა: „უშველეთ, ეგეც კვდებაო.“

მაგრამ იმან, რაც იმავე წუთს მოხდა, ყველა საგონებელში ჩააგდო.

იორამმა სისხლით დაფარული თვალები მოისრისა. სახეზე სისხლი შეჰხმობოდა. ნელ-ნელა წამოიმართა და ირგვლივ მიმოიხედა.

— გაცოცხლდა იორამი! — დაიყვირა პატარა ბიჭმა, რომელიც იქვე იდგა და თვალს არ აცილებდა, რაც ხდებოდა. ახალგაზრდა ქალმა კი, რომელიც იორამს ედგა თავს და სისხლს წმენდდა, შეშფოთებით წამოიძახა:

— ამონ-რა მოკვდა! უშველეთ!

სახტად დარჩენილი ადამიანები ერთმანეთს ჩურჩულით გადასცემდნენ — „მოკვდა“ და „გაცოცხლდაო,“ და ვიდრე კიდევ რამეს იტყოდნენ ან გამოერკვოდნენ, სიზმარში იყვნენ თუ ცხადში, ეჩვენებოდათ თუ მართალს ხედავდნენ, ამონ-რა წამოდგა და იორამისაკენ გაიხედა.

— როგორ ხარ, იორამ? — ჰკითხა ამონ-რამ.

— მგონი წავიქეცი და რალაც ვიტიენე, მაგრამ გამიარა. შენ როგორ ხარ? რა მოხდა აქ?

არც ამონ-რას და არც იორამს არ ანსოვდათ, რა მოიძოქმედეს მათ სულეებმა, ორივეს სულმა დაფარულად შეინახა თავისი საუბარი.

ბიჭები — მასწავლებელი და მოსწავლე — ერთმანეთს ღიმილით შესცქეროდნენ.

ქალებმა გამბედაობა გამოიჩინეს და იორამს სახეზე სისხლი მოჰბანეს. და როცა სახე მთლიანად მოსწმინდეს, ენა დაებათ.

— კეტი ასცდა?! — გაუკვირდა ერთს.

— როგორ ასცდა, თუ შუბლი გახეთქილი ჰქონდა! — გაუკვირდა მეორეს.

— მაშ, სად არის ნაჭრილობევი?! — გაუკვირდა მესამეს.

ვერაფერი გაეგოთ: როგორ მოხდა, რომ იორამმა გაცოცხლდა, ან როგორ მოხდა, რომ თავგახეთქილს ჭრილობების ნაკვალევიც არ აღმოაჩნდა.

ამ დროს გაოგნებულ ადამიანებს შორის სისინი გაისმა. ყველამ იქითკენ მიიხედა. სისინებდა ღიღი ბიჭი.

— სატანები არიან ეგენი... სატანები არიან...

ღიღი ბიჭი მთელ სეირს ადევნებდა თვალს და უხაროდა, რომ იორამის მამა მისი წაქეზებული იყო.

— სატანები არიან ნამდვილად... — დაისისინა სხვამაც, — ისე ვერ გაცოცხლდებოდნენ...

ხალხის ნაწილი, შეშინებული იმით, რომ სატანებს მათთვის რამე არ ევნოთ, გაეცალა იქაურობას. ფეხმოტეხილი

და თავგატეხილიც წაიყვანეს – სატანებისგან არაფერი გინ-
დათო.

მაგრამ ვინც დარჩა, დარჩა სწორედ იმ განცდით, რომ
რალაც დიდ სიკეთეს ეზიარა.



შენ უნდა მოარჩინო მამაშენი

ბევრმა დაიტირა მარა.

ქალაქელებს უყვარდათ კეთილი ქალი, რომელიც ყველას ხალისით ეხმარებოდა, მოხუცებსა და ავაღმყოფებს უვლიდა, მარტოხელა დედებს შვილების მოვლასა და გაზრდაში ეშველებოდა.

შეიცოდეს ამონ-რა, რომელსაც აღარც დედა ჰყავდა.

დაკრძალვაზე შეკრებილი ხალხი ნელ-ნელა დაიშალა.

ყველაზე ბოლოს ოქრომჭედელმა ზაქარიამ დატოვა სასაფლაო. თვალები ცრემლებით ჰქონდა სავსე.

ბევრი ეფერა ამონ-რას მორჩენილი ოქროს ხელებით და თავისთვის რაღაცას ბუტბუტებდა.

— შვილო, სასაფლაოდან ჩემთან მოდი სახელოსნოში! — სთხოვა ამონ-რას, — ზომ მოხვალ?

ამონ-რა გრძნობდა, რომ ზაქარია მას განსაკუთრებული სიყვარულით ეფერებოდა. „იქნებ იმიტომ, ხელები რომ მოვურჩინე?“ — ფიქრობდა თავისთვის.

— კარგი, მოვალ! — დააშვიდა ოქრომჭედელი.

აი, მოდის ახლა იგი თავჩაღუნული და მხრები უცაბცახებს, ეტყობა, ქვითინებს.

სასაფლაოზე ამონ-რასთან მისი მეგობრები დარჩნენ: იორამი და ილია.

ილია, როგორც იორამი, სამი თუ ოთხი წლით უფროსი იყო ამონ-რაზე, მაგრამ ამონ-რას მასთან მეგობრობა სიხარულს ჰგვრიდა. ამიტომ უნდოდა ილიას მოწვევა დაბადების დღეზე, როცა შვიდი წლის ზღებოდა, მაგრამ ვერ იზეიმა მაშინ ამონ-რამ დაბადების დღე. მას მერე ერთმანეთს არ შეხვედრიან. მარას შვილივით უყვარდა ილია, უდუღამო ბიჭი. დედა მშობიარობას გადაჰყვა. მამა და უფროსი ძმა ზრდიდნენ. ილია ოთხი წლის იყო, როცა მამასა და ძმას საქმიანობაში ეხმარებოდა. რვა წლისამ დურგლობა ისწავლა და მშვენიერი ხელოსანი გახდა — მისი ნაკეთობანი ისეთი ლამაზი, მოხერხებული და გამძლე იყო, რომ ბევრს არ

სჯეროდა, თუ ამას პატარა ბიჭი აკეთებდა. ვიდრე რამეს შექმნიდა, იღია ჯერ თიხის ფირფიტაზე დახატავდა ხოლმე. მნახველებს უკვირდათ, როგორ დახატე ასეთი ლამაზი რამ ან როგორ აკეთებო.

ახლა ისხდნენ სამივენი მარას საფლავთან.

იორამი და იღია ხმას არ იღებდნენ, არ უნდოდათ ფიქრებში ჩაძირული ამონ-რასთვის სიმშვიდე დაერღვიათ.

ამონ-რამ მკერდზე ტოპრაკი მოისინჯა — ქვაწერილი იქ იყო.

ფიქრებით ქვაწერილს უტრიალებდა ამონ-რა.

„იყოს შენი გზა ეკლიანი“, — ეწერა ქვაწერილზე.

„ამონი ტალღამ მომტაცა. მაგრამ დამიცვა, გადამარჩინა, სამაგიეროდ აქ განისვენებს მარა, ჩემი დედა. ანდრიაძაც დამტოვა. სად წავიდა ანდრია? რატომ არ გამიყოლა თან? დიდმა ბიჭმა ქვა მესროლა და თავი გამიტეხა — რატომ მკურნალობ იორამსო. იორამის მამამ წამლები და მალამოები გაგვინადგურა. ზოგიერთებმა იორამს და მე სატანები გვიწოდეს და განგვიდგნენ. იქნებ ეს არის ეკლიანი გზა? იქნებ უკვე შევუღექი ეკლიანი გზით სიარულს? მართლა ეკლებზე ხომ არ ლაპარაკობს ჩემი ქვაწერილი?“

ასე ფიქრობდა ამონ-რა და ცდილობდა გარკვეულიყო მოვლენებში, რომლებიც მის ცხოვრებაში ხდებოდა. განსაკუთრებით ერთი რამ აწუხებდა: რატომ ხდებოდა ისე, რომ ადამიანები სიკეთეს ბოროტებით პასუხობდნენ? ექვსი თვე შეუსვენებლივ და გულმოდგინედ სწავლობდნენ ამონ-რა და იორამი წამლებისა და მალამოების დამზადებას. რამდენი შრომა მოანდომეს სამკურნალო ბალახების შეგროვებასა და დამუშავებას, შეზავებას. როგორი მონღომებითა და სიყვარულით აკეთებდნენ ყველაფერს, რომ შემდეგ ადამიანებს — ავადმყოფებს, ხეიბრებს დახმარებოდნენ. გაბოროტებულმა კაცმა კი კეტის ერთი მოქნევით დაულეწა მკურნალებს ქილები. ან იმ დიდმა ბიჭმა რატომ გამოუცხადა მტრობა? საკუთარ ქვაწერილს დასტაცა ხელი, ნაცვლად იმისა, რომ განარებოდა და თავისი გზის საიდუმლო ამოეცნო, ამონ-რას ესროლა და შუბლი გაუტეხა. იქნებ ეს არის ეკლიანი გზა?

„იყოს გზა შენი მოკლე და უსასრულო.“

როგორი უნდა იყოს გზა მოკლე და უსასრულოც? ეკლიანი, მოკლე, უსასრულო! კიდევ — აღმავალი იყოს შენი გზაო. ეკლიანი, აღმავალი გზა!

„გზა დღეების გარეშე არ არსებობს, — გაიფიქრა ამონ-რამ, მაშ დღეებს უნდა გაეხედო, მივიღვარ თუ არა აღმავალი გზით. ანდრიამ მასწავლა გზის სიბრძნე. ადამიანებს ჰგონიათ, გზები იმიტომ არის მოგონილი, რომ იარონ, ერთი სოფლიდან მეორე სოფელში მივიდნენ, იყიდონ და გაყიდონ, გაახარონ ვინმე ან ავნონ ვინმეს. ადამიანები გზებს იმისთვის იყენებენ, რომ ვიღაც გამვლელს ჩაუსაფრდნენ და გაძარცვონ. იმას კი არ ფიქრობენ, მასწავლიდა ანდრია, რომ ყველა გზა, რაც დედამიწაზე არსებობს, ერთ დიდ მიზანს უნდა ემსახურებოდეს — სულის სრულყოფასა და ამაღლებას. დღეები გზებია, გზები კი დღეებია, რომლებმაც სულის სიმაღლეებისაკენ უნდა გვატარონო.“

შემდეგ ამონ-რას გამოქვაბულისაკენ მიმავალი ბილიკი გაახსენდა.

ეს ბილიკი ეკლიანი არის და აღმავალიც. არც მაინც-დამაინც გრძელია, ნახევარი დღეც არ სჭირდება ასვლას და ჩამოსვლას. იქნებ ამ ბილიკზეა ლაპარაკი ქვაწერილში? „მაშინ რა გამოდის? — გაიფიქრა ბიჭმა, — მთელი ჩემი ცხოვრება ამ ბილიკით უნდა ვიარო? ავიდე და ჩამოვიდე?! ეს უაზრობაა, მარტო ასვლა-ჩამოსვლა სულის წინსვლას ვერ დაეხმარება. რა მიგაქვს მალა და რა ჩამოგაქვს დაბლა — ეს არის გზა... სულის გზა — ზრუნვის გზა.“

გზა... გზა... გზა!

ამონ-რა ხვდებოდა, რომ ქვაწერილის საიდუმლო ამ სიტყვებიდან იწყებოდა. რა იგულისხმება მასში? რა არის გზა?

მეხსიერებაში ანდრიას დარიგებათა საგანძურს მიმართა.

რას ამბობდა ანდრია? საგანძურიდან ნელნელა ამოტივტივდნენ აზრები და ანდრიას ხმით აულერდნენ.

ანდრია ამბობდა: „გზა — ცხოვრებაა... ადამიანი სამყაროს მარადიული მგზავრია... დედამიწაზე ცხოვრება მარადიული ცხოვრების ერთი მონაკვეთია... სული ხილული და უხილავი გზებით მიემართება... მგზავრის ღირსება მისი ტვირთია...“

შემდეგ ანდრია ამბობდა: „გზა სიბრძნის დედაა... იოლი გზის მადიებელი თავის სულს დაღმართზე მიაქანებს... გზა ფიქრია, ყველაზე რთული გზა ფიქრია... ამალღებული ფიქრი ამალღებული გზით სიარულია. გზა ბევრია, მაგრამ ყოველ ადამიანს თავისი გზა აქვს და ის მას დაბადებით დაჰყვება!..“

„ადამიანი მაშინ ცხოვრობს, — ეუბნებოდა მოწაფეს ანდრია, — როცა საკუთარ გზას მისდევს. გული კი ამ გასაღებს სიყვარულის ფასად იძლევა.“

ამ აზრებმა ბევრ რამეში გაარკვია ამონ-რა, მაგრამ ქვაწერილის ამოცანა ბოლომდე მანც ვერ ამოხსნა.

ამონ-რა გამოერკვა ფიქრებიდან.

იორამი და ილია მის გვერდით ისხდნენ მიწაზე.

— იორამ, — მიმართა ამონ-რამ და ფეხზე წამოდგა, — გამოქვაბულში მოგიწევს ასვლა, რომ მოტეხილობის მალამო წამოიღო...

— ვისთვის? — ჰკითხა იორამმა.

— შენ უნდა მოარჩინო მამაშენი.

იორამს სახე შეეცვალა.

— მამაჩემი ღირსია, რომ საწოლზე იყოს მიკრული. მაშინ ნაკლებ ბოროტებას ჩაიდენს. განა მან არ მოკლა დედაშენი?

ამონ-რამ ანდრიასეული სიმშვიდით გაიმეორა:

— იორამ, ნუ ვიქნებით მამაშენის მსაჯულები. შენ მკურნალი ხარ.

— ბოროტიც უნდა განვკურნო? მტერიც უნდა განვკურნო, რომ ისევ მიმტროს? — ვერ მშვიდდებოდა იორამი.

— ჰო, თუნდაც იცოდე, რომ ისევ გიმტრობს. შენს მეტი მამაშენთან არავინ მივა, რომ უმკურნალოს.

იორამმა აღარაფერი უპასუხა.

ქალაქამდე გზა ჩუმად გაიარეს.

იორამმა გამოქვაბულებს მიაშურა.

ილია თავის სადურგლოს დაუბრუნდა.

ამონ-რა ოქრომჭედელ ზაქარიას სახელოსნოსკენ გაემართა.

ზაქარია სახელოსნოს წინ იჯდა და ამონ-რას ელოდებოდა. სახე გაებადრა, როცა დაინახა.

— შემოდი, შვილო, სახელოსნოში, ნახე, როგორ ვცხოვრობ! — ოქრომჭედელი ღელავდა, თუმცა ვერ აეხსნა, რა იყო ამის მიზეზი.

სახელოსნო სუსტად იყო განათებული. ოქრომჭედელს სანთლების შუქზე უყვარდა მუშაობა. სახელოსნოს ერთ კუთხეში ვიწრო ტახტი იდგა. დანარჩენი კუთხე-კუნჭული, კედელში ჩატანებული ნიშები ხელსაწყო იარაღებით, ოქროსა და ვერცხლის პატარა ნაჭრებით, ჯამებით იყო დაკავებული. ჯამებში ძვირფასი ქვები ეწყო. სახელოსნო პატარა იყო, სუფთა და კრიალა.

ამონ-რას ეგონა, რომ სახელგანთქმულ ოქრომჭედელს თავის სახელოსნოში საკუთარი ნაკეთობანი ექნებოდა გამოფენილი. ეგონა, რომ ზაქარია ხან ერთ ნაკეთობას გადმოუღებდა და სიამაყით უჩვენებდა, ხან მეორეს. მაგრამ მიხვდა, რომ თავმდაბალი და მორიდებული ზაქარია არ მოიწყობდა სახელოსნოში გამოფენებს, ზოლო ღარიბი და დაუცველი ოქრომჭედელი ვერც შეძლებდა ამას. თუ რამეს გააკეთებდა, შემკვეთებს მიჰქონდათ, მას მხოლოდ თავისი ოქროს ხელები რჩებოდა. ამ რამდენიმე ხნის წინ კინაღამ ხელებიც დაკარგა. ან იქნებ სიზმარში მოხდა ყველაფერი: ხელების დაწვაც და მორჩენაც? ზაქარია ვერ მიმხვდარიყო, როგორ მოხდა, რომ ამონ-რამ ხელები მოურჩინა.

— აი ასე ვცხოვრობ, შვილო! — ხელები გაშალა ზაქარიამ, — ეს არის, რაც მაქვს, მეტი არც მინდა.

ამონ-რა ცნობისმოყვარეობით ათვალთვრებდა ოქრომჭედლის იარაღებს და ხელსაწყოებს, ზაქარია გვერდით ედგა და ბიჭს თვალს არ აცილებდა.

შემდეგ ტახტზე ჩამოსხდნენ.

ზაქარიამ პატარა ყუთი გახსნა და იქიდან თავისი ნახელავი ამოიღო.

— ეს შენ, შვილო! — ნაკეთობა ბიჭს ხელისგულზე დაუდო.

ამონ-რა ნაკეთობას დააკვირდა.

ეს იყო ოქროსა და ძვირფას თვლებში გამოყვანილი ამომავალი მზე. მზე ელვარებდა, პირველ სხივებს აფრქვევდა, თითქოს საცაა ამოვა და ქვეყანას გაანათებსო.

ნამდვილი პატარა მზე ელო ამონ-რას ხელისგულზე.

ბიჭს ტანში გააურეოლა: განა ამ მზეს არ ხედავდა თვალდახუჭული, როცა ოქრომჭედლის ხელებს კურნავდა? მაშინ მის თვალწინ მთელმა სანახაობამ ჩაიარა: როგორ იმორჩილებდა ზაქარია ლითონს, მისი კოტიტა თითები როგორ გრეხდნენ და წნავდნენ უწვრილეს ძაფებს, როგორი სიზუსტითა და სინატიფით აწყობდნენ შიგ ძვირფას თვლებს. და, აი, რა გამოვიდა: ნამდვილი, პატარა ამომავალი მზე!

ამონ-რა მიხვდა, რომ ეს ნაკეთობა ოქრომჭედლის შედეგრი იყო. და თუმცა მებაღურის შვილს არ ჰქონდა გამოცდილება ოქრომჭედელთა ნამუშევრების შეფასებისა, გულმა უგრძნო, რომ მის ხელისგულზე იდო არა ოქრომჭედელ ზაქარიას შემოქმედების შედეგრი, არამედ მომავალ საუკუნეთა იშვიათობა.

კიდევ ერთი უცნაური განცდა დაეუფლა ამონ-რას.

რაც უფრო აკვირდებოდა ნაკეთობას, მით უფრო ცხადად ხედავდა ამომავალ მზეში მარას სახეს. მზის ოქროს დისკი ალაგ-ალაგ შეუმჩნევლად იბურცებოდა და ამონ-რას წარმოდგენაში მარას სიკეთით სავსე სახეს ქმნიდა.

„აკითხავ,“ — გაიფიქრა ამონ-რამ.

— ზაქარია, მეჩვენება თუ მართლა ვხედავ მარას სახეს? ოქრომჭედელმა არ იუცხზოვა ამონ-რას კითხვა. ალაღად, გულწრფელად უპასუხა:

— მართალი ხარ, შვილო, მე მიყვარდა მარა. მას კი ამონი უყვარდა. მარა ციდან ჩამოსული ანგელოზი იყო...

— ზაქარია, რამდენი დრო მონადლომე ამ სილამაზის შექმნას?

— მთელი სიცოცხლე და ერთი ღამე! — უპასუხა ზაქარიამ.

— ეგ როგორ? — გაუკვირდა ბიჭს.

— დღესმინი მთელი სიცოცხლე მიყვარდა და ამიტომ სულ დავეძებდი, როგორ გამომეხატა სამკაულში ეს სიყვარული. ცხადშიც და სიზმარშიც დავეძებდი მზისა და მარას ერთობას. ამას კი მხოლოდ წუხელ მივხვდი და, აი, რაც ხელში გიჭირავს, ეგ გავაკეთე. მარა რომ ცოცხალი ყოფილიყო, მას მივართმევდი. ახლა კი შენ გეკუთვნის...

ამონ-რას უნდოდა ეთქვა, დაიტოვე ეს ძვირფასი ნივთიო, მაგრამ ზაქარიამ გააჩერა.

— ყოველთვის თან ატარე, შვილო, ბოროტებისგან და-
გიცავს!

ამონ-რას ნაკეთობა გამოართვა, თავისი კოტიტა თითუ-
ბით მოეფერა, აკოცა, შემდეგ ბიჭს კისერზე ჩამოჰკიდა.

— ახლა დავშვიდდი! — ჩაილაპარაკა ზაქარიამ და
ამონ-რასაც თავზე ხელი გადაუსვა.

— გმადლობთ, ზაქარია... რა კარგი გული გაქვს, ზაქა-
რია... — უთხრა ამონ-რამ.

ცოტახანს სიჩუმე ჩამოვარდა და ამ ორიოდ წუთის
განმავლობაში ამონ-რამ და ზაქარიამ ერთმანეთს კეთილი
გრძნობები გაუცვალეს. მათი ღუძილი სალომეს ძახილმა და-
არღვია.

— ძია ზაქარია, მანდ ზომ არ არის ამონ-რა? ამონ-რას
ვეძებ! — იძახდა გოგონა ქუჩიდან.

ორივე გარეთ გავიდა.

სალომეს გაუხარდა, ამონ-რა რომ დაინახა.

— მთელი ქალაქი შემოვირბინე შენს ძებნაში! — გოგონა
აღელვებული ჩანდა.

— რატომ, სალომე, რა მოხდა? — ჰკითხა ამონ-რამ.

— რა მოხდა?! წამოდი, ნახე, რამდენი ხალხი შეიკრიბა
მოედანზე... შენც წამოდი, ძია ზაქარია!

სალომემ ხელი ჩასჭიდა ამონ-რას და მოედნისკენ წაიყ-
ვანა.

უკან ზაქარია ოქრომჭედელი მიჰყვებოდა.



ელთან თუ არა შენგან სიკეთეს — ჰქმენ სიკეთე

— რატომ იკრიბება ხალხი მოედანზე, სალომე? — ჰკითხა ამონ-რამ.

ხალხი მართლაც მიედინებოდა მოედნისკენ, დიდი და პატარაც.

— რა არის მესია? — ჰკითხა თავის მხრივ სალომემ.

— მესია მხსნელს, წინასწარმეტყველს ნიშნავს.

— ჰოდა, ასე ამბობენ, მესია მოდისო. იესო ჰქვია მესია-სო.

როცა მოედანზე მივიდნენ, სადაც ორი დღის წინ ამონ-რა და იორამი ავადმყოფებს კურნავდნენ, ნახეს, რომ აუარებელ ხალხს მოეყარა თავი, ტყვა არ იყო.

ვიღაც ხმაძაღლა აცხადებდა: იესო ქრისტე მზის ჩასვლამდე მოვაო.

რას არ ლაპარაკობდა ხალხი.

ზოგი ამბობდა, რომ იესო ღმერთთაო, ღმერთის შვილიაო.

ჰყვებოდნენ სასწაულებზე, რაც იესომ მოახდინა: ბრმას თვალი აუხილა, ხეიბარი ფეხზე დააყენა, კეთროვანი მოარჩინა, მკვდარი ლაზარე გააცოცხლა, აბობოქრებული ზღვა დააწყნარა.

ჰყვებოდნენ, რას უქადაგებდა იესო ხალხს: მოახლოვებულია ღვთის სასუფეველიო, ილოცეთ თქვენი მტრებისთვისო. ერთმანეთს უამბობდნენ იესოს იგავებს მთესველზე, ბოროტ მევენახეებზე, სამარიელზე.

ზოგს სჯეროდა, რომ იესო მართლა მესიაა, მართლა ქრისტეა, ზოგი გაიძახოდა, თვალთმაქციაო. საიდანღაც იღია გამოჩნდა და ამონ-რასა და სალომეს სიახლოვეს დადგა.

მზე ჩასასვლელად ემზადებოდა.

ისევ გამოაცხადა ვიღაცამ, რომ იესო აქ არ მოვა, ის თავისი მოწაფეებითა და მიმდევრებით ზეთისხილის მთის ძირას დაბანაკდა, ხვალ დილიდან იქ იქადაგებს და განკურნავს ავადმყოფებსო.

ხალხი შეწუხდა, ყველას ძალიან უნდოდა ენახა მესია, ავადმყოფებს კი განკურნება ეჩქარებოდათ.

ბევრმა თქვა, ახლავე წავალთ და ჩვენც ზეთისხილის მთასთან გავათევთ ღამეს, რომ დილით კარგ ადგილას დავდგეთ და იესო ახლოს დავინახოთო.

ხალხი ნელ-ნელა დაიშალა.

— ჩვენც წავიდეთ, — თქვა სალომემ, — მეც უნდა გამოგყვეთ!

ამ დროს იორამის ძახილი მოესმათ.

— ამონ-რა, — იორამმა ხალხის ნაკადი გაარღვია და მათთან მივიდა, — დედაჩემმა ეზოშიც არ შემიშვა, — მამაშენს არც შენი დანახვა უნდა და არც შენი განკურნებაო. როგორ მოვიქცე? აი, მალამოც წამოვიღე გამოქვაბულიდან.

„იყოს გზა შენი ეკლიანი!“

თითქოს ქვაწერილმა დაიწყო ლაპარაკი და ამონ-რას ყურში ჩასჩურჩულა: არჩევანი შენზეა.

უნდა ჩაასხა თუ არა პირში წამალი ავადმყოფს, ან წასცხო ხეიბარს ჭრილობაზე მალამო, თუ არც ერთს და არც მეორეს არ სურს, რომ შენ უმკურნალო? უნდა მოარჩინო თუ არა ავადმყოფი, რომელსაც შენი დანახვა არ სურს? უნდა დარჩე თუ არა ანგელოზად იმისათვის, ვინც შენ მხოლოდ სატანად გალიარებს?

ამონ-რას წარმოდგენაში საკუთარი ქვაწერილი სიბრძნის წიგნად იქცა და თავისით გადაიშალა. ამონ-რამ წიგნის კითხვა დაიწყო:

„იყოს გზა შენი ეკლიანი.“

არ ეძიო სხვა გზა, გარდა გზა სიკეთის ქმნისა.

მიუხედავად იმისა, ელიან თუ არა შენგან სიკეთეს — ჰქმენი სიკეთე!

დაინახავენ თუ არ დაინახავენ შენს სიკეთეს — ჰქმენი სიკეთე!

ღებულობენ თუ არ ღებულობენ შენგან სიკეთეს — ჰქმენი სიკეთე!

სიკეთით მოგიზღვავენ თუ ბოროტებით — ჰქმენი სიკეთე!

ჰქმენი სიკეთე და არასოდეს ითხოვო ვინმესგან ნებართვა, რადგან არავინ არის მბრძანებელი შენს სიკეთეზე.

ჰქმენი სიკეთე და არ იკითხო მისი ნაყოფი, არ ებიო მისი მიმღები!

სიკეთის მთესველი ის არის, ვინც არასოდეს მოიკითხავს თავის მოსავალს და უხარია, როცა სხვა იშკის.

სიკეთით აივსე გული მაშინაც, როცა ბოროტების მორევში მოექცევი, და მაშინაც, როცა წვეთი იქნები სიკეთის ზღვაში.

ჰქმენი სიკეთე უხმაუროდ, რადგან დაფარულ სიკეთეს აღვილად მიესვლება მასთან, ვისაც ის სჭირდება.

დაფარულ სიკეთეს მადლიერებით მიიღებს მტერიც და მოყვარეც, ბოროტიც და კეთილიც, ხეიბარიც და სალ-სალამათიც.

დაფარული სიკეთე სულს ვარსკვლავებზე გასაფრენად ამზადებს.

ძნელია სიკეთის ქმნა, სიკეთის გზაა ეკლიანი, ბოროტების გზაა უეკლო...“

— ამონ-რა, სად იყურები?! როგორ მოვიქცე, როგორ მივუდგე მამაჩემს? — უკვე მერამდენედ ჩაეკითხა იორამი.

ამონ-რამ მოასწრო სიბრძნის წიგნის გადაშლილი გვერდის ბოლომდე ჩაკითხვა.

ახლავე ეტყვის იორამს, როგორ უნდა მოიქცეს, „დაფარული სიკეთე!“ — აი, რისი ქმნაა საჭირო.

— იორამ, ჩამოჯექი ამ საჯილდაო ქვაზე.

იორამი ქვაზე ჩამოჯდა. ამონ-რა მის მუხლებთან მოეწყო.

— იორამ, გაივსე ახლა გული მადლიერებით მამის მიმართ — მან შეგქმნა, გამსჭვალე გული სიბრალულითა და თანაგრძნობით მამის მიმართ, — მან თავისი უმეცრებით დაკარგა შვილი, მთელ შენს სიყვარულს მოუხმე გულში და მამისკენ მიმართე — მამა მოყვასია შენი. ამ მალამოსთან ერთად გაუგზავნე მას გულის ცეცხლი. იორამ, შენ სიკეთის შემოქმედი ხარ, მოარჩინე მამა.

იორამი დაჰყვა ამონ-რას — თვალები დახუჭა და თანდათან სხვა სივრცეში ჩაიძირა.

სახეზე ტკივილი და თანაგრძნობა აესახა, თვალები ცრემლით ავესო.

მალამოს ქილა ხელში ჰქონდა ჩაბლუჯული.

იორამი მამას უახლოვდება. მისი გული ლოცვასავით ღაღადებს:

„შენი შვილი ვარ, მამა, შენი იორამი!
მამა ხარ და მიყვარხარ, როგორიც ხარ!
შვილი ვარ და მიმიღე, როგორიც ვარ!
ნუ შიშობ, მამა, შე სიკეთის გზაზე ვლგევარ. სიკეთეს
არაფერი ესაქმება სატანასთან.

შე მკურნალი ვარ!
მაცალე, განგკურნო!
შემდეგ ჩემი ხელით მოგცემ კეტს და, რაკი ასე გინდა,
კიდევ დამარტყი.

მამა, მარა დაიტირა ღლეს ხალხმა, შეილს გადაეფარა
და მას მოხვდა შენი კეტი.

მაგრამ ამონ-რა არ არის შენზე გაბოროტებული.

მაცალე განგკურნო, მამა, არ მინდა ხეობრად დარჩე
მთელი ცხოვრება.

მიჩვენე ზურგი, მაღამოს წავისვამ!

აი, აქ წავისვამ მაღამოს.

სამ ღლეში ადგები, მამა.

ჩემო მამა!“

ილია და სალომე იორამის წინ ისხდნენ მიწაზე. ისინი
შეშფოთებულები უყურებდნენ იორამის შეცვლილ სახეს. „რა
მოუვიდა, ცუდად ზომ არ გახდა?“ — უჩურჩულა შეშინე-
ბულმა სალომემ ამონ-რას. ამონ-რამ პასუხი არ გასცა, რად-
გან თავადაც იქ იყო, სადაც იორამი, და მის მამას საკუთარ
გულის ცეცხლს აშველებდა.

მოედანზე დარჩენილი რამდენიმე ადამიანი თავს დაადგა
ბავშვების ჯგუფს, ზოგი დაცინვით, ზოგი ცნობისმოყვარე-
ობით შეპყურებდა საჯილდაო ქვაზე ჩამოძვდარ ბიჭს, რომ-
ლის მთელი გონება სულ სხვაგან იყო გადასული.

იორამი ეფერებოდა მამას და ხედავდა, რა ხდებოდა იქ
— პატარა ბნელ ოთახში, სადაც მამა იწვა დაბალ ტახტზე
და გმინავდა.

— ქალო, — დაუძახა ცოლს, — მომხედე, მიშველე გა-
დავბრუნდე!

ცოლი მყისვე გამოჩნდა.

— რა იყო, კაცო, რა გინდა?

— დამეხმარე გადავბრუნდე...

ცოლი მოეხმარა და კაცი კენესით გადაბრუნდა.

იორამმა ამ დროს მამას ზურგზე პერანგი აუწია, წელი
გულის ცეცხლში შეზელილი მაღამოთი დაუზილა.

— რა მემართება, ქალო, — მიმართა კაცმა ცოლს, — თითქოს ზურგში რაღაც სასიამოვნო სითბო მივიღის! შენ მიშვრები რამეს თუ ასე იცის სიკვდილის წინ?

— გეჩვენება რაღაც. მე არაფერს ვიკეთებ. ნუ გეშინია, არ მოკვდები! — უპასუხა ცოლმა, — მაგრამ, შე უღმერთო, რას ერჩოდი ან შეიღს, ან სხვებს? საწყალი ქალი შეიღს რომ გადაეფარა და შენი კეტისგან დაიცვა, ღღეს დაკრძალეს. არ მოგასვენებს მისი ცოდვა...

იორამი აგრძელებდა მალამოთი წელის ზელას.

კაცი გრძნობდა, რომ ტკივილი უყურდებოდა.

— ნამდვილად არ ვკვდები, — ჩაილაპარაკა, — ღმერთი მშველის, ტკივილები მიქრება.

— შენისთანებს ღმერთი არ უშველის, — მიუგო ცოლმა, — თვითონ ხარ ქვასავით მაგარი, შენ ვერაფერი მოგერევა, მაგრამ ნურც შენ ცდილობ, რომ სხვებს მოერიო...

— ისევ ჭკუას მარიგებ? — გაბრაზდა ქმარი. კიდევ რაღაც უკუღმართი უნდოდა ეთქვა ცოლისთვის, მაგრამ ამ დროს თვალებში იორამის სახე ჩაუდგა და ყურში კი მისი ხმა ჩაესმა: „აი აქ წაგისვამ მალამოს. სამ ღღეში ადგები, მამა!“

თითქოს ცეცხლმა დაუარაო, უცბად ისე გაუხურდა და აეწვა ზურგი.

— ქალო, იორამი აქ არის?! — წამოიძახა გაოგნებულმა.

— რას ლაპარაკობ, კაცო, ნამდვილად მოჩვენებებში ხარ! შენ არ მითხარი, ეგ ეშმაკის ფეხი ეზოში არ შემოუშვაო! ღელა რომ გააგდებს სახლიდან ერთადერთ შეიღს, ის რა ღელდა? ან ის რა მამაა, შეიღს მოსაკლავად რომ დასდევს? რა ვართ ახლა ჩვენ? — ღელას ეტირებოდა, მაგრამ თავს იკავებდა, უფრო არ გადაერიო ქმარი.

— მაშ, იორამი აქ არ არის? — ისევ ეჭვით იკითხა კაცმა, თვალწინ კი იორამის სახე დაუდგა.

— ხომ გითხარი, არა მეთქი, სად ხელავ იორამს, შე უბედურო!

— გაიწყვიტე ხმა! — შეუტია ცოლს ქმარმა, — მე ვიცი, სადაც ვხელავ... აი აქ ვხელავ, ჩემს თვალწინ...

— ისემც მეხი დაგაყარე!

— ეჰ, ადგომა შემეძლოს, ვნახავდი, რა მეხსაც დამაყრიდი... იქნებ ეს დროც დადგეს! — და ისევ ეჭვით შეუტია, — მაშ შენ მიზელ ზურგს?

— მე არაფერსაც არ გიზულ. შენ არ ამიკრძალე, ხელი არ დამაკაროო...

— ვერ გაშიშვალ, რა შემართება! — თითქოს მოუბოდიშა ცოლსო, ისეთი ხმით ჩაილაპარაკა ავადმყოფმა, — მაშ დანიხსომე, თუ სამ დღეში მოვრჩები და ფეხზე წამოვდგები, იორამი მომიძებნე და შინ მომიყვანე.

„თავი კი გაგიხმეს! — სამ დღეში იქნებ ფეხებიც გაფშიკო. რა სასწაული წამოგაყენებს ფეხზე? ამ კაცს რაღაც სხვა ემართება. ისევ ექიმბაშთან უნდა წავიდე, რამე ბირჩიოს,“ — გაიფიქრა ქალმა.

— რად უნდა მოგიყვანო, ისევ კეტი რომ ჩასცხო, სასიკვდილოდ გაიმეტო? — შეუტია ცოლმა.

— შენ მომიყვანე და მე ვიცი, რასაც ვიზამ! — ისეთი სინანულის ხმით ჩაილაპარაკა ავადმყოფმა, რომ ცოლმა გაიფიქრა, ალბათ, სიკვდილი უახლოვდება და მონანიება უნდაო...

... ამონ-რამ თვალი გაახილა და იორამს შეეხმინა.

— საკმარისია, მესამე დღეს მამაშენი ფეხზე წამოდგება.

იორამმა წელში ძლიერი ტკივილები იგრძნო, თითქოს ხერხემალი აქვს გადატეხილიო. ადგომა გაუჭირდა. სალომე და ილია მიეშველნენ.

— რა დაგემართა, იორამ! — შეწუხდა სალომე, — ამონ-რა, უშველე იორამს!

არც სალომემ და არც ილიამ არ იცოდა, რა მოხდა ამ რამდენიმე წუთის განმავლობაში, სად იყო იორამი ან რატომ ასტკივდა ასე მოულოდნელად წელი. ამონ-რამ კი იცოდა ყველაფერი, რადგან ისიც იქ იყო, სადაც იორამი.

— ნუ შიშობ, გაუვლის, — უთხრა სალომეს. იორამს კი მალამოს ქილა ჩამოართვა და შიგ ჩაიხედა. იორამმაც ჩაიხედა ქილაში და გაკვირვებით წამოიძახა:

— ამონ-რა, ქილა სავსე იყო! სად არის მალამო?!

— აბა, რით უზელდი მამაშენს ზურგს? — უპასუხა ამონ-რამ.

მათ ირგვლივ შეკრებილმა ცნობისმოყვარეებმა ბიჭების მოქმედება სულელურ თამაშად მიიჩნიეს და წავიდნენ.

სალომემ ისევ გაიხსენა, რომ ზვალ დილით მესია ზეთისხილის მთასთან იქადაგებს და დაიჟინა, ახლავე წავიდეთო.

– შორია, ღამით მოგვიწვეს სიარული და შენ დაიღ-
ლები. ჯობია, დილით ადრე წავიდეთ! – თქვა ილიამ.

ამონ-რას გული ზეთისხილის მთისკენ ეწეოდა.

– სალომე სწორს გვირჩევს. დღეს გვირჩევნია წასვლა.
შუალამემდე იქ მივალთ და მოხერხებულ ადგილს ავირჩევთ,
რომ კარგად მოვისმინოთ ქადაგება. ცოტას კიდევ წავიძი-
ნებთ.

დაუჯერეს ამონ-რას და ოთხივე ზეთისხილის მთისკენ
მიმავალ გზას გაუყვა.



შენ ხარ კენახი უფლისა

მთვარიანი ღამე იყო და გზის გაგნება უადვილდებოდათ. მათ გარდა უამრავი ხალხი მიემართებოდა მთისკენ. სალომემ ბიჭებს სთხოვა, ცოტა ფეხს აეუჩქაროთ, წინ მიმავლებს გაეუსწროთო. მაგრამ იორამს სწრაფად სიარული არ შეეძლო, ილია ედგა მხარში და მას მიჰყავდა.

შუალამე ცოტა გადასული იყო, როცა ზეთისხილის მთასთან მივიდნენ.

ერთად თავმოყრილი ამდენი ხალხი არცერთ მათგანს არასოდეს ენახა. აქ იყვნენ იუდეველებიც, რომლებიც სულ ემატებოდნენ და ემატებოდნენ, გალილეველებიც, სამარელებიც, ათქალაქელებიც, ფინიკელებიც, კესარიელებიც, ამონელებიც, რომაელებიც, სირიელებიც, ბერძნებიც, იყო რამდენიმე იბერიელიც და სომეხიც. იყვნენ ქალები, ბავშვები, ახალგაზრდები და მოხუცები. ბევრი იყო ავადმყოფი და ხეიბარი. ზოგი საკაცით მოეყვანათ.

ხალხი ჯგუფ-ჯგუფად ივდა მინდორზე. ცეცხლი დაენთოთ და საჭმელს ამზადებდნენ. უკრავდნენ, მღეროდნენ და ცეკვავდნენ.

ამონ-რამ და მისმა მეგობრებმა დიდხანს ეძებეს მოხერხებული ადგილი, საიდანაც, მათი აზრით, კარგად დაინახავდნენ და მოუსმენდნენ იესოს.

მათთან მოხუცი ქალი მივიდა კალათით ხელში.

— მშვივრები იქნებით, შვილებო! — უთხრა და ოთხივეს პურის დიდი ნაჭერი და თევზი მისცა, — წყალი კი იქ დალიეთ! — და ხელი ჭისკენ გაიშვირა.

მოხუცს მაღლობა გადაუხადეს, ჭამეს და მალე დაიძინეს. სალომემ თავი მხარზე დაადო ამონ-რას და ჩაეძინა.

აღმოსავლეთი ოდნავ შეფაკლული იყო, როცა ამონ-რამ თვალი გაახილა. ბანაკში თითქმის ყველას ეძინა. ამონ-რას წამოდგომა უნდოდა, მაგრამ გადაიფიქრა, სალომე არ გავადვიძო, გოგონა მის მხარზე მშვიდად ფშვინავდა.

ამონ-რა ფიქრს მიეცა.

სიტყვა მესია ანდრიასაგან ჰქონდა გაგებული. მესია მო-
ვა და ხალხს დიდ ცოდნას მოუტანსო, ეუბნებოდა ანდრია.
თუ ხალხი მის სწავლას გაჰყვება, სიკეთეს ეწევა, თუ არა
და გაუბედურდებაო.

— საიდან უნდა მოვიდეს მესია? — ჰკითხა ამონ-რამ.

ანდრიამ ამონ-რა ვარსკვლავებისკენ გაახედა, — აი იქი-
დანო.

ამონ-რას წინათგრძობა დაეუფლა. ვის ელოდებოდა
ანდრია წლების განმავლობაში ასე მოთმინებით? ვისი
სურათი დანატა გამოქვაბულში? უფლის გამოქვაბული ვუწო-
დოთ ამ გამოქვაბულსო. მესია უფალია? მესია ის იყო, სურა-
თიდან რომ გადმოვიდა?

ამონ-რამ თვალები დახუჭა და სიბნელეს ჩახედა.
„ანდრია აქ არის, — გაუხარდა ბიჭს, — ანდრიას ვნახავ!
ანდრია უფალთან, მესიასთან არის, მისი მოწაფეა ანდრია!“
გულმა ბაგა-ბუგი დაუწყო და სიხარულით აუბგერდა. ალბათ,
ამ გულის ხმაურმა გააღვიძა სალომე. გოგონამ თვალები მო-
იფშვინიჭა და წამოდგა.

იორამმა და ილიამაც გაიღვიძეს.

ბანაკიც იღვიძებდა.

აღმოსავლეთი გაწითლდა და ხალხი თანდათან აფუს-
ფუსდა. მესიასთან შესახვედრად თავს იწესრიგებდნენ, თმას
ივარცხნიდნენ.

— საიდან გამოჩნდება მესია? — იკითხა სალომემ, მაგ-
რამ პასუხი ვერ მიიღო.

ლამით კარგად ვერ გაარჩიეს, სად დაბინავდნენ, მაგრამ
ახლა დაინახეს, რომ მათ ირგვლივ ბევრ ხალხს მოეყარა
თავი.

— აქედან დავინახავთ მესიას? აქედან გავიგებთ მის
ხმას? — შფოთაუდა სალომე.

ამ დროს მზის პირველმა სხივმაც გამოანათა და ბანაკ-
ში ჩაიქროლა ჩურჩულმა:

— მესია, მესია... იესო, იესო!!!

— აბა, მესია, საიდან მოდის მესია?

— აჯერ მესია, საიდანაც მზე ამოდის...

ვინც ჯერ კიდევ იწვა ან იჯდა, ფეხზე წამოხტა, დაბ-
ლები თითის წვერებზე შედგნენ, დიდებმა პატარები მხრებზე
შეისევს. ხეობრები და ავაღმყოფებიც წამოიძვრნენ:

— მესია, მესია...

— იესო, იესო...

— ქრისტე, იესო ქრისტე...

— ამონ-რა, დამანახე მესია! — შეეხვეწა სალომე.

ამონ-რამ სალომე ხელში აიყვანა და კისურზე შეისვა.

— ვხედავ, ვხედავ!.. მზესავით განათებულია... თეთრი აცვია... ანათებს... — იძახდა სალომე.

ამონ-რა ვერ ხედავდა მესიას, მაგრამ გრძნობდა, რომ რაღაც ძალიან დიდი მოვლენის მოწმე ხდებოდა. მესია, იესო ქრისტე — ეს ის იყო, უფლის გამოქვაბულში სურათიდან რომ გადმოვიდა. ამონ-რა ვერ ხედავდა, ვინ მოჰყვებოდა მესიას, მაგრამ ამასაც გრძნობდა: ერთ-ერთი მათ შორის, ვინც მესია-უფალს, იესო ქრისტეს ახლდა, ანდრია იყო. და აი, სალომემაც დაიძახა:

— ამონ-რა, მის გვერდით, მარჯვენა მხარეს, ბიძაშენი ანდრია დგას! ნამდვილად ანდრიაა, არ შეშლებს!

უცბად ბანაკში სრული სიჩუმე ჩამოვარდა. წამიც და ყველა მუხლებზე დაეშვა.

ამონ-რამ სალომე დაბლა ჩამოსვა და თვითონაც დაიჩოქა.

წინ უკვე აღარავინ ეფარებოდა და ამონ-რამ დაინახა ის - უფალი, რომელსაც ხალხი მესიას და იესო ქრისტეს უწოდებდა.

იესო შემალლებულ ადგილზე იდგა. იქვე იყვნენ მისი მოწაფეები, რომელთა შორის ამონ-რამ ანდრია შეიცნო.

ამონ-რა იესოს ნათებით იყო მოხიბლული.

შეუძლია თუ არა ვინმემ თქვას, როგორ გამოიყურება ჭეშმარიტი სიკეთე, ჭეშმარიტი თანაგრძნობა, უმაღლესი სიყვარული? „იესო ქრისტეა სიკეთის, თანაგრძნობის, მშვენიერებისა და ღვთიური სიყვარულის ზატი!“ — დაასკვნა ამონ-რას გულმა.

შორს იდგა იესო მათგან, მაგრამ ამონ-რასთვის ის იქვე იყო, მის გვერდით, მის ახლოს, სალომეს, ილიასა და იორამს შორის. იქვე იდგა და სუნთქვაც და გულისცემაც ესმოდა მისი.

იესომ ხალხისკენ ორივე ხელი გაიშვირა.

— მშვიდობა თქვენდა!

ეს იგივე ხმა იყო, რაც ამონ-რამ უკვე მოისმინა უფლის გამოქვაბულში.

შორს იდგა იესო, მაგრამ სიტყვები პირდაპირ ყურში ჩაესმა ამონ-რას.

იესომ ქადაგება დაიწყო.

იესოს ხმა, მისი ყოველი სიტყვა, სულისა და სახნის მოძრაობა გულში ეჭრებოდა ამონ-რას, მის გულსა და გონებას ავსებდა.

— ისმინეთ, მაშვრალნო, სულით ღარიბნო, გულით სუფთანო!

ეს არის პირველი და უმთავრესი მცნება რჯულისა:

უფალი ღმერთი ერთია!

შეიყვარე უფალი ღმერთი შენი

ყოვლითა გულითა შენითა,

ყოვლითა სულითა შენითა,

ყოვლითა გონებითა შენითა.

და ამის მსგავსი მეორე მცნება:

შეიყვარე მოყვასი შენი,

ვითარცა თავი შენი.

ღმერთი არის სული,

და მისი თაყვანისმცემელნი თაყვანს უნდა სცემდნენ

სულითა და ჭეშმარიტებით.

უფლის სასუფეველი ძალისხმევით აიღება,

ვინაიდან წვეული ბევრია, რჩეული კი ცოტა.

ძალისხმევა რწმენაშია.

თუ რწმენა გექნებათ და არ დაეჭვდებით,

ამ მთას რომ უთხრათ, აიწიე და ზღვაში ჩავარდიო,

ასე მოხდება.

ძალისხმევა სიტყვაშია.

ყოველი ფუჭი სიტყვისათვის, რომელსაც იტყვიან ადამიანები,

პასუხს აგებენ განკითხვის ღღეს.

ვინაიდან შენივე სიტყვებით გამართლდები

და შენივე სიტყვებით გამტყუნდები.

ძალისხმევა საქმეებშია.

ამიტომ ყველაფერში, როგორც გინდა, რომ მოგექცენ ადამიანები,

თქვენც ისევე მოექცით მათ.

კეთილ კაცს კეთილი საგანბურიდან სიკეთე გამოაქვს,
ბოროტ კაცს ბოროტი საგანბურიდან ბოროტება გამოაქვს.
შედით ვიწრო კარიბჭით,
ვინაიდან ფართოა კარიბჭე და განიერია გზა, რომელიც
დალუპვისაკენ მიემართება,
და მრავალნი დადიან მასზე,
ვინაიდან ვიწროა კარიბჭე და ვიწროა გზა, რომელიც
სიცოცხლისკენ მიემართება,
და მცირედნი ჰპოვებენ მას.
ერიდეთ სიმათლის კეთებას ადამიანთა თვალწინ, მათ
დასანახად,

თორემ ვერ მიიღებთ საზღაურს თქვენი ზეციური
მამისაგან.

და როცა მოწყალეობას გასცემ,
შენს მარცხენას ნუ ეცოდინება, რას აკეთებს მარჯვენა.
თქმულა ძველთა მიმართ:

„არ დაიფიცო ტყუილად, არამედ შეასრულე შენი ფიცი
უფლის წინაშე.“

მე კი გეუბნებით თქვენ:

საერთოდ არ დაიფიცოთ,

არც ცა, რადგან ღვთის ტახტია იგი,

არც ღვდამიწა, რადგან მისი ფერხთა სადგომია იგი,

არც საკუთარი თავი დაიფიცო,

რადგან ერთი ღერი თმის გათეთრება ან გაშავება არ

შეგიძლია.

არამედ იყოს შენი სიტყვა: ჰო-ჰო, ან არა-არა.

რაც ამაზე მეტია, ის ბოროტისგანაა.

თუ გაცდუნებს შენი მარჯვენა თვალი,

ამოითხარე და გადააგდე.

ვინაიდან უმჯობესია შენთვის, რომ ერთი ასოთაგანი
დაგელუპოს,

ვიდრე მთელი შენი სხეული გვენაში ჩავარდეს.

თუ შენი მარჯვენა ხელი გაცდუნებს,

მოიკვეთე და გადააგდე,

ვინაიდან უმჯობესია შენთვის, რომ ერთი ასოთაგანი
დაგელუპოს,

ვიდრე მთელი შენი სხეული გვენაში ჩავარდეს.

ვიყვარდეთ თქვენი მტრები,

დალოცეთ თქვენი მაწყვერები,
სიკეთე უყავით თქვენს მოძულეებს
და ილოცეთ მათთვის, ვინც გავიწროებთ და გღვენით,
რათა იყოთ თქვენი ზეციერი მამის ძენი,
ვისაც თავისი მზე ამოჰყავს ბოროტთა და კეთილთა

თავზე

და წვიმას უგზავნის მართლებსა და უსამართლოებს.
ყველას, ვინც ისმენს ჩემს სიტყვებს და ასრულებს მათ,
ვამსგავსებ კეთილგონიერ კაცს,
რომელმაც სახლი კლდეზე ააშენა.

მოვიდა წვიმა,
გადმოსკდნენ მდინარეები,
ამოვარდნენ ქარები და
ეკვეთნენ იმ სახლს.

ის კი არ დაეცა,

ვინაიდან კლდეზე იყო დაფუძნებული.

ასრულებს,
ზოლო ყოველი, ვინც ისმენს ამ ჩემს სიტყვებს და არ

ვამსგავსებ უგუნურ კაცს,
რომელმაც ქვიშაზე აიშენა სახლი.

მოვიდა წვიმა,

გადმოსკდნენ მდინარეები,
ამოვარდნენ ქარები და
ეკვეთნენ ამ სახლს.

ის კი დაეცა და

ფრიად დიდი იყო მისი დაცემა.

ვინც არ აიღებს თავის ჯვარს და არ გამომყვება,
არ არის ჩემი ღირსი.

ნუ დაიუნჯებთ დედამიწაზე,
სადაც ჩრჩილი და ჟანგი სპობს და
სადაც ქურდები თხრიან და იპარავენ.

არამედ დაიუნჯეთ ზეტაში,

სადაც ვერც ჩრჩილი და ვერც ჟანგი ვერ მოსპობს და
ვერც ქურდები თხრიან და იპარავენ,
რადგან სადაც თქვენი განძია,
თქვენი გულიც იქ იქნება.

მაშ იყავით სრულყოფილნი ისევე,

როგორც თქვენი ზეციერი მამაა სრულყოფილი.

ვისაც ყურები აქვს — ისმინოს.

ხალხი სულგანაბული უსმენდა იესო ქრისტეს. მხოლოდ აქა-იქ თითო-ოროლა ფარისეველი და მედავითნე აპირებდა ხელის შეშლას. ერთმა წამოიძახა: „რომელი ხელმწიფებით ამბობ ამას? ან ვინ მოგცა შენ ეს ხელმწიფება?“ მეორე კი — „შენ იესო არა ხარ, იოსების შვილი, ნაზარეთიდან, საიდან იცი ყველაფერი ეს?“ მაგრამ ხალხმა ჩააჩუმა ისინი.

ამონ-რას დაეიწყებოდა ჰქონდა, სად იყო, ვერც მის ირგვლივ აუარებელ ხალხს, ან თუნდაც სალომეს ხედავდა. ამჟამად აქ მხოლოდ ორნი იყვნენ — იესო ქრისტე და ამონ-რა. იესო ქრისტე მხოლოდ მას — ამონ-რას — უხსნიდა ცათა სასუფეველის საიდუმლოს, მხოლოდ მას განუძარტავდა თავისი იგავების აზრს. იესო ქრისტეს მისი ქვაწერილი ეჭირა ხელში და ხმამაღლა უკითხავდა იმას, რაც ამონ-რამ ვერ ამოიკითხა. ის ახლა უკვე ქვაწერილის თითოეული სიტყვის, თითოეული ხაზისა და ნიშნის აზრს ხვდებოდა. ამონ-რასთვის სრულიად ნათელი გახდა საკუთარი ქვაწერილის საიდუმლო. ამიტომ არჩევანიც მას ეკუთვნოდა: მოკლე და ეკლიანი გზით ევლო თუ ფართო და გრძელი გზით, ვიწრო კარიბჭით შესულიყო თუ ფართო კარიბჭით. მაგრამ ამ არჩევანს ფიქრიც არ სჭირდებოდა. ამონ-რა ანდრიას მოწაფეა, ანდრია კი — იესო ქრისტეს მოწაფეა. ანდრიამ უკვე აიღო თავისი ჯვარი, იტვირთა იესო ქრისტეს ტვირთი და ერთგულად მოჰყვება მას. ამონ-რაც აიღებს თავის ჯვარს, იტვირთებს იესოს ტვირთს და გაჰყვება ანდრიას.

— ამონ-რა, უყურე, რა ხდება!.. უყურე, რა ხდება, ამონ-რა! — შეაჯანჯლარა იგი სალომემ.

ილიას კისერი წაეგრძელებინა და პირდაღებული, გაკვირვებული, გაოგნებული შეჰყურებდა იესოს. მისთვისაც, იორამისთვისაც, სალომესთვისაც იესო ქრისტე მოშორებით კი არ იდგა ამაღლებულ ადგილას, არამედ იქვე იყო, მათ შორის, მათ თვალწინ. იორამს აღარ სტკიოდა ხერხემალი და ზურგი, ისიც ქრისტეს შეჰყურებდა გაოცებული.

— ამონ-რა, უყურე, უყურე, — ეკიდებოდა მკლავზე სალომე, — ბრმას თვალი აუხილა!

კაცმა, დაბადებით ბრმამ, პირველად დაინახა ქვეყანა; შეჰყურებს მზეს, ცას, მთას, ხეებს, ხალხს. მუხლებზე ეხვევა

ქრისტეს, უკოცნის ფეხებს და ტირის, ბლავის სიხარული-საგან.

იესო ქრისტემ ფეხზე ააყენა და უთხრა:

— შენმა რწმენამ განგკურნა შენ!

იესო ქრისტეს ახლა საკაცით ქალი მოუყვანეს. ასე წვეს დაძვლადაცემული ეს საცოდავი უკვე ცხრა წელიწადიაო, ეუბნებიან შვილები, უფალო, მარტო შენი სჯერაო.

— ქალო, ადექი ფეხზე, აილე შენი საწოლი და წადი შინ!

ეს სიტყვები იესო ქრისტემ წყნარად, მშვიდად და მბრძანებლურად წარმოთქვა. მათში ძალა იყო ჩადებული, ციური ძალა. ეს უცნაური ძალა იესოს სიტყვებისა იგრძნო ამონ-რამ და მაშინვე სასწაულის მოწმე გახდა: ქალი წამოდგა, სიხარულის ტირილით ატირდა, იესო ქრისტეს ფეხები დაუკოცნა, აიღო ხელში თავისი საწოლი და წავიდა. შვილებმაც მუხლი მოიყარეს იესო ქრისტეს წინაშე, მათაც ფეხები დაუკოცნეს უფალს და უკან გამოეკიდნენ დედას.

ახლა კეთროვანი დადგა იესოს წინ. ხალხმა შიშით უკან დაიწია — არ გადაგვედოსო. კეთროვანი საშინელი სანახავი იყო: სხეულზე ხორცები ულპებოდა, ლოყები ჩამოსცვენოდა და ყბის ძვალი მოუჩანდა.

— უფალო, თუ ინებებ, შეგიძლია ჩემი განწმენდა! — ძლივს-ძლივობით და ვედრებით ამოილაპარაკა კეთროვანმა.

იესო ქრისტემ გაიწოდა ხელი, შეახო მას და თქვა:

— მნებავს, განიწმინდე!

ეს არ იყო სიტყვები, რომლებსაც ადამიანები წარმოთქვამენ. ეს იყო ნება უფლისა. კაცს მყისვე მოშორდა კეთრი, სხეული დაუცხრა, სახე გაულამაზდა. ხალხმა მშვენიერი, ჯან-ღონით სავსე მამაკაცი იხილა.

— დიდება შენდა, უფალო! დიდება შენდა, უფალო! — ატირდა სიხარულისაგან კაცი.

იესო კი ამ ღროს თავის ნებას ხელგამხმარ კაცზე აღასრულებდა.

„იესო ქრისტეს ძალა მის ზეციურ ნებაშია, — გაიფიქრა ამონ-რამ, — ხშიანი იქნება მისი სიტყვა თუ უხმო, მასში ჩადებული ნება ყველაფერს გარდაქმნის.“

და ხელგამხმარი კაცი უკვე აღარ იყო ხეიბარი, იესო ქრისტეს ნება აღსრულდა.

დრო შეუმჩნეველად გაფრინდა.

შუაღლე გადავიდა, მზის ჩასვლა მოახლოვდა.

ავადმყოფთა ნაკადი დაიღია.

ხალხი ისევ ჯგუფ-ჯგუფად დაბინავდა ზეთისხილის მთის ძირში. ადამიანები არ ჩქარობდნენ შინ დაბრუნებას, ყველას ისევ იესო ქრისტეს ქადაგების მოსმენა სურდა. ამიტომ ხვალისდელ დილას ელოდებოდნენ. ალაგ-ალაგ ცეცხლი დაანთეს და ქალებმა საჭმლის მომზადება დაიწყეს. ისინი გაცხოველებით მსჯელობდნენ დღევანდელ დღეზე, იესოს სიტყვებსა და სასწაულებზე.

იესო ქრისტესთან დედებმა ბავშვები მიიყვანეს, უნდოდათ, რომ იესო ხელით შეხებოდა მათ. რამდენიმე მოწაფემ გზა გადაუღობა დედებს და უსაყვედურა: განა არ ხედავთ, რომ იესო დაიღალა, ნულარ შეაწუხებთ მასო.

იესომ შეამჩნია ეს, მოწაფეებს გაუწყრა:

— გამოუშვით ბავშვები და ნუ უშლით ჩემთან მოსვლას, ვინაიდან მაგათნაირებისაა ცათა სასუფეველი!

ბავშვები რიგში გამწკრივდნენ და სათითაოდ მოდიოდნენ მასთან.

— ჩვენც მივიდეთ... მივიდეთ... მივიდეთ!.. — გაიხარა სალომემ, ამონ-რას ხელი ჩაავლო და თან გაიყოლა. მათ იორამი და ილიაც მიჰყვნენ.

იესო ყოველ ბავშვს ეხვეოდა, თავზე ხელს ადებდა, უღიმოდა, დარიგებას აძლევდა.

აკურთხა ერთი, მეორე, მესამე... მეათე... ოცდამეათე...

— უფალო, დაისვენე... — მორიდებით უთხრა ერთმა მოწაფემ.

ქრისტემ მოწაფეებს გადახედა.

— ჭეშმარიტად გეუბნებით თქვენ, — მიმართა იესომ, — ვინც ბავშვივით არ მიიღებს ღვთის სასუფეველს, ვერ შევაშიგ.

იმავე მოწაფემ შემთხვევით ისარგებლა და ჰკითხა:

— უფალო, ვინ უფრო დიდია ცათა სასუფეველში?

იესო ქრისტე ამ დროს სალომეს ადებდა თავზე ხელს. იესომ აკურთხა სალომე, შემდეგ ხელი მოჰკიდა და მოწაფეების შუაში ჩააყენა.

ამონ-რას ამ სანახაობამ სუნთქვა შეუქრა.

იესომ მშვიდად და მოთმინებით განუმარტა მოწაფეებს:

— ჭეშმარიტად გეუბნებით თქვენ: თუ ისე არ მოიქცევით და არ იქნებით, როგორც ბავშვები, ვერ შეხვალთ ცათა სასუფეველში. ვინც მიიღებს ერთ ასეთ ბავშვს (იესომ სალომეს ნიკაპზე მიაღო ხელი, სახე აუწია, წკრიალა თვალებში ჩახედა და გაუღიმა) ჩემი სახელით, მე მიმიღებს. ხოლო ვინც ერთ ამ მცირეთაგანს, რომელსაც ჩემი სწამს, აცდუნებს (იესოს ხმა გაუმკაცრდა), მისთვის აჯობებდა წისქვილის ქვა დაეკიდათ კისერზე და ზღვის უფსკრულში ჩაეძირათ.

მოწაფეები და ახლო-მახლო მდგომნი სულგანაბულნი უსმენდნენ იესოს.

— შეხედეთ, — გააფრთხილა იესომ მოწაფეები, — აბუჩად არ აიგდოთ არც ერთი ამ მცირეთაგანი! გეუბნებით მე თქვენ, რომ მათი ანგელოზები ზეცაში ყოველთვის ხედავენ ჩემი ზეციერი მამის სახეს. ვინაიდან კაცის ძე დალუპულის სახსნელად მოვიდა. რა გგონიათ თქვენ, — გააგრძელა იესომ, — კაცს რომ ასი ცხვარი ჰყავდეს და ერთ მათგანს გზა რომ აუბნეს, განა მთებში არ მიატოვებს ოთხმოცდაცხრამეტს და არ წავა გზააბნულის მოსაძებნად? თუ მოხდება და იპოვის მას, უფრო მეტად გაიხარებს მასზე, ვიდრე ოთხმოცდაცხრამეტზე, რომლებსაც გზა არ აბნევიათ. ასევე არა აქვს სურვილი თქვენს ზეციერ მამას, რომ დაიღუპოს ერთი ამ მცირეთაგანი.

იესომ აცალა, რომ მოწაფეებს შეეთვისებინათ მისი სიტყვები, და დაასკვნა:

— უდიდესი თქვენს შორის თქვენი მსახური იყოს. ვინც თავს აიმაღლებს, დამდაბლდება, ხოლო ვინც თავს დაიმდაბლებს, ამაღლდება. დამდაბლდით, რათა ამაღლდეთ.

იესომ სალომე გაუშვა და ილია მიიკრა გულთან, ხელი დაადო და აკურთხა.

— იტვირთე ჩემი ტვირთი! — უთხრა ბიჭს.

შემდეგ იორამი წარუდგა იესოს.

იესო მასაც მოეფერა, ხელი დაადო და აკურთხა.

— იორამ, — მიმართა ბიჭს, — იყავი ადამიანის სხეული-სა და სულის კეთილი მკურნალი. რა საწყაოთიც მიუწყავ, იმავე საწყაოთი მოგეწყოს შენ!

— ჰო, უფალო! — უპასუხა შთაგონებულმა იორამმა.

იორამს უნდოდა შევედრებოდა იესოს — მამა მოძირჩი-
ნეო, მაგრამ ვერ გაბედა. იესო კი თავად მიუხვდა.

— კარგი შვილი ჰყავს მამაშენს. მიეტყუა ცოდვები შენს
გამო. ხვალ აღგება. მოინახულე და გაიხარე!

იორამის მთელმა არსებამ უძღვნა იესოს მაღლიერების
განცდა, სიტყვით კი ბიჭმა მარტო ორი სიტყვა წარმოთქვა:

— გმადლობთ, უფალო!

იესო ქრისტეს წინაშე ამონ-რა დადგა. ბიჭი მუხლებზე
დაეშვა და ფეხებზე ემთხვია იესოს.

იესომ ააყენა.

— ანდრია, აი, შენი ღისშვილი, ამონ-რა! — მიმართა
თავის მოწაფეს.

ანდრია იქვე იდგა, იესოს მარჯვნივ, და ნეტარების სა-
ხით შესცქეროდა იესო ქრისტესა და ამონ-რას შეხვედრას.

— ჰო, უფალო! — სწრაფად უპასუხა ანდრიამ.

იესო ქვაზე ჩამოჯდა და ამონ-რას თვალებში ჩახვდა.

— სხეულის სანთელი თვალია, — თქვა იესომ, — ჰოდა,
თუ თვალი სუფთაა, მთელი შენი სხეულიც ნათელი იქნება!

იესომ გაუღიმა ამონ-რას. ცოტა ხანს გაჩუმდა. მერე
ხელები გაიწოდა და თავზე დაადო.

ამონ-რას მთელი სხეული უცნაურმა განცხრომამ და
ჟრუანტელმა ააღულუნა.

ამონ-რას სული ნეტარების თრთოლვამ მოიცვა.

იესო ქრისტეს ხელებიდან ამონ-რას სულსა და გულში,
მთელ სხეულში ნაკადად მიედინებოდა ძალა, ცეცხლი, სიბრ-
ძნე. სხეული ფრთებს ისხამდა, სული ნათლდებოდა.

— შენ ხარ ვენახი უფლისა!

იესო ქრისტეს სიყვარულით სავსე ხმამ, სიტყვებმა, გა-
მომეტყველებამ, თვალების ძალამ ამონ-რა მეცხრე ცაზე და
კიდევ უფრო ზემოთ აიტაცა. იქ, ცათა სასუფეველში, ამონ-
რა ისმენდა იესოს გაკვეთილს, რომელიც მას ამქვეყნიური
არსებობის აზრს, ცხოვრების აზრს ჩააგონებდა. იესო უხმოდ
განუმარტავდა მას:

„რას ვამსგავსო ღვთის სასუფეველი?

ასეთია ღვთის სასუფეველი,

კაცმა რომ თესლი ჩააგდოს მიწაში, ეძინოს და ღებო-
დეს ღამით თუ ღლისით,

თესლი კი აღმოცენდება და იზრდება,

მან კი არ იცის, როგორ.

რადგან მიწა თვითონ გამოიღებს ნაყოფს:

პირველად ჯეჯილს,

მერე თავთავს,

შემდეგ კი სავსე მარცვალს თავთავში.

რაუამს მომწიფდება ნაყოფი,

მაშინვე გამოგზავნის ნამგალს, რადგან მოაწია მკამ.

კიდევ რას შევუდარო ღვთის სასუფეველი?

იგი მღოგვის მარცვალს ჰგავს,

რომელიც ყველაზე მცირეა მიწაზე არსებულ თესლთა შორის,

დათესვის შემდეგ კი ამოდის და მის ფოთლებში ფრინველნი იბუღებენ.

ამონ-რა,

შენ მოცემული გაქვს ცოდნა ღვთის სასუფეველის საიდუმლოსი.

შენ ჩემი პატარა მწყემსი ხარ."

იესო ქრისტემ მსუბუქად მოაშორა ხელები ამონ-რას.

ამონ-რა განცხრომის მეცხრე ციდან ნელა დაეშვა მიწაზე.

იესოს თვალს ვერ აცილებდა.

უნდოდა ჩახუტებოდა, უნდოდა მოეფერებოდა, უნდოდა ჩაძირულიყო იესო ქრისტეში.

იესო ქრისტე თავად მოეფერა ბიჭს, გულზე მიიხუტა. შემდეგ ანდრიას მიმართა:

— ანდრია, გააცილე შენი ღისშვილი. აქ მისი ღარჩენა აღარ არის საჭირო.

ანდრიამ მხოლოდ ახლა გაბედა ამონ-რასთან მისულისყო. ხელში ხელი მოჰკიდა.

— გამომყევი, ჩემო ბიჭო! — უთხრა მშვიდი ხმით.

როგორც კი იესოს თვალს მიეფარნენ, ანდრიამ შუბლზე აკოცა ამონ-რას, მოეფერა.

— ბედნიერი ვარ, რომ გნახე! — უთხრა ანდრიამ, — ბედნიერი ვარ, რომ ქრისტემ გაკურთხა!

ამონ-რაც ბედნიერი იყო მასწავლებელთან შეხვედრით. რამდენი რამ უნდოდა ეთქვა და ეკითხა მისთვის. მარა აღარ ჰყავთ არც ანდრიას, არც ამონ-რას; იორამმა წამლების დამზადება და მკურნალობა ისწავლა, ქვაწერილი ამოცნობილია, დღეს კი მის ყველა სიტყვასა და ხაზს ჩასწვდა;

აღბათ, სალომესა და ილიასაც ასწავლის კითხვასა და მეცნიერებას.

ეს ყველაფერი და ბევრი სხვაც ერთად და უეცრად გაიფიქრა ამონ-რამ. ანდრიამ კი მისი ყველა ფიქრი ერთად დაიჭირა.

— აი რას გეტყვი, ჩემო ბიჭო! — ხმამაღლა უპასუხა ანდრიამ ამონ-რას ფიქრებს, — მარას სული ცათა სასუფეველშია. ნათელი იყო მისი ცხოვრება და მისი სულიც ნათელ სამყაროში დამკვიდრდა. ხშირად გაიხსენებ მარა და უსურვე, რომ კიდევ უფრო სრულყოფილი გახდეს მისი სული.

ანდრია ცოტახანს გაჩუმდა. აღბათ, მარას სულს კეთილი ფიქრები გაუგზავნა.

— ასწავლე კითხვა და მეცნიერება სალომეს, ილიას და სხვებს, ვინც მოისურვებს. აკეთეთ კეთილი საქმეები, განკურნეთ ადამიანები, უამბეთ მათ იესო ქრისტეზე...

ანდრია ისევ გაჩუმდა. შემდეგ ამონ-რას თვალებში ჩახედა და თითქმის უჩურჩულა:

— ამონ-რა, შენ უკვე შეიცანი შენი ქვაწერილი. იყავი შენი გზის ერთგული.

ანდრიამ სალომე, იორამი და ილიაც მოიხმო თავისთან, მათაც მოეფერა.

— თქვენ ყველა ქრისტეს შვილები ხართ. დაეხმარეთ ერთმანეთს, ისწავლეთ ერთმანეთისაგან, იცხოვრეთ, როგორც იესო ქრისტემ დაგარიგათ. ამონ-რა იყოს თქვენი მასწავლებელი.

დასასრულ ანდრია ისევ სათითაოდ მოეფერა ყველას და აგრძნობინა, რომ წასვლის დრო აქვთ.

— ნულარ გაჩერდებით აქ, დაბრუნდით ქალაქში. გული გეტყვით, რა უნდა გააკეთოთ და როგორ მოიქცეთ. გზისა ნუ შეგეშინდებთ, მთვარიანი ღამეა. და, საერთოდ, არასოდეს არაფრის შეგეშინდეთ.

ამონ-რას უჭირდა მასწავლებელთან განშორება.

— მშვიდობით, ანდრია!

— ღმერთი გფარავდეთ ყველას!

ამონ-რა წინ გაუძღვა თავის მეგობრებს, ან, როგორც ანდრიამ თქვა, თავის მოწაფეებს. უკან მისი მასწავლებელი დარჩა. ანდრია დიდხანს ადევნებდა თვალს მიმავლებს, შემდეგ, როცა ისინი თვალთაგან მიეფარნენ, თავის მასწავლებელთან დაბრუნდა.

პირველი გაკვეთილი მოწაფეებთან

სალომე და ბიჭები დიდხანს მიდიოდნენ ჩუმად.

თითოეული იესოსთან შეხვედრის შთაბეჭდილებებში იყო ჩაძირული და ცდილობდა თავის თავში გარკვეულიყო.

„რატომ უთხრა იესომ თავის მოწაფეებს — თუ ესე არ მოიქცევით, არ იქნებით როგორც ბავშვები, ვერ შეხვალთ ცათა სასუფეველშიო? — ფიქრობდა სალომე, — როგორ იქცევიან ბავშვები? თამაშობენ, ცელქობენ, ჩხუბობენ და იბუტებიან. იმას ხომ არ ეუბნებოდა იესო მოწაფეებს — თქვენც ითამაშეთ, იცელქეთ, იჩხუბეთ და გაიბუტეთ, თორემ ცათა სასუფეველში არ შეგიშვებენო? ოჰ, რა სისულელეა! როგორ შეიძლება დიდებს ასეთი დარიგება მისცე. ან როგორ უნდა იცელქონ და ითამაშონ დიდებმა? ისე მოიქეცით, როგორც ბავშვებიო. ეს სხვა რამეს ნიშნავს. ისეთები იყავით, როგორც ბავშვებიო. აქ რაღაც საიდუმლოა. — სალომეს ფიქრებმა იესოს სხვა აზრებზეც გადაინაცვლა, — კიდევ იესომ თქვა: ვინც ერთ ასეთ ბავშვს ჩემი სახელით მიიღებს, ის მე მღებულობსო. მაშ, ვინც მე იესოს სახელით მიმიღებს, ის იესოს მიიღებს. გამოდის, რომ მეც იესო ვარ? — სალომე თავისმა დასკვნამ გააკვირვა, — ამონ-რას ვკითხავ, ის გამარკვევს.“ ყველაზე დიდი გამოცანა კი სალომესთვის სულ სხვა რამ იყო: „მათი ანგელოზები ზეცაში ყოველთვის ხედავენ ჩემი ზეციერი მამის სახეს,“ — ასე თქვა იესომ. „მეც ჩემი ზეციერი ანგელოზი მყავს? ის ჩვენს ზეციერ მამას ხედავს? რატომ მე ვერ ვხედავ ჩემს ანგელოზს ან ღმერთს? ვინ არის ზეციერი მამა, ღმერთი? — სალომეს ფიქრები ვერა და ვერ ლაგდებოდა, გოგონა ვერ პოულობდა თავისი კითხვების პასუხებს, — ამონ-რას ყველაფერი ეცოდინება. მას ვკითხავ.“ ამ ფიქრებით მოჰყვებოდა გვერდით სალომე ამონ-რას, მაგრამ ჯერ არაფერს ეკითხებოდა, ხედავდა, რომ იგი თავად იყო ფიქრებში ჩაძირული.

ილია გაოგნებული იყო იმით, რისი მოწმეც გახდა. იესოს სიტყვები კარგად ვერ გაიგო, მაგრამ გული უგრძნობდა, რომ დიდ ცოდნას ეზიარა, გონებაში რაღაც სინათლე და-

უმკვიდრდა. მიაბიჯებდა ისე, თითქოს ზურგზე უკვე აკიდებული ჰქონდა იესოს ტვირთი, მაგრამ რა ტვირთი იყო, ვერ ხვდებოდა, რადგან არ ამბიშებდა. „რას ნიშნავს — იტვირთე ჩემი ტვირთით? ასე მითხრა იესომ. ვიტვირთავ, მაგრამ ხომ უნდა ვიცოდე, რა არის ეს ტვირთი, სად არის ის, სად უნდა მივიტანო? იესო ქრისტეს ტვირთი... იქნებ ეს ტვირთი მისი ფიქრებია, რასაც ის ხალხს ასწავლიდა? მიჭირს გავერკვე. ამონ-რას უნდა ვთხოვო დამეხმაროს, მას ეცოდინება. ამონ-რა ჩემი მასწავლებელია.“ ასე ფიქრობდა ილია, მაგრამ არ ჩქარობდა, რომ ამონ-რასთვის კითხვები მიეცა, სხვა დროს ვკითხავო.

იორამი მიაბიჯებდა რწმენითა და იმედით სავსე. იესომ უთხრა: ადამიანის სულისა და სხეულის კეთილი მკურნალი იყავიო. ამ გზიდან არ გადაუხვევს იორამი. ზეპირად შეისწავლის წიგნებს, რომლებიც ანდრიამ ამონ-რას დაუტოვა, ისწავლის ანდრიას ნაწერებს; მათში ბევრი ცოდნაა სამკურნალო ბალახების და მკურნალობის შესახებ. იორამი უმკურნალებს ყველას განურჩევლად — კეთილსაც და ბოროტსაც, რადგან ასე თქვა იესომ: „დალოცეთ თქვენი მაწვევრები და სიკეთე უყავით თქვენს მოძულეებს. კიდევ იესომ უთხრა: რა საწყაოთიც მიუწყავ, ისეთი საწყაოთი მოგეწყოს შენო. რას ნიშნავს ეს? იორამი თითქოსდა ჩასწავდა ცათა სასუფეველის საიდუმლოს: როგორი სიკეთითაც იღვანებ აქ, დედამიწაზე, ის დაუბრუნდება შენს სულს იქ, ცათა სასუფეველში. მაგრამ იორამი ვერ გაერკვა იესოს ნათქვამში: მიეტევა მამაშენს ცოდვაში შენს გამოო. რას ნიშნავს ცოდვების მიტევა? — ფიქრობდა იორამი, — მამაჩემის სული განიწმინდა? ისევე განიწმინდა, როგორც კეთროვანი? მაშინ როგორი კაცი გახდება მამაჩემი?“ იორამს გაუჭირდა ამის გაგება, ვერა და ვერ წარმოედგინა, როგორი შეიძლებოდა გამხდარიყო ადამიანი, რომელიც ბოროტებით ცხოვრობდა და, უეცრად, ყველაფერი მიატოვა. ინახულე და გაიხარეო, უთხრა იესომ. „ამონ-რას უნდა გავესაუბრო, ის გამარკვევს.“ — გაიფიქრა იორამმა, მაგრამ ამონ-რას სიმშვიდე არ დაარღვია.

ამონ-რა წინ მიუძღოდა მეგობარ-მოწაფეებს. ფეხები თავად აგრძელებდნენ გზას, თვითონ კი მთლიანად ფიქრებში იყო წასული. წვრილ-წვრილად იხსენებდა ყველაფერს, თუმცა განცდილის, მოსმენილისა და დანახულის არცერთი

დეტალი წვრილმანად არ მიაჩნდა. იხსენებდა იესო ქრისტეს ხელებს და სიტყვით გამოუთქმელ იმ ძალასა და განცდას, რაც მას სულსა და გულში ჩაეღვარა, როცა იესომ ხელები თავზე დაადო. ამონ-რას გონებაში საკვირველი სინათლე შეიჭრა, სინათლე კი არა, გაგება, მიხვედრა; ყველაფერი განათდა მის გონებაში, ქვაწერილის მთელი საიდუმლო ამონ-რამ უეცრად ამოიცნო. აი, უბეში უღევს თავისი ქვაწერილი, ზეპირად იცის ყველა ხაზი, ყველა ასო-ნიშანი. რამდენს წვალობდა მათ ამოხსნაზე. ახლა კი ქვაწერილი მთლიანად ალაპარაკდა. გაიგო ამონ-რამ, რას ნიშნავს გზა, რომელიც მოკლევ არის და უსასრულოც, ეკლიანიც და აღმავალიც. ამონ-რამ მკერდზე ჩამოკიდებული ქვაწერილი მოისინჯა და მოეფერა, მოესიყვარულა. „იყოს მოკლე და იყოს ეკლიანი, — გაიფიქრა ბიჭმა, — გაუძლებ.“ მიუძღოდა წინ თავის მოწაფეებს ქრისტეს პატარა მწყემსი და ფიქრობდა იმაზე, თუ როგორ უნდა ემწყემსა ისინიც, ვინც მას ახლა ფეხდაფეხ მისდევდა, და ისინიც, ვინც მოისურვებდა, რომ გაჰყოლოდა.

ღამის სიჩუმეს ოთხი მგზავრის ნაბიჯები არღვევდა. საესე მთვარე უკნიდან უნათებდათ გზას და თითოეულ მათგანს წინ საკუთარ გრძელ ჩრდილს უჩენდა.

შორიდან ცხენების თქარათქური მოესმათ.

სალომე შეკრთა და ამონ-რას მიეკვრა.

— რა უნდა ვქნათ, თუ ყაჩაღები არიან? — ჰკითხა ამონ-რას.

— ნუ გეშინია, — დაამშვიდა ამონ-რამ, — და, საერთოდ, არასოდეს არაფრის შეგეშინდეს.

მაღლე გზაზე მხედრების მთელი რაზმი გამოჩნდა. ცხენოსნები ბავშვებს მიუახლოვდნენ. წინ მომავალმა, ალბათ, უფროსმა ხელი ასწია და რაზმი გაჩერდა. ცხენოსნები მახვილებითა და შუბებით იყვნენ შეიარაღებულნი.

— ეი, თქვენ, საიდან მოდიხართ ამ შუაღამისას, ან სად მიდიხართ?

— ჩვენ ზეთისხილის მთასთან ვიყავით, იქიდან ვბრუნდებით ქალაქში. — უპასუხა მშვიდად ამონ-რამ.

— რა გინდოდათ იქ? — მწყვრალად ჰკითხა უფროსმა.

— იესო ქრისტესთვის გვინდოდა მოგვესმინა.

— მერე, მოუსმინეთ? იქ არის თქვენი მესია? — დასძინა უფროსმა.

— არა, იესო არ მოვიდა იქ.

— როგორ თუ არ მოვიდა?! მაშ სად წავიდა იესო? — გაუკვირდა უფროსს.

— გალილეაში წავიდაო, ასე თქვეს.

— რას ამბობ?! — არ დაიჯერა უფროსმა, — განა ახლა იესო ზეთისხილის მთასთან არ არის თავის მოწაფეებთან ერთად?! განა იქ აუარებელი ხალხი არ შეიკრიბა?!

— ხალხი ძალიან ბევრი შეიკრიბა, მთელი ღამე და დღე ველოდეთ იესო ქრისტესა და მის მოწაფეებს. მაგრამ მხოლოდ მათგან გამოგზავნილი მოვიდა და შეგვატყობინა, რომ იესო იუდეაში არ მოვაო.

— რატომ არ მოვაო? — ჩაეკითხა უფროსი ამონ-რას. ცხენიდანაც ჩამოხტა, რომ მისთვის თვალებში ჩაეხედა, — შენ მართალს ამბობ?

— ასე თქვა გამოგზავნილმა: ვისაც იესოს ქადაგების მოსმენა ან მკურნალობა გინდათ, გალილეაში წადით, იესოს თაბორის მთასთან ან გენესარეთის ზღვასთან იპოვითო.

— ისევ გეკითხები, — მუქარით უთხრა უფროსმა, — რატომ არ მოვაო იესო?

— ასე თქვეს: იუდეაში მეფეს იესოს შეპყრობა უნდაო. იესოს შეატყობინეს ეს, ისიც უკან დაბრუნდა, ის გენესარეთის ზღვით ბეთსაიდაში აპირებს წასვლას, რომ მეფეს დაემალოს. — მშვიდად უპასუხა ამონ-რამ.

— შენ მართალს ამბობ?

— ღიახ, მართალს მოგახსენებთ.

უფროსი ამონ-რას მეგობრებს მიუბრუნდა;

— მართალს ამბობს თქვენი ამხანაგი?

მაგრამ ვერცერთმა ვერ გაიგო, რას ეკითხებოდა მათ შეიარაღებული კაცი, თანაც რატომ იყო ასე გამწყვრალი. უფროსი კიდევ უფრო გაბრაზდა, როგორ თუ პასუხს მიგვიანებენო და მათრახი შეათამაშა, აქაოდა ხომ არ გინდათ მათრახის გემო გაგასინჯოთო.

— მე თქვენ გეკითხებით, თქვენც ხომ იყავით ზეთისხილის მთასთან? მართლა არ მოვიდა იქ მესია? — უფროსმა ისე შეჰყვირა, რომ ბავშვებმა იგრძენეს, მეტად სახიფათო საქმეს გადაეყარნენ.

ბავშვები ისევ დუმდნენ.

— რატომ არ უპასუხებთ? — ჰკითხა ამონ-რამ მეგობრებს.

— როგორ ვუპასუხებთ, როცა არ გვესმის, რას გვეკითხება? ამონ-რა, რა ენაზე ელაპარაკები მაგ კაცს?! — იორამის პასუხი სამივესთვის საერთო იყო.

— როგორ თუ რა ენაზე? განა არ გვეყურებოდათ, ჩვეულადავ ენაზე!

— არა, შენ სხვა ენაზე ელაპარაკები მაგას, ჩვენ ეგ ენა არ გვესმის!

უფროსი მოუთმენლად ელოდა პასუხს და ბავშვების ამ მოლაპარაკებამ მისთვის უცხო ენაზე მთლად გამოიყვანა მდგომარეობიდან.

— რას დუღუნებთ თქვენთვის? — შეჰყვირა და ამონ-რას გადაუჭირა. სალომემ წამოიყვირა და ამონ-რას გადაეფარა. ილია და იორამიც მზად იყვნენ დაეცვათ მასწავლებელი, მაგრამ ამონ-რას სიმშვიდემ ისინი გააჩერა. ამონ-რას თავად ვერ გაეგო, რა ხდებოდა, მაგრამ ამბობდა იმას, რასაც გული ჰკარნახობდა, ხოლო ენა თავისით გამოთქვამდა სიტყვებს. ახლაც გულმა უკარნახა, ენამ კი თქვა:

— ბატონო, ჩემი მეგობრები ვერ გიპასუხებენ, რადგან მათ თქვენი ენა არ იციან.

— შენ საიდან იცი რომაული? — დაინტერესდა უფროსი.

— ერთი წელიწადი რომში ვცხოვრობდი, იქიდან მახსოვს.

— მაშ შენ ამბობ, რომ იესო ზეთისხილის მთასთან არც მისულა?

— დიახ.

— ხალხი რას შერება? მარტო თქვენ ბრუნდებით ქალაქში?

— ხალხის ნაწილი გალილეაში წავიდა, იქნებ იქ მაინც ვნახოთ იესო. ბევრი იყო ზეიბარი და ავადმყოფი. იესო მოგვარჩენსო, ამბობდნენ...

— სხვებმა?

— დანარჩენები ქალაქში დილით ადრე წამოვლენ. ღამით არ უნდოდათ სიარული.

— თქვენ რატომღა წამოხვედით? — შეუტია უფროსმა ამონ-რას.

— ჩვენ მეგობარს, — ამონ-რამ იორამზე მიუთითა, — მა-
მა ჰყავს ძალიან ავაღ, დარჩენა არ შეეძლო. ჩვენ მარტო არ
გვინდოდა გამოგვეშვა და გამოვყვეით.

უფროსი ცოტახანს ჩაფიქრდა. შემდეგ თავისებს ჰკითხა:
— ხომ გაიგეთ, რას ამბობს ეს ბიჭი, როგორ მოვიქ-
ცეთ?

ერთმა თქვა, იქნებ გვატყუებს ეგ ბავშვი, ამიტომ წავი-
დეთ ზეთისხილის მთასთან და დავრწმუნდეთო. სხვებმა კი
იგრძნეს უფროსის განზრახვა და ურჩიეს: ეს ბავშვი არ
გვატყუებს, რატომ დავკარგოთ დრო, დავბრუნდეთ და ასის-
თავს მოვახსენოთ, რაც შევიტყვეთო.

უფროსს მოეწონა მათი რჩევა.

— ბავშვები? — იკითხა უფროსმა, — დავტოვოთ თუ თან
წავიყვანოთ?

— ბავშვები თან რომ წავიყვანოთ, შევბრკოლდებით, მა-
გათთვის ცალკე ცხენები არ გვყავს, ჩვენ კი ცხენებზე ვერ
შევისხამთ! — თქვა ერთმა.

უფროსი კმაყოფილი ჩანდა. თუ რამ გაუგებრობა მომ-
ხდარა, ყველაფერს ჩემს მრჩეველს დავაბრალებო, გაიფიქრა.

— გაეიგოთ, ვინ არიან ეს ბავშვები, თუ გვატყუებენ,
სად დაგვეძალებიან, მოძებნით! — დაუმატა მეორემ.

— აბა, მითხარი, რა გქვია შენ და შენს ამხანაგებს, სად
ცხოვრობთ! — უბრძანა უფროსმა ამონ-რას.

— ქალაქში ვცხოვრობთ, — უპასუხა ამონ-რამ და ყვე-
ლას სახელი ჩამოუთვალა.

— შენი სახელი რად დაგავიწყდა?

— მე ამონ-რა ვარ, მეზადურ ამონის ძე. მამა თევზის
ჭერის დროს აღელვებულ ზღვაში დაიღუპა.

ცხენებიდან სამი ლეგიონერი ჩამოვიდა, ბავშვების მთვა-
რით განათებულ სახეებს ახლოდან დააკვირდა და დაიხსომა.

— შენ ხომ იცი არამეული? — ჰკითხა უფროსმა.

— ვიცი! — უპასუხა თამამად ლეგიონერმა.

— მერე და ხომ ხედავ, შე სულელო, რომ მარტო ეს
ერთი ბიჭი ლაპარაკობს ჩვენს ენაზე. დაკითხე სხვებიც და
გავიგებთ, ისინი რაღას იტყვიან.

ლეგიონერმა პირი გააღო და თითქოს რაღაც უნდა
ეთქვა, მაგრამ მისთვის მოულოდნელად გაურკვეველი ლულ-
ლული ამოუშვა.

— ასე ლაპარაკობენ არამეულად? — გაუკვირდა უფროსს, — ჰკითხე, გუებნები, სად არის ახლა მაგათი იესო!

ლეგიონერმა ისევ გაალო პირი და ისევ აღლულლულდა.

— რა გემართება? — გაწყრა უფროსი.

ლეგიონერმა ზლუქუნე დაიწყო.

— რა მოუვიდა ამას?

ორმა ლეგიონერმა პირში ჩახვდა აზლუქუნებულს და, რადგან სიბნელის გამო ვერაფერი დაინახა, ერთმა ხელი ჩაუყო პირში.

— აუჰ! — შეიცხადა, — ამას ენა გადაუყლაპავს! ენა აღარ აქვს პირში!

— რას ამბობ?! — გაოგნდა უფროსი, ეგონა — მამასხარაეებენო, — ამწუთს არ ლაპარაკობდა?

— ლაპარაკობდა, მაგრამ ველარ ილაპარაკებს... ენა გადაყლაპა... — გაიმეორა ლეგიონერმა.

უფროსმა გადაწყვიტა თავად შეემოწმებინა ყველაფერი.

— გააღე პირი! — დაუყვირა აზლუქუნებულ ლეგიონერს.

ლეგიონერმა საცოდავად დაიგმინა და ხახა დააფჩინა. უფროსმა უბედური მთვარისკენ შემოაბრუნა, აქაო და კარგად დავინახო, და შიგ ჩახვდა. პირში არაფერი ჩანდა. მაშინ უფროსმა თავად ჩაუყო თითები ხახაში და იქაურობა მოათვალიერა. ენაგადაყლაპულმა „ბუყო“ და რა საძაგლობაც აჭამეს ყაზარმაში, უფროსს სახეში შეასხა.

— თფუ... — გაცოფდა უფროსი, — წყალი... წყალი...

წყალი ლეგიონერებიდან არავის აღმოაჩნდა. უფროსს იორამი მიეშველა: აბგიდან დოქი ამოიღო და პირი მოაბანინა.

— ეი, შენ, — დაუყვირა უფროსმა ყველაზე ძლიერ ლეგიონერს, — გაულაწუნე ერთი მაგას ყბაში და ამოუგდე ენა...

ლეგიონერმა ხალისით შეასრულა უფროსის ბრძანება და აზლუქუნებულს ყბაში ლაზათიანი მუშტი სთხლიდა. ენაგადაყლაპული მიწაზე გაიშხლართა. მეორე ლეგიონერი მაშინვე ზედ მოაჯდა და ისევ ჩაუყო პირში ხელი, რომ ენა მოესინჯა. მაგრამ გამწარებულმა ენაგადაყლაპულმა ისე მაგრად მოუჭირა თითებზე კბილები, რომ ლეგიონერმა ყვირილი ატეხა — მიშველეთ, ხელი მომაჭამა ამ ვირმაო. ენაგადაყლაპულს ჩასცხეს და ძლივს გააღებინეს პირი; საცოდავი ლეგიონერი, რომელსაც ძალიან უნდოდა გმირობა გაეწია,

თვითონ გახდა საექიმო, რადგან ენაგადაყლაპულმა ნეკი მოაკენითა და პირიდან გამოაფურთხა.

კიდევ ბევრი ცუდი ამბავი მოხდებოდა, მაგრამ უფროსმა ჭკუა იხმარა: ლეგიონერებს უბრძანა ცხენებზე შემსხდარიყვნენ, ყველა ზურგისკენ შეაბრუნა, თვითონ თავში დაუდგა და მომყევითო, დაიძახა.

მამაც მეომართა შორის ერთი — თითმოკვნიტილი — მოთქმით ტიროდა, მეორე, რომელმაც ასე ღროულად გადაყლაპა ენა, ბლაოდა, ზოგი სიცილით ბჟირდებოდა, უფროსი კი, რომელსაც „ბუყის“ სუნი ახრჩობდა, ივინებოდა.

ვიდრე ცხენების ფეხის ხმა შეწყდებოდა, ბავშვები ადგილზე იდგნენ და მიმაკვალ რაზმს უყურებდნენ. შემდეგ კი ვითარების გარკვევა დაიწყეს.

— ამონ-რა, ვინ იყვნენ ისინი? რა უნდოდათ? — ჰკითხა მოუთმენლობით სალომემ.

— რა ენაზე ელაპარაკებოდი მათ?! შენ იცი ენები?! — გაოცებული იყო იორამი.

— სად მიდიოდნენ ან რატომ დაბრუნდნენ უკან? — უკვირდა ილიას.

ამონ-რამ თავადაც არ იცოდა კარგად, რა მოხდა.

რა თქმა უნდა, ამონ-რა მიხვდა, რომ შეიარაღებულები რომაელი ლეგიონერები იყვნენ და ცუდი განზრახვით მიიჩქაროდნენ ზეთისხილის მთისკენ; იმასაც მიხვდა, რომ მათ თურმე, როგორც უფროსმა თქვა, რომაულ ენაზე ელაპარაკებოდა, თუმცა არც რომაული და არც სხვა ენები, გარდა მშობლიური არამეული ენისა, არ იცოდა. კიდევ იმას მიხვდა ამონ-რა, რომ მოატყუა ლეგიონერები და უკან გააბრუნა, მაშ, დაიცვა იესოც და ხალხიც, რომელიც ზეთისხილის მთასთან იყო შეკრებილი. ჩასწვდა ყველაფერ ამას. მაგრამ როგორ მოხდა ეს ყველაფერი სწორედ ასე — ეს ვერ აეხსნა ამონ-რას.

რაც შეეძლო და რაც საჭირო იყო, განუმარტა მეგობრებს. მაგრამ ვერ აუხსნა და ვერ განუმარტა, საიდან მოუფრინდა თავში ლეგიონერების ენა და რამ ალაპარაკა ამ ენაზე, თანაც ისე, რომ თვითონაც არ იცოდა, თუ სხვა ენაზე ლაპარაკობდა. გული ახსენებდა, რა უთხრა იესო ქრისტემ განშორების წინ: „ამონ-რა, შენ მოცემული გაქვს ცოდნა

ღვთის სასუფეველის საიღუმლოსი“, მაგრამ ამ სიტყვების აზრი ამონ-რამ ჯერ ვერ ამოიცნო.

გზა გააგრძელეს.

ამონ-რას საუბარმა ლეგიონერებთან და ლეგიონერების უკან დაბრუნებამ, იმანაც, როგორ გადაყლაპა ერთმა საცოდავმა ლეგიონერმა ენა და მეორეს თითი მოაჭამა, ბავშვები ძალიან გაახალისა. სალომე გულიანად კისკისებდა: ასე უნდა მაგათ, რას ერჩიან იესოსო. შემდეგ წარმოიდგინა, რა დაემართება უფროსს, როცა გაიგებს, რომ პატარა ბიჭმა განგებ შეიყვანა შეცდომაში და მთელი რაზმი, იესოს დასაკავებლად მომზადებული, უკან დააბრუნა; როგორ გადაირევა და რას ეტყვის მას კიდევ უფრო ღიღი უფროსი. „ახია მაგათზე, ახია!“ – იძახდა სალომე, იცინოდა და სხვებსაც აცინებდა, ხარობდა და ამონ-რას ეფერებოდა: „ყოჩაღ, რა კარგად მოიფიქრე, როგორ უეცრად მიხვდი, რაც უნდა გეპასუხა, მათი ენაც როგორ გაიგე!“ ამონ-რას უნდოდა ეთქვა, რომ ეს მისი დამსახურება არ იყო, მაგრამ ხედავდა: ალტაცებული სალომე და ილიაც ამას ვერ გაიგებდნენ.

ილიასთვის ამონ-რა გამოცანა აღმოჩნდა: თითქოს რაზმ-ღენიმე წელია იცნობდა ამონ-რას, მეგობრობდა მასთან, მაგრამ ვერც წარმოიდგენდა, რომ ამონ-რამ ასე კარგად იცოდა კითხვა და მეცნიერება, შეეძლო გულთამშხილაობა და წინასწარმეტყველება. ილია მის მიმართ ღიღი მოწიწებით განიშტვალა და უფროსი მეგობრის გრძნობა მოკრძალებული მოწაფის განცლით შეეცვალა. ილიამ ველარ მოითმინა და ამონ-რას მიმართა:

– ამონ-რა, ასე თქვა ანდრიამ – ამონ-რა თქვენი მასწავლებელი იყოსო. მე მინდა შენი მოწაფე ვიყო. როდის მასწავლი კითხვასა და მეცნიერებას?

– ჰო, ჰო, მეც შენი მოწაფე ვარ, მეც უნდა მასწავლო!
– დაუმატა სალომემ, – როდის, როდის?

„ანდრიას არ უყვარდა საქმის გადაღება,“ – გაიფიქრა ამონ-რამ. გზიდან გადავიდა და ხის ქვეშ ქვაზე ჩამოჯდა. სალომე და ილია ვერ მიხვდნენ, რატომ განერდა ამონ-რა ასე მოულოდნელად.

– დასხვდით, – უთხრა ამონ-რამ, – შევუდგეთ კითხვისა და მეცნიერების გზას. ამ გზას კი, – და ხელი შარავზისკენ გაიშვირა, – მერე გავაგრძელებთ.

სალომე მაშინვე მის ფეხებთან მოეწყო, ბიჭებიც მის წინ დასხდნენ.

— დავიწყით იმით, რომ ცას გავხედოთ. რას ხედავთ ცაზე?

მოწაფეებმა თავები მაღლა აწიეს და ვარსკვლავებიან ცას დაუწყეს ცქერა.

— ვარსკვლავებს, მთვარეს.

— გათენდება და მზესაც დავინახავთ...

— მზე გაათენებს, ღამეს დღით შეცვლის...

— რამდენი ვარსკვლავია ცაზე? — ჰკითხა ამონ-რამ.

— აუარებელი... ძალიან ბევრი...

— უთვალავი...

უპასუხეს მოწაფეებმა.

— შეხედეთ, როგორ არიან ვარსკვლავები განლაგებულნი. რატომ არ იცვლიან ისინი თავიანთ ადგილებს?

მოწაფეებმა პასუხი ვერ მონახეს.

— ცაზე არიან მიმაგრებულნი და იმიტომ! — თქვა სალომემ.

ამონ-რამ აცალა მოწაფეებს, რომ ცოტახანს ეცქირათ ცისთვის და გაოცებულიყვნენ.

— რა საინტერესოა ცა. რა ხდება ნეტავ ვარსკვლავებზე? — თქვა სალომემ.

ილიაც მოხიბლული იყო ცით, თითქოს პირველად ახედა ვარსკვლავებსო. იორამიც ცნობისმოყვარეობით ისმენდა ამონ-რას გაკვეთილს, თუმცა ეს საფეხური მას დიდი ხანია ათვისებული ჰქონდა.

— ყველაფერი, რაც ჩვენს ზემოთ არის, ერთი დიდი წიგნია, რომლის წაკითხვაც უნდა ვისწავლოთ და მაშინ ბევრ საიდუმლოს გავიგებთ. ამ წიგნს სამყარო ჰქვია.

— სამყარო... — გაიმეორა სალომემ.

— ახლა მიმოიხედეთ ირგვლივ, რას ხედავთ? — ჰკითხა ამონ-რამ მოწაფეებს.

— ხეებს, მთებს...

— ქვებს, ყვავილებს, ბალახს...

— მინდვრებს...

— ტბებს, ზღვებსა და მდინარეებსაც დავინახავდით, ახლოს რომ ვიყოთ მათთან...

— ცხოველებსა და ფრინველებსაც დავინახავდით, მაგრამ ლამეა...

— რა ჰქვია ადამიანების დიდ სახლს?

სალომემ და ილიამ ვერაფერი უპასუხეს.

— ღელამიწა... — თქვა იორამმა.

— ღელამიწა, ღელამიწა! — გაიმეორა სალომემ.

ილია გულში იმეორებდა ყველაფერს.

— ყველაფერი, რაც ღელამიწაზე წარმოიშვა და აღმოცენდა, რაც ჩვენს გარშემოა და რითიც ვცოცხლობთ, მეორე დიდი წიგნია, პირველი წიგნის შვილი. ამ წიგნის წაკითხვაც უნდა ვისწავლოთ და მისგანაც საიდუმლოებს შევიცნობთ. ამ წიგნს ბუნება ჰქვია.

— სამყარო და ვარსკვლავები, ღელამიწა და ბუნება... — შეაჯამა თავისი ფიქრები სალომემ.

ამონ-რამ გააგრძელა:

— ახლა დახუჭეთ თვალები და თქვენს გონებაში, თქვენს გულში შეიხედეთ, რა ხდება და რა ინახება იქ?

ცოტახნის შემდეგ სალომე აჩურჩულდა:

— რა ხდება ჩემს გულში, რა ხდება ჩემს გონებაში... ფიქრები მაქვს თავში... გულში სიხარული მაქვს... ღელა მიყვარს და ამონ-რა მიყვარს, ეს მაქვს გულში...

— სინდისს ვხედავ გულში, — მორიდებით თქვა ილიამ.

— სურვილები მაქვს გულში... — დაუმატა სალომემ.

— წუხილი და საზრუნავი მაქვს... თავში ათასნაირი აზრი მიჩნდება! — თქვა იორამმა.

— სიზმრებს ვხედავ ხოლმე. სიზმრები ხომ გონებაში ხდება? — კიდევ დაუმატა სალომემ.

— ვოცნებობ ხოლმე, როცა ჩემთვის ვფიქრობ, თითქოს ვიღაცას ველაპარაკები... — თქვა ილიამ.

ამონ-რამ აცალა მოწაფეებს, რომ კიდევ მოეძებნათ კითხვის პასუხი. შემდეგ განუმარტა:

— ის, რაც თქვენს გულსა და გონებაშია, ყველაზე მთავარი წიგნია, მასში მეცნიერებათა მეცნიერებაა ჩაწერილი. თუ მის წაკითხვას ვისწავლით, მაშინ კიდევ უფრო ღრმად გავიგებთ სამყაროსაც და ბუნებასაც. ამ წიგნს სული ჰქვია.

— სამყარო, ბუნება, ღელამიწა, სული... სული, სამყარო, ღელამიწა... სამი მთავარი წიგნი... — გაიმეორა თავისთვის სალომემ.

ასე დაიწყო ამონ-რამ პირველი გაკვეთილი თავის მოწაფეებთან.

გაკვეთილი ხის ქვეშ, მთვარის შუქზე, როცა შუალამე უკვე გადასული იყო.



ეს იყო ღიმილი სინანულის, ბოდიშისა და იმედის

როცა ცოლმა ღილით ადრე გაიღვიძა, რაც დაინახა, თვალებს არ დაუჯერა: ქმარი ფეხზე იდგა, ღილინებდა და საგარეო ტანსაცმელს იცვამდა.

მაგრამ მარტო ეს კი არ გაუკვირდა ცოლს, ქმარი კარგ გუნებაზე იყო, — აი, რამ გააოგნა ქალი.

— ამას რას ვხედავ! — ჩაილაპარაკა ცოლმა, — ღმერთო, შენი სახელის ჭირიმე, გამაგებინე, რა ამბავია ამ კაცის თავს!

ოთხი დღის წინ ღონიერმა ბიჭებმა მალლა ასწიეს მისი ქმარი და საჯილდო ქვაზე ზურგით დაანარცხეს. ქმარს ხერხემალი გადაუტყდა და ნეკნები ჩაელეწა. ექიმბაშმა თქვა: ფეხზე ველარასოდეს გაივლისო. გუშინწინ კი მოჩვენებები დაეწყო: ზურგს უკან ვინ მიდგასო, იორამი აქ ხომ არ არისო. მოკლედ, ბოდავდა. ისიც კი თქვა, სამ დღეში ფეხზე აუდგებიო.

ცოლი ისევ ექიმბაშთან გაიქცა და ყველაფერი უამბო. რა ვქნა, როგორ მოვიქცეო, ჰკითხა. ექიმბაშმა კი უფრო გადარია ცოლი: შენი ქმარი ვერც ფეხზე გაივლის და თანაც გონთ გადასულაო. დღეს კი რას ხედავენ მისი თვალები?

ჯერ ერთი, ქმარი ღილინებს და კარგ ხასიათზეა. რაც თავი ახსოვს, ქმარს არასდროს უღილინია. იძინებდა ცუდ ხასიათზე და დგებოდა ცუდ ხასიათზე. მთელი დღეც გინებასა და ჩხუბში იყო. ეჩხუბებოდა და აგინებდა ცოლს, საცემად დასდევდა შვილს. მოძულებული ჰყავდა ყველა — ნათესავები და მეზობლები. ბოროტი და ბოლბიანი კაცი იყო ქმარი.

მეორეც, ქმარი, რომელიც მთელი ცხოვრება დავრდომილი უნდა ყოფილიყო, ფეხზე დგება და საგარეო ტანსაცმელს იცვამს. ისე კონტად და სხარტად მოძრაობს, თითქოს ოცი წლის საღ-სალამათი ბიჭი ყოფილიყოს. დღეს სწორედ ის მესამე დღეა, როცა ადგომა იწინასწარმეტყველა.

— ღმერთო დიდებულო, რა ხდება ამ კაცის თავს? — ჩაილაპარაკა გაოგნებულმა ქალმა.

მაგრამ წუთიც არ გასულა, რომ ერთ გაოგნებას მეორე მიემატა, ნამდვილად სიზმარში ვარო, გაიფიქრა და ლოყაზე იჩქიბიტა. მერე მეორედ იჩქიბიტა, რადგან ქმარმა მეორედ გაღმოსძახა ისევ ისეთი ალერსიანი ხმით, სიყვარულით:

— ანა, შენი ჭირიმე, დილა მშვიდობისა! ხომ არ გაგაღვიძე?

ანაო?!

ქმარმა სახელით მიმართა ცოლს!

თანაც მიუალერსა, დილა მშვიდობისაო!

ცოლს აღარც ახსოვდა, რომ სახელი ერქვა. ქმარი ან ცოლს ეძახდა, ან ქალოს, გარეშენი კი მხოლოდ ქალითა და დედაკაცით მიმართავდნენ. რაც თავი ახსოვს, ეს პირველი შემთხვევაა, როცა ქმარმა ანა დაუძახა.

— კაცო, შენს ჭკუაზე ხარ?! — თუმცა ნაჩქმეტი ეტკინა, ქალს თავი მაინც სიზმარში ეგონა.

არც თვითონ მიუმართავს არასდროს ქმრისათვის სახელით, სულ კაცოს ეძახდა.

ქმარმა თავაზიანად გაუსწორა:

— ანა, განა არ იცი ჩემი სახელი?

— ვიცი, რა გინდა მერე? — უხეშად უპასუხა ცოლმა.

ცოლ-ქმარს შორის შეუღლების პირველ დღიდან არ თქმულა საალერსო სიტყვა. მეზი კი დაგაყარე, აგორებულ მიწაში ჩაგაგდეო, შენ კი მომიკვდიო და მისთანანი ცოლისთვის ჩვეულებრივი სახმარი სიტყვები იყო. არც ქმარი აკლებდა ამდაგვარ სამკაულებს: შე ძუკნა ძაღლოვო, შენი ეგრე და აგრეო. და უეცრად ყველაფერი თავდაყირა დგება. როგორ შეიძლება გაუძლოს ამას ადამიანმა?

— ჰოდა, დამიძახე სახელით! — სთხოვა ქმარმა მშვიდი და ალერსიანი ხმით.

— მეზი კი დაგაყარე... — დააპირა ცოლმა ძველებურად გაესწორებინა ქმრისთვის ანგარიში.

მაგრამ ქმარმა აღარ დაამთავრებინა სათქმელი, ახალგაზრდულად ისკუბა მისკენ, ქალი საწოლიდან ხელში აიტაცა და გულში ჩაიხუტა.

— ანა, ახალ ცხოვრებას ვიწყებ! — უჩურჩულა ცოლს ყურთან, — რაც ვიყავი, დაივიწყე, აღარ ვარ ის. მოკვდა ჩემში ყველაფერი, რისთვისაც სასიკვდილეს მეძახდი...

ქმარმა ანას ნაჩქმეტი ლოყები დაუკოცნა და მოეფერა.

— კაცო, დაშვი დაბლა! — გაწყრა ანა.

— ანა, დამიძახე ნამდვილი სახელი, იმიტომ რომ ნამდვილი კაცი ვხდები, ადამიანი ვხდები, გესმის? შენც შენს სახელს გიბრუნებ. ანა ხარ შენ, ჩემი საყვარელი და ერთგული მეუღლე!

— იაკობ, დაშვი მიწაზე! — მოურბილა ხმას ანამ და ქმრის სახელი გაიხსენა.

— აი ეგრე, ჩემო საყვარელო, იაკობი ვიყავი და იაკობს ვუბრუნდები... ახლა შენც ჩაიცვი საგარეო ტანსაცმელი...

— იაკობ, წელი როგორ გაქვს, არ გტკივა? — ჰკითხა ანამ.

— წელი... ხერხემალი... ანა, რა დროს წელზე ლაპარაკია? სიზმარი ვნახე, ნამდვილი სიზმარი. ისეთივე ნამდვილი, როგორც გუშინწინ რომ იორამი მომეჩვენა, წელი დამიზილა და მითხრა: მამა, სამ დღეში ადგებიო. აი, ხომ ხედავ, მართლა ავდექი...

— დაშვი, კაცო...

— იაკობი ვარ, ანა... ახლა კი დამიჯერე, რასაც გეუბნები. როგორც კი მზე ამოვა, იორამი მოვა შინ. სიზმარში ერთი ნათელი კაცი გამომეცხადა, ციდან ჩამოფრინდა, წინ დამიდგა და მითხრა: მოგეტევა შენი ცოდვები. წელში გაიმართე და სწორ გზას დაადექიო. ხომ ხედავ, ანა, დღეს ახალი კაცი ვიბადები და სახელად იაკობი დამიძახე!..

იაკობმა ხელში ატაცებული ანა კიდევ დაატრიალა, აკოცა და საწოლზე ფრთხილად დასვა. ანამ ვერა და ვერ დაიმორჩილა თავი. უნდოდა რაღაც კარგი ეთქვა, თვითონაც მოფერებოდა იაკობს, მაგრამ ვერ ახერხებდა, არ იცოდა, როგორ უნდა მოქცეულიყო, როგორ უნდა ეთქვა ქმრისთვის კეთილი და საალერსო სიტყვა.

— ისევ გეკითხები, შენს ჭკუაზე ხარ მეთქი? — ჰკითხა ძველებური გაღიზიანებით ქმარს.

— ანა, როგორ ვერ ხვდები, ღმერთი გამომეცხადა სიზმარში, იესო ქრისტე ვარო, მითხრა. სწორ გზას დაადექიო, ცოდვები კი მიგეტევაო. მე აქამდის არ ვიყავი ჩემს ჭკუაზე. ახლა კი ნამდვილად ვუბრუნდები ჩემს თავს. დამიჯერე, ანა, სასწაული ხდება შენს თვალწინ!

მართლაც სასწაული ხდებოდა ანას თვალწინ: იაკობმა საწოლთან დაიჩოქა და ანას მუხლები დაუკოცნა.

— შენც მაპატიე, რა დღეშიც მყავდი, ანა! ვიცი, კეთილი გული გაქვს, მაგრამ მე გაგიქვავე. მაპატიე, ანა! მაპატიე, ჩემო კარგო!

იაკობმა ტირილი დაიწყო.

ანასაც გული აუჩუყდა, მოუღბა, დაუთბა, იაკობს თავზე თავი მიადო, ხელები შემოხვია და ცრემლები წასკდა. კარგახანს ტიროდნენ იაკობი და ანა, ცრემლები ღვარად სდიოდათ, მიწის იატაკზე პატარა გუბეც დადგა. ტიროდნენ და უხაროდათ, რომ ტიროდნენ; ცრემლები სდიოდათ და ბედნიერებას განიცდიდნენ, რადგან ახლად იბადებოდნენ.

ბოლოს დამშვიდნენ და ერთმანეთს შესცინეს.

— ამ დღით იორამი მოვა. მერე ჩვენ მარას საფლავზე წავალთ! — უთხრა იაკობმა ანას, — ჩაიცვი საგარეო ტანსაცმელი, ანა!

ანამ თავი დაუქნია — კარგო. წამოდგა და ძველ სკივრს ახადა. რამდენი წელია, შიგ არც ჩაუხედავს. ან რისთვის უნდა ჩაეხედა? ვისთვის უნდა გამოწყობილიყო ანა იმ ერთადერთ საგარეო ტანსაცმელში, რომელიც მზითვად გამოატანეს და რომელშიც ქორწილის დღეს მშვენიერ დედოფლად გამოიყურებოდა? ქმარს ეს არ სჭირდებოდა, სხვები კი დასცინებდნენ. ახლა იაკობი სთხოვს და ანაც დაყაბულდა; ის კი არა, მოუთმენლობამაც შეიპყრო — უნდოდა ჩქარა ჩაეხედა მტკაველისხელა სარკის ნატეხში და თავისი თავი ეხილა. აი, იაკობი როგორ გაახალგაზრდავდა, რა მშვენიერი მამაკაცი გახდა. ანამ ღირსეულად უნდა დაუშმვენოს მხარი.

ცოტახნის შემდეგ ერთმანეთით მოხიბლული ცოლქმარი, ანა და იაკობი, თავიანთი ღარიბული სახლიდან ეზოში გავიდნენ.

— საცაა იორამი მოვა, მასთან ერთად ამონ-რაც იქნება, მარას ანგელოზი შვილი! — იმეორებდა იაკობი და აღმოსავლეთს გაპყურებდა, მზის პირველ სხივებს ელოდებოდა.

ანას ჯერ კიდევ ბოლომდე არ სჯეროდა იაკობის სიზმრისა, ეს ხომ წინასწარმეტყველებააო, ფიქრობდა, საიდან იცის იაკობმა წინასწარმეტყველება, მაგრამ ქმარს არაფერს აგრძნობინებდა.

როგორც კი პირველმა სხივებმა ეზოში შეითამაშა, ქუჩიდან იორამის ხალისიანი ძახილი გაისმა:

— მამა, ხომ კარგად ხარ, ხომ ადექი ფეხზე, მამა!

ხალისიანად იძახდა იორამი, მაგრამ ეზოს ჭიშკარი
• მაინც ფრთხილად შეალო.

იორამი ჭიშკართანვე გაშეშდა: ეზოში საზეიმოდ გამოწყობილი წყვილი იდგა: დედა და მამა. მამის სახეზე ასეთი სიყვარულიანი, კეთილი ღიმილი იორამს არასოდეს უნახავს. რა ლამაზი დედა ჰყოლია იორამს, რა მშვენიერი მაჰაკაცია მამამისი!

მამამ შვილისკენ მორიდებული ნაბიჯები გადადგა. უღიმოდა შვილს, მაგრამ ეს არ იყო მამური ღიმილი, შვილის ნახვით გამოწვეული. ეს იყო ღიმილი სინანულის, ბოდიშისა და იმედის.

იაკობმა არ ჩაიხუტა შვილი — შერცხვა, ვერ გაბედა, ვერ შეჰკადრა.

მამა შვილს — იაკობი იორამს — მუხლებში ჩაუვარდა და მეორედ ატირდა ამ დილით.

— მაჰატიე, შვილო, მაჰატიე, იორამ. ცუდი მამა გყავდი ძალიან...

იორამი არ ელოდა ამას, გაოგნებული იდგა და ზემოდან უყურებდა მამას, ის კი მუხლებზე ეხვეოდა და ქვითინებდა.

ამონ-რამ, რომელიც უკან იდგა, იორამს უჩურჩულა: შენც ცოდვიანი ხარ მამის წინაშე, შენც შეევედრე მიგიტევოსო. იორამი მაშინვე მუხლებზე დაემხო, მამას კისერზე ხელები შემოაჭდო და, ალბათ, თავის ცხოვრებაში პირველად წვერებიანი ლოყები დაუკოცნა.

— შენც მაჰატიე, მამა, არ მიყვარდი, არც შენი მორჩენა მინდოდა... შეეცდი, მამა, მაჰატიე...

იაკობი ტკბილად მოეფერა შვილს.

ლამაზმა ანამ — დედამ — გულში ჩაიკრა შვილი, ეფერა და ეფერა.

რა ნეტარება ყოფილა დედის ალერსი, დედის მკერდში თავის ჩარგვა, დედის ხელები, დედის ჩურჩული — „შენი ჭირიმე, შვილო... შენ გენაცვალე, იორამ... რა ბედნიერი ვარ, რომ გხედავ... მაჰატიე, რომ სახლიდან გაგაგდე, ჩემო ბიჭო, ჩემო იორამ...“

იორამს უნდოდა ახლა ამონ-რას ჩაეარდნოდა მუხლებში, მაგრამ ამონ-რამ არ ღაანება.

— შე დედა მოგიკალი, კეთილი ანგელოზი ქალი — მარა! — შესტირა იაკობმა ამონ-რას.

— უფალმა მიგიტევა ცოდვები, იაკობ! — უთხრა ამონ-რამ, — ახლა შენზეა, რა გზას აირჩევ.

— გზა უკვე ავირჩიე, შვილო! — გრძნობით უპასუხა იაკობმა, — შენს საქმეებს უნდა შეეუწყყო ხელი, ეს არის ჩემი გზა...

ახლა შემოვიდნენ ეზოში სალომე და ილია. ისინი აქამდე გარედან აღევნებდნენ თვალს ეზოს მოვლენებს. ანამ და იაკობმა ისინიც კეთილად მიიღეს.

როცა ანამ გაიგო, რომ ბავშვები მთელი ღამე ზეთის-ხილის მთიდან მოდიოდნენ, დაღლილები და მშვივრები იყვნენ, მაშინვე დაფაცურდა: ახლავე საჭმელს მოგიტანთო და მერე აქვე დაისვენეთო. ყველანი ხის ქვეშ გაფენილ დიდ ნაბადზე დასხდნენ და თითქოს საუზმეს ელოდნენ. მაგრამ ვიდრე ანა დიდ ზონჩაზე სანოვაგეს აწყობდა, ბავშვები ერთმანეთის მიყოლებით ნაბადზე მიწვნენ და მიიძინეს.

ანა და იაკობი ცრემლიანი თვალებით უყურებდნენ ბავშვებს, რომლებიც მშვიდად და უშფოთველად სუნთქავდნენ. სალომეს თავი ამონ-რას მხარზე ჰქონდა მიდებული, იორამი გულადმა იწვა და ხელი თავქვეშ ამოედო, ილია ხეს იყო ზურგით მიყრდნობილი და თავი მუხლებში ჩაერგო.

— იაკობ, — ჩაიჩურჩულა ანამ, — ანგელოზები განა ასეთები არ არიან?

იაკობმა ანა ახლოს მიიზიდა და თმებზე აკოცა.

— მე პირველად ვხედავ ანგელოზებს, ანა! ბედნიერი ვარ, რომ თვალი ამეხილა!



სილამაზეს სიყვარულით სავსე გული ბადებს

ანდრიას გამოქვაბულში ახალი ცხოვრება დაიწყო.

იესო ქრისტესგან ნაკურთხმა ბავშვებმა გატაცებით მოჰკიდეს ხელი კითხვისა და მეცნიერების შესწავლას. იაკობმაც გამოთქვა სურვილი — მეც მასწავლეო, მეც შენი მოწაფე ვიქნებო, — სთხოვა ამონ-რას.

ამონ-რას ეუხერხულებოდა მასწავლებლად დასდგომოდა თავს მამისხელა კაცს, მაგრამ იაკობმა თავისი გაიტანა და იშვიათი მუყაითობაც გამოიჩინა.

ყოველი ღღე მასწავლებელსა და მოწაფეებს შეტად დატვირთული ჰქონდათ.

ამონ-რა შეიყვანდა ხოლმე მოწაფეებს თავის გამოქვაბულში, რომელიც ანდრიამ მოუწყო. კედლებს თვითონაც დაუმატა ახალი ტექსტები — ეს იყო იესო ქრისტეს აზრები, რაც მათ ზეთისხილის მთასთან მოისმინეს. დააყენებდა თითოეულ მათგანს კედლის იმ ნაწილთან, სადაც მისთვის შესაფერისი ტექსტი ეწერა, და დავალებას აძლევდა. თავად ხან ერთთან მიდიოდა და ეხმარებოდა, ხან მეორესთან. ბავშვები და იაკობი სწრაფად მიიწევდნენ წინ და ამონ-რასგან უფრო და უფრო რთულ დავალებებს ღებულობდნენ. იორამი გულმოდგინედ აგრძელებდა სამკურნალო ბალახების შესწავლას და მალამოების დამზადებას. კითხულობდა და კითხულობდა ანდრიას წიგნებსა და ნაწერებს, რომლებიც სკივრებში ეწყო. აგროვებდა სამკურნალო ბალახებს, ანდრიას ლაბორატორიაში ხარშავდა მათ, ერთმანეთში აზავებდა, კიდევ სხვა ნივთიერებებს უმატებდა და ასე ამზადებდა სხვადასხვა ავადმყოფობისათვის საჭირო სამკურნალო მალამოებსა და წამლებს. ბალახების შეგროვებასა და გამოხარშვაში მას სხვებიც ეხმარებოდნენ და თავადაც იძებნდნენ იორამისგან ცოდნას.

ამონ-რამ იორამს ანდრიას საიდუმლო გაანდო.

— ხომ გახსოვს, გატეხილი მუხლი რომ მოგიჩინე? — ჰკითხა იორამს.

— მაგას რა დამავიწყებს, — უპასუხა იორამმა, — რომელი მალამო წამისვი მაშინ?

— ის არ იყო მალამო, ის ნელსაცხებელი იყო. იორამმა ვერ გაიგო, რას ეუბნებოდა ამონ-რა.

— როგორ თუ არ იყო მალამო?!

ამონ-რამ უამბო იორამს, როგორ ამუშავა ანდრიამ ნახევარი ღლე მალამოს დასამზადებლად, შემდეგ ქალაქში გაგზავნა და დაარიგა — ადამიანებს უმკურნალო. ამონ-რას ეგონა, რომ მართლა მალამო მიჰქონდა პატარა ქილით. სინამდვილეში ანდრიამ უვნებელი ნელსაცხებელი გაატანა.

— მაშ როგორ მოძირჩა ფეხი და გამიქრა ჭრილობა? — გაუკვირდა იორამს, — ამ მალამოებს ტყუილად ვამზადებ? წივნიცი ტყუილად წაეიკითხე?

ამონ-რამ დაამშვიდა შემოფოთებული იორამი.

— სულაც არა. ეს მალამოები საუკეთესო საშუალებებია. მაგრამ თუ მალამოსთან ერთად შენი გულის ცეცხლსაც გამოიყენებ, მაშინ ავადმყოფი უფრო სწრაფად მორჩება. და რაც უფრო ძლიერი იქნება შენი გულის ცეცხლი, მით უფრო ნაკლებად დაგჭირდება მალამოებისა და წამლების გამოყენება. ზოგჯერ შენი ხელის შეხება, შენი ერთი ცეცხლიანი სიტყვაც საკმარისი იქნება, რომ ავადმყოფი განიკურნოს. სამაგიეროდ მისი ტკივილის ნაწილი შენში გადმოდინაცვლებს. აბა, გაიხსენე, როგორ მოარჩინე მამაშენი?

„მართლაც, — გაიფიქრა იორამმა, — მამაჩემისთვის ზომ არაფერი მალამო არ წამისვია, არც ახლოს ვიყავი მასთან. ძალიან მინდოდა, რომ გამთელებოდა ხერხემალი, ჩემს წარმოდგენაში ვუზელდი ზურგს მალამოთი. აი, თურმე, როგორ გაიყოლა ჩემი გულის ცეცხლმა მალამო მამაჩემთან. სამაგიეროდ მე ამტკივდა წელი, ილია მეხმარებოდა სიარულში.“

— ამონ-რა, — შესძახა გაოცებულმა იორამმა, — მე უკვე ვხვდები, როგორ გტკიოდა ფეხი, როცა მე განმკურნე... მაგრამ ნელსაცხებელი როგორ იქცა მალამოდ?

— მალამოდ იქცევა ყველაფერი, რასაც გულის ცეცხლი შეეხება. ამბობენ, იესო ქრისტემ ერთი ბრმა მიწით განკურნაო. მიწა თავისი ნერწყვით დაასველა, თვალებზე წაუსვა და როცა კაცმა თვალები მოიბანა, მხედველობა აღუდგა...

— აბა, მომისმინე, სწორად გავიგე თუ არა შენი ნათქვამი: მე უნდა ვავარჯიშო ჩემი გულის ცეცხლი და სრულ-

ვყო მალამოების დამზადების წესი. როცა ვინმეს ვუძეკურნალებ, მალამო გულის ცეცხლში უნდა შევეუზავო. ასეა?

— მართალს ამბობ! — და კიდევ უფრო დააზუსტა იორამის დასკვნა, — გულის ცეცხლი უნდა გამოიყენო მამინაც, როცა სამკურნალო ბალახებს ეძებ; მაშინაც, როცა მათ ხარშავ და აზავებ; მაშინაც, როცა ადამიანებზე ფიქრობ და მათ მკურნალობ. აი, ასე მოიკრებს ძალას შენს მიერ დამზადებული მალამო.

იორამმა მადლიერებით შეხვდა ამონ-რას და მოწინებით დაუხარა თავი:

— ამონ-რა, მივხვდი, რა დიდი საიდუმლო გამანდე. მადლობთ, მასწავლებელო!

ამ საუბრიდან რამდენიმე კვირის შემდეგ ამონ-რამ ურჩია იორამს ქალაქში წასულიყო და ავადმყოფებისა და დავროდომილებისათვის ემკურნალა.

— გაიყოლე ანა და იაკობი, ისინი შენი დამხმარენი იქნებიან. იარე კარდაკარ და იკითხე, ხომ არ სჭირდება ოჯახში ვინმეს მკურნალობა. უძეკურნალე განურჩევლად ყველას! — დაარიგა ამონ-რამ.

იორამი ასეც მოიქცა.

დადიოდა ქალაქის ქუჩებში და ამა თუ იმ ჭიშკართან შესძახებდა:

— მკურნალი ხომ არ გჭირდებათ, მკურნალი!

უკან ანა და იაკობი მისდევდნენ კალათებით, რომლებშიც სამკურნალო საშუალებები ეწყო.

ვინ ეჭვით შეხვდებოდა — შენ მკურნალობისა რა გეცოდინებო.

ვინ იაკობს რომ დაინახავდა, ჭიშკარს ცხვირწინ უკეტავდა, რადგან ბევრს ახსოვდა მისი ბოროტებანი. ვის დიდი ბიჭისგან გაგონილი ჰქონდა, რომ იორამი სატანას გაუამხანავდა, ამიტომ ახლოს არც მას იკარებდა.

მაგრამ ყოველთვის არ ხდებოდა ასე.

— მკურნალი? შენ ის ბიჭი არა ხარ, მოედანზე მოხუცი კაცი და ბავშვი რომ განკურნე? შემოდი, ღმერთმა გამოგზავნა ჩვენთან!

და მაშინ ანა და იაკობი ნაზად და სათუთად მობანდნენ ავადმყოფს მტკივნეულ ადგილს, წამოჯდომაში თუ გადებრუნებაში ეხმარებოდნენ. აკეთებდნენ ისინი ამას მთელი სიყვარულით, მზრუნველობითა და თანაგრძნობით. იორამი გასინ-

ჯავდა და გაესაუბრებოდა ავადმყოფს. შემდეგ ანა კალათიდან საჭირო მალამოს ქილას მიაწვდიდა. იორამის ხელები ამ დროს ავადმყოფისკენ გულის ცეცხლს აფრქვევდნენ. ზოგჯერ რამდენიმე წუთში, ზოგჯერ კი რამდენიმე დღეში ავადმყოფი მომჯობინდებოდა და პატარა მკურნალს ხელს უკოცნიდა. იორამი არასდროს ითხოვდა გასამრჯელოს. მხოლოდ იმ შემთხვევაში გამოართმევდა ვინმეს ერთ პურს ან ლეპტას, თუ შენიშნავდა, რომ ოჯახი შეძლებული იყო, და ისიც იმიტომ, რომ მეგობრებისათვის გამოქვაბულში სანოვავე მიეტანა.

გავიდა მცირე დრო და ქალაქში თორმეტი წლის ბიჭს — იორამს — საუკეთესო მკურნალის სახელი გაუვარდა. ხალხი იმაშიც დარწმუნდა, რომ ანა და იაკობი სიკეთით სავესე ადამიანები გახდნენ. ხმები დადიოდა: შეიღმა ბოროტების საწინააღმდეგო წამალი გამოიგონა და მამა განკურნაო. როცა ქალაქში ვინმე ავად გახდებოდა ან რამეს მოიტყუებდა, მაშინვე ანასთან გარბოდნენ: ღვთის გულისათვის, გვიშველოს იორამმაო. იორამმა რამდენიმე ბავშვი სიკვდილს გადაარჩინა, რამდენიმეს თვალი აუხილა ან დაბზლა მოუხსნა.

ასე იცვლებოდა ქალაქში ხალხის დამოკიდებულება იორამისა და მისი შშობლების მიმართ.

ამონ-რას ხელმძღვანელობით ილიაც სწრაფად დაწინაურდა. კითხვა ორ კვირაში შეისწავლა და წიგნებს ხარბად დაეწაფა. დასაწყისში კითხულობდა ყველა წიგნს, რასაც ანდრიას სკივრებში ნახულობდა. მერე და მერე კი ხუროთმოძღვრებამ გაიტაცა, ანდრიას ნაწერებსა და წიგნებში ხუროთმოძღვრების მეცნიერებას მიაგნო და მთელი მონღომებით შეუდგა მის დაუფლებას. მუშაობდა დღითა და ღამითაც: კითხულობდა, ხაზავდა, ხატავდა, ანგარიშობდა, ფიქრობდა. ილია მიხვდა, რომ სამშენებლო საქმე მათემატიკასა და გეომეტრიას ემყარებოდა, ამიტომ კარგად გაერკვა ორივეში. შეისწავლა ხიდების, ციხე-სიმაგრეების, სახლებისა და სასახლეების აშენება. შექმნა კიდევ რამდენიმე პროექტი, რითაც აღტაცებაში მოიყვანა თავისი მეგობრები. ამონ-რამ კი ისეთი რამ ურჩია, რომ ილიას ყველაფერი დაავიწყა, ძილი და მოსვენება დაუკარგა.

— ასეთი ნაგებობა რომ შექმნა, საბი საიდუმლო გჭირდება — რწმენა, ცოდნა და ზაქარია ოქრომჭედლის ოქროს ხელები! — განუმარტა ამონ-რამ.

ილია დაუყოვნებლივ ეწვია ზაქარია ოქრომჭედელს.

— ღმერთი გიშველის, ზაქარია, — შეეხვეწა ილია, — აჰა, ჩემი უბრალო და გამოუცდელი ხელები და მიქციე ისინი შენნაირ ოქროს ხელებად!

ზაქარიამ არ იჩქარა ილიას ხელების დათვალიერება.

— ჯერ შენს თვალებში ჩამახედე! — უთხრა ოქრომჭედელმა.

— თვალები! — გაუკვირდა ილიას, — აი, ჩამხედე თვალებში... კარგად ვხედავ...

ზაქარიამ ბიჭი სინათლეზე დააყენა, თვალები მოჭუტა და მის თვალებს ჩახედა. კარგახანს უყურა თვალებში. ილია ალაღად შეჰყურება ოქრომჭედელს.

— კარგად ვხედავ, ზაქარია, თვალები არ შემიშლის ხელს ოქრომჭედლობის დაუფლებაში!

— გულმა რომ შეგიშალოს? შენი თვალები შენს გულზე მელაპარაკებინ! — უპასუხა ზაქარიამ.

— გული? გულმა რატომ უნდა შემიშალოს? — კიდევ გაუკვირდა ილიას.

— შენი ხელები ისწავლიან ოქრომჭედლობას, გული კი გაწვრთნილ ხელებს ბოროტ ნივთებს დაამზადებინებს!

— მერე? რას გეუბნებიან ჩემი თვალები?

ზაქარიამ გაიღიმა, ილიას თავზე ხელი მოუცაცუნა.

— რას მეუბნებიან და კარგი ბიჭია ილიაო, ასწავლე ოქრომჭედლობაო, მაგრამ ჰკითხე ერთი, რად სჭირდება ოქრომჭედლობაო! — ხალისით წარმოთქვა ზაქარიამ.

— ამონ-რამ დავალება მომცა, მაგრამ თუ შენისთანა ხელები არ მექნება, დავალებას კარგად ვერ შევასრულებ! — უპასუხა ილიამ.

— კარგი გული გაქვს, ხელებიც გაიწვრთნებიან...

ბევრი ოფლი ღვარა ილიამ, ვიდრე ზაქარიასგან ისწავლა, როგორ გაეცხო გული სიყვარულით და ამ სიყვარულიანი გულით ურთულესი და ულამაზესი ჩუქურთმები გამოეყვანა. ილია თანდათანობით ჩაწვდა ზაქარია ოქრომჭედლის ფილოსოფიას. სილამაზეს სიყვარულით სავსე გული ბადებს, ეუბნებოდა ზაქარია, ოქროს ხელებსაც გული ჰქმნის, რომ რაც შიგ აქვს, გარეთ გამოიტანოს და ადამიანებს მოახმაროს. გულს უნდა სხვაც გაახაროს იმით, რაც თვითონ უხარია. ხელები მაშინ გახდებიან ოქროსი, განუმარტავდა ზაქარია,

როცა გული სიყვარულით თრთის. ხელები კი არ სწავლობენ ოქრომჭედლობას, გული სწავლობს და ხელებს ავარჯიშებს, წვრთნის...

ილიას გული ბეჯითად ითვისებდა ზაქარიას დარიგებებს და წვრთნიდა ხელებს. იმ ექვსი თვის განმავლობაში, ვიდრე ოქრომჭედლობას სწავლობდა, ილიამ ბევრჯერ დაიშავა ხელები, ბევრი უძილო ღამე მოახმარა რომელიმე უხილაკი მოძრაობის დაუფლებას.

უცნაურ დავალებებს აძლევდა ზაქარია გამოუცდელ ბიჭს. მისცემდა ოქროს ციციქნა ნაჭერს და ეტყოდა — ალერსად აქციეო, ან ზრუნვად აქციეო, ან მფარველად აქციეო. როგორ ვაქციო ალერსად, უკვირდა ბიჭს. ზაქარია კი ეტყოდა: თუ ალერსი არ იცი, არაფერი გამოგივა, ეალერსე, ესიყვარულე უფერო ლითონს და ისიც თვითონ მიიღებს ფორმასო. და როცა ილიამ ეს საიდუმლო შეიციცნო, მამინ მიხვდა, როგორ დაუწყო წვრთნა გულმა ხელებს და როგორ გაუადვილდათ ხელებს ურთულესი საოქრომჭედლო ოპერაციების შესრულება.

შემდეგ ზაქარიამ კიდევ უფრო სიღრმეში ჩაახვდა და თავისი დაფარული საიდუმლო გაანდო: თუ გინდა, რომ შენმა ნაკეთობამ ვინმე ადამიანი ავი თვალისაგან დაიცვას, მაშინ შენი სუფთა გულით უნდა განუწყვეტლივ შესთხოვო უფლის ძალებს, რომ დაისადგურონ შენს მედალიონში, ბეჭედში თუ სხვა რამ ნივთსა და სამკაულში და ავი თვალისაგან დაიცვან კეთილის მოქმედი ადამიანი; და ვიდრე ამ ნივთს ჰქმნი, გარეთ არ უნდა გაიხედო, არავის დაელაპარაკო, სხვა არაფერზე იფიქრო, უნდა შენს სახელოსნოში იჯდე და სანთლის შუქზე იმუშაო. ამ დროს ხელები კი არ შრომობენ, დაასკვნა ზაქარიამ, სული შრომობს, სული ძერწავს, ხელები კი ეხმარებიან; თუ კაცს გული ოქროსი არა აქვს, არც ხელები ექნება ოქროსი.

ილია ენერგიითა და ხალისით სავსე დაბრუნდა გამოქვაბულში: ზაქარია ოქრომჭედელმა იგი ქებით გაისტუმრა. ამონ-რამ კმაყოფილება გამოთქვა ილიას სიბეჯითის გამო.

— ახლა კი შექმენი პროექტი ნაგებობისა, რომელმაც საუკუნეებს უნდა გაუძლოს! — უთხრა ილიას.

დაიწვი, ცუდო, და აღარასოდეს დამიბრუნდე

ილია გამოქვაბულში განმარტოვდა და მთელი გულისყურით შეუდგა საქმეს.

სალომეც იშვიათი მოწაფე აღმოჩნდა. სწავლობდა გულმოდგინედ და დაუსვენებლად ეძებდა პასუხს ათასნაირ კითხვაზე. ამონ-რა მოთმინებით და გასაგებად განუმარტავდა სალომეს იესო ქრისტეს გამოთქმებს, უხსნიდა ცათა სასუფეველის ცხოვრებას და სამყაროს აგებულებას. გოგონას განსაკუთრებით უკვირდა და აოცებდა ორი რამ: სამყაროს უსასრულობა და ადამიანის სულის უკვდავება.

— კიდევ მითხარი, კიდევ გამიმეორე! — შესთხოვდა ამონ-რას და მთელი გულისყურით ისმენდა მის ყოველ სიტყვას.

ამონ-რაც უხსნიდა და განუმარტავდა. სამყარო უსაზღვროა, ეუბნებოდა ამონ-რა, ჩვენ სამყაროს შვილები ვართ. ჩვენ პატარა დედამიწაზე ვსაზლობთ, მაგრამ უსასრულობაში ვცხოვრობთ. ადამიანი დედამიწაზე იმიტომ იბადება, რომ სული განივითაროს, სრულყოფს. გახსოვს, რა უთხრა ხალხს იესო ქრისტემ ზეთისხილის მთასთან? იყავით სრულყოფილნი ისევე, როგორც თქვენი სულიერი მამაა სრულყოფილი. ადამიანმა ბევრი ცხოვრება უნდა გაიაროს, რომ ასეთ სრულყოფას მიაღწიოს. მაშინ ის ადამიან-ღმერთად იქცევა, სამყაროს სხვა სფეროებში გადაინაცვლებს და სინათლის ძალთა სამსახურში ჩადგება, რათა აღასრულოს ღვთის ნება. ზოლო თუ ადამიანი არ იზრუნებს სულის სრულყოფაზე, მაშინ შემოქმედი დაშლის მის სულს როგორც გამოუსადეგარ მასალას.

— როგორ უნდა ვიზრუნო ჩემი სულის განვითარებაზე?

— კიდევ და კიდევ ეკითხებოდა სალომე ამონ-რას.

— იფიქრე ღმერთზე, გიყვარდეს ადამიანები, ჰქმენი სიკეთე, ესწრაფევი სილამაზეს. ეს არის სულის განვითარების გზა! — განუმარტავდა ამონ-რა.

დღე დღეს მისდევდა, სალომე ფიქრობდა, კითხულობდა და ისევ უბრუნდებოდა უსასრულობასა და უკვდავებას.

— როცა ადამიანი კვდება, რა არის ეს? — ჰკითხა ერთ-
ხელ სალომემ თავის თავს და გაუხარდა, თავში პასუხი რომ
მოუვიდა: აქ სიკვდილი იქ დაბადებას ნიშნავს, სხეული კვდებ-
ა, სული კი აგრძელებს თავის გზას.

სალომე ბიბლიამ გაიტაცა. ძალიან უჭირდა, მაგრამ
ამონ-რას დახმარებით ბიბლიის ბევრ საიდუმლოებაში გაერ-
კვა. ამასთან სურვილი გაუჩნდა, რომ როდისმე სკოლა გაეხს-
ნა და ქალაქის ბავშვებისათვის კითხვა და მეცნიერება ესწავ-
ლებინა. ამონ-რამ მოუწონა აზრი და უთხრა, ნუ გადადებდა
ამ საქმეს. სალომეს გაუკვირდა.

— მასწავლებლობას მაშინ დავიწყებ, როცა გავიზრდები.
ჯერ მე თვითონ ვარ ბავშვი, თანაც ცოტა ვიცი. რვა-ათი
წლის შემდეგ დიდიც ვიქნები და ბევრიც მეცოდინება!

მაგრამ ამონ-რამ სხვა გზა გამონახა.

— ტყუილად გგონია, რომ ცოტა იცი. განა გაცილებით
ბევრი არ იცი იმაზე, ვინც არაფერი იცის? ასეთი ბავშვი კი
ქალაქში ბევრია. შენ მათთვის საუკეთესო მასწავლებელი იქ-
ნები.

— მე ვინ მომაბარებს ბავშვს სასწავლებლად? — კიდევ
უფრო გაუკვირდა სალომეს.

— შენ ხალისიანი და ჭკვიანი გოგო ხარ. ბავშვებს უყ-
ვართ შენთან თამაში, ბევრი მეგობარიც გაყავს. ითამაშე მათ-
თან ყოველდღე სკოლობანა და მასწავლებლობანა. რადგან
მათზე მეტი იცი და თამაშის წამომწყებიც შენ იქნები, მას-
წავლებლად შენ ავირჩევენ. ბავშვებს თამაში ეგონებათ, შენ
კი მართლა ასწავლი კითხვასა და მეცნიერებას და ისინიც
მართლა ისწავლიან. აი ასე გახდები მასწავლებელი.

სალომე არ მოელოდა საქმის ამდგავარად გადაწყვეტას.

ამონ-რამ გაუღიმა და დაუმატა:

— იაკობი თიხის ფირფიტებს მოგიმზადებს. ზედ ასოები
და ლექსები დავწეროთ, ფსალმუნები დავწეროთ, იესო ქრის-
ტეს იგავები დავწეროთ, სურათები დავხატოთ. ბავშვებს მოე-
წონებათ ასეთი წიგნები. შენ მათ ბიბლიის ისტორიებს უამ-
ბობ. დარწმუნებული ვარ, ისინი არ მოგცილდებიან. მშობლე-
ბიც კმაყოფილნი დარჩებიან, რადგან ბავშვები უთავბოლოდ
აღარ იქნებიან ქუჩებში... აბა, როდის დაიწყებ მასწავლებლო-
ბას?

ამონ-რას იღვით აღტაცებულმა სალომემ ეს საქმე მართლაც არ გადადო.

უბნის ათიოდე ბავშვს თავისი სახლის ეზოში მოუყარა თავი და სკოლობანას თამაში დააწყებინა. ბავშვები მოიხიბლნენ თამაშით. მათთვის უცხო და საინტერესო აღმოჩნდა ყველაფერი, რასაც სალომე უამბობდა და აკეთებინებდა. უყვებოდა ბიბლიის ისტორიებს, ესაუბრებოდა ვარსკვლავებსა და სამყაროზე, უსასრულობასა და უკვდავებაზე, იესო ქრისტეზე. სალომეს სკოლაში ბავშვები მღეროდნენ და ცეკვავდნენ, ქუჩებში წარმოდგენებს მართავდნენ.

თიხის ფირფიტების მეშვეობით, რომლებიც იაკობმა დაამზადა, ბავშვებმა ისწავლეს სოლომონის იგავები, ფსალმუნები, ისწავლეს თვლა, შეკრება და გამოკლება. ბავშვებს უფრო და უფრო უძლიერდებოდათ სკოლობანას სიყვარული, და როცა სალომე ეუბნებოდა — დღეს გვეყოფა თამაშით, შინ წასვლა არავის უნდოდა, კიდევ ვითამაშოთო, ეხვეწებოდნენ მასწავლებელს.

სალომეს სკოლას ემატებოდნენ და ემატებოდნენ ბავშვები. დედებს თვითონ მოჰყავდათ ბავშვები და სალომეს თხოვდნენ, ესენიც ათამაშეო. და რადგან ერთი მასწავლებელი ვეღარ ართმევდა თავს, სალომეს იაკობი შეეშველა. ბავშვებმა სწრაფად შეიყვარეს კეთილი და დაუზარელი ძია იაკობი, რომელიც მათ მთებსა და ხეობებში ატარებდა, გამბედაობასა და ურთიერთდახმარებას ასწავლიდა.

სალომეს სკოლამ ერთი ისეთი რამ მოიმოქმედა, მთელი ქალაქი აალაპარაკა.

ძია იაკობმა გულახდილად უამბო ბავშვებს, როგორი ცუდი კაცი იყო ადრე, რამდენ ბოროტებას ჩადიოდა, როგორ ეჩხუბებოდა ყველას, შვილიც კი გააგდო სახლიდან, ცუდს ფიქრობდა, ცუდს ლაპარაკობდა. შემდეგ ისიც უამბო, როგორ გავარდა მოედანზე ხელკეცით და რა უბედურება დაატრიალა იქ, როგორ შეიპყრეს ღონიერმა ახალგაზრდებმა, ზურგით ქვაზე დაანარცხეს და ხერხემალი გადაუტეხეს. ჰყვებოდა ამას ძია იაკობი და ტირიდა, ბავშვებს პატიებას სთხოვდა. უამბო, როგორ გამოეცხადა იესო ქრისტე და უთხრა: სწორ გზას დაადექით. დეთის წყალობით სამ დღეში განიკურნა. „მეც ავდექი და იესო ქრისტეს გზას გავეყვი. არასოდეს ჩავიდნენ ბოროტებას, გულში არ გავივლებ ცუდ განზრახვას, აღარ წამომცდება ცუდი სიტყვა. ყველაფერი ცუდი, რაც ჩემ-

ში იყო, დაწვრი. თუ ვინმეს გაქვთ რამე ცუდი თვისება, ან აუგი ფიქრები და სიტყვები გაწუხებთ, აიღეთ და დაწვით თქვენც,“ — უთხრა ბავშვებს ძია იაკობმა.

ბავშვებმა განიცადეს იაკობის ბედი. მასთან ერთად ტიროდნენ და თანაუგრძობდნენ. როცა მან თავისი ამბის მოყოლა დაასრულა, ბავშვებმა ჰკითხეს:

— ძია იაკობ, როგორ დაწვით ჩვენი ცუდკაცობა?

ყველამ მოისურვა თავისი ცუდი თვისებებისა და ცუდ-სიტყვაობის დაწვა, მაგრამ როგორ?

და მაშინ ძია იაკობმა ურჩია:

— თითოეულმა თქვენგანმა ჭინჭის ფუფალა დაამზადეთ და მას გადაეცით თქვენი ცუდი ფიქრები, სიძულვილი, უღირსი სიტყვები, მასში გადაიტანეთ ყველაფერი, რისგანაც გინდათ განიწმინდოთ. შემდეგ წაიყვანოთ ეს ჭინჭის ფუფალები და ქალაქის მოედანზე დაწვით. ყველამ დაინახოს, როგორ იწვის ცუდკაცობა და როგორ ძლიერდება სიკეთე.

რამდენიმე დღის შემდეგ ბავშვებს მზად ჰქონდათ თავიანთი ჭინჭის ფუფალები. ფუფალები მახინჯები, უშნოები, დაგრეხილები იყვნენ, უსუფთაო ძონძებში გახვეულნი. ისინი მეტის ღირსნი არ არიან, ამბობდნენ ბავშვები. წავიდნენ ქალაქის მოედანზე, კოცონი დაანთეს და აუარებელი ხალხის თვალწინ ფუფალები შიგ ჩაყარეს, თან მისძახოდნენ: დაიწვი, ცუდო, და აღარასოდეს დამიბრუნდო.

ასე განიწმინდნენ სალომეს სკოლის ბავშვები. ამ კოცონის შემდეგ თითოეული მათგანი უფრო ლამაზი, კეთილი და ხალისიანი გახდა.

სალომეს სკოლაში დადიოდა ათი წლის ბიჭი, სახელად თეოფილე, უპატრონო და ლატაკი. მიუხედავად იმისა, რომ ყოველთვის ნახევრად მშვიერი იყო, ბიჭი მეცადინეობებს არ აცდენდა და გატაცებით ითვისებდა ყველაფერს, რასაც სალომე და იაკობი ასწავლიდნენ. თეოფილე არ თამაშობდა სკოლობანას, ის მთელი სერიოზულობით სწავლობდა. სალომეს მოეწონა თეოფილე, ნიჭიერი ბიჭიაო, და ამონ-რას ნებართვით გამოქვაბულში აიყვანა.

ამონ-რა კეთილად შეხვდა თეოფილეს. გამოჰკითხა, რით ცხოვრობს, რატომ აღმოჩნდა მარტო. მშობლები რაღაც ავადმყოფობით გახდნენ ავად და ერთ დღეს დაიხოცნენ, უთხრა თეოფილემ, თავს კი იმით ვირჩენ, რომ ვის რაში ვეხმარები და ვის რაში, ასე ვმოულობ ლუკმა პურსო.

ბიჭს ყელზე გახვრეტილი ქვა ჰქონდა ჩამოკიდებული.

— რა არის ეს? — ჰკითხა ამონ-რამ.

— ქვაა. ჩემი სახლის წინ ეგლო. მომეწონა, გავხვრიტე და ყელზე ჩამოვიკიდე! — უპასუხა თეოფილემ.

ამონ-რამ ქვა ხელისგულზე დაიღო და დაკვირვებით შეათვალიერა. „საკუთარი ქვაწერილი უპოვია, — გაიფიქრა ამონ-რამ, — რაკი მოეწონა და თან დააქვს, ადრე თუ გვიან წაიკითხავს კიდეც.“ ქვაწერილის ხაზებმა ამონ-რა რაღაცას მიახვედრა.

— თეოფილე, — უთხრა ბიჭს, — თვალისჩინივით გაუფრთხილდი ამ ქვას. ეს უბრალო ქვა არ გეგონოს, ეს შენი ქვაწერილია.

თეოფილემ ვერ გაიგო, რას ნიშნავს ქვაწერილი, და უნდოდა ეკითხა, მაგრამ ამონ-რამ დაასწრო:

— მოვა დრო და თავად გაიგებ, რა არის ქვაწერილი, და კიდეც ამოიცნობ, რა წერია შენს ქვაწერილში.

თეოფილემ სწავლა ამონ-რას ხელმძღვანელობით გააგრძელა და მალე ხატვაში გამოიჩინა თავი. ამონ-რამ ასწავლა საღებავების დამზადება და ფერების შერჩევა. შემდეგ საშუალება მისცა რამდენიმე თავისუფალი გამოქვაბულის კედელი მოეხატა. თეოფილემ იშვიათი ნიჭით ასახა კედლებზე ბუნებისა და ადამიანთა ცხოვრების სურათები, მთები, ცხოველები. ერთი გამოქვაბულის ჭერი ცის მნათობებითა და ღრუბლებით მოხატა.

„ეს ბიჭი საბერძნეთში უნდა გავაგზავნოთ, რომ დაოსტატდეს,“ — გაიფიქრა ამონ-რამ, როცა თეოფილეს მხატვრობას ათვალიერებდა. იორამს სთხოვა გასამგზავრებელი ფული შეეგროვებინა. თეოფილეს დარიგებანი მისცა, როგორ უნდა ეცნოვრა და რომელ მხატვრებთან დაოსტატებულიყო. შემდეგ იაკობმა ბიჭი დიდ ზღვაზე გააცილა და სანავსადგურო ქალაქ იაფეში საბერძნეთისაკენ მიმავალ გემზე დასვა. თეოფილეს თან გაჰყვა ამონ-რას დარიგება: ყელზე ჩამოკიდებულ ქვას გაუფრთხილდი, ის შენი ქვაწერილიაო.



უნდა გაგახაროთ: ჩვენთან სტუმარი მოდის

ერთ დღეს ამონ-რამ თავისი მოწაფეები უფლის გამოქვაბულში მოიწვია. ყველამ იცოდა, რომ ამონ-რასთვის ეს გამოქვაბული წმიდათაწმიდა ადგილი იყო, მაგრამ რა იყო შიგ, ეს კი არავინ იცოდა. თოვფილე ჯერ წასული არ იყო, და ისიც ესწრებოდა ამ მოვლენას.

როცა ბავშვები და იაკობი უფლის გამოქვაბულში შევიდნენ და კედელზე გამოსახულება დაინახეს, სახტად დარჩნენ. თავისდაუნებურად ყველამ უეცრად მუხლი მოიყარა მის წინაშე.

გამოქვაბულის მშვიდი და ღუმლიანი სივრცე მოწაფეებმა სწრაფად შეავსეს ძლიერი განცდებით, ნათელი ფიქრებით, ამაღლებული წარმოსახვებით. თითოეულის სულში სიყვარულის, თავყვანისცემის, მადლიერების სიმები აქედერდა. „ყოვლითა გულითა შენითა, ყოვლითა სულითა შენითა, ყოვლითა გონებითა შენითა,“ — თითოეულ მათგანს ჩაესმოდა ყურში ამ სიტყვების ციური ჟღერა. მოწაფეთა ღუმლიანი განცდები და ფიქრები ერთმანეთში შეიკრა და ერთიან ლოცვად იქცა. გამოქვაბული ნელ-ნელა განათდა ცისფერი ალით, ცისფერი ცეცხლის ენები ლიკლიკებდნენ ბავშვების თავებზე, გუმბათისკენ მიიწევდნენ და ქარგავდნენ ვედრებას, რომლის სიტყვები ერთი წლის წინ თავისთავად დალაგდნენ ამონ-რას გულში, როცა ის ანდრიაბ პირველად მოიყვანა აქ.

„ღმერთო დიდებულო,
თავყანს ვცემ შენს წმიდათაწმიდა სახელს.
მიმიღე შენს მონა-მსახურად,
ამკიდე ტვირთი შენი
და ამატანიე ეკლიანი ბილიკებით
მთის მწვერვალზე,
რომლიდანაც ჩავეწვდები
შენი სიყვარულის უსაზღვროებას
და შევიცნობ
შენი სიბრძნის სიღრმეს.
ამინ.“

ასე იყვნენ კარგახანს ცისფერი ცეცხლის ალში გახვეულნი და უფლისადმი ცისფერ ვედრებას ალაგვლენდნენ. დუმილს თანდათან ყრუ ქვითინი შეერია.

ტიროლა იაკობი, ქვითინებდა გულამოსკვნით და შეებით.

„თუ არ იქნები, როგორც ბავშვი, ვერ შეხვალ ცათა სასუფეველში,“ — ჩაესმოლა იაკობს ყურში ციური ხმა. „ჰო, უფალო, ჰო, უფალო...“ — ჩურჩულებდა და ქვითინებდა იაკობი, ცრემლები კი სდიოდა და სდიოდა. იაკობი ჩოქვით მივიდა კედლის სურათთან და უფალს მუხლებზე ეამბორა. შემდეგ ცოტა დამშვიდდა და ბავშვებისკენ მოიხედა. მის სახეზე უმშვენიერესი სიყვარულის ღიმილი დაიქარგა.

ამონ-რა ფეხზე წამოდგა და გასავლელისკენ გაემართა. მას სხვებიც გაჰყვნენ. უხმოდ და ფრთხილად მოძრაობდნენ, რომ გამოქვაბულის დუმილის ჰარმონიაში ზედმეტად არაფერს გაეფაჩუნა.

მზე ჩასვლას აპირებდა.

განცდებით სავსე, მოწაფეები გამოქვაბულების წინ პატარა მოედანზე მოეწყვნენ ამონ-რას გარშემო და უსიტყვო საუბარი გამართეს. ისინი ერთმანეთს ელაპარაკებოდნენ ფიქრებით, უზიარებდნენ განცდებს, ეკითხებოდნენ და უპასუხებდნენ, საკუთარ შთაბეჭდილებებში ერკვეოდნენ.

უკვე წელიწადი გავიდა, რაც ისინი ანდრიას გამოქვაბულის მკვიდრნი გახდნენ. ამ ხნის განმავლობაში

ამონ-რა ცხრა წლის გახდა,

სალომე — შეიდი წლის,

იორამი — თორმეტი წლის,

ილია — ცამეტი წლის,

თეოფილე — ათი წლის,

იაკობი — ორმოცდარი წლის.

ამ ერთი წლის განმავლობაში თითოეული ვიწრო ბილიკით მიიწველა წინ.

ამონ-რამ საკუთარი ქვაწერილის საიდუმლო ამოიცნო და, რაც მთავარია, იესო ქრისტეს სიტყვების საიდუმლოსაც მიხვდა: „ამონ-რა, შენ მოცემული გაქვს ცოდნა ღვთის სასუფეველის საიდუმლოსიო.“ ეს ცოდნა და ძალა მას იესო ქრისტემ მიანიჭა.

იორამმა ახალ სამკურნალო მცენარეებს მიაგნო, ანდრიას საექიმო წიგნები შეისწავლა, ქალაქში სახელთგანთქმუ-

ლი მკურნალი გახდა, და, რაც მთავარია, ამონ-რას დახმარებით საკუთარი სამკურნალო ძალის საიდუმლოებას მიხვდა.

ილიამ ხუროთმოძღვრების მეცნიერება ათვისა, ხიდების, სასახლეების, ციხე-სიმაგრეების მშენებლობა ისწავლა, ზაქარია ოქრომჭედლის დახმარებით გულის ფილოსოფიაში გაერკვა, ხელები ოქროსი გაიხადა და, რაც მთავარია, მის სულსა და გულში უკვე იქმნებოდა ამონ-რასგან ჩაგონებული დიდებული ნაგებობა.

იაკობმა მთელი არსება განაახლა, სიკეთით აღივსო და, სწორ გზას დაადგა — ამონ-რას საქმეებს გააჰყვა.

თეოფილემ სალომეს სკოლაში კითხვა ისწავლა, ამონ-რას ხელმძღვანელობით მეცნიერების შესწავლას შეუდგა, მხატვრობის ნიჭი გამოავლინა და მალე საბერძნეთში წავა, რომ დიდ მხატვრებთან დაოსტატდეს და, რაც მთავარია, ამონ-რასგან დარიგება მიიღო — ყელზე ჩამოკიდებულ ქვას თვალისწინივით გაუფრთხილდი, ის შენი ქვაწერილიაო.

უფლის გამოქვაბულიდან ეს-ეს არის გამოსული მოწაფეები ფიქრებით უხდიდნენ მადლობას მასწავლებელს — ამონ-რას, ხოლო ამონ-რა ფიქრებით ეთაყვანებოდა თავის მასწავლებელს ანდრიას და მუხლებზე ეხვეოდა იესო ქრისტეს. ანდრია კი ამ დროს თავის მასწავლებელს იესო ქრისტეს მიჰყვებოდა ფეხდაფეხ. ამონ-რა ქვაზე იჯდა და ზურგით გამოქვაბულის კედელს იყო მიყრდნობილი. თვალებდახუჭული გასცქეროდა სივრცეს.

— სამყარო...

ჩამავალი მზით გაოქროვილ სიჩუმეში ჩუმადვე ჩაილაპარაკა ამონ-რამ, თითქოს თავისთვის ფიქრობსო. მოწაფეებმა ყურები ცქვიტეს, იგრძნეს, რომ ამონ-რას მათთვის რაღაც ახალი საიდუმლო უნდა ემცნო.

ამონ-რამ თვალები გაახილა და ცას გახედა. მოწაფეებმაც ცისკენ აიხედეს. ლამაზი ფორმის ღრუბლები ჩამავალი მზის სხივებში ნებივრობდნენ და ადამიანებს გარდასახვის ხელოვნებას უჩვენებდნენ. ამონ-რა და მისი მოწაფეები მოხიბლულნი შეჰყურებდნენ ფერად-ფერად ღრუბელთა ნელ თამაშს.

— მალე ვარსკვლავები აკიაფდებიან და უფრო სრულად დავინახავთ სამყაროს, დავინახავთ სამყაროს იმ ნაწილს, რომელსაც ჩვენი თვალი სწვდება, ჩვენმა გულმა კი იცის, რომ

სამყაროს დასასრული არა აქვს, სამყაროს არა აქვს საზღვრები...

ისევ გაჩუმდა ამონ-რა. კარგა ხანს დუმდა. ამასობაში კიდევ დაბინდდა და ცაზე ვარსკვლავები დასხდნენ. ამონ-რა შთაგონებული გააჭყურებოდა ვარსკვლავებიან ცას.

— იესო ქრისტე ღმერთი მასწავლებელია, ის ადამიანთა გზაა, მასწავლებელი მოწაფის გზაა... იესო ადამიანებს იმითომ მოეუბნა, რომ ასწავლოს, როგორ იცხოვრონ, რათა სული განივითარონ, სული დაღუპვას გადაარჩინონ... იგი ადამიანებს მოუწოდებს გახდნენ ისეთივე სრულყოფილნი, როგორი სრულყოფილიც არის ჩვენი ზეციერი მამა... მას უნდა, რომ ადამიანები ღმერთებივით გახდნენ და სამყაროს შშენებლობაში მიიღონ მონაწილეობა...

ამონ-რას მთელი გონება სადღაც შორს იყო წასული და იქიდან ეხმიანებოდა მის ირგვლივ შემოკრებილ მოწაფეებს. კარგახნის ღუმელის შემდეგ ისევ აშრიალდნენ მისი ფიქრები.

— ყოველ ადამიანს სამყაროში თავისი დიდი მზრუნველი ჰყავს... იგი შორს ჭვრეტს და სამყაროსა და საუკუნეების სიღრმიდან უგზავნის ადამიანს ქვაწერილს... ადამიანი ქვაწერილს მიიღებს თავისი სულის განვითარების განსაკუთრებით მნიშვნელოვან პერიოდში, და თუ შეეცდება ამოიცნოს მისი საიდუმლო, მაშინ გაიგებს, რას ურჩევს სამყაროს დიდი სული... ვინც საკუთარი ქვაწერილის გზას გააჭყვება, ცათა სასუფეველის ჭიშკარში შევა... ბედნიერია, ვინც უბრალო ქვაში საკუთარ ქვაწერილს შეიცნობს...

ამონ-რას მზერა და გონება უფრო ღრმად შეიჭრა ვარსკვლავთა სივრცეში. სრულ ღუმელში მისი ფიქრები პეპლის მსუბუქი ფრთებივით ფარფატებდნენ.

— ცხოვრებაში ის მიღის ვიწრო ბილიკებით, ვინც განუწყვეტლივ ემზადება ღირსეული მოწაფე გახდეს და ესწრაფვის მასწავლებლის შეცნობას. მაშინ ქვაწერილიც აღვილად მიაგნებს თავის პატრონს, ხოლო პატრონი შეძლებს ამოიცნოს ქვაში ჩამალული საიდუმლო...

ამონ-რას ფიქრები შენეულა.

სამაგიეროდ მოწაფეთა ფიქრები აშარიშურდნენ. ისინი მიხვდნენ, რომ მასწავლებლობისა და ქვაწერილის სიბრძნით ამონ-რამ დაასრულა მათი მომზადების ერთი დიდი საფეხური.

ამონ-რა წელში გაიმართა, გარშემო მიმოიხედა და მთვარის შუქზე ვილაცას თუ რაღაცას დაუწყო ძებნა. უეცრად ხალისიანად წამოიძახა:

— უნდა გაგახაროთ, ჩვენთან სტუმარი მოდის!

გამოქვამულში სტუმრების მიღებას მიჩვეულები არ იყვნენ. საიდან მოდის ან ვინ არის ჩვენი სტუმარიო, გაუკვირდა ყველას.

— არ შეგეშინდეთ, კეთილი სტუმარია! — დაუმატა ამონ-რამ.

და იმავე წუთს შემოესმათ უცნაური ნაბიჯების ხმა. ბურჩქები გადაიწია და იქიდან დიდი წაბლისფერი დათვი გამოვიდა.

სალომემ შეჰკივლა და ამონ-რას მიეკრო. სხვებიც შეშინდნენ.

— არ შეშინდეთ, — გაუმეორა ამონ-რამ, — სამეგობროდ მოვიდა!

დათვი იმდენად დიდი იყო, რომ მთელი შეკრებილობა ერთად ჩაეტეოდა მის მუცელში.

დათვმა იორამსა და იაკობს თავზე გადააბოტა და ამონ-რას წინ თავი დახარა.

მოწაფეების გოცების საზღვარი არ ჰქონდა.

ამონ-რამ დათვს თავზე ხელი მოუთათუნა, მიეფერა და უსიტყვოდ ჰკითხა:

„ვინ გამოგზავნა?“

„იმან,“ — უპასუხა დათვმა ასევე უსიტყვოდ.

„რატომ გამოგზავნა?“

„იმიტომ.“

„რა გქვია?“

„ბუნგლო.“

ამონ-რამ მეგობრებს დათვი გააცნო:

— ეს ბუნგლოა. ჩვენთან იცხოვრებს. გიყვარდეთ და იმეგობრეთ.

სალომეს უეცრად დაეუფლა სიმშვიდე და გამბედაობა, ბუნგლოს სქელ კისერზე მოეხვია, თუმცა ხელები ვერ შემოაწვდინა, და აკოცა.

— მიყვარხარ, ბუნგლო! — უთხრა დათვს.

ბუნგლომ თავი დაუქნია სალომეს და ყველას. მეც მიყვარხართო, ამბობდა ბუნგლო.

უცნობი ხუროთმოძღვარი

იუდეაში ხმა გავარდა: ერთ რომაელ დიდებულს — იუსტიციუსს — მდინარე იორდანის ნაპირას სასახლის მშენებლობა აქვს განზრახულიო. ეს ამბავი გამოქვაბულში იაკობმა მოიტანა. ამონ-რას გაუხარდა.

— ილია, გამოვცადოთ შენი ხელოვნება!

ილიამ ვერ გაიგო, რას ითხოვდა ამონ-რა. მაშინ ამონ-რამ დააზუსტა:

— შექმენი სასახლის პროექტი და გავუგზავნოთ რომაელ დიდებულს.

ამონ-რამ კარგად იცოდა, რომ იუსტიციუსს სასახლის ასაშენებლად ცნობილ ხუროთმოძღვრებს მიიწვევდა და, რა თქმა უნდა, არ დათანხმდებოდა, რომ გამოუცდელი და უცნობი ცამეტი წლის ბიჭისათვის მიენდო ეს საქმე. მიუხედავად ამისა, ილიას ურჩია წასულიყო და კარგად შეესწავლა ის ადგილი, სადაც დიდებულს სასახლის აშენება ჰქონდა გადაწყვეტილი, შემდეგ რამდენიმე თვე ემოგზაურა და რომის იმპერიის საუკეთესო სასახლეები ენახა. მერე კი დაემუშავებინა პროექტი, ხარჯების ანგარიში, მშენებლობის ვადების გეგმა.

— ყველაფერს ამას დიდებულს გავუგზავნით, იქნებ მიიღოს შენი პროექტი?

— მე ვინ მანდობს სასახლის აშენებას?! — შეიცხადა ილიამ, მაგრამ ამონ-რამ დაამშვიდა.

— ჯერ შექმენი საუკეთესო პროექტი.

ილიამ დაუჯერა ამონ-რას. საქმეს მთელი გატაცებით შეუდგა. იმოგზაურა რომში, საბერძნეთში, შეისწავლა ყველაზე ცნობილ დიდებულთა სასახლეები, წაიკითხა წიგნები. შემდეგ იორდანის ნაპირებიც დაათვალიერა. ამონ-რას დავალებით მთელ ამ საქმიანობაში მას იაკობი ეხმარებოდა. გავიდა ხუთი თვე და ილიამ ამონ-რას თავისი პროექტი და დანგარიშებანი უჩვენა. ამონ-რამ მოიწონა სასახლის პროექტი.

ვის უნდა მიეტანა იუსტიციუსთვის პროექტი და აეხსნა მისი შინაარსი?

ამონ-რამ ისევ იაკობს მიმართა.

— შენ წახვალ იუსტინესთან. ეტყვი, რომ დიდ ხელოვანს თავისი ვინაობის გამჟღავნება არ შეუძლია და შენ მისი წარმომადგენელი ხარ!

გამოაწყვეს იაკობი, როგორც განათლებულ კაცს და დიდი ხუროთმოძღვარის წარგზავნილს შეეფერებოდა, შესვეს თეთრ ცხენზე და გაუშვეს.

იაკობი მაშინ მიადგა იუსტინეს, როცა მან ის-ის იყო დაამთავრა მოლაპარაკება რომიდან მიწვეულ ხუროთმოძღვრებთან, მოიწონა მათი პროექტი და მოურიგდა მშენებლობაზე.

ამ დროს მსახურმა მოახსენა:

— ბატონო, თქვენთან თეთრი ცხენოსანი კაცია, ამბობს, დიდი ხუროთმოძღვრის წარმომადგენელი ვარო, და თქვენს ნახვას ითხოვს!

იუსტინეს გაუკვირდა, არ ეგონა, რომ რომიდან მოწვეულ ხუროთმოძღვრებზე უფრო სახელოვანი ხუროთმოძღვარი სხვაც იქნებოდა. რომაელმა ხუროთმოძღვრებმა ყურები ცქვიტეს.

იუსტინეს თუმცა გადაწყვეტილი ჰქონდა, რომ სასახლეს რომაელებს ააშენებინებდა, ცნობისმოყვარეობამ სძლია და უბრძანა მოეყვანათ სტუმარი.

იაკობი თავაზიანად მიესალმა და თავისი ბატონისგან წერილი გადასცა.

იუსტინემ წერილი წაიკითხა: ცნობილი ხუროთმოძღვარი, რომელსაც არ შეეძლო თავისი ვინაობის გამხელა, სახელგანთქმულ დიდებულს სასახლის პროექტს სთავაზობდა.

— მაჩვენე პროექტი, განა ეგ უფრო უკეთესი იქნება, ვიდრე რომაელმა ხუროთმოძღვრებმა შექმნეს? — ეჭვით თქვა იუსტინემ.

იაკობმა არაფერი უპასუხა. მხოლოდ დიდ მაგიდაზე პროექტი გაშალა და გვერდით სასახლის ხედების სურათები დააწყო.

იუსტინე გააკვირდა.

ასეთი მშვენიერება მის ბევრის მნახველ თვალებს არსად ეხილა — არც რომში, არც საბერძნეთში, არც ეგვიპტეში, არც მავრიტანიაში.

სასახლე ლაღად ეკვროდა მდინარე იორდანის მარჯვენა სანაპიროს და ულამაზესი ხილით მეორე ნაპირს უერთდებო-

და. ეზო დამშვენებული იყო ბალებით, ხეივნებით, ყვავილებით, ხეხილით, მყურრო დასასვენებელი ადგილებით. იორდანის ერთი ნაკადი არხით ეზოს შუაგულსკენ მიემართებოდა და ტბას ჰქმნიდა. არხს ბოგირები ამშვენებდა. ტბაში გელები დაცურავდნენ, ტბის შუაგულში შადრევნები ჩქეფდა. ალაგ-ალაგ უმშვენიერესი ქანდაკებები იყო აღმართული. სასახლის დარბაზები მეტად მონერხებულად იყო განლაგებული. დიდი ჩუქურთმიანი ფანჯრები უზვად ანათებდა სასახლის სივრცეს. რამდენიმე დარბაზი ხელოვნების ქმნილებათა გამოსაფენად იყო გათვალისწინებული. იუსტინეს იცნობდნენ როგორც ხელოვნების დამფასებელს და იშვიათი სურათებისა და ქანდაკებების კოლექციის მფლობელს.

იუსტინემ დიდხანს ათვალიერა პროექტი.

მის წარმოდგენაში სასახლის ხედებმა ხორცი შეისხეს და იუსტინემ ამაყად აწია თავი.

— რას იტყვი? — მიმართა რომაელ ხუროთმოძღვრებს, რომლებიც არანაკლებ გაოცებულები იყვნენ უცნობი ხუროთმოძღვრის პროექტით, მომავალი სასახლის ხედებით, მაგრამ არ იმჩნევდნენ. იუსტინემ პასუხი ვერ მიიღო.

მაშინ იაკობს მიუბრუნდა.

— ვინ არის ეს ხუროთმოძღვარი?

— ბატონო, ის თავის სახელს ვერ გაამჟღავნებს!

— მაშ ვინ უხელმძღვანელებს მშენებლობას?

— თავად უხელმძღვანელებს, მაგრამ თქვენ არ გეცოდინებათ, ვინ არის ის.

იუსტინემ იცოდა, რომ იყვნენ უცნობი მხატვრები, მოქანდაკენი, უცნობი ხუროთმოძღვარნი, რომელთაც შედეგები ჰქონდათ შექმნილი. ამიტომ აღარ ჩაეძია პროექტის მშენებელის ვინაობას, რადგან თავად პროექტით მოიხიბლა.

იაკობი ისე იქცეოდა, როგორც დარიგებული იყო.

— ბატონო, ხომ არ ინებებთ ხარჯების ანგარიშს? — და იუსტინეს ქალღმრთელები გაუწოდა.

იუსტინემ ანგარიშს ჩახელა. მასში ყველაფრის ღირებულება წვრილად იყო ჩამოთვლილი, საერთო ჯამმა კი იუსტინე გაახარა.

რომაელი ხუროთმოძღვრები ნერვიულობდნენ. თუ უცნობი ხუროთმოძღვარი უფრო იაფად ააშენებდა სასახლეს,

ვიდრე ისინი, მაშინ, ცხადია, იუსტინე დაარღვევდა მათთან შეთანხმებას.

— აჰა, ნახეთ, გაეცანით! — იუსტინემ რომაელებს ანგარიშის ქალაქები გაუწოდა.

რომაელები კარგახანს ჩაჰყურებდნენ ქალაქებს, უნდოდათ რაღაც შეცდომა ეპოვათ, მაგრამ ამოდ. მათი ანგარიში ორჯერ აღემატებოდა იმ ხარჯებს, რასაც უცნობი ხუროთმოძღვარი სასახლის მშენებლობისათვის ვარაუდობდა.

— რას იტყვით? — ჰკითხა მათ იუსტინემ.

რომაელებმა მხრები აიჩეჩეს.

იაკობმა ახალი ქალაქები მოამზადა.

— ბატონო, მშენებლობის ვადებს ხომ არ გაეცნობით?

იუსტინეს წარმოდგენაში სასახლე უკვე აშენებული იყო. მოუთმენლობამ შეიპყრო. ქალაქები არ ჩამოართვა იაკობს.

— მითხარი, რა წერია ამ ქალაქებში, მოვესწრები სასახლის აშენებას?

— ბატონო, თქვენ დიდხანს იცოცხლებთ, — თავაზიანად უპასუხა იაკობმა, — სასახლე, თუ თქვენი ნება იქნება, ორ წელიწადში აშენდება!

რომაელები კი ოთხ-ხუთ წელიწადს ითხოვდნენ.

იუსტინემ გამეორებით იკითხა:

— კიდევ მითხარი, რას ამბობს შენი ხუროთმოძღვარი, რამდენ ხანში დავამთავრებო სასახლეს?

— ორ წელიწადში, ბატონო!

იუსტინემ ახლა უკვე მწყრალად გადახედა რომაელებს.

— თქვენ რას იტყვით?

ერთმა გაბედა და თქვა:

— შეუძლებელია ასე სწრაფად სასახლის აშენება!

იაკობმა ისევ გაუწოდა ქალაქები იუსტინეს:

— ბატონო, ინებეთ მშენებლობის გეგმა. აქ ყველაფერია გათვალისწინებული!

იუსტინემ გამოართვა ქალაქები და ყურადღებით გაეცნო.

— ოჰო, — წამოიძახა მან, — უცნობი ხუროთმოძღვარი მშენებლობისათვის ახალ ტექნიკას იყენებს! რას იტყვით? — და ქალაქები რომაელებს გაუწოდა.

რომაელი ხუროთმოძღვრები მთლად დაიბნენ, ხმა ვერ ამოიღეს. ხუთივეს სახე ჰქონდა გაწითლებული, ბრაზი ახრჩობდა. ღიდი დამარცხება იწვინეს: ერთმა ვილაც უცნობმა ხუროთმოძღვარმა მათზე გაცილებით უკეთესი პროექტი შექმნა, ორჯერ იაფი დააფასა და ორჯერ სწრაფად აპირებს აშენებას. შერცხვენილებმა მღაბლად დაუკრეს თავი იუსტინეს და დარბაზიდან გავიდნენ.

იუსტინე იაკობს მიუბრუნდა.

— არც ახლა გამიმხელ, ვინ არის უცნობი ხუროთმოძღვარი?

„ნეტავ რას მოიმოქმედებს რომაელი დიდებული, თუ ვეტიყვი, რომ უცნობი ხუროთმოძღვარი ცამეტი წლის იუდეველი ბიჭია, ამიტომ არც სახელგანთქმული და არც გამოცდილი?“ — გაიფიქრა იაკობმა. იუსტინეს კი მოახსენა:

— ბატონო, თქვენ მას ნახავთ, მაგრამ არ გეცოდინებათ, რომ ის არის!

— კარგი, ასე იყოს. მოახსენე შენს ბატონს, რომ პროექტს ვლგებულობ და მინდა სასწრაფოდ შეუდგეს მშენებლობას!

— მადლობას მოგახსენებთ, ბატონო!

გახარებულმა იაკობმა თავი დაუქნია იუსტინეს და დარბაზიდან ელვისებურად გაქრა. მალე თეთრი ცხენი უკან მიაქროლებდა მას.



საქმე უბრალოდ გადაწყდა

დიდი ბიჭი დღითი-დღე უფროდაუფრო ბოროტდებოდა.

ბავშვებს არ უყვარდათ ის და გაურბოდნენ მასთან თამაშს. ის კი ხან ერთს აუტყდებოდა, დასცინოდა და აწვალებდა, ხან მეორეს. პატარებს კი აიძულებდა სახლიდან ნივთები და ფული მოეპარათ და მისთვის მიეცათ. მისგან დაშინებული პატარა ბავშვები ძალაუნებურად საკუთარი სახლის ქურდები ხდებოდნენ. როცა რომელიმეს მამა გაიგებდა — შვილმა საგვარეულო სამკაული, ან საღურგლო იარაღი, ან ფული მოიპარაო, დაიჭერდა საწყალ ბავშვს და ურტყამდა და ურტყამდა. ის კი ვერ ბედავდა ეთქვა, რომ ქურდობა დიდმა ბიჭმა ჩაადენინა.

სალომეს სკოლამ სულ გადარია დიდი ბიჭი.

ბევრმა ბავშვმა სალომესთან დაიწყო სიარული და ნაკლებად იცლიდა ქუჩაში სათამაშოდ, დიდ ბიჭს კი არც ეპარებოდა. სკოლაში სალომე და იაკობი ბავშვებს ისეთ რამეებს ასწავლიდნენ, რომ ისინი უფრო თამაშები და შეუპოვრები ხდებოდნენ და აღარც დიდ ბიჭს ემორჩილებოდნენ. ის კი არა, რამდენიმე კიდეც შეიკრა მის წინააღმდეგ.

ერთხელ, როცა დიდი ბიჭი ერთ პატარას, რომელიც სკოლიდან ბრუნდებოდა, წინ გადაუდგა და დაავალა, სახლიდან რაღაც მოიპარე და მომიტანე, თორემო... ემუქრებოდა, მას მაშინვე ხუთი თანატოლი ამოუდგა, ექვსივემ ქვებს დაავლო ხელი და დიდ ბიჭს მოუღერა.

— აბა, მოუსვი აქედან, თორემ თავს გაგიხეთქავთ! — შესძახა ექვსივემ.

დიდ ბიჭს ეგონა, ძველებურად თვალებს დავუბრიალებ, ცხვირთან დანას შევეუთამაშებ და ექვსივეს ერთად შევაშინებო. ასეც აპირებდა მოქცეულიყო, მაგრამ, ნურას უკაცრავად, — არცერთმა წარბიც არ შეიხარა.

— თუ სამ თვლაში გზიდან არ ჩამოგვეცლები, ჩაგქოლავთ! ერთი... ორი...

ისე გადაწყვეტით უთხრეს ბავშვებმა და ისე მოემზადნენ ქვების სასროლად, რომ დიდმა ბიჭმა დიდი საშიშროება

იგრძნო. მას ისლა დარჩენოდა, — მე თქვენ გიჩვენებთო, — დამუქრებოდა და იქაურობას გასცლოდა.

გათამამებულმა ბავშვებმა ყიჟინა დასცხეს და შესაშინებლად ქვები ბიჭის შორიახლოს ისროლეს. დიდმა ბიჭმა, — ვაიმე, უკვე მქოლავენო, — ისე მოკურცხლა, უკან არ მოუხედავს.

— შშიშარა, შშიშარა, — მისძახოდნენ ბავშვები.

ამ მარცხმა დიდ ბიჭს სულაც არ ასწავლა ჭკუა. მან სხვა გზებს დაუწყო ძებნა. „მე უნდა დავიმორჩილო და შევაშინო ისინი, ვინც მაგათ ხელმძღვანელობს,“ — გაიფიქრა. ასეთები კი, რომლებიც მტრად დაიგულა, იყვნენ ამონ-რა და მისი „ავან-ჩავანები,“ როგორც მათ დიდმა ბიჭმა უწოდა.

ამ „ავან-ჩავანებს“ დიდი ბიჭი იცნობდა. იორამს სვა „ცუნცრუკა ექიმს“ ეძახოდა. ილიაზე ამბობდა, მიკვირს ეს ჭკვიანი ბიჭი მაგ ტუტრუცანებს როგორ აჰყვავო. სალომეს დიდმა ბიჭმა გომბიო დაარქვა. იაკობისა კი ვერაფერი გაეგო.

დიდმა ბიჭმა თვალთვალის დაუწყო მათ. ხედავდა, რომ ისინი, ერთად თუ ცალცალკე, მთისკენ მიემართებოდნენ ან მთიდან ბრუნდებოდნენ. გაგებული ჰქონდა, რომ მთის რაღაც ადგილებში გამოქვაბულები იყო და იქ ფილოსოფოსი ცხოვრობდა თავის დისშვილთან — ამონ-რასთან ერთად. შემდეგ ფილოსოფოსი სადღაც გადაიკარგა. ამონ-რამ კი გარშემო შემოიკრიბა „თავისავით ტუტრუცანები,“ და ყველანი ყოველდღე გამოქვაბულებში დაძვრებიან. რა უნდათ გამოქვაბულებში, რას აკეთებენ იქ? დიდმა ბიჭმა არ იცოდა არც ის, თუ რა ხდებოდა გამოქვაბულებში, არც ის, თუ სად იმალებოდა იქ ასასვლელი ბილიკი.

რამდენიმე დღის თვალთვალის შემდეგ, ბოლოს და ბოლოს, მიაგნო ბილიკის დასაწყისს. დაუყარაუღდა, როცა, მისი ვარაუდით, გამოქვაბულში უკვე არავინ იქნებოდა, რადგან ამონ-რა და იორამი ერთად გამოვიდნენ ბურქებიდან და სადღაცას წავიდნენ, სალომე ბავშვებს სკოლობანას ეთამამებოდა, ილია და იაკობი კი კვირაზე მეტია არ გამოჩენილან. „ვინდა დარჩებოდა გამოქვაბულებში?“ — ჰკითხა დიდმა ბიჭმა თავის თავს, და თავმაც, ჩვეულებისამებრ, დაუფიქრებლად უპასუხა: „არაჲინ... მიდი, გააკეთე, რაც გინდა!“ „რა მინდა და ბუდე მოვუშალო გამოქვაბულების ვირთხებს!“ — დაისისინა გულში დიდმა ბიჭმა, ბურქებში შეძვრა და ბილიკს გაჰყვა.

ალაგ-ალაგ ბილიკი იკარგებოდა ან კლდის პირას მიდი-
ოდა. დიდი ბიჭი ვაივაგლახით უბრუნდებოდა სწორ გზას.

თითქმის მთელი დღე მოუნდა გამოქვაბულებში ასეღას.

აი, მიაღწია კიდევ პატარა მოედანს და გამოქვაბულის
შესასვლელის წინ აღმოჩნდა. მაგრამ ვიდრე უკანასკნელ
ბუჩქს გააღწევდა, ქვას წამოკრა ფეხი. ქვა დიდი არ იყო, —
თხელი, პატარა, — არც ფეხი სტკენია ძალიან, მაგრამ დიდი
ბიჭი მაინც გაბრაზდა. „ოჰ, შენი...“ — წამოიძახა ბოლმით,
ქვას ხელი დაავლო და არც დახედა, იქვე დაგდებულ დიდ
ქვაზე დაუპირა დამსხვრევა. მარჯვენა ხელი მაღლა შემართა
და ის იყო პატარა ქვას დიდ ქვაზე დაახეთქებდა, მაგრამ
მოულოდნელად ხელი ჰაერში გაუშემდა. „რა დაემართა ჩემს
ხელს?“ — გაუკვირდა დიდ ბიჭს. ხელი მშვიდად დაუშვა
დაბლა და ქვას დახედა. მის გაყინულ სულში რაღაც
უცნაურმა გაიფარუნა, მაგრამ სიძულვილმა მაშინვე იგი ნაკუ-
წებად დაფლითა. მან პატარა ქვა დიდ ქვაზე დადო, აიღო
მესამე ქვა, დიდი და მრგვალი, ასწია თავს ზევით და პატარა
ქვას დასცხო. ააცდინა. ან იქნებ დიდ ქვას არ მოუნდა
ხელისგულივით პატარა ქვას დასცემოდა და გვერდით ჩაიქ-
როლა. დიდი ბიჭი, უფრო გაბოროტებული, ისევ დასწვდა
მრგვალ ქვას, ორივე ხელით ასწია მაღლა, დაუმიზნა პატარა
ქვას და ზედ დაანარცხა. ხელისგულივით ქვა ნამსხვრევებად
იქცა. იმავე წამს დიდმა ბიჭმა გულში მწარე, აუტანელი
ტკივილი იგრძნო. ტკივილმა, თითქოსდა წვეტიანი ნემსი ყო-
ფილიყოს გრძელი ძაფით, მთელ სხეულში დაუარა და ყველ-
გან წუხილი და სიმწარე დაუტოვა. შეზღვევ ზემოთ გაემართა
და თხემიდან გარეთ გავიდა.

მიუხედავად უსიამოვნებისა, რაც გამოქვაბულებისაკენ
სავალ ბილიკებზე განიცადა და რაც ხელისგულისხელა პა-
ტარა ქვამ მიაყენა, დიდი ბიჭი მაინც გახარებული იყო. ხომ
მოაღწია აქამდე, ხომ მიაგნო გამოქვაბულების ვირთხების ბუ-
დეს. მალე დაუნგრევს მათ ამ ბუნავს და მერე მის მდგმუ-
რებსაც უტირებს ყოფას.

და ვიდრე საქმეს შეუდგებოდა, დასვენება მოისურვა. ჩა-
მოჯდა დიდ ქვაზე, რომელზეც ეს-ეს არის პატარა ქვა დაამ-
სხვრია, და ზემოდან ქალაქს გახედა. „აუჰ, რა სიმაღლეზე
ამოვსულვარ!“ — გაუკვირდა და ქალაქის ქუჩებისა და უბნე-
ბის გარკვევა დაიწყო.

ამ დროს უკნიდან გაურკვეველი ფაჩუნი შემოესმა. მიხედვაც ვერ მოასწრო, რომ ვილაცამ ორი მსხვილი და ძლიერი მკლავი ილღიებში ამოსდო, გამოქვამულების წინ მოედანზე გაათრია და კალთაში ჩაისვა.

დიდი ბიჭი გაფართხალდა, მაგრამ ძლიერი მკლავები სალტესავით ჰქონდა შემოჭლომილი. და როცა ამ მკლავებს ჩასჭიდა ხელი, რომ გათავისუფლებულიყო, მიხვდა, რომ ის ადამიანის მკლავები არ იყო. ეს იყო რალაც საშინელი ბანჯგვლიანი არსება, რომელიც არც უკან მიხედვის საშუალებას ამძღვედა.

— გამიშვი... გამიშვი... — ღრიალებდა დიდი ბიჭი და უმწეოდ იქნევდა ფეხებსა და ხელებს.

შემდეგ აზრად მოუვიდა, რომ ბანჯგვლიან არსებას შეეძლო მისთვის თავი მოეჭამა. შეშინდა დიდი ბიჭი, დაფეთდა, ატირდა და ხვეწნა დაუწყო:

— არ შემჭამო... არ შემჭამო... არ მომკლა...

მაგრამ ბანჯგვლიანი არსება მას არ ჭამდა და არც კლავდა. ჩაბლუჯული ჰყავდა და არ უშეებდა, ეს იყო და ეს. ამ მდგომარეობაში იყო დიდი ბიჭი რამდენიმე საათი. შიშისგან თავში აზრიც გაუჩერდა. მოსალამოვდა.

ამ დროს ფეხის ხმაც გაისმა. ამონ-რა და იორამი მოდიოდნენ და მოსაუბრობდნენ.

დიდ ბიჭს იმედი მიეცა, რომ ისინი გაათავისუფლებდნენ მას ბანჯგვლიანი არსების ტყვეობისაგან, მაგრამ შეშინდა კიდევ: მიხვდებიან, რისთვისაც ვარ მოსული და რას მიზამნო.

ბუჩქებიდან ამონ-რა და იორამი გამოვიდნენ:

— ეს დიდი ბიჭი არ არის? რა უნდა აქ?! — გაუკვირდა იორამს.

ამონ-რას კი გაეცინა.

— რაც უნდა და რისთვისაც მოვიდა აქ, თვითონ იცის, მაგრამ რომ არ გამოუვიდა? — უპასუხა ამონ-რამ.

იორამსაც გულიანად გაეცინა, ისე ამაყად ჰყავდა ჩაბლუჯული ბუნგლოს დაუპატიუბელი სტუმარი.

დიდი ბიჭი ხმას ვერ იღებდა, არ იცოდა, როგორ მოქცეულიყო: ეთხოვა ბიჭებისათვის, გამათავისუფლეთ და მეტს აღარ ვიზამო, თუ ბედს დალოდებოდა.

— რა ვუყოთ ამ დიდ ბიჭს? — ჰკითხა იორამმა ამონ-რას, — იქნებ ჰყავდეს ასე დატყვევებული ბუნგლოს ორი-სამი

დღე და მერე გავუშვით? ან იქნებ სულაც ბუნგლოს მივანდოთ, რისი ღირსიც არის, ის უქნას?

იორამი, რა თქმა უნდა, ხუმრობდა, მაგრამ როგორ მოიქცეოდა ამონ-რა, არ იცოდა.

იორამის ხუმრობა დიდმა ბიჭმა სიმათლელ მიიღო, შიშისაგან ბუნგლოს თათებში მთლად აცახცახდა და რაღაც გაურკვეველი ლულლული დაიწყო.

— ბუნგლო, გაუშვი! — მიმართა ამონ-რამ ბანჯგვლიან არსებას.

ბუნგლომ ნელ-ნელა გაშალა თავისი მსხვილი თათები.

დიდმა ბიჭმა შეველა იგრძნო და ბუნგლოს მუხლებიდან მიწაზე ჩამოცოცდა. გაქცევა არც უფიქრია, ან სად გაექცეოდა ამ... დიდმა ბიჭმა შიშით შეხედა მის დამატყვევებელს და კინალამ გული წაუვიდა: რამხელა დათვი... აი, ვის ჰყავდა ის ჩაბლუჯული!

იდგა ამონ-რასა და იორამის წინ დიდი ბიჭი, წოწლო-კინა, მაღალი, გრძელკისერა. დაჰყურებდა ზემოდან მასზე დაბლებსა და ასაკითაც ჰატარა ბიჭებს. გაწითლდა, გაწითლდა, მაგრამ სირცხვილისაგან კი არა, არამედ ბოლმისა და სიძულვილისაგან. როგორ უნდოდა, რომ თვალები დაებრიალებინა, ერთისთვის კისერში ჩაეველო ხელი და მაღლა აეწია, მეორესთვის — პანჩური ამოეკრა, ორივესთვის თავისი ძალა ეჩვენებინა და თავის ყურმოჭრილ მონებად ექცია. თუ ამათ მოერეოდა, მაშინ მთელი ქალაქის ბავშვებიც მისი ყურმოჭრილი მონები გახდებოდნენ. აუჰ, რამდენ რამეს მოაპარინებდა მათ სახლებიდან. რატომ ეს ბანჯგვლიანი არსება, ეს დათვი, რომელიც გორასავით დგას გამოქვაბულის წინ, მას არ ემორჩილება! მაშინ ქალაქის ბავშვები კი არა, მათი მშობლებიც მისი მოსამსახურეები გახდებოდნენ, თვითონ ქალაქის მბრძანებლად იქცეოდა. ამ ცინგლიანებს კი, თავი რომ მეცნიერებად და ექიმებად მოაქვთ, დათვს ჩააყლაპვინებდა. მაგრამ რა ქნას ახლა უსუსურმა დიდმა ბიჭმა — თავისი მტრების ხელშია ჩავარდნილი, როგორ უშველოს თავს?

საქმე კი უბრალოდ გადაწყდა: ამონ-რამ მშვიდად, უბოროტოდ, მაგრამ გადაწყვეტილ უთხრა დიდ ბიჭს:

— წადი აქედან. რაკი ამოსასვლელი ბილიკი იპოვე, ჩასასვლელსაც იპოვი!

ახლავს მიხვდა ღიღი ბიჭი, რა საშინელი გამოცდა ელოდა: უმთვარო ღამეში მთიდან დაბლა უნდა დაშვებულყო. მთაში კი თურმე ასეთი უზარმაზარი ბანჯგვლიანი არსებანიც ყოფილან. ცოცხალი ვერ ჩააღწევს ქალაქში, ან განა როგორ უნდა გაიგნოს? რა ქნას ღიღმა ბიჭმა, იქნებ შეეხვეწოს ამონ-რას, ამაღამ აქ გამათევინეთ და ღიღით ადრე წაუვლო?

— წადი, წადი! — მშვიდად გაუმეორა ამონ-რამ, — ნუ შიშობ, ჩააღწევ ქალაქამდე!

ღიღი ბიჭი უიმედო ნაბიჯებით მიიშალა ბუჩქებში.



დედამიწაზე ნაირნაირი და უთვალავი ქვაა

იორამს ეგონა, ამონ-რა გაუწყრებოდა დიდ ბიჭს, დაე-მუქრებოდა, მეორედ არ გაბედო აქ მოსვლას, ეტყოდა. ან კეთილად მაინც დაარიგებდა, რომ ბოროტებისათვის თავი დაენებებინა.

ამონ-რა ამ დროს მიწიდან ქვის ნატეხებს კრეფდა და დიდად შეწუხებული ჩანდა.

— რად გინდა ეგ ქვის ნატეხები? — ჰკითხა იორამმა.

— დიდი ბიჭი ჩვენ მტრად მიგვიჩნევს, არა და თვითონვე თავისი თავის ყველაზე დიდი მტერი! — გულისტკივილით თქვა ამონ-რამ.

იორამმა ვერ გაიგო, რას გულისხმობდა ამონ-რა.

ამონ-რამ ქვის ნატეხებიდან მთლიანი ქვის აწყობა დაიწყო. უკვე ბნელდებოდა, და ეს საქმე არ იყო ადვილი.

— მოიტანე, თუ შეიძლება, წებო და სანთელი! — სთხოვა იორამს.

ანდრიას ლაბორატორიიდან იორამმა პატარა თიხის ჭურჭლით წებო და ანთებული სანთელი გამოიტანა.

ამონ-რამ ქვის ნატეხებს თავ-თავისი ადგილი მოუნახა და ერთმანეთს მიაწება.

— საკუთარი ქვაწერილი მეორედ მივიდა დიდ ბიჭთან, მან კი ვერ გაიგო, რა ეჭირა ხელში, და დააშსხვრია. იშვიათად ხდება, რომ ერთ სიცოცხლეში ქვაწერილი ორჯერ მივიდეს მასთან, ვისთანაც არის გამოგზავნილი. მაშ, ვინ არიან დიდი ბიჭის მტრები, თუ არა თვითონვე?

ამონ-რა ნამდვილად შეწუხებული იყო.

— ვერ ვხდები, რას გულისხმობ! — უთხრა იორამმა.

ამონ-რამ გამთელებული ქვაწერილი იორამს დაუდო ხელისგულზე.

— როგორ ფიქრობ, განა ეს ქვა ჩვეულებრივი ქვაა, როგორიც ბევრია აქაც და ხევშიც?

იორამმა თვალები მოჭუტა, რომ იისფერ სიბნელეში ქვას დაკვირვებოდა. მასზე ხაზები და ნიშნების მწყკვრივები შეინიშნა.

— ეს არ არის შემთხვევითი ქვა! — თქვა დარწმუნებით იორამმა, — მაშ ეს ის ქვაწერილია, შენ რომ ამასწინათ გველპარაკუბოდი?

— გეტყვი, იორამ, შენ უნდა იცოდე ქვაწერილის საიდუმლო.

ბუნგლო ბიჭების ახლოს მიწაზე დაწვა, ამონ-რა მოეფერა ბუნგლოს, შემდეგ მის მუცელს მიეყრდნო და თითქოსდა ხმამაღლა ფიქრობსო, ჩუმად და ნაწყვეტ-ნაწყვეტად აჩურჩულდა.

— ეს ქვა, რომელიც ახლა გავამთელეთ, დიდი ბიჭის ქვაწერილია. ერთხელ უკვე მივიდა ქვაწერილი მასთან, ის კი ვერ მიხვდა, რა ქვა ეჭირა ხელში, და მე შესროლა...

იორამს გაახსენდა ის დღე — თვითონაც იქვე იყო, როცა ამონ-რამ მიწიდან ის ქვა აიღო, რომლითაც დიდმა ბიჭმა მას შუბლი გაუტეხა.

— ამონ-რა, ნუთუ ეს ის ქვაა?! — ჰკითხა გაკვირვებით.

— ის არის... დღეს კი, ჩვენს მოსვლამდე, მეორედ მიაკითხა მას საკუთარმა ქვაწერილმა. ალბათ, ფეხი წამოკრა მას, როცა ბურქებში გამოიარა. იქ მე დაეძალე ეს ქვაწერილი. რამდენი ხანია იქ დევს და არავის წამოუკრავს ფეხი, მხოლოდ მისმა პატრონმა წამოჰკრა ფეხი. რატომ მაინცდამაინც იმ ბურქებით გამოიარა, როცა აქეთაც შეეძლო? იმიტომ რომ საკუთარმა ქვაწერილმა მიიზიდა. ვერც ამჯერად მიხვდა, რა ქვა იყო ან რატომ წამოჰკრა ფეხი. თუ ქვას მშვიდად აიღებდა და კეთილი გულით, ან ცნობისმოყვარეობით მაინც შეხვდავდა, იქნებ დაფიქრებულყო. მაგრამ ასე არ მოიქცა, გაბოროტებით დასტაცა ხელი და შური იძია: თავისი ცხოვრების საიდუმლო ამ ქვაზე დაამსხვრია. აი, ჩვენ აღვადგინეთ ქვაწერილი, მივაწებეთ ერთმანეთს ნამსხვრევები, დავდებთ მას გამოქვაბულში თაროზე. მაგრამ როდისღა მივა კიდევ ეს ქვაწერილი მასთან? ერთ ცხოვრებაში საკუთარ ქვაწერილთან ორჯერ შეხვედრა დიდი იშვიათობაა. მაშ რამდენი სიცოცხლე დასჭირდება კიდევ, რამდენჯერ უნდა დაიბადოს, რომ ამ ქვაწერილმა შესამედ მიაკითხოს დიდ ბიჭს, ხოლო ის მზად აღმოჩნდეს მის ამოსაცნობად?

იორამს სიტყვა-სიტყვით ახსოვდა ამონ-რას ამასწინანდელი საუბარი, როცა უფლის გამოქვაბულიდან გამოვიდნენ. მაშინ ამონ-რამ უთხრა ყველას, რომ დიდი სულეები ადამიანებს ქვაწერილებს უგზავნიანო. ახლა კი იორამმა გაიგო,

რომ ადამიანი მთელ თავის ცხოვრებათა განმავლობაში ერთ ქვაწერილს მიიღებს. იორამი მოუთმენლობამ შეიპყრო: რას ეტყვის, რას გაუშნელს მას კიდევ ამონ-რა?

ამონ-რამ თავი ბუნგლოს თავს მიაყრდნო და ვარსკვლავებიან ცას დაუწყო ცქერა. შემდეგ ნელა და ჩუმად გააგრძელა შეწყვეტილი ფიქრები. იორამს ისეთი შთაბეჭდილება ექმნებოდა, თითქოს ამონ-რა ვარსკვლავებიან ცაზე კითხულობდა, რასაც ამბობდა.

— დედამიწაზე ნაირ-ნაირი და უთვალავი ქვაა. ყველას, უმცირეს კენჭსაც კი, თავისი დანიშნულება აქვს. ზოგის დანიშნულება ის არის, რომ ხეების, სახლების და სასახლეების, ციხე-სიმაგრეებისა და ტაძრების მშენებლობას მოხმარდეს. ზოგის ის, რომ ადამიანებმა მათგან მშენიერება გამოძერწონ. ზოგს სამკაულებად აქცევენ, ასეთებს ძვირფას ქვებს უწოდებენ. ზოგს სასაფლაოებზე მიიტანენ — მათ საფლავის ქვები ჰქვია. ზოგი საჯილდაო ქვა გახდება და ახალგაზრდები ერთმანეთს თავიანთ ძალას უჩვენებენ. არსებობს ქვები, რომლებიც ფილოსოფოსთა გამოცანაა, ქვები, რომლებსაც მშენებლები დაიწუნებენ, მაგრამ შენობის ქვაკუთხედები გახდებიან. არიან ქვები, რომლებიც თხელ მდინარეზე გადასვლაში გვეხმარებიან. ქვების ერთი ნაწილი იმიტომ გაჩნდა, რომ ბუნების სიდიადეს ჰიმნი უგალობოს...

ამონ-რა გაჩერდა, თითქოს ვარსკვლავებიან ცაზე წასაკითხ ტექსტს დაეძებდა.

არათუ იორამი, ბუნგლოც სმენად იყო გადაქცეული.

— ქვები ადამიანთა განვითარებისათვის არიან შექმნილნი, — გააგრძელა ამონ-რამ, — მაგრამ ადამიანები ხშირად უპატივცემულად ეპყრობიან ქვებს, ერთმანეთის საზიანოდ და საბოროტოდ იყენებენ. ქვებს ერთმანეთს ესვრიან, ქვებით ვინმეს ჩაქოლავენ, ქვებით მაღალ და გრძელ კედელს ააშენებენ, რომ ერთმანეთს გაეთიშონ, საპყრობილეებსა და დილეგებს ააშენებენ, რომ ერთმანეთი დაამწყვდიონ. მაშინ ქვები თავიანთ დანიშნულებას კარგავენ, ქვებიც უბედურდებიან და ადამიანებიც...

ამონ-რა ისევ გაჩუმდა.

ბუნგლო ხელს ულოკავდა ამონ-რას.

წუთიც და ამონ-რას მშვიდი და ჩუმი ხმა ისევ აშრი-აღდა.

— მაგრამ არიან სულ სხვანაირი ქვეები, რომელთა დანიშნულება განსაკუთრებით მნიშვნელოვანია. ასეთი ქვა იმდენია, რამდენიცაა ადამიანის სული, რომლებმაც დედამიწაზე უნდა ჰპოვონ სრულყოფა. დედამიწა ჩვენი განვითარების გზაა, უსასრულო გზის ერთი მონაკვეთია. ადამიანი დედამიწაზე ადამიან-ღმერთად უნდა იქცეს. ასე გვითხრა იესო ქრისტემ. ასეთ სრულყოფას რომ მიაღწიოს, ადამიანს ერთი ცხოვრება არ ეყოფა, არც ორი, არც ათი, არც ასი ცხოვრება ეყოფა. ამიტომ ადამიანი დაბადება, იცხოვრებს, იღვაწებს და გარდაიცვლება, ანუ უზილავ სამყაროში გადავა, სადაც მისი სული ცათა სასუფეველში იმ სიმაღლეს მიაღწევს, რა სრულყოფაც დედამიწაზე ცხოვრებისას შეიძინა.

ამონ-რა დიდხანს იყო ჩუმად.

ამასობაში იორამი სამყაროს წიგნის არსს აცნობიერებდა. ისიც შეჰყურებდა ცას და ეჩვენებოდა, რომ ვარსკვლავები დაბლა დაეშენენ, ცამ დაბლა დაიწია, რათა ამონ-რას გააღვილებოდა წიგნის გადაშლილი გვერდის კითხვა. „რას იტყვის კიდევ,“ — ეკითხებოდა იორამი ვარსკვლავებს. ვარსკვლავები კი საიდუმლოდ ციმციმებდნენ და უღიმოდნენ იორამსაც, ამონ-რასაც და ბუნგლოსაც. „იქნებ ვარსკვლავებიც სამყაროში გაბნეული ქვებია? — გაიფიქრა ბიჭმა, — მაგრამ როგორ ანათებენ ისინი, და რატომ არ ანათებენ დედამიწის ქვეები?“

ისევ აშრიალდა ამონ-რას ხმა.

— ერთ ცხოვრებაში ადამიანს შეიძლება ილია დაარქვან, მეორეში — იორამი, მესამეში — ალექსანდრე, მეოთხეში — მიხეილი, მეხუთეში — ანა ან მარიამი და ასე შემდეგ. სული კი ერთია და სრულყოფას ესწრაფვის. ყოველი გარდაცვალების შემდეგ იგი ან უფრო მაღლდება ცათა სასუფეველში, ან დაბლდება. ადამიანის დაბადება ორ შემთხვევაში შეწყდება: როცა იგი ისეთსავე სრულყოფას მიაღწევს, როგორი სრულყოფილიც არის ჩვენი ზეციერი მამა; ან როცა ისე გადაგვარდება, რომ მისი შემდგომი სრულყოფა შეუძლებელი ხდება. პირველი — სიცოცხლის გზაა, რომელიც ვიწროა და ვიწრო კარიბჭისკენ მიემართება. ადამიანი ძალისხმევით დაიმკვიდრებს ცათა სასუფეველს და მაშინ შემოქმედი მას სრულყოფის ახალ გზაზე დააყენებს. მეორე — დაღუპვის გზაა, რომელიც ფართოა და ფართო კარიბჭეს დაეძებს. შემოქმედი ასეთ სულს დაშლის, როგორც უნაყოფოს სამყაროს მშენებ-

ლობისათვის. ყოველ ცხოვრებაში ადამიანს საკუთარი მისია ეძლევა, იგი მასშივება ჩამალული და ადამიანმა უნდა ამოიცი-
ნოს, რატომ მოვიდა ამქვეყნად. თუ ამოიციწობს მისიას და
გაჰყვება მას, მისი განვითარება ღაჩქარდება, თუ საკუთარი
მისიის საწინააღმდეგოდ იცხოვრებს, მისი განვითარება შე-
ფერხდება.

ცა და ვარსკვლავები კიდევ უფრო დაბლა დაეშენენ.

სანთელი დიდი ხანია ჩაქრა.

იორამი ცდილობდა აზრით შეეღწია ცათა სასუფეველ-
ში. ბუნგლო ისევ ულოკავდა ამონ-რას ხელს. ამონ-რამ გა-
ნაგრძო.

— ქვაწერილები იმიტომ არსებობენ, რომ ადამიანებს
დაეხმარონ გაიკვალონ გზა ცათა სასუფეველისაკენ. ყოველი
ადამიანი დედამიწაზე თავისი მრავალი ცხოვრების განმავლო-
ბაში ერთხელ მიიღებს ქვაწერილს, მიიღებს მაშინ, როცა მას
განსაკუთრებით სჭირდება რჩევა და როცა სამყაროში მისი
სულის ბედი წყდება. ქვაწერილით დიდი სული ამცნობს
ადამიანს, რომელზეც ის ზრუნავს, როგორ გააგრძელოს
ცხოვრება. ამცნობს ამას საიდუმლო ნიშნების მეშვეობით. სა-
კუთარი ქვაწერილის წაკითხვა მხოლოდ მას შეუძლია, ვისთ-
ვისაც ის არის გამოგზავნილი. ძალიანაც რომ გვინდოდეს,
ჩვენ დიდი ბიჭის ქვაწერილს ვერ ამოვიცნობთ, მაგრამ თუ
თვად შეეცდება ქვაწერილის წაკითხვას, ადრე თუ გვიან
ჩასწვდება საკუთარი ბედის საიდუმლოს. მაშინ არჩევანის
წინაშე დადგება, რომელ გზას გაჰყვეს: იმას — დიდმა სულმა
რომ ურჩია, თუ იმას, რომლისკენაც მას ამქვეყნიური სურვი-
ლები ეწვეიან...

ამონ-რა ცოტახანს გაჩერდა, თვალეები დახუჭა და სიბ-
ნელე გაარღვია: დიდი ბიჭი „მიშველეთო“ ყვიროდა.

— ნუ გეშინია, გააგრძელე გზა, მიხვალ ქალაქში... —
ჩაილაპარაკა ამონ-რამ და თვალი გაადევნა, როგორ დააღწია
დიდმა ბიჭმა თავი ეკალ-ბარდებს და ისევ ბილიკს დაუბრუნ-
და.

რას ამბობს ამონ-რაო, გაუკვირდა იორამს და საუბრის
გაგრძელებას დაელოდა.

— ქვაწერილის დანიშნულებაც ეს არის — ადამიანი გა-
დამწყვეტი არჩევანის წინაშე დააყენოს. ამის შემდეგ იგი
კარგავს თავის ძალას და ჩვეულებრივ ქვად იქცევა... ქვა-
წერილს ღროულად ის მიიღებს, ვინც ელის მის გამოჩენას,

ვინც ეძებს მას. ეძებდე და ჰპოვებდეთ, გვარიგებენ მასწავლებლები. ქვაწერილის ძებნა იმას კი არ ნიშნავს, რომ ხევხევ იარო და ქვებში საკუთარი ქვაწერილი ეძებო. ადამიანი იმით ეძებს ქვაწერილს, რომ სიკეთეს თესავს, ადამიანებს უთანაგრძნობს, ამაღლებულად და ლამაზად ფიქრობს და შრომობს, ესწრაფვის მასწავლებელს. ეს არის ძიების გზა. მაშინ ქვაწერილიც მოიჩქარის შენსკენ, უხილავ თუ ხილულ ძალებს მოაქვთ იგი შენთან. ხოლო თუ ადამიანი გამოიჩენს მონღოლებას, რომ ამოიკითხოს ქვაწერილის საიდუმლო, მაშინ ამ საქმეში მას მასწავლებელიც დაეხმარება...

ამონ-რამ იორამს მთლიანად გაანდო ყველაფერი, რაც ქვაწერილის შესახებ იცოდა. დანარჩენს იორამი თვითონაც მიხვდება. იორამი თავადაც მიიწევს საკუთარი ქვაწერილის შესახვედრად და, ალბათ, მისი ქვაწერილიც მოიჩქარის მისკენ. მაგრამ რა ეშველება დიდ ბიჭს, რომელიც საკუთარ ბედს ამსხვრევს? ამონ-რამ დიდი ბიჭის გამთელებული ქვაწერილი იორამს გაუწოდა.

— გამოქვაბულში თაროზე დადე.

— იქნებ მიუვუტანოთ ქვაწერილი და ავუხსნათ, რაშია საქმე? — ჰკითხა იორამმა.

— არაფერი გამოვა, — უპასუხა ამონ-რამ, — დიდი ბიჭი ისეა შეპყრობილი ბოროტებით, რომ ქვაწერილს ვერაფერს გაუგებს, ისევე დაამსხვრევს. იდოს ეს ქვაწერილი ჩვენს გამოქვაბულში თაროზე. ოდესმე, რომელიღაც სიცოცხლეში, იქნებ კიდევ ერთხელ გაემართოს თავის პატრონთან შესახვედრად.

ამონ-რამ ისევე ჩანდა თვალებში სიბნელეს.

— დიდი ბიჭი კუნძმა დააფრთხო, დათვი ჰკონია, — ჩაილაპარაკა თავისთვის, — ადექი და გააგრძელე გზა, ახლოს ხარ ქალაქთან...

უკვე გვიანი ღამე იყო.

ბიჭებმა ბუნგლოს თბილ მუცელთან მიიძინეს.

ბუნგლომ თავისი დიდი თათები გადააფარა ერთსაც და მეორესაც.



დიდ დათვზე სხედან და ისე მოდიან

დიდი ბიჭი დაღმართ-დაღმართ მიდიოდა.

სირბილით გაივლიდა ამ ბილიკს, მაგრამ რომ ვერ ხედავდა? უმთვარო ღამეს ვარსკვლავები სუსტად ანათებდნენ. ესეც არ იყო, როგორ უნდა დაენახა ბილიკი, რომელიც ბუნქების, ეკალ-ბარდების, ხეების ქვეშ იმალებოდა! გული შიშით უცემდა დიდ ბიჭს და ყოველ ფაჩუნზე ღამის წაქცეულიყო. საკუთარი ფეხის ხმაც აშინებდა.

ერთგან იგრძნო, რომ ბილიკს ასცდა. ფეხი რაღაცეებში გაებლანდა და ეგონა, გველი მეხვევა ფეხებზეო. ამ დროს ჭოტმაც დაჰკივლა.

— მიშველეთ! — შეჰღრიალა დიდმა ბიჭმა, მაგრამ ამ ტყე-ღრესა და მთაში, უმთვარო ღამეში ვინ გაიგებდა მის ღრიალს? მეორედ დაიღრიალა მიშველეთო, მესამედ. და ამ დროს თითქოს ყურში ჩაესმა ამონ-რას ხმა: „ნუ გეშინია, გააგრძელე გზა, მიხვალ ქალაქში.“

დიდი ბიჭი დამშვიდდა. ფეხები გაითავისუფლა და გზა გააგრძელა. „როგორ მომესმა მტრის ხმა?!“ — ფიქრობდა გაოგნებული და იმის ნაცვლად, რომ მაღლიერება დაუფლებოდა, მუქარა შეუთვალა ამონ-რას.

მიაბიჯებდა ნელა, ხელები წინ ჰქონდა გაშვებული, რომ ხეს არ დაჯახებოდა. კიდევ იმის შიში ჰქონდა, გზას არ ასცდენოდა და კლდეში არ გადაჩხბილიყო.

გამოქვამულის ბანჯგელიანი ცხოველი გააჩხენდა და ისევ შიშმა შეიპყრო. „ახლა რომ იმხელა დათვს გადავეყარო, რა მეშველება?!“ — გაიფიქრა და ღამის ჩაიკეცა, რადგან მის წინ მართლაც აღიმართა უზარმაზარი დათვი. თითქოს დაიღრიალა კიდევ, თათები მაღლა აღმართა და ის იყო, ზედ უნდა დამხობოდა დიდ ბიჭს. დიდმა ბიჭმა ისევ განწირულად შეჰყვირა: „მიშველეთ!“ — და გული წაუვიდა. როცა გონს მოვიდა, ვერაფერი დაინახა, ირგვლივ წყვდიადი იდგა. ყურში კი ამონ-რას ხმა ესმოდა: „ადექი და გააგრძელე გზა, ახლოს ხარ ქალაქთან.“

დიდი ბიჭი ფეხზე წამოდგა. „საით წავიდე?“ – გაიფიქრა და ხელები წინ გაიშვირა. „დალმართს გაჰყევი. ახლოს ხარ ქალაქთან,“ – ისევ ჩაესმა ყურში. ფეხით დალმართი მოსინჯა და ფრთხილად გადადგა ნაბიჯები. „საიდან მესმის მისი ხმა? ერთხელაც იქნება, ჩამივარდება ხელში...“ – გულში იმუქრებოდა დიდი ბიჭი.

გათენებისას მართლა გავიდა ქალაქისკენ მიმავალ დიდ გზაზე, თავი სამშვიდობოს დაიგულა და სიხარულმა შეიპყრო. ვიდრე ქალაქში შევიდოდა, გზის პირას ხის ქვეშ დაჯდა და ფიქრებს მიეცა. ფიქრები ბნელი და ჭვარტლიანი ჰქონდა: ისევ სიძულვილი, ისევ შური, მტრობა. ამასობაში ჩაეძინა კიდევ და ძალიან შეეშინდა, როცა ვილაცის რიხიანმა და მუქარიანმა ხმამ ჩასძახა:

– შენ, ეი, რას გღიხარ აქ?

მზე უკვე ამოსულიყო.

დიდ ბიჭს თავზე ათიოდე რომაელი ლეგიონერი ედგა. ისინი შუბებითა და მახვილებით იყვნენ შეიარაღებულნი. ერთმა, რომელიც, ალბათ, უფროსი იყო, შუბის წვერი მკერდზე მიბჯინა და ისევ მკაცრად დაჰყვირა:

– ვინ ხარ და რას გღიხარ აქ ამ დილაადრიანად?

დიდმა ბიჭმა ვერ გაიგო, რას ეკითხებოდა უფროსი, რადგან არ ესმოდა რომაელების ენა, მაგრამ მიხვდა, რომ ის ძალიან ბრაზობდა. შეჰყურებდა უფროსს დაფეთებული თვალებით და შუბის წვერის შიშით განძრევას ვერ ბედავდა.

ერთმა ლეგიონერმა უთარგმნა: გეკითხებიან, ვინ ხარ და აქ რას აკეთებო.

დაიბნა დიდი ბიჭი. რა უნდა ეთქვა? ხომ არ ეტყოდა, რომ ფილოსოფოსის გამოქვაბულებში უნდოდა შეპარვა და ყველაფრის განადგურება, რასაც იქ ნახავდა. ენა დაება, შუბის წვერი კი მკერდზე აწვეებოდა.

– ამოიღე ხმა, რატომ ხარ აქ ამ დილაადრიანად, თორემ... – გააფრთხილა იმანვე, ვინც უთარგმნიდა.

დიდმა ბიჭმა დიდი ტყუილი დააბუთქა:

– აქ ვლოცულობ ხოლმე ყოველ დილით!

– შენ რა, ქრისტიესი ხარ, მესიისა? – ჰკითხა ისევ უფროსმა, როცა დიდი ბიჭის ტყუილი უთარგმნეს.

– არა, არა! – ხელები გაასავსავა დიდმა ბიჭმა, – არ ვიცი, ვინ არის ქრისტი!

— ამ ქალაქში ბავშვებს იცნობ?
— ყველას ვიცნობ! — უპასუხა დიდმა ბიჭმა.
— აბა, უთხარი ამას იმ მაწანწალების სახელები! — უბრძანა უფროსმა ერთ თავის ლეგიონერს. ლეგიონერმა სწრაფად ჩამოთვალა გაზეპირებული სახელები:
— ამონ-რა, სალომე, ილია, იორამი...
— ვიცნობ, ვიცნობ! — გაუნარდა დიდ ბიჭს, რადგან გულმა უგრძნო, რომ ლეგიონერები მათ დაემებნებენ.
— ადექი და გაგვიყვანე მათი სახლებისაკენ! — უბრძანა უფროსმა.

დიდმა ბიჭმა მთისკენ გაიშვირა ხელი.

— იქ, გამოქვაბულში?

ლეგიონერებმა ერთმანეთს გადახედეს. არავის უნდოდა მთებში წოწიალი იმ ლაწირაკების გამო.

— დაბლა არ ჩამოდიან? ქალაქში არ ცხოვრობენ?

— ქალაქში ახლა ერთია, სალომე. გაჩვენებთ მის სახლს!

არ იცოდა დიდმა ბიჭმა, რომ როცა ხის ქვეშ ჩაეძინა, სწორედ ამ დროს სალომე გამოქვაბულისკენ მიიჩქაროდა ამონ-რას სანახავად და ბუნგლოსთან სათამაშოდ. თან რძე და პური მიჰქონდა.

— გაგვიძეხი! — უბრძანა უფროსმა.

დიდი ბიჭი, რაკილა შუბის წვერი მოაცილეს, თამამად წამოხტა და ლეგიონერებს წინ გაუძღვა.

როცა ქალაქის ქუჩებში მიდიოდნენ, ხალხი ეჭვით ეკითხებოდა ერთმანეთს: რას დადიან ქალაქში, ვის დაემებნებნო. გამოცდილებით იცოდნენ, რომ ლეგიონერები ქალაქში ყოველთვის ვილაცას დასდევდნენ დასაჭერად.

დიდი ბიჭი სალომეს სახლის წინ გაჩერდა.

— აქ! — და ხელი გაიშვირა.

— შედი და გამოიყვანე გარეთ, თუ არ დაგემორჩილოს, თმებით გამოათრიე! — გადასცა უფროსის ბრძანება მთარგმნელმა.

დიდი ბიჭი არც დაფიქრდა, რა ცუდი დავალება უნდა შეესრულებინა. სალომეს ციციქნა სახლში შევარდა და დაიყვირა:

— სალომე, გამოეთრიე გარეთ!

— რაშია საქმე? — ჰკითხა შეშინებულმა სალომეს დედამ, — რატომ ეძახი სალომეს ასე? სალომე არ არის შინ!

— როგორ თუ არ არის?! მაშ სად არის?

გააფთრებული დიდი ბიჭი ოთახის ყველა კუთხე-კუნჭულს ეძებდა. სალომე არსად იყო.

— გეუბნები, არ არის სალომე შინ, მთებში წავიდა ამ დილით! — გაუმეორა სალომეს დედამ.

მაშინ დიდმა ბიჭმა სალომეს დედას ჩაავლო ხელი და ძალით გამოიყვანა გარეთ.

ლევონერებმა გაიკვირვეს.

— შენ, ეი, ვერ გაიგე, რა გითხრეს? ჩვენ პატარა გოგო გვინდა, ეს კი ვინ არის?!

— ეს დედამისია! — აუხსნა დიდმა ბიჭმა.

— ჩვენ ქალიშვილი გვინდა, სულელო! — გაბრაზდა უფროსი და შუბი ყელში მიაბჯინა. დიდი ბიჭი შიშისაგან აცახცახდა და ძლივს გააგებინა, რომ სალომე მთებში წასულა, იქ არის, გამოქვაბულში.

— მერე აქ რატომ მოგვიყვანე? კვალს ფარავდი?

უფროსმა იფიქრა, ესეც იმათგანია და ისე მატყუებს, როგორც იმათ მომატყუესო, და შუბის წვერი კიდევ უფრო მიაჭირა ყელში. დიდი ბიჭი მიწაზე დაეცა და ატირდა.

— ადექი და გაგვიძეხი გამოქვაბულისაკენ! — დაუყვირა უფროსმა.

ლევონერები უკან გაბრუნდნენ. დიდი ბიჭი წინ მიდიოდა, ძლივს მიათრევდა ფეხებს. ლევონერები კი ზურგში შუბს აჭერდნენ და აჩქარებდნენ.

ქალაქის მოედანზე გავიდნენ და დაინახეს, რომ ხალხს მოეყარა თავი.

— რად შეკრებილა ხალხი, რა ამბავია? — იკითხა უფროსმა.

ვინ უთხრა — იესო ქრისტეს ელიანო, ვინ კი — მკურნალის მოსვლასო. ხალხი ემატებოდა და ემატებოდა. მაშინ უფროსმა იფიქრა, თუ მართლა მოვა ამათი მესია, იქნებ აქვე დავიჭიროო. მაგრამ სწრაფადვე გადაიფიქრა — ხალხის შეეშინდა. შეძლევა აზრად მოუვიდა, რომ იუდეველები შეიძლება რომაელების წინააღმდეგ ირაზმებიან, ამიტომ გადაწყვიტა შეჩერებულიყო და მოედანზე შეკრებილი ხალხისათვის თვალყური ედევნებინა. ლევონერებს უბრძანა შორიანხლო განლა-

გებულიყვნენ, ერთი კი ასისთავთან გააგზავნა და შეატყობინა, რისთვის შეჩერდა მოედანზე.

შუადღემდე არც მესია გამოჩნდა და არც მკურნალი.

შუადღის მერე კი მოხდა ის, რამაც მთელი ქალაქი გაამხიარულა, ლეგიონერები კი ძალიან ცუდ გუნებაზე დააყენა.

ერთი ბიჭი მაღალ ხეზე იჯდა და იქიდან ახარებდა ხალხს — მოდიოდნენ თუ არა, ვისაც ელოდნენ.

— მოდიან! — დაიძახა ბიჭმა მაღლიდან და ხალხმა გაიხარა, — დიდ დათვზე სხედან და მოდიან!

ამ ბოლო ცნობამ ხალხი გააცინა: რა ზუმარა ბიჭი ზის ხეზეო, რას არ იტყვისო.

დიდმა ბიჭმა კი, დათვიო, რომ გაიგო, გაქცევა სცადა. რომაელმა ლეგიონერმა, რომელსაც ჩაბარებული ჰყავდა, კისერში სტაცა ხელი.

— სად გარბიხარ, გველის წიწილო? შენს ძმაკაცებს გინდა შეუერთდე?

— ხომ გაიგე, დათვზე სხედანო... ძალიან დიდი დათვია...

მაგრამ ლეგიონერმა მაგრად ჩასცხო თავში ფარი: ესეც შენი დიდი დათვიო.

ხეზე მჯდარი მახარობელი კი ისევ გაიძახოდა:

— მოდიან! დიდ დათვზე სხედან და ისე მოდიან!

და ვიდრე ხალხი მხიარულობდა და იცინოდა ხის კენწეროზე წამოსკუპებული მახარობლის ზუმრობაზე, ხოლო ლეგიონერები საბრძოლო განკარგულებას ელოდნენ, მთავარ ქუჩაზე მართლაც გამოჩნა დიდი დათვი. ასეთი დიდი დათვი ჯერ თვალთ არავის ენახა. ხალხმა პირი დაალო, გაჰკვირდა. წესით, ყველა უნდა გაქცეულიყო და სადმე თავი შეეფარებინა; მაგრამ რატომღაც არავინ შეშინდა და არც მიიძალა. ლეგიონერები საგონებელში ჩაცვივდნენ და შუბები და მახვილები მოიმარჯვეს. ხალხის უმრავლესობა სიხარულითა და ნდობით შეჰყურებდა დიდ დათვს, დინჯად რომ მოაბიჯებდა მოედნისკენ და ზურგით მოჰყავდა სალომე, ამონ-რა და იორამი.

ხალხი გაიწ-გამოიწია და დათვი მოედნის ცენტრში აღმოჩნდა, დაბლა დაწვა და მგზავრები გადმოსხა.

— ვისაც მკურნალობა გინდათ, აქეთკენ დადექით რიგში! — გამოაცხადა იორამმა და ხელით უჩვენა, საით უნდა მოწყობილიყვნენ.

სალომე იორამს დაეხმარა და მალამოებითა და დასა-
ლევით წამლებით სავსე თიხის ქილები დიდ ქვაზე დააწვეს.
ბუნგლო დიდ ქვასთან წამოწვა.

— დათვი არ დაგვეგლეჯავს? — იკითხა ვილაყამ.

— თუ თქვენ არაფერს დაუშავებთ, დათვი არ გერჩით! —
უპასუხა იორამმა.

ლეგიონერების უფროსი შორიდან ადევნებდა თვალს
მოვლენებს.

„მე ხომ მომატყუეს ამ ლაწირაკებმა, იესო ქრისტე არ
მისულა ზეთისხილის მთასთანო, გამაბრძოლებს და მთელი
რაზმით უკან გამაბრუნებს. ახლა ეს მაიმუნები ამდენ ხალხს
ასულელებენ, ვითომ მოგარჩინთო. მაგათ ვაჩვენებ სეირს,“ —
გაიფიქრა ათისთავმა.

იორამმა ავაღმყოფების მკურნალობა დაიწყო. სალომე
და ამონ-რა ეხმარებოდნენ მას.

ლეგიონერების უფროსმა ცოტახანს ითმინა, მერე ლეგი-
ონერს დაუძახა, რომელსაც დიდი ბიჭი ჰყავდა ჩაბარებული,
და უბრძანა:

— ეგეც იმათგანია, უთხარი, დათვი ცალკე გაიყოლოს,
თორემ შუბზე წამოვაცვამთ!

როცა დიდმა ბიჭმა ეს ბრძანება მოისმინა, კინალამ და-
ბლა დაეცა.

— შემჭამს, შემჭამს! — შევედრა უფროსს.

— შეგჭამს და ღირსიც იქნები! შეასრულე, რაც გიბრ-
ძანე!

ლეგიონერმა დიდ ბიჭს პანჩური ამოჰკრა და წინ გა-
იგდო.

— აბა, ჰა, მიდი დათვთან! იცოდე, ეს შუბი შენზე მაქვს
დამიზნებული!

სხვა ლეგიონერები ამ დროს ისე ეწყობოდნენ, რომ
როგორც კი დიდი ბიჭი დათვს მოატყუებდა, მაშინვე სცე-
მოდნენ მატყუარა მკურნალებს და დაეჭირათ. უფროსი კი
ემზადებოდა, რომ ხალხისთვის გამოეცხადებინა — მაწანწა-
ლები და მატყუარები არიან ესენიო.

დიდი ბიჭი მიწაზე იწვა და ფორთხვით უახლოვდებოდა
ბუნგლოს. „რა ვქნა, რა ვქნა, როგორ მოვიქცე?“ — უდულდა
ტვინი დიდ ბიჭს. უკან ლეგიონერს შუბი ჰქონდა მისთვის
გამზადებული, წინ — ბუნგლოს ხახა ელოდა.

ამონ-რამ შენიშნა, როგორ მიფორთხავდა დიდი ბიჭი ბუნგლოსკენ, ლეგიონერებიც დაინახა. მაგრამ ვიდრე რამეს მოიფიქრებდა, ბუნგლო წამოიძარტა და ორ ფეხზე დადგა. ოჰ, რამსიძალლე გახდა ბუნგლო! ლამის ხის კენწეროზე მჯდარ მახარობელს მისწვდებოდა.

— არ შეგეშინდეთ! — მიძართა ამონ-რამ ხალხს, — ბუნგლო თქვენ არაფერს გერჩით!

ამ დროს უფროსის ბრძანებით გაბრიყვებული ორი ლეგიონერი მოედნის ცენტრში გამოხტა და ამონ-რას შუბები მიუშვირა.

— დაჭერილი ხარ, გამოდი აქეთ! — შეუყვირა ერთმა.

ბუნგლომ საოცარი სისხარტე გამოიჩინა: ვერავენ დაინახა, როგორ მოხდა, რომ შუბები მიწაში ღრმად ჩარჭობილი აღმოჩნდა, ხოლო ლეგიონერები ისე მაღლა ისხდნენ ხეზე, რომ იქიდან მიწაზე დაბრუნება მათთვის ნეკნებისა და ფეხების მტვერევისთან იქნებოდა დაკავშირებული.

მაშინვე გამოხტა ცენტრში ოთხი ლეგიონერი და ოთხი შუბი მიუშვირა ბუნგლოს მუცელს.

ბუნგლომ თვალის დახამხამებაში ოთხივე შუბი იმ ორის გვერდით ჩაარჭო, ხოლო ლეგიონერებს ისე გაულაწუნა თათით ყბაში, რომ ისინი გულწასულნი დაეცნენ.

ამის მაყურებელი უფროსი გაცეცხლდა, მახვილი იშიშვლა და დარჩენილ ოთხ ლეგიონერს უბრძანა მიჰყოლოდნენ.

ხალხი გამხიარულდა. სანახაობა მეტად არაჩვეულებრივი იყო. ავადმყოფებსაც დაავიწყდათ თავიანთი უბედურება და სანახაობას თვალს არ აცილებდნენ.

— ყოჩაღ, ბუნგლო... მიდი, მიდი, ბუნგლო! — აქეზებდნენ ბუნგლოს, მაგრამ წაქეზება არ სჭირდებოდა. ბუნგლო თავის საქმეს აკეთებდა.

მახვილმომარჯვებული ლეგიონერები ნელ-ნელა მიიწვედნენ წინ და ბუნგლოს ალყაში იქცევდნენ. ბუნგლო ორფეხზე იდგა და წინა თათები მაღლა ჰქონდა ამვერილი. იდგა გაუნძრევლად და თვალეზახუჭული. უფროსმა თავისი ლეგიონერები ძალიან ახლოს მიიყვანა ბუნგლოსთან. სწრაფი ნახტომი და ხუთივე წვეტიან ორლესულ მახვილებს ბუნგლოს ხუთი მხრიდან გაუყრიდნენ მუცელში, ზურგში და გვერდებში. ხალხმა სული შეიგუბა — ბუნგლოს არაფერი ეგნოსო.

— ჰოპ! — დაიძახა უეცრად უფროსმა და ლეგიონერები მგლებივით გადახტნენ წინ მახვილების ჩასაცემად. და კიდევ ეგონათ, საქმე გააკეთეთო, რადგან ბუნგლო მაშინვე ზურგით მიწაზე დაეცა. მახვილები ჰაერში შეეჯახნენ ერთმანეთს. ვერც კი მოასწრეს ლეგიონერებმა გონს მოსულიყვნენ და გაეგოთ, რა ტყუილად ისკუპეს, რომ ბუნგლო მიწაზე ზურგით დატრიალდა, ხუთივეს ქვემოდან უკანა თათი ამოსცხო და ხუთი მახვილი ჰაერში აფრინდა. აბა, ვის შეეძლო ამოეხსნა ასეთი გამოცანა: როგორ მოხდა, რომ ჰაერში ავარდნილმა ხუთმა მახვილმა წვერი მიწისკენ იბრუნა, ბუნგლო კი დაბზრიალდა, ხუთივე ლეგიონერს უკანა თათი გამოჰკრა და მიწაზე გაშხლართა. მაშინვე წამოხტა, ორი ლეგიონერი ერთ ილლიაში ამოიჩარა, ორი მეორეში, მეხუთეს კი — უფროსს — მკერდზე თათი დაადგა და ამ მდგომარეობაში გახედა ხალხს.

ხალხი ხარხარებდა, ხარობდა, ტაშს უკრავდა.

— ბუნგლო, ბუნგლო, ბუნგლო! — გუგუნებდა ხალხი.

სალომე გარშემო ურბენდა ბუნგლოს და აღტაცებული კისკისებდა.

— ბუნგლო, მიყვარხარ, ბუნგლო! — გაიძახოდა სალომე. ბუნგლომ ლეგიონერები მიწაზე დასხა.

წაქცეული ააყენა.

ხეზე შემსხდარნი დაბლა ჩამოსხა.

იორამმა გულწასულ ლეგიონერებს რალაც მაღამო მოსცხო ცხვირში და ოთხივემ თვალი გაახილა.

დაბნეული, დაბეჭილი, დაბეგვილი და განიარაღებული ლეგიონერები თავიანთ უფროსთან ერთად მოედნის ცენტრში იდგნენ და არ იცოდნენ, რა ექნათ.

ამონ-რა უფროსს მიუახლოვდა. „ოჰ, შენი თავი ჩამადგებინა ხელში!“ — სიმწრით გაიფიქრა უფროსმა.

— წადი, წაიყვანე შენი ლეგიონერები! — უთხრა ამონ—რამ.

ლეგიონერებმა მიწაში ჩარჭობილ შუბებსა და მახვილებს მიმართეს. რამდენს არ ეწვალნენ, ვერცერთ მათგანს ძერა ვერ უყვეს. ახლა ამ სანახაობამ აცინა და გაამხიარულა ხალხი.

— მაგ შუბებსა და მახვილებს მიწიდან ვეღარ ამოაძრობთ! — უთხრა ამონ-რამ უფროსს, რომელიც არა და არ ეშვებოდა ტარამდე ჩარჭობილ თავის მახვილს.

უფროსი წელში გაიმართა და ლეგიონერებს ანიშნა — გამომყევითო.

და ვიდრე ლეგიონერები მოედნიდან გავიდოდნენ, ბუნგლომ კიდევ ერთი რამ ჩაიდინა: მიწაზე გართხმული და ხის ძირში მიშალული დიდი ბიჭი მაღლა აიტაცა და ლეგიონერების უფროსს კისერზე დაასვა. უფროსმა კბილები გააკრაჭუნა, კისრიდან დიდი ბიჭის ჩამოგდება მოინდომა, მაგრამ ვერ მოახერხა: შიშისაგან გაფითრებულმა და მოულოდნელობით გაოგნებულმა დიდმა ბიჭმა ორივე ხელი მაგრად შემოაჭლო უფროსს ყბებთან, ხოლო ფეხები მის მკერდზე გადაგრიხა. ლეგიონერებმა სცადეს დახმარებოდნენ უფროსს, მაგრამ დიდ ბიჭს ფეხები ვერა და ვერ გაუხსნეს.

უფროსი გაუბრაზდა თავის ლეგიონერებს, გალანძლა კიდევ, რატომ ეს ნაბიჭვარი ვერ მომაცლიეთო. მაგრამ მეტი გზა არ ჰქონდა, კისერზე შემჯდარი დიდი ბიჭით ძლივს გაარღვია ხალხის ღობე და თავისი მეომრებიც თან გაიყოლა.

— ვისაც მკურნალობა გინდათ, აქეთ დადექით! — ისევ გამოაცხადა იორამმა.

ხალხი დიდხანს ვერ დაწყნარდა. იორამი და მისი თანაშემწენი კი უკვე კურნავდნენ ავადმყოფებსა და დავრდომილებს.

მოსალამოვდა. ავადმყოფების რიგიც დაიღია.

— დროა დავამთავროთ! — თქვა ამონ-რამ.

სალომემ კალათაში ჩააწყო წამლები.

— მე და იორამი ილიასთან და იაკობთან წავალთ, — უთხრა მას ამონ-რამ.

— მე მტოვებთ? — შემფოთდა სალომე, — არ წამიყვანთ?

— შენ ხომ სკოლა გაქვს! მიატოვებ სკოლას? — უპასუხა ამონ-რამ.

— არა, სკოლას ვერ დავტოვებ... ბავშვებს ვერ ვუღალატებ...

— მაშინ შენ იცი, როგორ კარგად წაიყვან საქმეს ჩვენს მოსვლამდე.

— როდის დაბრუნდებით? — სალომემ მოიწყინა.

— არ ვიცი, მაგრამ ვგრძნობ, რომ აუცილებელია იქ წავიდეთ.

შემდეგ ამონ-რა ბუნგლოს მიუბრუნდა. მის ირგვლივ ბავშვები ხარობდნენ. მათ შეიყვარეს ბუნგლო და არც ეშინოდათ მისი: ვინ მუცელზე უღიტინებდა, ვინ — კოცნიდა, ვინ — დინგზე ხელს უსვამდა.

— ბუნგლო, შენ სალომე შინ მიაცილე. შემდეგ კი გამოქვაბულში დაბრუნდი! — უთხრა ამონ-რამ თავის ბანჯგვლიან მეგობარს, რომელმაც დღეს მთელი ქალაქი გაახარა, ლეგიონერებს კი საშინელი მოგონებანი გაატანა.

ბუნგლო მიწაზე დაწვა, რომ სალომე ზურგზე შეეჯდო-მოდა.

გოგონა ამონ-რას ჩაეხუტა და აცრემლდა.

— არ მინდა შენთან განშორება! ძალიან მიყვარხარ!

— მეც ძალიან მიყვარხარ! — უპასუხა ამონ-რამ და ლოყაზე აკოცა, — ახლა კი წადი სახლში, დედა გელოდება! სალომე ბუნგლოსთან მივიდა და მოეფერა.

— მიდიან, ჩვენ კი ვრჩებით, არა?

ბუნგლომ თავი დაუქნია — ასეაო.

— ადექი და წავიდეთ. მე არ შეგაჯდება...

ბუნგლო წამოდგა. ჯერ ამონ-რასა და იორამს ლოყები აულოკა, შემდეგ გამოემშვიდობა და ისე შეჭლრიალა, რომ მთელი ქალაქი შეიძრა, ბოლოს სალომესთან ერთად მოედანი დატოვა. ბავშვები უკან აედევნენ.

ამონ-რამ და იორამმა თვალით გააცვიფრეს სალომე, ბუნგლო და ბავშვები. მოედანი, რომელმაც სამუდამოდ შეინახა მენსიერებაში ეს საკვირველი დღე, დაცარიელდა. ბიჭებმა ერთმანეთს შეხედეს და გაიღიმეს.

„მაშ, წავიდეთ?“ — ჰკითხა ამონ-რამ იორამს აზრით.

„წავიდეთ!“ — აზრითვე უპასუხა იორამმა.



ყველამ იმედისა და სიყვარულის თითო ნაპერწკალი ესროლეთ

უკვე სამი თვე გავიდა, რაც ილიამ და იაკობმა იუსტინეს სასახლის მშენებლობას მოჰკიდეს ხელი. საქმე ჩქარა წავიდა წინ. მშენებლობას იაკობი ხელმძღვანელობდა, როგორც უცნობი ხუროთმოძღვარის წარმომადგენელი. ილია კი იაკობმა იუსტინეს ისე გააცნო, ვითომ მისი მოსამსახურე იყო. აბა რას იფიქრებდა დიდებული, რომ სწორედ ეს პატარა ბიჭი იყო უცნობი ხუროთმოძღვარიც და მშენებლობის ნამდვილი ხელმძღვანელიც. ის ყოველთვის გვერდით ახლდა იაკობს და უკარნახებდა, რა დავალებები მიეცა მუშებისათვის, როგორი მასალა შეერჩია მშენებლობისათვის, სად რა ზომები დაეჭირა.

საძირკველი მუშებმა ახალი ტექნიკით გათხარეს. ეს იყო რაღაც უცნაური მანქანა, ბორბლებიანი; ხარები მანქანას ეწეოდნენ, მანქანის რკინის ძვლები ბრუნავდნენ და საძირკვლის ზომაზე მიწას ჭრიდნენ. უკან მეორე მანქანა მოჰყვებოდა, მასაც ხარები ეწეოდნენ. მანქანას სათხრელები ჰქონდა მიმაგრებული, ისინიც ბრუნავდნენ, მოჭრილი მიწა მაღლა ამოჰქონდათ და გვერდით ყრიდნენ. დანარჩენს მუშები ხელით ამთავრებდნენ: ამოღებული მიწა სწრაფად გაჰქონდათ ხელის ურმებით და ქვიან მინდორს ასწორებდნენ. რომელი ხუროთმოძღვრები საძირკვლის გათხრას ერთ წელიწადს მაინც მოანდომებდნენ, იაკობმა და ილიამ კი ეს საქმე ორ თვეში დაასრულეს. ისეთივე მანქანით ამოთხარეს დიდი ტაფობი, რომელიც ტბად უნდა ქცეულიყო, გაიყვანეს არხი და მდინარე იორდანედან წყალი მიუშვეს. ტაფობი ორ თვეში გაივსო და მშვენიერი ტბა გაჩნდა; მასში გელებმა დაიწყეს სრიალი.

იუსტინე თავისი ამალით ხშირად აკითხავდა მშენებლობას და თვალებს არ უჯერებდა, როგორ სწრაფად კეთდებოდა ყველაფერი. იუსტინე გატაცებით აკვირდებოდა მშენებლებს, ოსტატებსა და ხელოსნებს და მათგან უცნობი ხუროთმოძღვრის გამოცნობას ცდილობდა. ხან ერთზე მიიტანდა ეჭვს,

ხან მეორეზე. ბოლოს თვალი იაკობს დაადგა: ნამდვილად თვითონვეა უცნობი და, თანაც, სახელთგანთქმული ხუროთ-მომღვარი, მე კი მეუბნება — წარმომადგენელი ვარო.

შუადღე იქნებოდა გადასული, როცა ამონ-რამ და იორამმა, ორდღიანი სიარულის შემდეგ, როგორც იქნა, მიაღწიეს იორდანეს ნაპირს, სადაც გახურებული მუშაობა მიმდინარეობდა.

იაკობი ამ დროს იუსტინეს მშენებლობას ათვალიერებინებდა და უხსნიდა, სად რა და როგორ კეთდებოდა. ილიამ, რომელიც იაკობის გვერდით იდგა, შორიდანვე შენიშნა ამონ-რა და იორამი და ისე გაუხარდა, რომ მიატოვა იუსტინეც და იაკობიც და მათკენ გაიქცა. იუსტინეს გაუკვირდა, როგორ თვითნებურად მოიქცა უცნობი ხუროთმომღერის მოსამსახურე ბიჭი და იკითხა:

— იაკობ, რატომ გაიქცა შენი მონა ნებადაურთველად?

— ბატონო, — თავაზიანად მიუგო იაკობმა, რომელმაც თავადაც შენიშნა ამონ-რა და იორამი, თავადაც სიხარულით გაიქცეოდა მათკენ, რომაელი დიდებულის წინაშე რომ არ მღვარიყო, — დიდი ხნის უნახავი ორი მეგობარი მოვიდა მასთან, შორი გზიდან მოვიდნენ ისინი.

— რატომ მოვიდნენ, რა უნდა გააკეთონ მაგ ბავშვებმა აქ? — ისევ იკითხა იუსტინემ.

— ბატონო, თუ თქვენი ნება იქნება, შესაფერისი სამუშაოთი დავასაქმებ!

— რა უნდა იყოს მაგათი შესაფერისი საქმე? — დაეჭვდა იუსტინე, მაგრამ ჩათვალა, რომ ოსტატმა თავისი საქმე თვითონ იცისო, და დაუმატა, — კეთილი, აშუშავე!

იუსტინე იმ დღეს ადრე წავიდა მშენებლობიდან. იაკობს გაგებულნი ჰქონდა, რომ იუსტინეს ცოლი ჰყავდა ავად, მეტად მძიმე მღვდომარეობაში, და ეჩქარებოდა მასთან დაბრუნება.

ილიამ და იაკობმა გაიხარეს ამონ-რასა და იორამის მოსვლით. მამამ შვილი გულში ჩაიკრა, ანას ამბავი გამოჰკითხა, სალომე როგორ არისო, ბუნგლო რას შერებაო. ბერი იცინეს ილიამ და იაკობმა, როცა მოისმინეს, რა დღე დააყარა ბუნგლომ დიდ ბიჭსა და გვარდიელებს. თავის მხრივ ილიამ და იაკობმა ბიჭებს მშენებლობა დაათვალიერებინეს, სათხრელი მანქანები უჩვენეს. უამბეს, როგორი კმაყოფილია იუსტინე.

როცა ტბას ათვალთვობდნენ და ქანდაკებებით შადრევნის შემკობაზე ლაპარაკობდნენ, იაკობთან შეშფოთებულმა მუშებმა მოიბრინეს.

— ბატონო, — ქოშინით შესძახა ერთმა, — ცუდი ამბავი მოხდა... ქვის მტვრეველის შვილს ფეხზე ქვა დაეცა და კვდება... ბატონო, იქნებ უშველოთ...

სასახლის მშენებლობაზე ერთდროულად ხუთასზე მეტი კაცი მუშაობდა. ისინი საქმეების მიხედვით იყვნენ დაყოფილნი ჯგუფებად. იაკობი ყველას კეთილად ეპყრობოდა, ზრუნავდა მათზე, ამიტომ მუშებსაც შეუყვარდათ თავიანთი უფროსი და როცა რამე უჭირდათ, მასთან გარბოდნენ საშველად.

იაკობი იცნობდა ამ ბიჭს, ცხრა თუ ათი წლის ცელქი და მოუსვენარ ფილიპეს. მამა სადაც კი წავიდოდა საშუაოდ, ბიჭიც თან დაჰყავდა. ან სად და ვისთან უნდა დაეტოვებინა, როცა არც სახლი ჰქონდა, არც ცოლი ჰყავდა და არც ახლობლობა. ფილიპე არ იყო მისი ნამდვილი შვილი. მონეტიალე კაცმა ჩვილი ბავშვი გზაზე იპოვა, კატის კნუტივით გადაგდებული. დედაც გახდა მისთვის და მამაც. ფილიპე ცელქი კი იყო, მაგრამ შრომაც უყვარდა და მამას ყოველთვის გვერდში ედგა, ნიჭიც გამოიჩინა და რამდენიმე ხელობა ისწავლა. მუშებს შორის ფილიპე ყველაზე პატარა იყო, ამიტომ დიდები ანებიერებდნენ მას, ის კი ხალხით ასრულებდა მათ დავალებებს.

იაკობი შეწუხდა.

— რა შეიძლება ვუშველოთ პატარა ბიჭს? — ჰკითხა ამონ-რასა და იორამს.

— წავიდეთ, ვნახოთ! — თქვა ამონ-რამ და ყველანი სირბილით გაჰყვნენ მუშებს.

ამონ-რასა და მის მეგობრებს საცოდავი სანახაობა დახვდათ: ბიჭს ფეხი მოტეხილი კი არა, მთლიანად დამსხვრეული ჰქონდა. ან რა დაემართებოდა სხვა, როცა მამის გაუფრთხილებლობის გამო მაღლიდან ჩამოვარდნილი ლოდი ბიჭს ბარძაყზე დაეცა. ფეხი დანაყილს ჰგავდა, მამა კი ბლაოდა, ხალხი იჭერდა, თორემ თავი ქვისთვის უნდოდა დაენთქებინა.

— მეც თან გამოგყვები იმქვეყნად, შვილო, მარტოს არ გაგიშვებ, ფილიპე... — მოსქვამდა გაუბედურებული კაცი.

— ვცადოთ! — გადაულაპარაკა ამონ-რამ იორამს.

იორამმა სწრაფად ამოიღო ჩანთიდან საჭირო მალამო, მაგრამ კარგად იცოდა, რომ ბიჭს მხოლოდ ძლიერი გულის ცეცხლი თუ მოარჩენდა.

სამუშაო დღე უკვე დასრულდა, ამიტომ ბევრი მუშა შეიკრიბა უბუდურების ადგილას. ხალხს ძალიან იმედი ჰქონდა, რომ იაკობი სასწრაფოდ რაღაცას მოიმოქმედებდა. ამიტომ ვერაინი მიხვდა, რატომ იდგა იგი დაჩოქილი ფილიპეს წინ და შეწუხებული დასცქეროდა ბიჭს, არც ხმას იღებდა და არც რამე განკარგულებას იძლეოდა. პატარა ბიჭები კი, რომლებიც მას მოჰყვნენ, რაღაც უცნაურად იქცეოდნენ.

იორამმა მალამო ორივე ხელის გულზე სქლად გადაისვა და ამონ-რას ხელებთან ერთად თავისი ხელებიც დამსხვრეულ ფეხს დააფარა.

— იორამ, მოიმარჯვე მთელი სიყვარული და თანაგრძნობა! — ჩუმად გადაულაპარაკა ამონ-რამ და რამდენიმე წუთის შემდეგ ორივემ სხვა სამყაროში გადაინაცვლა, ორივე ცისფერი ცეცხლის უსაზღვრო სივრცეში ჩაიძირა. სხვა არაფერი იყო ირგვლივ, გარდა ცისფერი ცეცხლის ენებისა.

— იაკობ, რას გამტერებულხარ, კაცო, შვილი მეღუპება, მიშველე რამე... — ღრიალებდა მამა.

მაგრამ იაკობს არ ესმოდა მამის მუდარა, ვერც ვერაინის ხედავდა ირგვლივ. დაჩოქილი და თვალებდახუჭული იაკობი თავისი გულის ცეცხლს უგზავნიდა პატარა ფილიპეს, ამონ-რასა და იორამის გულის ცეცხლს აძლიერებდა. ვერაინი ვერც მიხვდებოდა, თუ რა სიკეთე ხდებოდა ამ დროს.

ბოლოს ხალხმა იფიქრა, ალბათ, იაკობმა იგრძნო, რომ ფილიპე უკვე ცოცხალი აღარ არის, ბავშვს აღარაფერი ეშველება და ამიტომ ვეღარც ვერაფერს ამბობს და აკეთებსო.

თითქოს უიმედობის და განწირულობის ღრუბელი ჩამოწვაო, თითქოს მისგან გლოვისა და მწუხარების თავსხმამ დაუშვაო, თითქოს მიუსაფრობის შიშმა დაჰქროლაო — იფრქვეოდა და იფრქვეოდა აღამიანთა გულებიდან დამფრთხალი ფიქრების ნაფლეთები პატარა ბიჭის თავზე და ძალად იკვრებოდა, ცოტაც და ეს შეკუმშული ენერგია უხმო მეხვიით დაეცემოდა ბიჭს და გაიტაცებდა მის სულს. ამ დროს ილიამ, რომლის გულმა იგრძნო, რაც უნდა მომხდარიყო, და თვალებმა დაინახეს, როგორ ემზადებოდა საზეიმოდ ბნელი ძალა, სამარისებურ სიჩუმეში, როცა აღარც ბელს შეგუებული მამა

ბლაოდა — ყველას გასაგონად, მაგრამ ჩურჩულით, რომ ამონ-
რასა და იორამისთვის ხელი არ შეეშალა, ბრძანება გასცა:

— ადამიანებო, რა გემართებათ... გადაარჩინეთ ფილიპე!
ყველამ, ყველამ იმედისა და სიყვარულის თითო ნაპერწკალი
ესროლეთ! აბა, ჰა, ერთად... იმედისა და სიყვარულის
ნაპერწკალი... კიდევ... კიდევ... კიდევ...

და იმავე წამს ფილიპეს თავზე შეკრულ შავ ძალას პა-
წაწკინებულა ნათელი ცეცხლოვანი ისრები შეესია. შავმა
ღრუბელმა გაიბრძოლა, ფილიპესკენ გაიწია, მაგრამ პაწაწ-
კინებულა ნაპერწკლების გუნდმა არ დაანება, ცისფერ ალად
იქცა, ბურთად შეიკუმშა, შავ ღრუბელში შეიჭრა და აფეთ-
ქდა. შავი ძალა ნაფლეთებად იქცა და გაიფანტა. მის ადგი-
ლას ისევ ცეცხლოვანი ბურთი გაჩნდა. იგი მიუახლოვდა
ბიჭს, წამით მის თავზე შეითამაშა. შემდეგ მის სხეულში ჩა-
იშალა. ამ ბრძოლის მოწმე მხოლოდ ილია იყო, მხოლოდ ის
ხედავდა, რა ემართებოდა შავ ძალას, ხალხი კი ორიოდ წუ-
თის შემდეგ საოცრების მოწმე გახდა: ფილიპემ თვალები გა-
ახილა და ცელქი და მოუსვენარი ბიჭის ხმით იკითხა:

— მამა, რა მოხდა? გადავრჩი?

და თითქოს ელვამ გაჰკვესაო, ერთმა საერთო სიხა-
რულმა გაანათა უეცრად იქაურობა; თითქოს საზეიმო ზარმა
ჩამოჰკრაო, ისე აძგერდნენ ადამიანთა გულები.

მამამ უცბად ვერ გაიგო, რა მოხდა, ეგონა, შვილის ხმა
მომჩვენაო. მაგრამ როცა ფილიპე თვალებგახელილი და გა-
ღიმებული დაინახა, თითქოს გული ამოუხტა მაღლა სიხარუ-
ლისგანო, ისე შესძახა:

— შვილო! შენ შემოგვევლოს მამაშენი! გამოცოცხლდი,
შვილო? — ფილიპესთან მიიჭრა, ამონ-რასა და იორამს ხელი
ჰკრა — გაიწიეთო, და შვილს ჩაეკონა.

— გადაარჩი, ფილიპე, გადაარჩი, შვილო! რაკი ცოცხალი
ხარ, ერთი ფეხი მაგის სანაცვლო იყოს!..

პირველი ამონ-რა გამოერკვა, შემდეგ იორამმა და
იაკობმა გაახილეს თვალები. სამივეს მოწყვეტილი ჰქონდა
წელი და ფეხებზე თითქოს დამბლა დაეცათო. საშინელ ტკი-
ვილებს გრძნობდნენ. სცადეს წამოდგომა, მაგრამ ვერ შეძ-
ლეს. არავის მოსულია აზრად მიხმარებოდნენ, რადგან წარ-
მოდგენაც არ ჰქონდათ, რა მოხდა ან რა დღეში იყვნენ იაკო-
ბი და ორი ბიჭი, რომლებმაც, რატომღაც, ხელები დააფარეს

ფილიპეს ფეხზე. იორამს ხელისგულები მთლად გამოშრალი ჰქონდა, ზედ მაღამოს ნასახიც არ იყო შერჩენილი.

— მამა, ქვა დამეცა ფეხზე, არა? — იკითხა ფილიპემ.

— ჰო, შვილო, ჩემი ბრალი იყო, მე გადმოვაგდე ქვა მაღლიდან... ღმერთმა გვიშველა, რომ თავზე არ დაგეცა... ფეხი... ერთი ფეხი... რას იზამ, შვილო...

— რას მეუბნები, მამა, ფეხი აღარა მაქვს? — ჰკითხა ფილიპემ გაოცებით. მის ხმაში სულაც არ იგრძნობოდა, რომ რამე ტკივილი აწუნებდა.

— ჰო, შვილო, აი, ერთი ფეხი... — შესტირა მამამ.

— არ უნდა მტკიოდეს, მამი? რატომ არ მტკივა ფეხი?

ზოგს გაუკვირდა: ეს ბიჭი რას ამბობს, როგორ თუ არ სტკივა ფეხიო, ზოგმა კი გაიფიქრა: საწყალი, ველარც ტკივილს გრძნობსო. ყველას ეცოდებოდა ცელქი და ხალისიანი ფილიპე, რომელსაც დღეის ამის იქით მხოლოდ ყავარჯნებით უნდა ევლო.

იაკობი და იორამი, როგორც იქნა, ერთმანეთის დახმარებით წამოდგნენ, ილია ამონ-რას დაეხმარა.

— იაკობ, — ჩუმად ჰკითხა ახლომდგომმა ოსტატმა, — მაგ ბაღს აღარაფერი ეშველება?

იაკობმა ამონ-რასა და იორამს შეხედა: რა ვუპასუხო.

— წყალი მოიტანეთ და მობანეთ ფეხი! — უპასუხა ამონ-რამ იაკობის ნაცვლად.

ოსტატმა და სხვებმაც, ვინც ახლო იდგა, გაიკვირვა: ეს ბავშვი ვინ არის და რატომ გვარიგებს ჭკუასო, მაგრამ იაკობმაც გაიმეორა:

— სწორს გეუბნებიან, მოიტანეთ და მობანეთ ბიჭს ფეხი!

წყალი სწრაფად გააჩინეს და დიდი სიფრთხილით დაუწყეს ფილიპეს ფეხზე სისხლისა და ჭუჭყის ჩამობანა. თან განუწყვეტლივ ეკითხებოდნენ: ზომ არ გატკინეთო. ფილიპე არც კენესოდა და არც ტიროდა, არაო, ამბობდა, მსიამოვნებს კიდევო, და მოუთმენლად ელოდებოდა ენახა, რა დღეში ჰქონდა ფეხი.

ფეხი ნელ-ნელა გამოჩნდა.

არც დაჟეჟილობა, არც მოტეხილობა, არც ნაკაწრი.

მთელი და უვნებელი ფეხი!

ახლო მაყურებლებს, რომლებიც საშინელ სანახაობას ელოდნენ, თვალები გაუდიდდათ. მამამ კი გულუბრყვილოდ და სიხარულით წამოიძახა:

— შეილო, ლოდი არც დაგცემია ფეხზე... ალბათ, ხმამ შეგაშინა და იმიტომ წაგივიდა გული... ლოდი აგცდენია, შეილო...

ფილიპეც გაკვირებული იყო. ბიჭს კარგად ახსოვდა, რაც მოხდა: თავისთვის გულადმა წამოწოლილი იყო მიწაზე და მალლა ხარაჩოებზე მამის საქმიანობას ადევნებდა თვალს. მამამ ხარაჩოებზე ლოდის გადაადგილება სცადა, მაგრამ უხერხულად გამოუვიდა და ლოდი შხუილით დაეშვა დაბლა. ფილიპემ ლოდს მაშინ მოჰკრა თვალი, როცა ის უკვე დაეცა ბარძაყში და გულიც წაუვიდა. აი, ლოდიც აქვე გდია. თუ ლოდი არ დაეცა, მაშ, რატომ ჰქონდა ფეხი სისხლითა და ჭუჭყლით დაფარული? საიდან გამოუვიდა ამდენი სისხლი? რატომ არ ჩანს ჭრილობის ნაკვალევი?

ხალხმაც უთავბოლო ლაპარაკი დაიწყო. ყველაფერს ამბობდნენ. იმასაც, რომ ლოდი არც ჩამოვარდნილა ხარაჩოებიდან, ის დაბლა ეგდო და ბიჭმა, ალბათ, ფეხი წამოჰკრა და წაიქცაო; იმასაც, რომ ფილიპე ცელქი ბიჭია და გაგვათამაშაო; იმასაც, რომ ლოდი მართლაც დაეცა ბიჭს ფეხზე, მაგრამაც დაუღეწა, — ჩვენი თვალით ვნახეთ, — მაგრამ სასწაული მოხდა და გაუმთელდაო.

ფილიპემ დაეჭვებით მოისინჯა ფეხი.

— მამა, მაშ შენ გგონია, რომ ფეხი აღარა მაქვს და ვეღარ გავივლი? აბა ვცადო!

ფილიპე ფეხზე წამოდგა, ჯერ გაირ-გამოიარა, შემდეგ შეხტა და გადახტა, რითაც ყველა გაახარა, და გულიანად გაიცინა.

ამონ-რამ, იორამმა და იაკობმა, მიუხედავად ძლიერი ტკივილებისა, — თითქოს ფეხებში ათასი ეკალი ერთბაშად შერჭობოდეს ან ათას კოლოს ერთბაშად დაეკბინოს, — იქაურობას ისე გააღწიეს თავი, რომ მათთვის არავის მიუქცევია ყურადღება და ვერც ვერავინ ხვდებოდა, რომ სწორედ მათ აღუდგინეს ფილიპეს ფეხი, სამაგიეროდ თან გაიყოლეს ყველა მისი ტკივილი. ილიამ იცოდა, რა დღეში იყვნენ ისინი, ამიტომ ხან ერთს ამოუდგებოდა მხარში და ხან მეორეს.

ყველას მოექეცი ისე, როგორც გინდა, რომ შენ მოგექცნენ

მშენებლობაზე ბევრი მუშა ცოლ-შვილით იყო მოსული. იაკობმა ქალებს მათთვის შესაფერისი სამუშაო მიუჩინა. ბავშვები კი შშობლებს ეხმარებოდნენ. მაგრამ იაკობმა ბავშვებისთვის ისეთი რამ მოიმოქმედა, რასაც არავინ არცერთ მშენებლობაზე არ მოსწრებია: ოცდაათამდე ბავშვს სკოლა გაუხსნა და სწავლა დააწყებინა. იაკობი ახერხებდა ყოველდღიურად, განსაკუთრებით საღამოობით, ერთი-ორი საათი ბავშვებთან ყოფილიყო. ასწავლიდა მათ კითხვას, ესაუბრებოდა სამყაროსა და ვარსკვლავებზე, სულის უკვდავებასა და ცათა სასუფეველზე, რაც ამონ-რასაგან ჰქონდა მოსმენილი, ესაუბრებოდა იესო ქრისტეზე – ღმერთზე, რომელიც ადამიანებთან მოვიდა. იაკობს ილიაც ეხმარებოდა, მან ბავშვებს მათემატიკა და გეომეტრია შეაყვარა.

ამ საქმეში ამონ-რა და იორამიც ჩაებნენ.

ამონ-რამ ბავშვებს გააგებინა, რომ სამყარო უსასრულოა, რომ ადამიანი სამყაროს შვილია, რომ აზრი სამყაროს ცეცხლია და რომ ადამიანი პასუხისმგებელია თავისი აზრების გამო. ამონ-რა ბავშვებს ასწავლიდა ლამაზად, სიყვარულით, ამაღლებულად, გმირულად აზროვნებას. განუმარტავდა იესოს მცნებებს და უყვებოდა იესოს იგავებს. ბავშვებს ძალიან მოეწონათ ამონ-რას საუბრები, შეუყვარდათ იგი და ყველას უნდოდა მასთან მეგობრობა.

იორამმაც ბავშვების ღიდი სიყვარული დაიმსახურა. მან ბავშვებს შეასწავლა ავაღმყოფის მოვლა, გაჭირვებაში ჩავარდნილის დახმარება. ასწავლა აგრეთვე ზოგიერთი ბალანჩის გამოყენება ამა თუ იმ ავაღმყოფობის სამკურნალოდ.

იაკობის სკოლაში ფილიპეც დადიოდა.

როცა ამონ-რამ თავის საუბრებში ბავშვებთან იესო ქრისტე ახსენა, ფილიპემ ყურები ცქეიტა.

– მამაჩემისაგან მაქვს გაგებულნი, რომ იესო მესიაა, ღმერთის შვილია და დედამიწაზე მოვიდა, რომ ადამიანები დალუპვისგან იხსნას! – უთხრა ამონ-რას.

ბავშვები რასაც სკოლაში ისმენდნენ და სწავლობდნენ, მშობლებსაც უამბობდნენ. ამიტომ ისე გამოდიოდა, რომ ბავშვებისთვის გახსნილ სკოლას დიდებშიც შეჰქონდა განათლება.

ფილიპემაც უამბო თავის მამას, რა თქვა ამონ-რამ იესო ქრისტეზე. მამამ კი მეორე დღეს თავის სამუშაო ჯგუფში გაერთიანებულ მუშებს უთხრა:

— ამ ბიჭს, რომელიც ჩვენს ბავშვებს ასწავლის, იესო ქრისტე უნახავს და მისი ქადაგებისთვის მოუსმენია. მოდით დაეუძახოთ და ჩვენც მოგვიყვეს, ვინ არის იესო, მართლა მესიაა თუ ვინმე ცრუ!

მუშებმა ეს აზრი მოიწონეს. ბევრს ჰქონდა გაგებული იესო ქრისტეზე — ვინ რა იცოდა და ვინ რა. საერთო ჯამში კი გამოდიოდა, რომ იესო ქრისტე დედაშიწაზე მოსული ღმერთია, ისრაელის მეფე დასაჭერად დასდევს, რადგან იესო ტახტის წართმევას უპირებს, ფარისევლები და მედავითნეები, მღვდელმთავრები და მათი მიმდევრები გაბრაზებულები არიან ქრისტეზე — როგორ ბედავს და თავს ღმერთის შვილად აცხადებს, და ისინიც დასაჭერად დასდევენ. რიგიანად არავინ არაფერი იცოდა. გაუგზავნეს მუშებმა ამონ-რას კაცი და შეუთვალეს: მოდი და იესო ქრისტეზე გველაპარაკეო.

ამონ-რა მუშებს სამუშაო დღის ბოლოს ეწვია.

ნაჯაფარი ხალხი ერთი ქოხის წინ შეიკრიბა. აქ იყვნენ სხვადასხვა ქვეყნისა და რჯულის ადამიანები: იუდეველები და ბერძნები, რომაელები და პართელები, ეგვიპტელები და არამეები, იბერიელები და სომხები. ეს იყო ხალხი, რომელიც ან გაჭირვების გამო დადიოდა ქვეყნიდან ქვეყანაში და სამუშაოს დაეძებდა, ან მოგზაურობის ჟინმა გადაკარგა თავისი სამშობლოდან, ან ბედის უკუღმართობამ აურია გზაკვალი. მათ შორის რამდენიმე საგანგებოდ იყო მოწვეული, როგორც ამა თუ იმ საქმის საუკეთესო ოსტატი.

შეკრებილნი მიწაზე ნახევარწრიულად დასხდნენ და წინ ამონ-რა დასვეს. უცხოელები, რომლებმაც ენა არ იცოდნენ, იუდეელების გვერდით მოთავსდნენ, რომ მათ, რამდენადაც შეეძლოთ, ეთარგმნათ და გაეგებინებინათ, რასაც ამონ-რა იტყოდა.

ამონ-რამ მშვიდად და რწმენით დაიწყო იესო ქრისტეზე საუბარი.

მსმენელები თანდათან იხიბლებოდნენ. ამონ-რამ მათ წინაშე იესო ქრისტეს ცოცხალი სახე წარმოადგინა. ახალი მთვარის შუქით მკრთალად განათებული ქოხის წინ შეკრებილი ადამიანები თითქოსდა თავად იესოს შესცქეროდნენ და უსმენდნენ, და არა ცხრა წლის ბიჭს.

ადამიანები ისმენდნენ მამა ღმერთზე, სულიწმიდაზე და კაცის ძეზე, უფლის სასუფეველზე, უფლის სასუფეველისკენ მიმავალ ვიწრო გზასა და ვიწრო კარიბჭეზე, დაღუპვისაკენ მიმავალ ფართო გზასა და ფართო კარიბჭეზე, იესო ქრისტეს მცნებებზე, სასწაულებზე, ავადმყოფთა განკურნებაზეც.

ვერც შენიშნეს, რომ შუალაშე ახლოვდებოდა და ხვალ მთელი დღის სამუშაო ელოდათ.

როცა ამონ-რამ დაასრულა საუბარი, სთხოვეს კვლავაც გაეგრძელებინა და სხვა რამეებიც ეთქვა.

მუშები ერთმანეთს უზიარებდნენ შთაბეჭდილებებს. აღმოჩნდა, რომ ყველამ ყველაფერი თარგმნის გარეშეც კარგად გაიგო.

— ეს ბიჭი მშვენიერად ლაპარაკობდა ბერძნულად! — თქვა ბერძენმა ოსტატმა, მაგრამ მას მაშინვე მეორე, შემდეგ მესამე და მეოთხეც გამოეპასუხა:

— როგორ თუ ბერძნულად? ის მხოლოდ არაბულად ლაპარაკობდა!

— რას ამბობთ, მე ყველაფერი რომაულად მესმოდა!

— სომხურად კი ნამდვილად ლაპარაკობდა!

— და კოლხურად არა?

და ადამიანებმა პირი დააღეს: გამოირკვა, რომ ყველას თავის ენაზე ესმოდა ამონ-რას ხმა და ველარ მიხვდნენ — ბოლოს და ბოლოს, რა ენაზე ლაპარაკობდა იგი. რადგან ამონ-რა იქვე იყო, მას მიადგნენ და ჰკითხეს:

— ბიჭო, განა შენ ბერძნულად არ ლაპარაკობდი?

— განა არაბულად არ ლაპარაკობდი?

— მე არამეულად მესმოდა ყველაფერი. ასე არ იყო?

ამონ-რა გაოცდა: ეს რას მეკითხებიანო. მას ვერც წარმოედგინა, რომ ყველა თავის ენაზე მოისმენდა მის ხმას და მთელი საუბრის შინაარსს. ის თავის არამეულ ენაზე ლაპარაკობდა, მაგრამ როგორ მოხდა, რომ ბერძენს მისი საუბარი ბერძნულად ჩაესმა, იბერიელს — იბერიულად, სომეხს — სომხურად, ეგვიპტელს — ეგვიპტურად, რომაელს —

რომაულად? ან ის როგორღა ხდება, რომ თვითონაც ყველასგან ყველაფერი ესმის, თუმცა ადამიანები, როგორც ჩანს, თავთავის ენაზე ელაპარაკებიან? რა ენაზე დაპარაკობს ამონ-რა, რომ ყველას გაეგება მისი?

— მე ჩემს ენაზე ვლაპარაკობდი, — უპასუხა ამონ-რამ, — ახლაც ჩემს ენაზე ვლაპარაკობ. თქვენ რაღა ენაზე მელაპარაკებით?

— როგორ თუ რა ენაზე?! — გაიკვირვა არაბმა მუშამ, — არაბულ ენაზე! განა არ იცი, რომ შენც არაბულ ენაზე მპასუხობ, ჩემს ენაზე?

ამას დიდხანს იკვლევდნენ და შედეგით გაოგნებულები დარჩნენ. გამოირკვა, რომ თუმცა ამონ-რა თავის არამეულ ენაზე ლაპარაკობს, მისი ხმა ყურში ყველას თავთავის ენაზე ჩაესმის, ხოლო რა ენაზეც არ უნდა მიმართონ ამონ-რას, ის ყველაფერს მაშინვე იგებს.

— როგორ ხდება, კაცო, ეს?! — გაიძახოდა ერთი ეგვიპტელი ოსტატი, გაკვირვებულ-გაოგნებული, — რატომ ჩვენ ვერ ვიგებთ ერთმანეთის ენას? ეს ბიჭი კი ყველას ენას იგებს და ჩვენც ყველას მაგისი გვესმის?

— ამას ღმერთი აკეთებს, ღმერთი! ეგ ბიჭი კი ღვთის შვილია! ამიტომ ხდება ასე! — თქვა ბერძენმა ხელოსანმა და ბევრი დაეთანხმა მას.

მეორე დღეს მშენებლობაზე ყველამ გაიგო, რომ აქ ერთი პატარა ბიჭია, რომელმაც იესო ქრისტეზე ყველაფერი იცის და ყველა ენაზე ლაპარაკობსო. სხვებმაც მოისურვეს ამონ-რასთვის მოესმინათ. მაშინ იაკობმა უკეთესი ადგილი გამოიხატა საუბრებისთვის — ტბის პირას, შემალლებულ ბორცვზე, და ერთი კვირის განმავლობაში მუშებსაც ორი საათით ადრე ამთავრებინებდა საქმეს. მსურველი სამასამდე კაცი აღმოჩნდა. ამონ-რა მონღომებით, ხალისით, გატაცებით უამბობდა მათ იესო ქრისტესა და მის მცნებებზე, უყვებოდა და განუმარტავდა იესო ქრისტეს იგავენს. გარდა ამისა, იორამთან ერთად კიდევ კურნავდა იმათ, ვისაც რამე სტკიოდა და აწუხებდა.

მუშები მეტად წაახალისა იესო ქრისტეს აზრებმა. ამონ-რასა და იორამის სამკურნალო მოღვაწეობამაც კეთილად იმოქმედა მათ შრომაზე და სასახლის მშენებლობის საქმე კიდევ უფრო სწრაფად წავიდა წინ.

ამონ-რას განუწყვეტლივ ეხვეოდნენ ირგვლივ ღიღებიც და პატარებიც, ქალებიც და კაცებიც. ყველას უნდოდა მასთან საუბარი, თავისთვის რაღაცის გარკვევა.

ბავშვებისთვის კი ზეიმი იყო ამონ-რასთან ყოფნა და თამაში. ამონ-რა ესაუბრებოდა მათ ვარსკვლავებსა და შორეულ სამყაროებზე, ადამიანთა ღიღ მასწავლებლებზე, ასწავლიდა მათ ლამაზად და კეთილად ფიქრს, აფრთხილებდა, რომ ცუდი აზრები, აუგი განზრახვები თქვენვე დაგობრუნდებოდათ უკან და დაისჯებითო. „ყველას მოექეცი ისე, როგორც გინდა, რომ შენ მოგექცნენ,“ — ჩააგონებდა. თამაშობანი კი ისეთი იყო, რომ ბავშვებს უნდა გამოეჩინათ სიმამაცე და გამძლეობა, ყურადღება და ერთგულება. მუშები იღლებოდნენ, მაგრამ ამონ-რასთან განშორება არ უნდოდათ.

ერთ დღეს ამონ-რასა და იორამთან ფილიპე მივიდა.

— მე ვიცი, ვინც მომირჩინა ფეხი! — უთხრა ბიჭებს, — ეს თქვენ იყავით, ორნი, ხომ ასეა?

ამონ-რამ და იორამმა გაიღიმეს და არაფერი უპასუხეს.

— მე ვიცი, ჩემი ფეხის მორჩენა შეუძლებელი იყო, ტკივილებისაგან ვკვდებოდი. ამ დროს გონდაკარგულმა ორი ანგელოზი დავინახე, მეფერებოდნენ და შეალერსებოდნენ, ადრეა შენი სიკვდილიო, ერთმა ასე მითხრა. ტკივილები გამიქრა, და როცა თვალი გავახილე, თქვენ დავინახეთ, თავს მეღექით და რაღაცას აკეთებდით. მაშინ ვერ მივხვდი, ახლა კი, როცა ვნახე, როგორ კურნავთ ადამიანებს, ნამდვილად ვიცი, ის ანგელოზებიც თქვენ იყავით და თქვენ გადაამარჩინეთ. ხომ ასეა? რატომ არ მიპასუხებთ? — აშკარა იყო, რომ ფილიპე არ მოეშვებოდა მათ, ვიდრე პასუხს არ გაიგებდა.

— მთავარია, რომ შენ კარგად ხარ და დარბიხარ, თამაშობ და ცელქობ, მუშაობ და კიდევ სწავლობ! — უპასუხა იორამმა.

მაგრამ ფილიპე ამით არ დაკმაყოფილდა.

— მე ვიცი, რა იქნება მთავარი, — თქვა მან და ამონ-რას მიუბრუნდა, — მთავარი ის იქნება, თუ მეც თქვენი გავხდები. თქვენ ერთნი ხართ — იაკობი, ილია, იორამი, ამონ-რა. მეც თქვენთან მინდა ვიყო. ყველაფერში დაგიჯეროთ, ოღონდ ბევრი მასწავლეთ, ათასჯერ უფრო მეტი, რასაც იაკობის სკოლაში ასწავლით!

ფილიპე ალაღად, გულწრფელად ეხვეწებოდა ამონ-რას — მოწაფედ ამიყვანეო. და როცა ამონ-რამ უთხრა — კარგი, მიგიღებთო, — გაიხარა და რა გაიხარა: შეხტა, შეკუნტრუნდა, ამონ-რას მუხლებზე მოეხვია, იორამს ხელზე აკოცა.

— თქვენი ვარ... თქვენი ვარ... მეც ვნახავ იესო ქრისტეს, იქნებ მეც მაკურთხოს... აი, ნახავთ, როგორი ერთ-გული ვიქნები... — გაიძახოდა ფილიპე.



თქვენი მეუღლე მორჩება, მე კი ოქრო არ მჭირდება

ერთი თვის შემდეგ ისევ გამოჩნდა იუსტინე თავისი ამალით.

— აბა, როგორ არის საქმე? — ჰკითხა იაკობს.

— ბატონო, — მიუგო იაკობმა, — თქვენ ხელთ გაქვთ მშენებლობის გეგმა. ყველაფერი გეგმის მიხედვით სრულდება! იაკობმა, ილიასთან ერთად, იუსტინეს უჩვენა, სად რა და როგორ გაკეთდა. იუსტინემ კმაყოფილება გამოთქვა საქმის მსვლელობის გამო. მაგრამ აშკარად ჩანდა, რომ იგი სხვა რამესაც ეძებდა. მუშებს შორის მას თავისი მსტოვრებიც ჰყავდა, ისინი ყველაფერს ფარულად ადევნებდნენ თვალყურს და თუ რამ საეჭვოს შენიშნავდნენ, დაუყოვნებლივ აცნობებდნენ ხოლმე. იუსტინემ უკვე იცოდა, რომ ახლად-მოსულმა ორმა ბიჭმა მუშებს შორის რაღაც რელიგია შემოიტანეს. მას იესო ქრისტეს სახელი გაგებული ჰქონდა, თუმცა არაფერი იცოდა იმაზე, თუ რას ქადაგებდა ახალი მესია. მსტოვრებმა მის ყურამდე მიიტანეს იუდეველი ფარისევლებისა და მეღავითნეების აზრი, რომ იესო ქრისტე ცრუ მესიაა, ეს უმწიფარი ბიჭები კი ხალხს აბრიყვებენ და სისულელეებს უყვებიან. ამიტომ ურჩევდნენ მას გაეძევიანა ეს ბიჭები მშენებლობიდან და ისინიც მიეყოლებინა, ვინც მათ თანაუგრძნობდა. იუსტინეს ისიც შეატყობინეს, რომ უცნობი არქიტექტორის წარმომადგენელი, რომელიც მშენებლობას ხელმძღვანელობს, ამ გზააბნეული ბიჭების დიდი მფარველია და ეხმარება მათ იესოს სახარების ქადაგებაში.

ყველაფერმა ამან იუსტინე მეტად ჩააფიქრა. იცოდა, რომ იაკობის შემცვლელს ვერ მონახავდა. იუსტინეს მხოლოდ სასახლის გეგმა ჰქონდა, მშენებლობის საიდუმლო კი იაკობის ხელთ იყო: როგორ, რა საშუალებითა და ტექნიკით დააჩქარებდა სასახლის მშენებლობას, როგორ მოაწყობდა შადრევნებს, რა გზებით მოარუქურთმებდა სასახლის კედლებს. იუსტინე იმითაც იყო გაკვირვებული, რომ ხუთასზე მეტი მუშა იაკობის ხელმძღვანელობით ასე შეწყობილად

შრომობდა. კაცმა რომ თქვას, იუსტინეს ძალიან სჯეროდა იაკობის და დიდი ნდობით ეპყრობოდა მას. არც ახალი მესიის შესახებ მითქმა-მოთქმა აწუხებდა იუსტინეს. რა ესაქმებოდა მას, რომაელ დიდებულს, რომელიც იუდეის ერთ-ერთი პროვინციის მმართველად იყო დანიშნული, ვილაც მესიასთან. მას მხოლოდ ის უნდოდა, რომ იუდეველ ფარისევლებთან და მღვდელმთავრებთან ურთიერთობა არ დარღვეოდა, ისინი თავის საწინააღმდეგოდ არ განეწყო.

გარდა ამისა, იუსტინეს კიდევ ერთი რამის გარკვევა სურდა.

— მართალია, რომ ვინმე ამონ-რა, პატარა ბიჭი, აქ ვილაც მესიის სახარებას ქადაგებს? — ჰკითხა იაკობს.

— მართალია, ბატონო! — გულწრფელად უპასუხა იაკობმა.

— მერე, რატომ მიეცი ამის ნება? — მწყრალად და გაკვირვებით ჰკითხა იუსტინემ.

— იმიტომ, ბატონო, რომ ქრისტეს სახარებამ ეს ხალხი უფრო პატიოსანი, საქმის ერთგული და შრომისმოყვარე გახადა. განა არ შენიშნეთ, რომ დაჩქარდა მშენებლობა? — მშვიდად უპასუხა იაკობმა.

„ეს კი მართალია,“ — გაიფიქრა იუსტინემ.

— მერე, რას უქადაგებს ვე ბიჭი ხალხს, რას ამბობს ქრისტეო?

— ბატონო, მაგას ამონ-რაზე უკეთესად მე ვერ მოგახსენებთ! — უპასუხა იაკობმა.

— ეს მითხარი, მაგ ბიჭს მართლა შეუძლია მკურნალობა? — ეს იყო, რაც იუსტინეს განსაკუთრებით აინტერესებდა.

იუსტინეს უმშვენიერესი და სათნო მეუღლე — ავგუსტა უკანასკნელ დღეებს ითვლიდა. მკურნალებმა ვერაფერი უშველეს. სისხლიც გამოუღეს, ნაირ-ნაირი ბალახების ნახარშებიც დაალევინეს, ტანიც დაუზილეს, მოკლედ, გააკეთეს ყველაფერი, რაც შეეძლოთ, მაგრამ უშედეგოდ. მკურნალები კი სახელგანთქმულნი იყვნენ. სამი დღის წინ მათ იუსტინეს გამოუცხადეს: ჩვენთვის ეს ავადმყოფობა უცნობია, ამიტომ ვერ ვუშველით თქვენს მეუღლესო. და როცა იუსტინემ ჰკითხა, რას მირჩევთო, მათ უპასუხეს: ღმერთს შეევედრეთ, იქნებ სასწაული მოხდესო.

და აი ამ დროს მსტოვრებმა იუსტინეს აცნობეს, რომ ეს ბიჭი ავაღმყოფებს კურნავსო და რამდენიმე მაგალითიც დაუსახელეს.

იუსტინეს სასწაულებისა არ სჯეროდა. „ჩემს უსაყვარლეს ავგუსტას ვერავინ მომირჩენსო,“ — ფიქრობდა გულში. მიუხედავად ამისა მაინც გადაწყვიტა ეს ბიჭი, ანუ ამონ-რა, როგორც მას ეძახოდნენ, თან წაეყვანა და ავგუსტას გართობა და ვითომ მკურნალობაც დაევალებინა. „დაე უამბოს ავგუსტას იესო ქრისტეზე, გულს გადააყოლებსო,“ — ფიქრობდა იუსტინე.

— ეგ ბიჭი თუ მართლა მკურნალია, თან გავიყოლებ! — ბრძანა იუსტინემ.

— ბატონო, — მოახსენა იაკობმა, — ამ რამდენიმე დღის წინ ამონ-რამ სასწაული მოახდინა — დამბლადაცემულ ოსტატს ძალა დაუბრუნა... — იაკობი კიდევ აპირებდა სხვებზეც ეთქვა, მაგრამ იუსტინემ გააწყვეტინა.

— მომგვარე ეგ ამონ-რა!

ცოტა ხანში ამონ-რა მის წინაშე იდგა.

იუსტინეს მოეწონა ბიჭი, ლამაზი და კეთილი სახის, ნათელი და ჭკვიანი გამომეტყველებით.

— ბიჭო, შენ არჩენ დამბლადაცემულებს? — ჰკითხა იუსტინემ.

ამონ-რამ არაფერი უპასუხა.

— მითხარი, როგორ განკურნე დამბლადაცემული? — ისევ ჰკითხა იუსტინემ.

— დამბლადაცემული ღმერთმა განკურნა! — მიუგო ამონ-რამ.

— კარგი, ასე იყოს. მაგრამ თუ შენ მეუღლეს მომირჩენ, შენს წონა ოქროს მოგცემ!

— თქვენი მეუღლე მორჩება, — მიუგო ამონ-რამ მშვიდად, — მე კი ოქრო არ მჭირდება.

— რა იცი, რომ მორჩება? — გაიკვირვა იუსტინემ.

— ვიცი. ღმერთის ნებაა ეს! — უპასუხა ამონ-რამ.

„ალბათ, ბავშვური მიაშიტობით ლაპარაკობს ასე, არ იცის, რას ამბობს,“ — გაიფიქრა იუსტინემ.

— ოქრო რატომ არ გინდა? — ჰკითხა იუსტინემ, — იქნებ სხვა რამე მოგცე?

– მე არაფერი მინდა თქვენგან, – უპასუხა ამონ-რამ, – მაგრამ თუ ინებებთ და ერთ კეთილ საქმეს შეასრულებთ, თქვენსავე ღირსებას დაამშვენებთ.

– კარგი, ყველაფერს შევასრულებ. გამომყევი! – უბრძანა იუსტინემ.

და ვიდრე გაჰყვებოდა, ამონ-რამ მოასწრო იორამისთვის ეთქვა, ფილიპეს მინეღეო.



ამას ჯერ ის ყურები არა აქვს, რომ ისმინოს

ავგუსტა ბერძენი დიდებულის ქალიშვილი იყო.

ხუთი წლის წინ ბერძენმა დიდებულმა სტუმრად და სამეგობროდ მიიწვია რომაელი დიდებული იუსტინე და მის საპატივცემულოდ სასახლეში დიდი წვეულება გამართა. თავი მოიყარეს ათენის დიდებულებმა, მმართველებმა, განათლებულმა ადამიანებმა, უმშვენიერესმა ქალიშვილებმა და ქალბატონებმა. ერთმანეთს ცვლიდა ცეკვა, სიმღერა, ლექსაობა და მახვილსიტყვაობა.

და აი დიდ დარბაზში მოულოდნელად არფის სიმები აუღერდა. ყველამ იქითკენ მიაპყრო მზერა. თეთრ აბრეშუმის კაბაში გამოწყობილ ქალიშვილს ხელში ოქროს არფა ეჭვია. აუღერდნენ არფის სიმები, და დარბაზი ამაღლებული სულის მელოდიათ გაავსო, მელოდიათ ქალიშვილის ხმაც შეუერთდა და თითქოს ანგელოზის ფრთები ამრიალდაო, ისე ჩაიქროლა ჩურჩულმა: „ავგუსტა, ავგუსტა!“! ულამაზესი ქალიშვილი უკრავდა და მღეროდა სიყვარულისა და უკვდავების ღვთაებრივ სიმღერას. შეკრებილნი სულგანაბულნი უსმენდნენ. ბევრი ცრემლს იწმენდა.

ქალიშვილმა სიმღერა დაასრულა. სტუმრები კარგახანს გაოგნებულნი იყვნენ. შემდეგ კი დარბაზში ოვაციამ იქუხა.

— ავგუსტა... ავგუსტა... ავგუსტა... — ერთხმად იძახდა ყველა.

იუსტინემ მოსვენება დაკარგა. ქალიშვილი ნამდვილად ის იყო, ვინც მას ოცნებებში ეხატებოდა და ვისაც მისი გული დაეძებდა. ახალგაზრდა რომაელმა დიდებულმა იგრძნო, რომ ათენში სწორედ სიყვარულის საძებნელად ჩამოვიდა და იპოვა ის, თავისი ერთადერთი, რომელიც აქამდე თვალითაც არ ენახა, ახლა იხილა და იცნო. იგრძნო, რომ მის გარეშე რომში ვერ დაბრუნდებოდა.

წამიც არ დაუყოვნებია იუსტინეს, თავის ბერძენ მასპინძელს მიუბრუნდა და მოუთმენლობით ჰკითხა:

— მეგობარო, ვინ არის ეს ქალიშვილი?

— ავგუსტაა! — ღიმილით მიუგო დიდებულმა.

— აქ რატომ არის?

— ჩემი ქალიშვილია ავგუსტა!

იუსტინემ უცხად ვერ მონახა სათქმელი. რა თქმა უნდა, მისი მეგობარი მიხვდა, რომ მას მოეწონა ავგუსტა, მაგრამ იქნებ ავგუსტას უკვე ჰყავს საქმრო, ან იქნებ გათხოვილიც არის. როგორ უთხრას მეგობარს, რომ ავგუსტას გარეშე არ დაბრუნდება რომში? იუსტინემ თავისი ახალგაზრდული გულწრფელობით იმარჯვა, მასპინძელს თვალებში შეხვდა და წარმოთქვა:

— ჩემო კეთილო მეგობარო, თუ ისეთ რამეს მოგახსენებ, რაც შენთვის მიუღებელია, მაშინ თვალები აშარიდე და მე ყველაფერს მივხვდები! მომეცი შენი ასული ცოლად და მე ის სიკვდილამდე შეყვარება!

ბერძენმა მეგობარმა ასევე თვალებში ჩახვდა იუსტინეს, თითქოს იქ, თვალების სიღრმეში, ეძებდა გრძნობით ნათქვამი სიტყვების დასტურს. შემდეგ გულღიად და კეთილად უთხრა:

— ო, დიდებულო იუსტინე! ბედნიერი ვიქნები, თუ ჩემი სიძე გახდები, მაგრამ ავგუსტას თანხმობაა საჭირო. შენვე გამოუცხადე მას ამის შესახებ და პასუხსაც ის გეტყვის!

— მაშ ახლავე ვეახლები მას! — თქვა იუსტინემ და ავგუსტასკენ გაემართა.

შეკრებილთა აღტაცება ჯერ ჩამცხრალი არ იყო, როცა ავგუსტას წინაშე იუსტინე წარსდგა.

ხალხმა იფიქრა, ალბათ უცხოელმა დიდებულმა მადლობა უნდა მოახსენოს ავგუსტას მშვენიერი სიმღერის გამო და გაჩუმდა.

იუსტინემ ქალიშვილის წინაშე ცალ მუხლზე დაიჩოქა, ხელები მისკენ გაიწვდინა და სრულ სიჩუმეში ხმამაღლა და მთელი განცდით წარმოთქვა:

— ჩემი მეგობრის უმშვენიერესო ასულო! ბედმა მომიყვანა შენს წინაშე, რომ ჩემი სიყვარული გიძღვნა და შეგვედრო გაიზიარო იგი!

იუსტინემ ქალიშვილის კაბის კალთა აზიდა და ეამბორა.

ქალიშვილი არ მოელოდა ასეთ წინადადებას. შერცხვა, გაწითლდა, თუმცა გულმა მაშინვე უთხრა, რომ მასაც ეახლა ბედი.

მამა გვერდით ამოუდგა ქალიშვილს და უჩურჩულა:

— შეილო, ნუ დაიმორცხვებ, გულის კარნახით იმოქმედე და მოახსენე რომაელ დიდებულს შენი გადაწყვეტილება!

ავგუსტა თავდახრით იდგა და უფრო და უფრო წითლდებოდა.

— უპასუხე, ჩემო ასულო... მაგრამ იცოდე, რომ შენ თავისუფალი ხარ! — გაუმეორა მამამ.

ავგუსტამ თავი დააქნია.

— მაშ თანახმა ხარ? — ჰკითხა მამამ.

— თანახმა ვარ! — თქვა ჩუმად, მაგრამ იუსტინემ გაიგო მისი ნათქვამი, სწრაფად წამოდგა ფეხზე და ბედნიერმა, უსაზღვრო სიყვარულით შეპყრობილმა დარბაზობაზე მოწვეულ სტუმრებს მიმართა:

— ისმინეთ! ავგუსტა ჩემი ცოლი ხდება! ვფიცავ ჩემს ღმერთებს, მე ის სიკვდილამდე მეყვარება!

იუსტინე შეტრიალდა, მძლავრი მკლავებით ავგუსტა მაღლა აიტაცა და წამოიძახა:

— ამ წუთიდან ავგუსტა ჩემი ქალღმერთია!

შემდეგ ქალიშვილი გვერდით დაიყენა და მამამისს მიმართა:

— დიდებულო მეგობარო, ხომ არ ვაქციოთ დღეკანდელი წვეულება ქორწილად?

ასე ეწია ბედს ათენში ერთი რომაელი დიდებული, ხოლო ბევრ ბერძენ დიდებულს ბედი ხელიდან გაუსხლტა.

იუსტინე რომში ავგუსტასთან ერთად დაბრუნდა. მალე იგი კეისარმა იუდეის პროვინციის მმართველად დანიშნა და ისინი იუდეაში ჩამოვიდნენ.

ავგუსტას კეთილშობილებამ, სათნოებამ და იშვიათმა სილამაზემ იუსტინეც გააკეთილშობილა. იუდეველებს არ უყვარდათ რომაელი დამპყრობლები, მაგრამ იუსტინე არ მიიჩნეის მტრად. იუსტინე ღმობიერი და სამართლიანი მმართველი აღმოჩნდა და იუდეველებიც მას პატივისცემით ექცეოდნენ. ავგუსტას შესახებ ლეგენდები გაჩნდა.

ხალხში ლაპარაკობდნენ, რომ ავგუსტას ხშირად იწვევენ ღმერთები თავიანთ ნადიმებზე, რათა დაუკრას არფაზე და იმღეროს; ღმერთები ისე იხიბლებიან მისი სიმღერით, რომ მზად არიან ნებისმიერი სურვილი შეუსრულონ, მაგრამ ავგუსტა მათგან არაფერს ითხოვს. კიდევ ამბობდნენ, რომ ავ-

გუსტას ღმერთებმა ერთი უცნაური ქვა გამოუგზავნეს, მასზე ცის საიდუმლოა ჩაწერილი; თუ ავგუსტა საიდუმლოს ამოცნობს, მაშინ ღმერთები მას ანგელოზად გადააქცევენო. იმასაც ამბობდნენ, რომ ავგუსტას გული სიკეთით აქვს სავსე, ამიტომ არ იცის, რა არის ბოროტებაო.

იუსტინეს მცდელობას, რომ პროვინციაში სამართლიანობა დამყარებულიყო, ხალხი ავგუსტას მიაწერდა. იმასაც ავგუსტას დამსახურებად თვლიდნენ, რომ იუსტინემ ზღაპრული სილამაზის სასახლის აშენება გადაწყვიტა და ეს საქმე უცნობ, მაგრამ სახელგანთქმულ ხუროთმოძღვარს მიანდო.

იუდეაში ჩამოსვლიდან ორი წლის შემდეგ ავგუსტას სახეზე ფერი შეეცვალა, გაყვითლდა, გახდა, თვალები ჩაუცვივდა. ავგუსტამ არ ისურვა, რომ ვინმეს ის ასეთ მდგომარეობაში ეხილა, ამიტომ ჩაიკეტა და იუსტინეს გარდა თავისთან არავის უშვებდა. ავგუსტას სხეულში ძალა გამოეღია, მოძრაობა უჭირდა, თავის ძლიერი ტკივილები დასწყობდა. იუსტინე ყოველ ღონეს ხმარობდა, რომ მეუღლე გადაერჩინა. მიუხედავად იმისა, რომ მშვენიერმა ქალიშვილმა დაკარგა თავისი ბრწყინვალეობა და აჩრდილს დაემზგავსა, მიუხედავად იმისა, რომ ანგელოზებით ჰაეროვანი ქალიშვილი უმოძრაო მოჩვენებად იქცა, იუსტინეს მის მიმართ სიყვარული არა თუ გაუწეულდა, პირიქით, უფრო გაუძლიერდა.

რომელი ქვეყნიდან და საიდან არ ჩამოიყვანა მკურნალები, რანაირი წამლები არ იხმარეს, მაგრამ არაფერი გამოვიდა — ავგუსტა უფრო და უფრო უარესად ხდებოდა. ჭკვიანმა ქალიშვილმა იცოდა, რომ ძალიან ავად იყო და, შესაძლოა, მისი სიცოცხლე მალეც დასრულდებოდა, მაგრამ სულის სიძლიერეს არ კარგავდა. როცა კი იუსტინე მის ოთახში შევიდოდა, ღიმილით შეხვდებოდა, თავში მხოლოდ კეთილი აზრები უტრიალებდა, არავის აღანამაულებდა, არ წუწუნებდა და არ დასტიროდა თავის მდგომარეობას. უფრო იმაზე ფიქრობდა, რას გააკეთებდა კარგს, თუ გამოჯანმრთელდებოდა.

მკურნალებმა იუსტინეს ყველა იმედი გადაუწურეს, და საწყალი კაცი საგონებელში ჩავარდა — ავგუსტას გარეშე საკუთარი სიცოცხლე უაზრობად ეჩვენებოდა.

ავგუსტაზე ფიქრები ეძალებოდა იუსტინეს მაშინაც, როცა მშენებლობიდან მიიჩქაროდა და თან ამონ-რა მიჰყავდა. „რა შეუძლია ამ ბავშვს, რა იცის ამან მკურნალობის? —

ფიქრობდა იუსტინე, — ტყუილად მიმყავს ავგუსტასთან, მაგრამ იქნებ მოსაუბრედ მაინც გამოდგეს!“ და უცბად გაახსენდა, რომ ავგუსტა იუსტინეს მხოლოდ ბერძნულად ელაპარაკებოდა, სხვა ენები არ იცოდა, ამიტომ რანაირი მოსაუბრე იქნებოდა ეს ბიჭი მისთვის?

— ბიჭო, — მიმართა იუსტინემ ამონ-რას, რომლებიც ცხენზე იჯდა და უკან მიჰყვებოდა, — შენ მხოლოდ არამეულენაზე ლაპარაკობ?

— არ ვიცი! — უპასუხა ამონ-რამ.

იუსტინეს გაუკვირდა ასეთი პასუხი. ალბათ, ვერ გაიგო, რა ვკითხუო.

— ბიჭო, მე გეკითხები, იცი თუ არა ბერძნული?

— შეიძლება ვიცოდე!

ვერც ამ პასუხს მიხვდა იუსტინე და მზად იყო გასწყრომოდა ამონ-რას, მაგრამ იფიქრა, ბერძნულად დაველაპარაკები, ენახოთ, თუ გაიგებსო, და ბერძნულად ჰკითხა:

— რამდენი წლის ხარ შენ?

ამონ-რამ ვერაფერი გაიგო. მაშინ იუსტინემ იგივე რომაულად ჰკითხა. ამონ-რა ისევ ვერაფერს მიხვდა. იუსტინემ არაბულიც იცოდა, მაგრამ ამონ-რამ ვერც ამ ენაზე გაიგო რამე. მხოლოდ მაშინ, რაც იუსტინემ არამეულად ჰკითხა: რამდენი წლის ხარო, ამონ-რამ უპასუხა — ცხრა წლისო.

შეწუხდა იუსტინე. ბიჭის სამკურნალო ცოდნაში დიდად ეპარებოდა ეჭვი, ახლა კი იმაშიც დარწმუნდა, რომ ავგუსტა ვერ დაელაპარაკებოდა მას, ვერც ბიჭი გაართობდა ავგუსტას თავისი ზღაპრებით მესიაზე. „მეტი გზა არ არის, თარჯიმანი დაგვჭირდება. მაგრამ ავგუსტას რომ არ უნდა ვინმე სხვადაც იხილოს მისი ახლანდელი ჩამქრალი სახე? როგორ მოვიქცე?“ — წუხდა იუსტინე თავის ფიქრებში.

გზის დიდი ნაწილი ისე გაიარეს, რომ იუსტინეს აღარაფერი უკითხავს. ამონ-რა გარემოს ათვალთვრებდა და თავის ფიქრებს მიეცა.

როცა ამონ-რა ფიქრებში იძირებოდა, ათასნაირი ხილვა მოსდიოდა. საკმარისი იყო ეფიქრა, ვთქვათ, წყალზე, ცეცხლზე, ღრუბელზე, მთაზე, ვარსკვლავზე ან ვინმე ადამიანზე, რომ მის წინ ხატები გადაიშლებოდა, როგორც ცოცხალი წიგნი. ამონ-რა ხვდებოდა, რომ მას შეეძლო სცოდნოდა ყველაფერი ყველაფერზე. ალბათ ეს იყო ცოდნა ღვთის სასუ-

ფეკლის საიდუმლოსი, რაც მას იესო ქრისტემ მიანიჭა. მაგრამ ისიც შენიშნა, რომ ამ საიდუმლოს ყოველთვის კი ვერ სწვდებოდა, არამედ მაშინ, როცა გულწრფელად ეძლეოდა ფიქრებს, ან მაშინ, როცა ძალიან უნდოდა სიკეთის ქმნა. მაგრამ თუ თავის თავს გამოცდას დაუპირებდა, ერთი ვნახოთ, რა შემძლიაო, თუ ვინმე ეჭვიანი მოუწყობდა გამოცდას, ვნახოთ, მართლა შეგიძლია თუ არაო, მაშინ, ნურას უკაცრავად, არაფერი გამოდიოდა. აი, ახლაც, როცა იუსტინემ გამოსაცდელად ჰკითხა რაღაც სხვადასხვა ენებზე, ამონ-რამ ვერაფერი გაიგო.

ამჯერად ამონ-რას ფიქრები თავად ფიქრს მიაღწენ. „უფალო, მომანიჭე ცოდნა ფიქრის, აზრის შესახებ!“ — შესთხოვა ამონ-რამ ცათა სასუფეველს. უნაგირზე რყევა ხელს არ უშლიდა, რომ მთელი ყურადღებით დაჰკვირვებოდა ხილვებს, რომლებიც თანდათანობით ჩნდებოდნენ მის წარმოდგენაში, და ამოეცნო ისინი.

აგერ, მუშაობს კაცი ვენახში. უელის ვაზს და ესიყვარულება. თავში ნაირ-ნაირი, ზოგჯერ მთელი, ზოგჯერ ნაწყვეტ-ნაწყვეტი აზრები მოსდის. ხან თავისთვის ჩაიბუტბუტებს, ხან წაიმღერებს, ხელები კი ეალერსებიან და უვლიან ვაზს. ეჰ, ამბობს თავისთვის მუშა-კაცი, მშვილობა იყოს ქვეყანაზე, ყველა კარგად იყოს, ყველა ბედნიერი იყოს, და მეც და ჩემი ოჯახიც კარგად ვიქნებით. მერე მეზობელი ქერივი ჭალი გაახსენდა, გაჭირვებაში რომ ზრდის ოთხ შვილს. ვინ დაეზმარება მას? ვენახი უფუჭდება საცოდავს. უნდა მოვიცალო და ხვალ მის ვენახს მოვუარო. თუ ღმერთმა ინება და კარგი მოსავალი მივიღე, აგრძელებს ფიქრს მევენახე, მაშინ სტუმარსაც ვუმასპინძლებ, ცოტას კიდევ გაყვიდი და ქალიშვილს მზითვს მოვუმზადებ. ოფლი წურწურით ჩამოსდის მუშა კაცს და მიწაში იღვრება, ის კი არ წუწუნებს, ეს რა დღეში ვარო, პირიქით, ღმერთს მადლობას სწირავს იმისათვის, რაც აქვს. მუშაობს ასე ვენახში მევენახე, ხოლო მის თავზე ღლიც-ღიცებენ ცისფერცეცხლოვანი პაწაწინტელა ღრუბლები. შემდეგ ისინი ელვისებურად მიისწრაფვიან მალლა და იქ თავის-სავე მსგავს უზარმაზარ ცისფერცეცხლოვან ღრუბელს უერთდებიან. ეს ცისფერცეცხლოვანი უზარმაზარი ღრუბელი კი დაიძვრის და მევენახისკენ გამოემართება, მის ვენახს გაანაყოფიერებს, მევენახეს კი ქვაზე ფეხს წამოაკრევიანებს, წააქ-

ცევს და ცხვირით მიწაში დაფლულ განძის ქოთანს აპოვნიებს. უხარია მშრომელ კაცს — რა ბედი მეწვიაო, და ახლა იმაზე ფიქრობს, როგორ გაახარებს ოჯახს, გაჭირვებულ ქერივ მებობლებსაც შეეშველება, სოფლისთვის ჭკას გათხრის და მდინარეზე ხიდს გააღებს. ისევ ისწრაფვიან ცისფერცეცხლოვანი ციცქნა ღრუბლები ღიდი ცისფერი ცეცხლისაკენ და ასე დაუსრულებლივ.

ამ კაცის გვერდით მეორეც მუშაობს თავის ვენახში. მასაც ფიქრები ეძალება. უელის ვახს და ბრაზობს — აი, წამოვა სეტყვა, დადგება გვალვა და გაუნადგურდება წლის მოსავალი. რა ფასი აქვს ამისთანა შრომას? გული ბოლმით და შურით ევსება — მისი მებობლის ვენახი უკეთესად გამოიყურება, უფრო კარგად ასხია. ეს არის ღმერთის სამართალი? გაუჭირვა საქმე ქერივმა მებობელმა — ხან ერთ ბავშვს გამოგზავნის, ხან მეორესა და მესამეს, ან თვითონ მოადგება და ხელში მეთხე ბავშვი უჭირავს — ერთი პური მასესხეო. ერთხელ ასესხა, მეორედ. რამდენჯერ შეიძლება ასე? ჭირმა წაიღოს ყველა. ცოლიც გაუხდა ავად. ესლა აკლდა! სად იშოვოს მისი მკურნალობის ფული? ბარემ ჩაბარდეს უფალს და ეგ არის. რად უნდა ავადმყოფი ქალი. შვილი მაინც არ გაუჩინა, ისეთი უჯიშოა. გავეყიდი მთელ მოსავალს და გადავმალავ ფულს, ქოთანში ჩავდებ და მიწაში დავფლავ, როდისმე გამომადგება, ფიქრობს კაცი. ოფლი წურწურით ჩამოსდის მევენახეს და მზეს უწყრება — რას დააცხუნა ასე, მუშაობას არ დაგაცდის, ან ეს ღრუბლები სად გადაიკარგნენ, რომ ცოტა წამოწვიდოს. უბრაზდება კაცი ღმერთს: არც შვილი მომეცი, არც ვენახი მივარგა, სახლიც ვერ ავაშენე, ქოხმანში ვცხოვრობ. ეს არის, ღმერთო, შენი სამართალი? რატომ გამაჩინე, თუ არაფერს გაიმეტებდი ჩემთვის! მუშაობს ამ ფიქრებითა და ზრახვებით ვენახში მევენახე, ხოლო მის თავზე ჭვარტლიანი ღრუბლები გროვდება, კალიასავით ღრუბლები. ჭვარტლისფერი კალიების გუნდი ელვისებურად მიისწრაფვის, ოღონდ ძალიან მაღლა კი არა, სადღაც ახლოს, სადაც მსგავსი ჭვარტლიანი ღრუბლების გროვაა. დაიძვრის ეს შავშავი ფიქრების გროვა და კალიებს შეუსევს მევენახის ზვარს. მას კი ქვაზე ფეხს წამოაკრევიებს და მოსტეხავს ფეხს. გაბოროტდება ეს კაცი და წყველა-კრულვას შეუთვლის ყველას — ღმერთსაც და კაცსაც, ვენახსაც და მის პატრონ-

საც. რაღა მე დამემართა ესო, ივინება, აი იმ ჩემს მეზობელ მევენახეს რატომ არ მოსტყდა ფეხიო, ახიცი იქნებოდა, რა ამღერებს ამ სიციხე პაპანაქებაშიო. ისევ ისწრაფვიან ჭვარტლიანი კალიების გუნდები, რომ კიდევ უფრო დიდი ჭვარტლიანი ღრუბლები დააყენონ თავს და ასე დაუსრულებლივ.

მეზობელი მევენახე კი, რომელმაც ეს-ეს არის თავის ვენახში განძით სავსე ქოთანნი იპოვა, მორბის მის საშველად.

ამონ-რას ამ ხილვებიდან დასკვნები გამოაქვს და თან-მიმდევრულად ალაგებს. მან უკვე იცის, რომ ფიქრებსა და აზრებს სული ბადებს და ისინი სულივით უკვდავნი ზღებიან; უკვე დაბადებული ფიქრები და აზრები არ ემორჩილებიან თავიანთ დამბადებელს, გარბიან მისგან შორს და სამყაროში არსებულ მსგავს ფიქრებსა და აზრებს უერთდებიან; ფიქრები და აზრები უბრუნდებიან თავიანთ დამბადებელს, მაგრამ მარტონი კი არა, არამედ უფრო გაძლიერებულნი მსგავსი ფიქრებითა და აზრებით; იმისდამიხედვით, თუ როგორები არიან ისინი — კეთილგანზრახულნი თუ ბოროტგანზრახულნი — მათ დამბადებელს შესაბამისს მიაგებენ; კეთილ აზროვნებას ადამიანი ცათა სასუფეველისკენ მიჰყავს, ბოროტი აზროვნება კი მას ცათა სასუფეველის სიახლოვესაც არ აკარებს; კეთილი ფიქრები და აზრები, კეთილი განზრახვები და საქმეები ის არის, რაც ადამიანმა ცათა სასუფეველში უნდა დაიუნჯოს, თუ უნდა, რომ მისმა სულმა მაღალ სამყაროებს მიაღწიოს. ცათა სასუფეველში ყველაფერს ფიქრი, ნათელი და ღამაზი აზრები ჰქმნიან. ამ ცოდნას, რაც მან ცათა სასუფეველისაგან მიიღო, ამონ-რა გაანდობს ყველას, ვინც მოუსმენს, ვისაც ყურები აქვს, რომ ისმინოს.

ამასობაში იუსტინე გამოერკვა.

— ისევ გზაში ვართ? — გაიკვირვა და ამონ-რას გადახედა, — ხომ არ ჩაგეძინა ცხენზე მჯდომარეს?

— არა, — უპასუხა ამონ-რამ, — ვფიქრობდი.

— რაზე? — ჩაეძია იუსტინე.

„ამას ჯერ ის ყურები არა აქვს, რომ ისმინოს, ამიტომ არაფერს ვეტყვი,“ — გაიფიქრა.

— ყველაფერზე. — უპასუხა იუსტინეს.

მზე ჩადიოდა, როცა სასახლის ეზოში შევიდნენ.

— მაღლობა ღმერთს, მოვედით! — დაღლილი ხმით თქვა იუსტინემ.

მე მხოლოდ აღვასრულებ უფლის ნებას

დილით მოსამსახურე ქალმა ამონ-რას საუზმე მოართვა და გააფრთხილა: ბატონი შენთან ერთ საათში მოვაო. იუსტინე, მართლაც, მოვიდა ერთ საათში, უკან მონა მოჰყვებოდა და ტანსაცმელი მოჰქონდა.

— მონა გაბანავებს და ეს ტანსაცმელი ჩაიცვი! — ბრძანებით უთხრა იუსტინემ.

— რატომ, ასე არ შეიძლება ვიყო? — ჰკითხა ამონ-რამ. იუსტინემ იწყინა სიტყვის შებრუნება.

— გესმის, ბიჭო, ის გააკეთე, რასაც გიბრძანებენ! — უთხრა იუსტინემ მკაცრად.

ამონ-რამ ყურადღება არ მიაქცია იუსტინეს ბრძანებასა და სიმკაცრეებს. ის იმიტომ კი არ გამოჰყვა იუსტინეს ამხელა გზაზე, რომ მან უბრძანა. ამონ-რას ერთადერთი მბრძანებელი ჰყავს — ეს მისი გულია. გულმა უთხრა, რომ ავგუსტას უშველოს, და ამონ-რაც გამოჰყვა იუსტინეს.

მალე ახალ ტანსაცმელში გამოწყობილი ამონ-რა მონამ იუსტინეს მიჰგვარა.

— წამოდი! — უბრძანა იუსტინემ.

მათ სასახლის დერეფნები გაიარეს და მოჩუქურთმებული კარების წინ შეჩერდნენ.

— მომიმინე, ბიჭო, — მკაცრად გააფრთხილა იუსტინემ ამონ-რა, — არაფერი შეიმჩნიო ავგუსტას დანახვისას და არც არავის უთხრა რამე მის შესახებ, თორემ დაისჯები. გასაგებია?

ამონ-რამ თავი დაუქნია. თუმცა მას ასეთი გაფრთხილებანი არ სჭირდებოდა.

იუსტინემ კარები გააღო და ოთახში შევიდა. ამონ-რას ხელით ანიშნა — მომყვიო.

უზარმაზარი ოთახი რამდენიმე სანთლით სუსტად იყო განათებული.

პატარა ფანჯრებზე ფარდები ეფარა, რომ დღის სინათლეს არ შემოეღწია.

იუსტინე ავგუსტას საწოლთან მივიდა, ქალს აკოცა და ალერსით უთხრა:

— ჩემო ქალღმერთო, აი ის ბიჭი, რომელზეც ამ დილით გეუბნებოდი. იქნებ მოგინდეს მასთან საუბარი? მესიას შეხვედრია, იესო ქრისტეს რომ ეძახიან. კიდევ ამბობენ, ამ ბიჭმა მკურნალობა იცისო.

ეს ყველაფერი იუსტინემ ბერძნულად წარმოთქვა და ამონ-რამაც კარგად გაიგო ყველაფერი, მაგრამ ვგონა, რომ იუსტინე ავგუსტას არამეულ ენაზე ელაპარაკებოდა, და გაუკვირდა: ხომ უთხრა გუშინ იუსტინემ, რომ ავგუსტა მხოლოდ ბერძნულად ლაპარაკობს და ამიტომ თარჯიმანი დაგვჭირდებაო.

იუსტინე ამონ-რას მიუბრუნდა და არამეულად უთხრა:

— მოდი ახლოს, აქ დადექი და უპასუხე, რასაც ქალბატონი გკითხავს!

ამონ-რა მიუახლოვდა საწოლს და ავგუსტას შეხედა.

სატირალი სანახაობა წარმოუდგა თვალწინ.

ახალგაზრდა ქალი, რომელსაც ჯერ ოცდაერთი წელიც არ შესრულებია, თავისი ცხოვრების უკანასკნელ დღეებს ითვლიდა. ჩამქრალი თვალები სევდას ასხივებდნენ, თუმცა ჩამჭკნარ სახეზე უშფოთველობა ეწერა. ავგუსტამ გაუღიმა ამონ-რას და თითქოს სიკეთე გამოასხივაო, ისეთი მომხიბვლელი და უშუალო იყო მისი ღიმილი.

— ჰკითხე, ჩემო ქალღმერთო, რაც გინდა. მე ვუთარგმნი. ვნახოთ, რას გვეტყვის.

ისევ გაიღიმა ავგუსტამ. ეს ღიმილი ახლა უკვე ცისფერი ცეცხლის ალს ჰგავდა.

— რატომ ეძახი მას ბიჭს, ხომ აქვს სახელი? — მეტად სუსტი ხმით, ძლივს გასაგონად დაილაპარაკა ავგუსტამ.

— ამონ-რაა მისი სახელი. კარგი, ასე დაეუძახებ.

სახე კი ჰქონდა ავგუსტას ჩამქრალი, მაგრამ სულის ძალას არაფერი დაჰკლებია. ამ სულის ძალამ ჰკითხა ამონ-რას:

— მე შენ სიზმარში ვნახე?

იუსტინეს გაუკვირდა ავგუსტას ნათქვამი — საიდან ნახავდა ამ ბიჭს სიზმარში, პირველად ხედავს მას. ის იყო დააპირა ბერძნულიდან არამეულად ეთარგმა ეს სიტყვები, რომ ამონ-რამ თავისი მშვიდი ხმით მიუგო:

— ღიახ, ქალბატონო, ჩვენ სიზმარში ვნახეთ ერთმანეთი.

იუსტინეს ენა დაება: ამონ-რამ ბერძნულად უპასუხა ავგუსტას. თანაც რა სისულელეს ეუბნება: ჩვენ ერთმანეთს სიზმარში შევხვდითო.

— შენ ბერძნულად ლაპარაკობ?! — ჰკითხა ამონ-რას წყრომით, — რატომ დამიძალე, თუ ბერძნულად ლაპარაკი იცი?

— მე ბერძნული არ მისწავლია, არც რომაული, — უპასუხა ამონ-რამ, — მე ენა ვიცი და ვლაპარაკობ.

იუსტინემ ისევ ვერაფერი გაიგო, მაგრამ არც ამონ-რას შეეძლო აეხსნა მისთვის, როგორ ხდებოდა, რომ ზოგჯერ მისი ლაპარაკი ნებისმიერ ენაზე მოლაპარაკე კაცს ესმოდა და ყველას ეგონა, რომ ეს ბიჭი ჩემს ენაზე ლაპარაკობსო. თავად ამონ-რამაც არ იცოდა, რა ენაზე მეტყველებდა ამ დროს. ან რა ენაზე უპასუხა ახლა ავგუსტას, რომ მან კიდევ გაიგო და კიდევ გაიკვირვა:

— შენც იხილე ის სიზმარი?!

— ღიახ, ქალბატონო, მე თქვენ პეშევით ანკარა წყაროს წყალი მოგართვით.

— აჰ... — წამოიძახა სუსტი ხმით ავგუსტამ, — სწორედ შენ გნახე სიზმარში...

იუსტინე ვერც ამონ-რასა და ავგუსტას საუბრის შინაარსს ხვდებოდა.

— ამონ-რა, მიაბე იესო ქრისტეზე, რაც იცი! — სთხოვა ავგუსტამ.

— ქალბატონო, მე თქვენ გიაბობთ იესო ქრისტეზე ყველაფერს, რაც ვიცი, მაგრამ ჯერ გთხოვთ ოთახში მზის სინათლე შემოუშვათ.

ავგუსტას სახეზე შეშფოთება აღებეჭდა.

იუსტინეც გაწყრა: როგორ გაბედა ამ ბავშვმა ასეთი სითამამითა და თვითდაჯერებით ავგუსტას ნების დარღვევა. ის იყო აპირებდა დაეტუქსა ამონ-რა, რომ ავგუსტამ შეშფოთებით იკითხა:

— რატომ უნდა შემოუშვათ მზის სხივები, შენ ჩემი ჩამქრალი სახე გინდა იხილო?! ან გინდა იუსტინემ უფრო კარგად ჩაიბეჭდოს, როგორი მოჩვენება მივდივარ ამ ქვეყნიდან?!

ავგუსტას ხმა აუკანკალდა, ალბათ, აქვითინდებოდა კიდევ. მაგრამ ამონ-რამ ისევ მშვიდი ხმით ჩააგონა:

— ქალბატონო, თქვენ უმშვენიერესი ბრძანდებით. თქვენი სულის სილამაზეს თქვენი სხეული ვერასდროს შეედრება. მალე თქვენ სხეულის პირვანდელი ბრწყინვალებაც დაგიბრუნდებათ. ამიტომ შემოუშვით მზე თქვენს ოთახში. სინათლე სიცოცხლის დედაა. ის თქვენს მკურნალობაში დამეხმარება.

— შენ ჩემს განკურნებას აპირებ?! — გაუკვირდა ავგუსტას.

— მე თქვენ პეშვით ანკარა წყაროს წყალი მოგართვით. შვიდი დღის შემდეგ ისეთივე იქნებით, როგორიც ხუთი წლის წინათ იყავით. სასახლე, რომელსაც თქვენი მეუღლე აშენებს, თქვენ უნდა დაამშვენოთ.

იუსტინეს გულში რისხვა მოაწვა. რას ამბობს ეს ბაღლი! ატყუებს ამ საცოდავ ქალს — შვიდ დღეში მოგარჩენო — და კიდევ რაღაც წყალს გაიძახის! ჯერ ამონ-რას კინწისკვრით გაგდება უნდოდა ოთახიდან, მაგრამ გადაიფიქრა — ავგუსტა მიხვდებოდა, რომ აღარც იუსტინეს აქვს მისი გადარჩენის რაიმე იმედი.

— შენ შვიდ დღეში გინდა ფეხზე დამაყენო და ჩემი სილამაზე დამიბრუნო?! — ისევ უიმედო გოცუბით ჰკითხა ავგუსტამ.

— თქვენ მესამე დღეს აღგებით ფეხზე და საკუთარ ბაღში გაისეირნებთ. ვარდებს მონატრათ თქვენი ზილვა, დიდი ხანია გელიან. მეშვიდე დღეს კი თქვენი მეუღლე წვეულებას გამართავს, რომ ყველამ იხილოს თქვენი ბრწყინვალება და თქვენი სიმღერაც მოისმინოს. დღესვე გაუგზავნეთ მალემსრბოლი მამათქვენს, რომ ამ ზეიშს ჩამოუსწროს.

ზეიშს თუ დაკრძალვასო, უნდოდა დაეყვირა იუსტინეს და თვალწინ წარმოუდგა, როგორ წევს ავგუსტას უსულო სხეული ვარდებში ჩაფლული. აი, რა ვარდებზე ლაპარაკობს ეს ლაწირაკი. იუსტინე წამოიძვარა, რომ ბიჭისთვის სილა გაეწნა, მაგრამ ისევ ავგუსტას ხმამ შეაჩერა.

— განა რა წამალი გაქვს ისეთი, რომ განმკურნო, ვერ მხედავ, რა დღეში ვარ?

— მე არ მაქვს არავითარი წამალი და მალამო, — მიუგო ამონ-რამ.

— იუსტინე, მე ვიცი, რაც გითხრეს მკურნალებმა ჩემგან ფარულად. უთხარი ამონ-რას მათი გადაწყვეტილება, რომ მიხვდეს — ჩემი მორჩენა შეუძლებელია. როგორ უნდა განმკურნოს მან შვიდ დღეში, როცა შვიდი დღის სიცოცხლეც არ დაირჩენია. ალბათ, ასეთია ღვთის ნება, და მე ვემორჩილები მას!

იუსტინეს ისევ ჩაუვარდა ენა მუცელში. როგორ უთხრას ამ ბიჭს მომაკვდავი ქალის თანდასწრებით, რა უთხრეს მას მკურნალებმა. არ უნდა წამოეყვანა ეს ბიჭი! იქიდანაც უნდა გაეძევებინა, სადაც სასახლის მშენებლებს თავგზას უბნედა თავისი სისულელებით. აი, გაათრევს ამ ბიჭს გარეთ, კარგად გააჯოხინებს მსახურებს და გააგდებს აქედან.

— ქალბატონო, — თქვა ამონ-რამ, — თქვენმა მკურნალებმა უკვე ჩაიქნიეს ხელი თქვენზე და თქვენს მეუღლეს აუწყეს, რომ თქვენ მალე წახვალთ ამ ქვეყნიდან...

და ამ დროს იუსტინე ვეფხვივით წამოხტა და დაიღრი-ალა:

— გაიწყვიტე ხმა, შე...

და ვიდრე იუსტინე განზრახვას შეასრულებდა, ამონ-რამ სათქმელი დაასრულა:

— თქვენ უფლის ნებით განიკურნებით. მე მხოლოდ აღვასრულებ იესოს ნებას...

და ამ დროს იუსტინე თავზე დაემხო ამონ-რას.

— ესეც შენი იესო... ესეც შენი ქრისტე... ლაწირაკო... მაწანწალავ...

იუსტინემ ერთი ხელი ყელში სტაცა ბიჭს, მეორეთი კი სახეში ურტყამდა, რაც ძალა და ღონე ჰქონდა. მას არ ესმოდა მისუსტებული და ვედრებით სავსე ხმა ავგუსტასი:

— იუსტინე, რას შვრები... ცოდოა ბავშვი, იუსტინე... გაანებე თავი... არ მოკლა...

ამონ-რა მოწყვეტით დაენარცხა იატაკზე. იუსტინემ ფეხებში ჩაავლო ხელი და კარებისკენ გაათრია. აქ წამოეწია მას ავგუსტას განწირული კივილი:

— იუსტინე, მოიყვანე ამონ-რა ჩემთან...

იუსტინე შეჩერდა, სული მოითქვა. შეეცადა დამშვიდებულიყო და ისე მიმართა ავგუსტას:

— ჩემო ქალღმერთო, მაპატიე, რომ ეს მაწანწალა მოგიყვანე, შევცდი...

— იუსტინე, მოიყვანე ამონ-რა... იუსტინე, ჩამოგლიჯე ფარდები სარკმელებიდან... გაანათე ოთახი. იუსტინე...

იუსტინე არც დაფიქრებულა — მიანება ამონ-რას თავი და ფარდებს ეკვეთა.

წუთში განათლა ოთახი — შემოიჭრნენ მზის სხივები, ავგუსტას საწოლზეც დაიბუღეს და მის სახეს მიეაღერსნენ.

იუსტინემ შეხვდა მეუღლეს და გული მოუკვდა, ტირილი მოუნდა, მის საწოლთან დაიჩოქა და აზლუქუნდა.

ამონ-რა წვალებით წამოდგა ფეხზე და ავგუსტას საწოლთან მივიდა. თითქოს არც არავის უცდია მისი დახრჩობა, არც არავის დაუსისხლიანებია მისი სახე ან ფეხებით უთრევიან, თითქოს არაფერი მსგავსი არც მომხარისოს, მისთვის ჩვეული სიმშვიდითა და რწმენით თქვა:

— ქალბატონო, უბრძანეთ თქვენს მეუღლეს, დაგვტოვოს. უბრძანეთ, რომ მამათქვენს მალემსრბოლი გაუგზავნოს. უბრძანეთ იფიქროს ზეიმზე, რომელსაც ერთი კვირის თავზე მოაწყობს.

ავგუსტა ცოტა ხანს ჩუმად იყო. მამა არ უნახია ავგუსტას, რაც იუსტინემ წამოიყვანა. მონატრა მამა. მართლაც, გააგზავნოს იუსტინემ მალემსრბოლი, იქნებ კიდევ მოუსწროს ქალიშვილს ცოცხალს. ზეიმიც მოაწყოს მამის საპატივსაცემოდ. იჩქაროს იუსტინემ. იქნებ ეს ერთი კვირა მისი უკანასკნელი დღეებია?

— იუსტინე, ხომ მოისმინე, რა თქვა ამონ-რამ? შეასრულე ყველაფერი, ჩემო კეთილო მბრძანებელო!

— ასეთია შენი სურვილი, ჩემო ქალღმერთო? — ჰკითხა იუსტინემ დაეჭვებით.

— ჰო, ჩემო კეთილო, ჩემი სურვილია... გთხოვ შეასრულო...

— ასე იყოს, შევასრულებ...

იუსტინემ ამონ-რას შეხვდა. რისხვამ გაუარა, მაგრამ ეჭვმა — არა. თუმცა ვერაფრით აეხსნა, რა ძალა იხმარა ამ ბიჭმა ისეთი, რომ ავგუსტამ ოთახში მზის სხივები შემოუშვა და იუსტინეს თავისი დალეული, ჩამქრალი სახე სინათლის შუქზე დაანახა.

— ახლა კი დაგვტოვე, ჩემო ძვირფასო... — დაიჩურჩულა ავგუსტამ.

იუსტინე ფეხზე წამოიმართა. კარებთან მისულ მეუღლეს ავგუსტამ ძლივს მიაწვდინა ხმა:

— იუსტინე, თავად შეგატყობინებ, როდის მოხვიდე...

— დღის ბოლოს მოვიდეს, — თქვა ამონ-რამ. იუსტინე მზად იყო ისევ შემობრუნებულიყო და ახალი ძალით სცემოდა ამ თავხედს, რომელიც საყვარელ ცოლთან შეხვედრას უზღუდავდა.



ოცდამეთხუთმეტე თავი

მათ შორის ყველაზე პატარა ყველაზე დიდი იყო

ქრისტეზე საუბრისა და მკურნალობის შესაძენად დად-
გა.

ავგუსტა მართლაც მოფერიანდა, გახალისდა და სა-
წოლში წამოჯდა.

ავგუსტა ხარბად ისმენდა ამონ-რას მონათხრობებს იესო
ქრისტეზე, ცათა სასუფეველზე, მცნებებზე. იგავების მეშვე-
ობით ამონ-რა ცდილობდა დახმარებოდა ავგუსტას ჩასწვლო-
მოდა იესო ქრისტეს მოძღვრებას. ავგუსტამ იწამა ძე ღვთისა
და ძე კაცის რელიგია. სთხოვა ამონ-რას ესწავლებინა მის-
თვის ლოცვა და დღეში შეიდეჯერ აღავლენდა ღვთის მიმართ
გულწრფელ და მხურვალე ლოცვას.

ავგუსტას უკვირდა, რამდენი რამ იცოდა ამ პატარა
ბიჭმა, რომლის სიკეთეს, სიყვარულსა და თანაგრძნობას საზ-
ღვარი არ ჰქონდა. მაგრამ კიდევ უფრო აოცებდა ამონ-რას
რწმენა და სულის ძალა.

პირველ დღეს ამონ-რამ ის შეძლო, რომ ავგუსტას იმე-
დი გაუჩინა და ხალისი მიანიჭა. მეორე დღეს ავგუსტას სახე
შეეფაკლა და სხეულში ღონე იგრძნო, საწოლში წამოჯდა
და ლამაზი ფიალიდან ღვინო მოსვა. იუსტინემ თვალებს არ
დაუჯერა, როცა ავგუსტა გახალისებული და მოღონიერებუ-
ლი დაინახა. გულში კი გაიფიქრა, რომ ეს სიკვდილის მო-
ახლოებას ნიშნავსო, და ისევ ტირილი მოუნდა. ამონ-რას კი-
დევ ერთხელ შეხედა უნდობლობით და მუქარით: დრო მოვა,
შენსას მიიღებო.

შესაძენად დღეს დილით ამონ-რა საწოლთან დაუჯდა
ავგუსტას და გულის ცეცხლი მოიმარჯვა. მისი ხელები უხ-
ვად უღვრიდნენ ავადმყოფს სხეულში უცნაურ სითბოს.
ავგუსტა ძლიერმა ჟრუანტელმა შეიპყრო, სხეულში სიცოცხ-
ლის ფესვები ამოძრავდნენ და ხარბად შეიწოვეს ამონ-რას
გულის ცეცხლი. შემდეგ ამონ-რამ ჩურჩული დაიწყო და მის
ხმასაც გულის ცეცხლი მიჰქონდა ავგუსტას სულში:

— იყო ერთი ქალი. თორმეტ წელიწადს იტანჯებოდა იგი სისხლისდენით. მკურნალებმა ვერაფერი უშველეს. რა უნდა ექნა ქალს? ვერ შრომობდა, უჭირდა ოჯახის გაძლოლა, შვილების მოვლა, რცხვენოდა ხალხში გასვლისა. ქალი დასუსტდა, მოიკაკვა, სიცოცხლე მობეზრდა. როგორ ფიქრობთ, ქალბატონო, რას მოიმოქმედებს ეს ქალი?

— თავს მოიკლავს? — შემფოთდა ავგუსტა.

— ისმინეთ შემდეგ. ოჯახში მისულმა ერთმა სტუმარმა უამბო მასპინძელს იესო ქრისტეზე. ქალმა იწამა იგი და თავისთვის თქვა: მის სამოსელსაც რომ შევებო, განვიკურნებიო. დაიწყო სოფელ-სოფელ სიარული და იესოს კვალის ძებნა. აი, ერთხელაც დაინახა — გარბის კაცი და იძახის: „იესო მოდის... იესო ქრისტე მოდის!..“ გაუხარდა ქალს და შუა გზაზე დაჯდა, რომ იესო ქრისტეს როგორმე ხელით შეხებოდა. გამოჩნდა იესო ქრისტე. გვერდით მოწაფეები უდგანან, უკან აუარებელი ხალხი მოჰყვება. გზაზეც ბევრი ხალხი შეიკრება იესოს შესახვედრად. საწყალი ქალი ხალხში ჩაიმალა. გაიარა იესო ქრისტემ გზაზე. ქალი მიწაზე განერთხო, რომ ხელი მიეწვდინა მისი სამოსელისათვის. მისწვდა სამოსლის კალთას, აკოცა და თქვა თავისთვის: „მოვიდეს სუფევა შენი, უფალო, ვითარცა ცათა შინა, ეგრეცა ქვეყანასა ზედა.“ იესომ იგრძნო, რომ ძალა გავიდა მისგან. მობრუნდა, დაინახა მიწაზე გართხმული ქალი და უთხრა: „გამხნევედი, ასულო, შენმა რწმენამ განგკურნა!“ ქალი მაშინვე განიკურნა, წელში გაიმართა და მადლი შესწირა უფალს.

ამონ-რამ თვალეში ჩახედა ავგუსტას და დაინახა შიგ რწმენით აგიზგიზებული ცისფერი ცეცხლი. ხელი გაუწოდა და ჩვეული მშვიდი ხმით, რომელშიც ცეცხლის ძალა იყო ჩაქსოვილი, უთხრა:

— ქალბატონო, თქვენი რწმენა განგკურნავთ თქვენ. მომეცით ხელი და გადმოდით საწოლიდან. ვარდებმა მოიწყინეს უთქვენოდ ბაღში.

ავგუსტა შეცბა.

— რწმენა თქვენი წამალია, — გაუთეორა ამონ-რამ, — მომეცით თქვენი ხელი.

ავგუსტამ მორჩილად გაუწოდა ხელი ამონ-რას და საწოლიდან გადმოვიდა.

— ახლა ჩაიცივით თქვენი ლამაზი თეთრი აბრეშუმის კაბა და გამოეწყვეთ.

ავგუსტამ ისევ მორჩილად შეასრულა ამონ-რას თხოვნა.

— ჩაიხედეთ სარკეში.

ავგუსტამ გადაძალული სარკე მოძებნა, ჩაიხედა და მის სახეზე ბედნიერი გაოცება აისახა, თვალები სიხარულის ცრემლებით აევსო.

— ამონ-რა, მართალია, რასაც სარკეში ვხედავ, თუ სიზმარია ეს?

— ქალბატონო, წამობრძანდით ბაღში. იქ იუსტინეს ნახავთ, ის გეტყვით მართალს.

მთელი ამ ხნის განმავლობაში ამონ-რა განუწყვეტლივ გვერდით ედგა ავგუსტას. ახლაც ხელი მოჰკიდა მას და ნელა, მშვიდი ნაბიჯებით კარებისკენ წაიყვანა.

— ქალბატონო, ეცადეთ არ გამიშვათ ხელი. — გააფრთხილა ამონ-რამ ავგუსტა.

ოჰ, რა დიდი ღრო გავიდა მას შემდეგ, რაც ავგუსტამ თავისი თავი ამ ოთხ კედელში ჩაკეტა. რა ხდება გარეთ? ისევ დაფრინავენ ცაში ჩიტები და გალობენ? ისევ იშლებიან ბაღში ვარდები და სურნელს აფრქევენ? ისევ მოჩქეფს და მოიმღერის ნაკადული? ისევ დასრიალებენ ცაში ღრუბლები და წვიმას აგზავნიან? ისევ მიდის ავგუსტა გარეთ, საკუთარ ბაღში, რომ მიეაღეროს, მიეფეროს ჩიტებსაც, ვარდებსაც, ნაკადულსაც, ღრუბლებსაც?

ავგუსტა რწმენით გაჰყვა ამონ-რას, სასახლის კიბეები ჩაიარა და ბაღში გავიდა.

ამონ-რა ხელს არ უშვებდა ავგუსტას.

— ქალბატონო, თქვენ ბრძანდებით ამ ბაღის მშენიერება.

ავგუსტა იღიმებოდა ისე, როგორც გაიღიმებს ხოლმე ჩვილი. მას ისევე აოცებდა და ახარებდა ყველაფერი, როგორც ბავშვს, რომელიც პირველად ხედავს ღრუბლებს, პირველად ხედავს ნაკადულს.

ბაღში დიდი სიცოცხლე სუნთქავდა და ხალისობდა. ავგუსტას გამოჩენამ თითქოს ახალი ნაპერწკალი შემატა მას და ბაღმა გულსავესედა ჩაისუნთქა და ამოისუნთქაო. აკლდა ბაღს ეს ნათელი ნაპერწკალი, წუხდა მის გამო და, აი, ავგუსტა თავისი ნაზი ღიმილით სიყვარულს უგზავნის ბაღის

თითოეულ არსსა და სულდგმულს. ბულბულმა ავგუსტას თავზე შეიფართხალა, შემდეგ ვარდის ბურქზე შემოჯდა, ხმა მოისინჯა და აგალობდა, ამღერდა, აქო და ადიდა შემოქმედი. ავგუსტამ სუნთქვა შეიკრა — მისი სულიც ამღერდა ბულბულის სტვენასთან ერთად.

— ქალბატონო, ბულბულმა საგალობელი გიძღვნათ თქვენ, — უთხრა ამონ-რამ.

ბულბულმა ისევ შეიფრთხილა და თითქოს ბურქიდან ბურქზე გადაფრინდაო, ავგუსტას მხარზე დასკუპტა და ახალი სიმღერა წამოიწყო, ასე ეფერებოდა და ეაღერებოდა ავგუსტას. ნაკადულთან დაიხარა ავგუსტა, ამონ-რაც ჩაცუცქდა მასთან ერთად. ნაკადული არუხრუხდა და შეთამაშდა. ავგუსტამ ხელი ჩაყო მორუხრუხე წყალში და — ეს რა მოხდა! ნაკადული ჯერ გაჩერდა, შეგუბდა და გაისუსა, თითქოს და სარკედ იქცა ავგუსტასათვის — ნახე, რა მშვენიერი ხარო, ან იქნებ იმიტომ, რომ თავადაც მოიხიბლა და გაოცდა ავგუსტას ხილვით. შემდეგ კი მოულოდნელად შექანდა, აფეთქდა, თითქოს ქვებზე დაიმსხვრაო, მხეფებად იქცა და თავისი სიხარული იმით გამოხატა, რომ ავგუსტას სახეზე შეესხურა და კაბა დაუსველა. ავგუსტა შეხტა, გადაიკისკისა, პეშვით წყალი ამოიღო, ტურჩებთან მიიტანა და აკოცა, კიდევ აკოცა, თითებს შორის კამკამა წყაროს წყალი წვეთ-წვეთად ჩაიცალა და ხელისგულზე ლაჟვარდოვანი მარგალიტის მარცვალი დარჩა.

— ამონ-რა, შეხედე! რა არის ეს?! — გაიკვირვა ავგუსტამ.

— ქალბატონო, წყარომ მოგართვათ საჩუქარი სიყვარულის ნიშნად! — უპასუხა ამონ-რამ.

საკვირველად იქცეოდა ლაჟვარდოვანი მარგალიტის მარცვალი: ხელისგულიდან ავგუსტას მკლავს გაჰყვა, ყელი და ლოყა გაიარა, თან ცისფერ ნაზ სხივებს ისროდა, და შუბლის შუაგულში გაჩერდა. ავგუსტამ ხელი მოისვა შუბლზე, უნდოდა მარგალიტის მარცვალი ისევ ხელისგულზე დაესვა, მაგრამ ის არ დაემორჩილა, ისევ ხალისით გასრიდა და იმავე გზით და თავის ადგილს დაუბრუნდა.

მარგალიტის ცელქობით გართულ ავგუსტას მზის სხივებმა დაუწყეს თამაში — უჭყიტინებდნენ თვალებში, ლიცლი-

ცებდნენ სახეზე. რამდენიმე სხივი კი გულში შეუძვრა და იქ დაიბუდა. გული გაუთბა ავეუსტას, ესიაძვნა და გაუხარდა.

— გმადლობთ, მზეო! — ჩაიწურწულა.

ნიავი კი ძალიან გაცელქდა, ადრე უფრო თავაზიანი იყო, ახლა კი თმები დაუშალა. ისწორებს თმებს ავეუსტა, ისწორებს, ნიავი კი თავისას არ იშლის — თვალებში უბლანტავს თმებს, შემდეგ მალლა შეისვრის, შემდეგ კისერზე შემოახვევს. ასე ეალერსება ავეუსტას ნიავი.

სად არიან ღრუბლები, სად გადაკარგულან? როგორი მოწმენდილია ცა! ერთი ციცქნა ღრუბელი მაინც გასრიალდეს ცაზე, რომ გაიხსენოს ავეუსტამ, როგორები არიან ღრუბლები. მაგრამ არა! აგერ, მორბის ერთი დიდი თეთრი გუნდა ჰორიზონტიდან. რა მოაქანებს ასე სწრაფად? მოქრის, მოქრის, მოფრინდა კიდევ, ავეუსტასთან ეშვება და — გაქრა ავეუსტა! ავეუსტა კი არა, ყველაფერი გაქრა ავეუსტას ირგვლივ. ამონ-რას მაგრად უჭირავს მისი ხელი, მაგრამ ვერც ამონ-რას ხედავს ავეუსტა, ღრუბელმა შეფუთა იგი, მის სხეულსა და სულს შეუერთდა და სიაძვნების ჟრუანტელით გაავსო. ღრუბელი ეფერება ავეუსტას, ყველა ღრუბლის სახელით ულოცავს ბაღში გამოსვლას, სიცოცხლესა და ხალისს ჰმატებს, ძალას უნერგავს. ავეუსტა ბავშვივით ხარობს, მადლობას სწირავს ცას, ღრუბელთა დედას. ღრუბელი კი ისევ გასრიალდა მალლა და გამოჩნდა ავეუსტა, უფრო განათებული და გაბრწყინებული. მხარზე ისევ უზის ნაზი ბუღბუღი და გალობს, შუბლზე მარგალიტი უციმციმებს, ვარდების სურნელი თან ახლავს და მის სულს უხილავი ძალებით ავსებს. ღრუბელმა კი თავისი მსუბუქი მანტია მოასხა ბეჭებზე.

ამონ-რა ხელს არ უშვებს ავეუსტას და ახლა სხვა მხარეს მიჰყავს იგი.

სასახლის ბაღში თეთრმა ცხენმა ახოვანი მხედარი შემოაგელვა.

მხედარმა ჯერ უყურა ავეუსტას, უყურა — არ სჯეროდა, რასაც ხედავდა. შემდეგ კი, — „ავეუსტა, ჩემო ქალღმერთო,“ — შესძახა, ცხენიდან გადმოფრინდა და მისკენ გამოქანდა.

— ავეუსტა... ავეუსტა... ავეუსტა... — იძახოდა იუსტინე და მირბოდა, ავეუსტას ფეხებთან მუხლებზე დაეცა და

ორივე ხელი შემოხვია ქალს, — ავგუსტა... ავგუსტა... — სიხარულით ატირდა იუსტინე.

ავგუსტა თავისუფალი ხელით ეფერებოდა იუსტინეს, თმებზე ეფერებოდა, ფეხზე აყენებას ცდილობდა. იუსტინემ ქვემოდან ახელა ავგუსტას და მთელ სხეულში მისი მომხიბვლელი ღიმილის სითბო შეიგრძნო. შემდეგ ამონ-რას შეხვდა იუსტინემ, მუხლებზე დამხობილი ამონ-რას სიმაღლის გახდა და ბიჭს თვალი გაუსწორა. ო, რა თვალები ჰქონია ამ პატარა ბიჭს — იუსტინე ამონ-რას სიკეთესა და თანაგრძნობაში ჩაიძირა, მის თვალებში ჩაპატარავდა და უცბად იგრძნო, რომ სული და სხეული ეწმინდებოდა.

— ამონ-რა, უსაზღვრო პატარა ბიჭო! მომიტევე, მომიტევე! — ამონ-რას მხრებზე შემოხვია ხელები, მხარზე თავი დაადო და ასე გააგრძელა ტირილი, მაგრამ ეს უკვე მონანიებისა და მაღლიერების ტირილი იყო.

ასე გაგრძელდა რამდენიმე წუთს. ბოლოს ავგუსტამ ისევ ჩაავლო თმებში ხელი იუსტინეს და თავისკენ ნაზად მიიზიდა. იუსტინე წამოდგა და ახლა უკვე ავგუსტასა და ამონ-რასაც ზემოდან დახვდა: ამონ-რა მხრებამდე ძლივს სწვდებოდა ავგუსტას, ავგუსტა კი მხრებამდე ძლივს სწვდებოდა იუსტინეს. მაგრამ იუსტინე ახლა უკვე ხვდებოდა, რომ მათ შორის ყველაზე პატარა ყველაზე დიდი იყო.

ამ დროს ღობის მიღმა გზიდან ბავშვების სიხარულიანი ხმები მოისმა. გარბოდნენ ბავშვები და ატყობინებდნენ ყველას:

— იესო მოდის... იესო ქრისტე მოდის... ქრისტე მოდის... ალილუია, ალილუია...

ამონ-რას გული აუჩქარდა.

აი, თურმე რატომ ესწრაფვოდა დღევანდელ დღეს, რატომ უთხრა ავგუსტას, რომ მესამე დღეს საკუთარ ბაღში გაისეირნებო. იმიტომ რომ იერუსალიმისკენ მიმავალ ქრისტეს დღეს ამ გზაზე უნდა გაეგლო. ავგუსტამ უნდა დაინახოს იგი. თავადაც კიდევ ერთხელ დაინახავს იესოს და, იქნებ, ანდრიასაც მოკრას თვალი.

— რა ხდება, ამონ-რა?! — გაოცდა ავგუსტა, — განა ეს ბავშვები მართალს გაიძახიან?!

— ქალბატონო, მართალს გვახარებენ ბავშვები. წავიდეთ, იქნებ დავინახოთ უფალი! — მიუგო ამონ-რამ, მეორე

ხელი იუსტინეს ჩაავლო და ორივე თან გაიყოლა. ავგუსტაც და იუსტინეც მორჩილად მიხდევდნენ ამონ-რას: ავგუსტა რწმენით, სიხარულით და მაღლიერებით სავსე, იუსტინე კი ჯერ კიდევ გაურკვეველი თავის თავში — რა მოხდა და რა ხდება.

ისინი ჭიშკრიდან გზაზე გავიდნენ.

მახარობელი ბავშვები მორბოდნენ, ხტოდნენ და იუწყებოდნენ:

— იესო მოდის... ქრისტე მოდის... ალილუია!

სახლებიდან ხალხი გამობოდა და გზა მალე გაივსო იესოს ნახვის მსურველებით.

ალაგ-ალაგ ხალხმა სახლებიდან ფარდაგები გამოიტანა და გზაზე დაფინა. ქალებმა გზა ლამაზი ყვავილებით დაფარეს. შუაგზაზე ან გზისპირას ავადმყოფები, ხეიბრები, ბრძები და ყრუები ჩამწკრივდნენ. ერთგან შვილებმა დამბლადაცემული მამა საწოლით გამოიყვანეს და გზისპირას დააყენეს. ადამიანები იმედსა და აღტაცებას ვერ ფარავდნენ.

ამ ამბის მაყურებელ იუსტინეს უცბად სულში სინათლე ჩაუდგა, ამონ-რასგან ხელი გაითავისუფლა და სასახლეში შებრუნდა. ცოტა ხნის შემდეგ მას და მოსამსახურეებს ზურგზე აკიდებული ფარდაგები და ხალიჩები მოჰქონდათ. იუსტინემ თავისი ხელით გაშალა უზარმაზარი ხალიჩა გზაზე სასახლის წინ. მოსამსახურეებმაც ერთმანეთის მიყოლებით დაფინეს გზაზე ძვირფასი მოქარგული ხალიჩები და ფარდაგები.

ამასობაში შორიდან მომავალი ხალხიც გამოჩნდა.

— აგერ იესო... მოდის იესო... მოდიან... — ახშიანდა გზაზე გამოფენილი ხალხი.

იესო ქრისტე ვირზე იჯდა, თეთრი სამოსი ეცვა.

აქეთ-იქიდან მოციქულები ედგნენ, უკან ხალხის ნაკადი მოსდევდა.

პროცესია ნელა მოიწვედა წინ.

— იესო, ალილუია... იესო, ალილუია... — იძახდნენ ბავშვები, ქალები, მოხუცები. ყვავილების წვიმა არ ცხრებოდა..

იესო და მისი მოწაფეები იუსტინეს სასახლეს მოუახლოვდნენ. გზისპირას მომლოდინე ავადმყოფები და ხეიბრები იესოს წინ გადაუდგნენ და შველა სთხოვეს. მოწაფეებმა

დააპირეს გზა გაეთავისუფლებინათ, მაგრამ იესომ დაუშალა, ვირიდან გადმოვიდა და ავადმყოფებსა და ხეიბრებს მიმართა:

— ყოველ თქვენგანს რწმენისამებრ მოგეგოთ! — და ხელები მათკენ გაიშვირა.

ავგუსტამ, იუსტინემ, ამონ-რამ და ყველამ, ვინც ახლოს იდგა, ან ხეზე იჯდა, ან მაღალი იყო, დაინახეს, როგორ ხდებოდა სასწაული: ყრუმ ყვირილი დაიწყო — მესმისო; ბრმა გაოგნებული იყურებოდა აქეთ-იქით — ვხედავ, ვხედავო; კაცი, რომელიც შეიღებმა საწოლით გამოიყვანეს, ფეხზე წამოდგა — მოვრჩი, შვილებო, მოვრჩიო, გაიძახოდა; ორად მოკაკეული ქალი წელში გაიმართა და ბედნიერმა შესძახა — ადამიანად ვიქეციო; კაცს, რომელსაც სახე და სხეული უკურნებელი წყლულებით ჰქონდა დაფარული, განიწმინდა და სიხარული-საგან ატირდა. ადამიანები ხან ერთს უყურებდნენ გარშემო, ხან მეორეს, რომ საკუთარი თვალით ეხილათ ხეიბარი, რომელსაც ფეხი მოურჩა, ბრმა, რომელმაც ქვეყანა დაინახა, დაწყლულებული, რომელსაც სხეული განეწმინდა. გაოცება, გაოგნება, გაკვირვება, აღტაცება — აი რას გამოხატავდნენ ისინი თავიანთი წამოძახილებით, სახით, ხელებით.

ბევრი განიკურნა, მაგრამ ზოგს არაფერი ეშველა: კუტი იყო და კუტად დარჩა, ბრმა იყო და ბრმად დარჩა, ენაბლუ იყო და ისევ ენაბლუობდა.

— ჩვენ რა დავაშავეთ, იესო!

— უფალო, ჩვენც მოგვხედე!

— გვიხსენი, უფალო!

ეხვეწებოდნენ ისინი და წყრებოდნენ მასზე: ეს რანაირი მესიააო, ზოგს კურნავს და ზოგს — არაო.

იესომ სიბრაღულით გახედა მათ.

— ოი, მოქმედნო ურჯულოებისა! — მიმართა იესომ, — ვინც მეუბნება „უფალო, უფალო!“, ყველა როდი განიწმინდება და განიკურნება, ან ყველა როდი შევა ცათა სასუფეველში! რატომ მიწოდებთ: „უფალო, უფალო!“ — და იმას არ აკეთებთ, რასაც გეუბნებით?

იესომ გზა განაგრძო და იუსტინეს სასახლის წინ გაჩერდა.

— ანდრია, აი ჩემი პატარა მწყემსი! — მიმართა ბკერდით მდგომ ანდრიას და ხელი ამონ-რასკენ გაიშვირა.

შემდეგ ავგუსტაზე მიუთითა, — ჭეშმარიტად გეუბნები შენ, ანგელოზი ანგელოზს ფრთებს უსწორებს!

ანდრიამ ტკბილად გაუღიმა ამონ-რას და ფიქრით უთხრა: „ვაძაყობ შენით, ჩემო ბოჭო!“

ამონ-რამაც ფიქრით უპასუხა: „ანდრია, ჩემო მასწავლებლო, მე შენით ვაძაყობ. გმადლობთ, ანდრია!“

ავგუსტა მონუსხულივით შეჰყურებდა იესოს და გულში ბეჭდებოდა მისი ყოველი სიტყვა, მოძრაობა, ხმა, მისი სახე.

იესომ გზა გააგრძელა. ამონ-რამ თვალი გააყოლა. გული სავსე ჰქონდა მოგიზგიზე ცეცხლით.

პროცესიამ ნელა ჩაიარა. ბევრი აედევნა მას.

გზაზე გამოსული ხალხი კიდევ დიდხანს საუბრობდა იესო ქრისტეზე, მის იგავენებსა და მცნებებზე.

განკურნებულნი ხალისით უყურებდნენ ყველას, რა სატანჯველისაგან იხსნა ისინი იესო ქრისტემ. ისინი კი, ვინც არ განიკურნა, იესოს აუგად იხსენიებდნენ და იძახოდნენ: ეგრემ მართლა მესია იყოს, ჩვენ ასე არ მოგვექცეოდაო. მაგრამ მათ ცოტა უსმენდა.

იუსტინემ ნათლად და გარკვევით მოისმინა, როგორ თქვა იესო ქრისტემ: „ანგელოზი ანგელოზს ფრთებს უსწორებსო,“ და იმასაც მიხვდა, რომ ამონ-რასა და ავგუსტაზე აძბობდა.

დღევანდელმა დღემ შეძრა იუსტინეს სული, გამოაღვიძა, გამოაფხიზლა და არჩევანის წინაშე დააყენა.

ეს-ეს არის იესო ქრისტემ მისი სასახლის წინ გზაზე გაიარა.

სულ ცოტა ხნის წინ კი ავგუსტა ამონ-რასთან ერთად ბაღში მოსეირნე დაინახა.

იუსტინემ ჯერ კიდევ არ იცოდა, რას უქადაგებდა იესო ადამიანებს, არაფერი იცოდა ცათა სასუფეველის შესახებ. მაგრამ ქრისტეს ცოცხალმა სახემ, მისმა ხმამ მასზე დიდი შთაბეჭდილება მოახდინა. იუსტინემ გუშანით იგრძნო, რომ მართლაც იხილა ძე ღვთისა, რომელსაც ხალხისათვის ცხოვრების განახლების კანონი მოაქვს. იუსტინე იესოს ქარაგმამ გააოცა და ჩააფიქრა: „ანგელოზი ანგელოზს ფრთებს უსწორებსო.“ „რას უნდა ნიშნავდეს ეს? — ფიქრობდა იუსტინე, — განა მართლ იმას, რომ ამონ-რა ავგუსტას ჯანმრთელობაზე ზრუნავს? რატომ თქვა იესომ — ფრთებს უსწორებსო, ან რა-

ტომ უწოდა მათ ანგელოზები? იესო ქრისტე და ამონ-რა — რა კავშირია მათ შორის?“ ამ კითხვებით მიმართა იუსტინემ თავის თავს და მხოლოდ ის დასკვნა გამოიტანა, რომ ამონ-რა, ეს პატარა ბიჭი, რომელიც მხოლოდ ცხრა წლისაა, ღვთის საქმეს ასრულებს. მაშ, ავგუსტას მორჩენაც ღვთის საქმეა.

იუსტინეს ეჭვები ამონ-რას მიმართ ერთბაშად დაიშხვრა.

ავგუსტა, იუსტინე და ამონ-რა დიდხანს იდგნენ გზაზე, უსმენდნენ ადამიანებს, რომლებიც ქრისტემ განკურნა.

ამონ-რას ისევ მაგრად ეჭირა ხელში ავგუსტას ხელი. ახლა იუსტინესაც მოჰკიდა ხელი და ორივე სასახლისკენ შეებრუნა. ამონ-რას ხელისგან იუსტინეს გულში უცბად შეიჭრა რაღაც ცხელი ნაკადი და სისხლში გადაინაცვლა. იუსტინეს მთელი სხეული აჟღერდა.

— ამონ-რა, — მიმართა იუსტინემ, როცა სასახლეში შევიდნენ, — თუ შეიძლება, მეც მოვუსმენ შენს საუბრებს ავგუსტასთან!

იუსტინეს ეგონა, ამონ-რა თავს შეიკავებდა, ან არაო, ეტყოდა იმის შიშით, რომ არ განმეორებულყოფო ის, რაც პირველ დღეს მოხდა. მაგრამ ამონ-რამ, რომლისთვისაც წარსული უკვე აღარ არსებობდა, თავისი მშვიდი და კეთილი ხმით უთხრა:

— კარგი, შეიძლება.



ოცდამეთექვსმეტე თავი

მე უკვე მყავს მამა, რომელიც მეზმარება საუნჯე დავიძკვიდრო ზეცაში

ამ დღის შემდეგ კიდევ სამმა დღემ გაიარა.

ავგუსტა ყოველდღიურად იცვლებოდა: მის სახეზე წაიშალა უკანასკნელი კვალი თითქმის სამწლიანი მძიმე ავადმყოფობისა და პირვანდელი სილამაზე დაუბრუნდა. ავგუსტას სულმა გაუძლო ავადმყოფობის გამოცდას — კიდევ უფრო ამაღლდა და აღივსო უფლის სიყვარულით.

სასახლეში სიცოცხლე აჩქეფდა.

ბაღში გამრავლდნენ ბუბულები და ერთმანეთს ეჯიბრებოდნენ სტენაში. სასწრაფოდ გულუხვად აკოკრდნენ და გაიშალნენ ბურქებზე ვარდები, დაამშვენეს და საამო სურნელით აავსეს იქაურობა.

ნაკადული კალაპოტში ველარ დაეტია — ცეკვა და ხტუნვა დაიწყო. სასახლეს ირმები შემოეჩვივნენ და ავგუსტას ეთამაშებოდნენ.

დროდადრო ღრუბლები ეშვებოდნენ და საინტერესო სანახაობებს ქმნიდნენ.

გაიხარეს მონებმა და მოსამსახურებმა, როცა თავიანთი კეთილი და ლამაზი ქალბატონი იხილეს.

იუსტინე ხარბად ისმენდა ამონ-რას საუბრებს ქრისტეზე, უყურებდა, როგორ კურნავდა ავგუსტას და როგორ მის თვალწინ იცვლებოდა მისი საყვარელი მეუღლე.

— რა ძალაა შენში? — ჰკითხა ამონ-რას და ხელებზე კოცნა დაუპირა.

ამონ-რამ არ დაანება.

— ზომ მოგახსენეთ, ბატონო, — უპასუხა იუსტინეს, — ღმერთმა განკურნა ავგუსტა. მე მხოლოდ მისი ნება აღვასრულე.

— მე ვღებულობ იესო ქრისტეს მოძღვრებას! — გრძნობით წამოიძახა იუსტინემ, — მითხარი, შემიძლია ჩემს თავს ქრისტიანი ვუწოდო?

ამონ-რამ გაიღიმა.

— ბატონო, მომავალში, ალბათ, ადამიანებს, რომლებიც ქრისტიანს ირწმუნებენ, ქრისტიანებს დაუძახებენ.

— ნუ მიწოდებ მე ბატონს, მე არ შემიძლია შენი ბატონი ვიყო.

იუსტინეს შეუყვარდა ამონ-რა — პატარა ბიჭი — რწმენისა და სიკეთის განსახიერება. რაც უფრო აკვირდებოდა მას, მით უფრო აოცებდა მისი ცოდნის სიღრმე და ყოვლისმომცველობა, წინასწარმეტყველური ნიჭი და მკურნალობის ძალა. ვერც წარმოედგინა იუსტინეს, რომ დადგებოდა დღე, როცა ამონ-რა თავის გზას გაუდგებოდა. ეს მას ავგუსტამ უთხრა:

— რას იზამს ამონ-რა, დარჩება თუ წავა ჩვენგან?

— როგორ თუ წავა?! — გაუკვირდა იუსტინეს, — სად უნდა წავიდეს?!

ავგუსტამ მხრები აიჩეჩა.

— ხვალ ჩემს მკურნალობას ამთავრებს... რას იზამს მერე?... წავა... — ავგუსტას სიხარულს წუხილი შეერია: მას უმძიმდა თავის სულიერ მასწავლებელთან დაცილება.

მაშინ იუსტინეს აზრმა გაუელვა.

— ჩემო ქალღმერთო, ვიშვილოთ ამონ-რა! გაეზარდოთ, როგორც შვილი. იყოს ის ჩვენი მემკვიდრე!

— არ მოისურვებს! მას თავისუფლების მეტი არაფერი უნდა... — თქვა ავგუსტამ.

მაგრამ იუსტინე დარწმუნებული იყო, რომ ამონ-რას კიდევ გაუხარდებოდა, თუ დიდებული მას მამობას შესთავაზებდა. ამიტომ მიიხმო თავისთან ამონ-რა, დაათვალიერებინა სასახლე და სამფლობელოები, უჩვენა საგანძურში ოქროთი სავსე საჭურჭლეები, უამბო, რა დიდებული ქონება და სამფლობელოები აქვს რომში. იუსტინეს ვერც წარმოედგინა, რომ უპატრონოდ დარჩენილი ცხრა წლის ბიჭი, რომელიც გაჭირვებაშია და მაწანწალობს, უარს იტყვოდა ყოფილიყო მემკვიდრე მდიდარი რომაელი არისტოკრატიისა.

— შენ იქნები ჩვენი არისტოკრატიული გვარის გამგრძელებელი. წამოიზრდები და, შესაძლოა, რომის კეისარი გახდე. ავგუსტას და მე გვინდა ხვალ წვეულებაზე გამოვუცხადოთ მოწვეულ დიდებულებს, რომ შენ ჩვენი შვილი და მემკვიდრე ხარ!

იუსტინე ელოდა ამონ-რას მორიდებულ სიხარულს და, რა თქმა უნდა, თანხმობას.

და ვიდრე ის მოლოდინში იყო, ამონ-რას თვალწინ სურათი დაიხატა: აი, მიჰყავს მაცდურს იესო გამოსაცდელად. აიყვანა მაღალ მთაზე, საიდანაც კარგად ჩანს წუთისოფლის ყველა სამეფო და მათი დიდება, და ეუბნება: „ყოველივე ამას შენ მოგცემ, თუ დამხობილი თაყვანს მცემ.“ იესო უშფოთველად უყურებს წუთისოფლის სამეფოებს და ეუბნება მაცდურს: „განვედ, სატანავ, ვინაიდან დაწერილია: უფალს, შენს ღმერთს ეცი თაყვანი და მხოლოდ მას ემსახურე!“ მაცდური უკმაყოფილო მიდის მისგან, იესოსთან კი ანგელოზები მოფრინდნენ.

— ბატონო... — მაგრამ იუსტინემ შეაწყვეტინა.

— ნუ მეძახი ბატონს, მამა დამიძახე...

— ბატონო, — მიმართა ამონ-რამ იუსტინეს მშვიდი ხმით, — მე უკვე მყავს მამა, რომელიც მეხმარება დავიმკვიდრო საუნჯე ზეცაში.

იუსტინე შეცბა, ვერც ბოლომდე ჩასწვდა პასუხის აზრს — ვინ მამაზე ან რა ზეციერ სიძლიერეზე ლაპარაკობდა ბიჭი, ნუთუ უარს იტყვის ასეთ ბედნიერებაზე?

ამონ-რამ ცოტა შეიცადა და გააგრძელა:

— ბატონო, იქნებ საინტერესო იყოს თქვენთვის ასეთი ამბავი. მოვიდა იესოსთან ერთი მთავარი და ჰკითხა: „კეთილო მოძღვარო, რა მოვიმოქმედო, რომ საუკუნო სიცოცხლე დავიმკვიდრო?“ იესომ უთხრა მას: „რატომ მიწოდებ კეთილს? არავინ არის კეთილი, გარდა ერთისა — ეს ღმერთია. ხოლო თუ საუკუნო სიცოცხლეში გინდა შესვლა, დაიცავი მცნებანი.“ „რომელი?“ — ჰკითხა მთავარმა. იესომ უპასუხა: „იცი შენ მცნებანი: არ იბრუშო, არ კლა, არ იპარო, არ იყო ცრუმოწმე, ნუ მოატყუებ, პატივი ეცი შენს ღელასა და მამას, გიყვარდეს მოყვასი შენი, ვითარცა თავი შენი.“ მთავარმა მიუგო: „მოძღვარო, ყოველივე ამას ჩემი სიჭაბუკიდან ვიცავდი. რაღა მაკლია?“ იესომ შეხედა მას, შეუყვარდა და უთხრა: „ერთი რამ გაკლია: წადი, რაც გაქვს, გაყიდე, ღარიბებს დაურიგე და ზეცაში გექნება საუნჯე. მერე მოდი და გამომყვი.“ შეწუხდა და დაღონდა მთავარი, რადგან ძალიან მდიდარი იყო...

იუსტინე დიდი ყურადღებით უსმენდა ამონ-რას და ცდილობდა კარგად გარკვეულიყო ნაამბობში.

ამონ-რამ დაასრულა:

— მთავარმა ვერაფერი უთხრა იესოს და განშორდა. მაშინ იესო თავის მოწაფეებს მიუბრუნდა და განუმარტა: „ჭეშმარიტად გეუბნებით თქვენ, ძნელია მდიდრისათვის ცათა სასუფეველში შესვლა. უმალ აქლემი გაძვრება ნემსის ყუნწში, ვიდრე მდიდარი შევა ცათა სასუფეველში.“

იუსტინე საგონებელში ჩავარდა. მიხვდა, რომ ამონ-რა უარს ამბობდა მისი მემკვიდრე გამზდარიყო და არც რაიმე ქონებით მოიხიბლებოდა. მაგრამ მდიდარი მთავრის ამბავი ბოლომდე ვერ გამოიცნო. „მეც ხომ ახალგაზრდა და მდიდარი მთავარი ვარ, როგორ მოვიქცე?“ — ჰკითხა თავის თავს და პასუხს დაუწყო ძებნა.

ამ დროს ამონ-რას ავეუსტას მოსამსახურემ მოაკითხა: ქალბატონი გიხმობთო.

იუსტინე მოეფერა ამონ-რას და ავეუსტასთან გაუშვა.

ავეუსტა ბაღში ელოდა ამონ-რას.

— აი, რა უნდა გიჩვენო! — და ბრტყელი თეთრი ქვა გაუწოდა, — ცხრა წლის ვიყავი, როცა მდინარეში ეს ქვა დაეინახე, დავწვდი და ამოვიღე, თუმცა კინალამ მდინარეში თან გამიყოლა. მას შემდეგ ეს ქვა ჩემს მფარველად გავიხადე და ყოველთვის თან დამქონდა. რაც ავად ვიყავი, სულ სასთუმალთან შედო. შეხედე, რა არის ზედ დახატული ან რა ლამაზი ხაზებია! ზოგჯერ მგონია, რომ რაღაც არის დაწერილი და ვცდილობ გამოვიცნო. გინახავს ასეთი რამ?

ამონ-რამ ქვა ყურადღებით დაათვალიერა, ავეუსტას ხელისგულებს დააკვირდა და ქვის ხაზებს შეადარა.

— ქალბატონო, ეს თქვენი ქვაწერილია.

ავეუსტას ძალიან გაუკვირდა ამონ-რას ნათქვამი.

— რა არის ქვაწერილი?! რატომ არის ქვაწერილი?!

— ქალბატონო, ეს ქვაწერილი მრავალი წლის წინათ გამოგიგზავნათ თქვენმა მასწავლებელმა, დიდმა სულმა. მასზე ჩაწერილია თქვენი ამქვეყნიური ცხოვრების მთავარი აზრი.

და ამონ-რამ ანდრიასეული გულმოდგინებით განუმარტა ავეუსტას, რას ნიშნავს ქვაწერილი და რა მნიშვნელობა აქვს მის ამოცნობას.

— თქვენ ბედნიერი ბრძანდებით, რომ საკუთარ ქვაწერილს მიაგენით და ცდილობთ ამოიცნოთ იგი.

ავგუსტამ უკან გამოართვა ქვაწერილი ამონ-რას.

— მაშ ეს ხაზები და ნიშნები მართლა რამეს ნიშნავს? — ეტყობოდა, რომ ავგუსტა ღელავდა.

— დიახ, მხოლოდ თქვენთვის, რადგან ეს ქვა თქვენთან გამოგზავნილი წერილია.

ავგუსტა ქვაში ჩაწერილ ნიშნებს დააკვირდა, სახეზე გაოცება აღებეჭდა, თვალები გაუფართოვდა.

— ამონ-რა, თითქოს ვცნობ ნიშნებს. დამეხმარე წავიკითხო!

— არა, ქალბატონო, — მიუგო ამონ-რამ, — თქვენს ქვაწერილს მხოლოდ თქვენ წაიკითხავთ. მე იმით დაგეხმარეთ, რომ გითხარით, რას ნიშნავს ქვაწერილი. და როცა ქვაწერილის საიდუმლოს გაიგებთ, თქვენვე უნდა მიიღოთ გადაწყვეტილება — გაჰყვებით თუ არა მინიშნებულ გზას.

— კარგი, რაკი ასეა, ვეცდები წავიკითხო, რა წერია ჩემს ქვაწერილზე!

ავგუსტა მოუთმენლობამ შეიპყრო, ხის ჩრდილქვეშ ბალახებზე მოიკეცა და ქვაწერილი მუხლებზე დაიდო. დიდხანს, მზის ჩასვლამდე, თავი არ აუწვევია. ხან პოულობდა გასაღებს, როგორ წაეკითხა ქვაწერილი, ხან ისევ კარგავდა მას. თითქოს ამოიცნო ზოგიერთი ნიშანი, მაგრამ ტექსტისა და ხაზების აზრი მაინც ვერ ამოიკითხა.

იუსტინეს ხმა გაისმა:

— ავგუსტა, ჩემო ქალღმერთო, სად ხარ?

ავგუსტა გამოერკვა. იუსტინემ შენიშნა ხის ქვეშ მჯდარი ავგუსტა და მისკენ წამოვიდა.

— უნდა გაგახარო, — უთხრა იუსტინემ, როცა მიუახლოვდა, — ხვალ ჩვენს წვეულებაზე მამაშენიც იქნება... გვეწვევა პროკურატორი პილატე, მეოთხედმთავარი ჰეროდე ანტიპა. წვეულება ისეთი დიდებული უნდა გექონდეს, როგორიც ამ სასახლეს არასდროს უნახავს!



ავგუსტა უფლის ანგელოზია

ავგუსტას მთელი ღამე თვალი არ მოუხუჭავს — სანთლების შუქზე ქვაწერილს ჩაჰკირკიტებდა.

„რას ნიშნავს ეს ხაზები? — ფიქრობდა ავგუსტა, — ხაზები წნულების დიდ კონას ჰგავს. კონაში ერთი მთავარი ხაზია, რომელსაც ხელებივით გამოუშვერია ორი ტოტი და ყველა ხაზი თავისკენ მოუზიდავს, თითქოს გულში ჩაუკრავს. ვთქვათ, ეს ხაზი მე ვარ, ეს ჩემი ცხოვრების გზაა. მაგრამ ეს ხაზები რაღა? რატომ ვიხუტებ მათ გულში? რატომ არის ასე ბევრი ხაზი ერთის გარშემო, რომლის შემდეგ ყველა მათგანი ისევ თავ-თავის გზით მიემართება? რატომ არიან ეს ხაზები უფრო პატარები და ნორჩები?“

ბევრი იფიქრა ავგუსტამ, მაგრამ პასუხს ვერ მიაგნო.

შემდეგ ნიშნებში სცადა გარკვევა და მათში სიტყვების ამოცნობა. იესოს ნათქვამი გაახსენდა: „ანგელოზი ანგელოზს ფრთებს უსწორებსო.“ „ანგელოზი! ხომ არ წერია აქ სადმე ეს სიტყვა?“ — გაიფიქრა ავგუსტამ და არც გაუჭირდა ბოლოსწინა ნიშნების ჯგუფი ამ სიტყვებისათვის მიემსგავსებინა. მალე ამის მეშვეობით კიდევ ერთი სიტყვა ამოიკითხა: „ნათელი;“ კიდევ მომდევნო სიტყვა; „უნათლოთა.“

ირიურაჟა. მზის პირველ სხივზე მასთან ამონ-რა მოვა. დღეს მეშვიდე დღეა და ამონ-რა დაასრულებს მკურნალობას. ავგუსტას იუსტინემ უთხრა, რომ ამონ-რამ უარი თქვა მათი მემკვიდრე და შვილობილი გახდეს. მაშ ავგუსტა ვერ გაუწევს მას დედობას. როგორ უნდა ავგუსტას, რომ დედა იყოს, ბევრი შვილი ჰყავდეს, გაზარდოს ისინი კეთილ და გულმონწყალე ადამიანებად. ავგუსტამ წარმოიდგინა, როგორი დედა იქნებოდა თავისი შვილებისათვის, როგორ ეყვარებოდა ისინი და მათაც ასწავლიდა სიყვარულს. „დედა, დედა, დედა...“ — დაუძახებდნენ შვილები... და უცბად აზრად მოუვიდა ეს სიტყვა მოესინჯა ქვაწერილის ნიშნებში. და რაოდენ დიდი იყო მისი განცვიფრება, როცა მეორე მწკრივი ნიშნებისა ამ სიტყვას დაემთხვა. მზის პირველი სხივი ჯერ კიდევ ემზა-

დებოდა გამოსაჩინად, როცა გახარებულმა ავეუსტამ ასჯერ მაინც გადაიკითხა მთლიანად ამოცნობილი წერილი. ბედნიერი იყო ავეუსტა: ქვაწერილმა გაუხსნა საიდუმლო, ალაპარაკდა მისი ქვაწერილი. სად არის ამონ-რა, რომ უთხრას, რას ამბობს მისი ქვაწერილი!

აკოცა ავეუსტამ ქვაწერილს, გულში ჩაიკრა.

შემდეგ მუხლებზე დადგა და ილოცა, მაღლი უძღვნა უფალს.

მზის პირველმა სხივამაც შემოიჭვრიტა ოთახში, კარებს კი ამონ-რა და იუსტინე მიადგნენ.

იუსტინემ ადრეც იცოდა, რომ ავეუსტას ერთი უცნაური ქვა ჰქონდა, ბევრჯერ ცნობისმოყვარეობით ატრიალა იგი ხელში. მაგრამ არასდროს უფიქრია, რომ მის ხაზებსა და ნიშნებში რაიმე აზრი იყო ჩადებული, თუმცა ძალიან უკვირდა: როგორ შექმნა ბუნებამ ასეთი მშვენიერი ქვა და ასე გონივრულად ამოქარგა იგი. ავეუსტას კი მისთვის ჯერ ნათქვამი არ ჰქონდა, რაც გუშინ ამონ-რამ ქვაწერილზე უთხრა. ამიტომ იუსტინე ვერ მიხვდა ავეუსტას აღტაცებისა და სიხარულის მიზეზს, ვერ გაიგო, რატომ მიეგება ამონ-რას, მუხლი მოუყარა, ხელები დაუკოცნა, თავი მკერდზე მიადო და ატირდა. იუსტინემ იფიქრა, განკურნების გამო უხდის მადლობასო.

ავეუსტა კი ახლა სხვა რამის გამო ტიროდა.

ეს იყო სიხარულის და ბედნიერების ცრემლები. ავეუსტა მადლობას უხდიდა პატარა ბიჭს, ანგელოზს, რომელმაც ფრთები გაუსწორა და ცხოვრების გასაღები აპოვნინა.

რისთვის სჭირდება აღამიანს ფრთები? გასაფრენად, რა თქმა უნდა. სულს სჭირდება ფრთები, რომ აფრინდეს. ამონ-რამ სწორედ სულის ფრთები გაუსწორა ავეუსტას და იმ გზის პოვნაშიც დაეხმარა, საითკენაც ავეუსტა უნდა გაფრინდეს.

— ქალბატონო, აბრძანდით! — უკვე მერამდენედ სთხოვა ამონ-რამ ავეუსტას, მას კი არ ესმოდა.

იუსტინემ მხრებზე მოჰკიდა ხელი და ააყენა.

იუსტინეს არასოდეს უნახავს ავეუსტას ასეთი ბედნიერი სახე, არც ასეთი ლამაზი უნახავს იგი ოდესმე — ქალი ანათებდა.

— ამონ-რა, მე წავიკითხე ჩემი ქვაწერილი! — ხმის კანკალით წარმოთქვა ავგუსტამ, — აი, რა წერია აქ!

ავგუსტამ თითი გაადევნა ქვაში ჩაკირულ ნიშნებს და ნელა ამოიკითხა:

„იყავნ
დედა უდელოთა,
ნათელი
უნათლოთა,
ანგელოზი უფლისა.“

ამონ-რამ გაიღიმა. თითქოს ცისფერმა ალმა გადაუარა სახეზე, ისეთი იყო მისი ღიმილი.

იუსტინემ ვერაფერი გაიგო, გარდა იმისა, რომ ქვაზე თურმე რაღაც ყოფილა დაწერილი, და ავგუსტამ შეძლო მისი წაკითხვა. ამიტომ ავგუსტას ჰკითხა:

— რას ნიშნავს ეს სიტყვები? რატომ გიხარია ასე მათი წაკითხვა?

— ჩემო კეთილო მბრძანებელო, — მიმართა ავგუსტამ იუსტინეს და კისურზე მოეხვია, — ამ ქვაზე ჩემი ცხოვრების გზაა ჩაწერილი. ეს ჩემი ქვაწერილია, რომელიც ჩემმა მასწავლებელმა, დიდმა სულმა ოდესღაც გამომიგზავნა!

— ქვაწერილი?! — გაიკვირვა იუსტინემ, — ეს რაღაა? და როგორია შენი ცხოვრების გზა?

ავგუსტამ დააპირა რაღაც ეთქვა, მაგრამ გაჩუმდა. მერე თითქოს თავისთვის ჩაილაპარაკა:

— ჩემი ცხოვრების გზა... მართლაც, როგორია ჩემი ცხოვრების გზა? რას მეუბნებიან ეს სიტყვები და ხაზები?

— ქალბატონო, — მიმართა ამონ-რამ, — თქვენ ამოიცანით ტექსტი, მაგრამ ახლა უნდა ამოიცნოთ მთავარი: ტექსტისა და ხაზების აზრი. ამის საიდუმლო თქვენმა გულმა იცის, ჰკითხეთ მას. მაშინ სრულად გეცოდინებათ გზა, რომელსაც სულის სრულყოფისკენ მიჰყვებართ. ეს ცოდნა არჩევანის წინაშე დაგაყენებთ: გაჰყვებით ამ გზას, რომელიც არ გიქადით უზრუნველობას, თუ არ გაჰყვებით მას და სხვა გზას აირჩევთ.

ავგუსტამ დიდი ყურადღებით მოისმინა ამონ-რას ღარიბება.

— ახლა დაბრძანდით, — სთხოვა ამონ-რამ ავგუსტას.

იუსტინეს ბევრი კითხვა გაუჩნდა ამონ-რასა და ავგუსტას საუბრის გამო, მაგრამ თავი შეიკავა მათგან, რადგან ამონ-რა ავგუსტას მკურნალობას შეუდგა.

ამონ-რამ საწოლზე ჩამოხვდარი ავგუსტას ორივე ხელი თავის ხელებში დაიჭირა და გულის ცეცხლი მოიძარჯვა. გული ბუნარივით აგიზგიზდა და ამონ-რამ უბრძანა ცეცხლს მისი ხელების მეშვეობით ავგუსტას სხეულში გადასულიყო.

ავგუსტა უჩვეულო ჟრუანტელმა შეიპყრო.

გრძნობდა, რაღაც ძლიერი ხდებოდა მის სხეულში, სულში, რაღაც იღვენებოდა და რაღაც მკვიდრდებოდა; ხდებოდა რაღაც იღუმალი, უთქმელი.

იუსტინეც გრძნობდა ამ იღუმალ ძალას და ხელავდა კიდევ, როგორ ემატებოდა სინათლე ავგუსტას სახეს.

რამდენიმე წუთიანი ღუმილის შემდეგ ამონ-რამ წყნარი, მშვიდი და რწმენით სავსე ხმით დაიწყო:

— ისმინეთ იესო ქრისტეს გაფრთხილება განკითხვის დღეზე. მოვა კაცის ძე თავისი დიდებით და ყველა ანგელოზი მასთან ერთად, და დაჯდება დიდების ტახტზე. შეიყრება მის წინაშე ყოველი ერი და იგი გამოარჩევს მათ ერთიმეორისაგან, როგორც მწყემსი გამოარჩევს ხოლმე თხებს ცხვრებისაგან. და დააყენებს ცხვრებს თავის მარჯვნივ და თხებს — მარცხნივ. მაშინ ეტყვის მეუფე თავის მარჯვნივ მდგომთ: „მოდით, მამაჩემის კურთხეულნი, დაიპკიდრეთ წუთისოფლის დასაბამიდან თქვენთვის გამზადებული სასუფეველი. ვინაიდან მშვიდა და საჭმელი მომეცით, მწყუროდა და მასვით; უცხო ვიყავი და მიმიღეთ; შიშველი ვიყავი და შემომოსეთ; სნეული ვიყავი და მომარჩინეთ; საპყრობილეში ვიყავი და მომაკითხეთ.“ მაშინ მართალნი ეტყვიან მას პასუხად: „უფალო, როდის გიხილეთ შენ მშვიერი და დაგაპურეთ? ან მწყურვალი და გასვით? როდის გიხილეთ უცხო და მიგიღეთ? ან შიშველი და შეგმოსეთ? როდის გიხილეთ შენ სნეული ან საპყრობილეში მყოფი და მოგაკითხეთ?“ მეუფე მიუგებს მათ პასუხად: „ჭეშმარიტად გეუბნებით თქვენ: რაც კი გაუკეთეთ ერთს ამ ჩემს მცირე ძმათაგანს, მე გამიკეთეთ.“ მაშინ იმათაც ეტყვის, ვინც მარცხნივია: „წადით ჩემგან, წყვეულნი, საუკუნო ცეცხლში, რომელიც გამზადებულია ეშმაკისა და მისი ანგელოზებისათვის. ვინაიდან მშვიდა და საჭმელი არ მომეცით; მწყუროდა და არ მასვით; უცხო ვიყავი და არ მიმიღეთ; შიშ-

ველი ვიყავი და არ შეგშოსეთ; სნეული ვიყავი და საპყრობილეში და არ მომინახულეთ.“ ისინიც მიუგებენ პასუხად: „უფალო, როდის გიხილეთ შენ მშვიერი, ან მწყურვალი, ან უცხო, ან შიშველი, ან სნეული, ან საპყრობილეში და არ გემსახურეთ?“ მიუგებს უფალი პასუხად: „ჭეშმარიტად გეუბნებით თქვენ: როგორც არაფერი გაუკეთეთ არც ერთს ამ მცირეთაგანს, არც მე გამიკეთეთ.“ და წავლენ ესენი საუკუნო სატანჯველში, ხოლო მართალნი — საუკუნო სიცოცხლეში.

ამონ-რა გაჩუბდა. მისი ხელებიდან კვლავ მიედინებოდა გულის ცეცხლი ავგუსტას სხეულსა და სულში.

ავგუსტა და იუსტინე ფიქრებში ჩაიძირნენ.

ავგუსტა იმაზე ფიქრობდა, თუ რას ნიშნავდა „დღეა უდღეოთა“ და „ნათელი უნათლოთა“ და როგორ უნდა აღესრულებინა თავისი ვალი, რათა მართალი შეხვედროდა განკითხვის დღეს.

იუსტინეს კი არ ასვენებდა მდიდარი თავადის ბედი. რას იზამს იგი: გაყიდის მთელ თავის ქონებას, დაურიგებს ღარიბებს და გააყვება იესოს, თუ ვერ შეეღება თავის სიმდიდრეს.

ამონ-რამ აცალა ავგუსტას და იუსტინეს უფიქრათ.

კარგა ხნის შემდეგ მშვიდად თქვა:

— ქალბატონო, თქვენ უკვე ხმაც დაგიბრუნდათ. თქვენი სიმღერა ბევრს მოხიბლავს.

ავგუსტას სახე გაებადრა.

ნუთუ მართლა შეუძლია დაუკრას არფაზე და ძველებურად იმღეროს? სიმღერაში იგი ყოველთვის შვებასა და აღმაფრენას განიცდიდა.

— ახლავე შემიძლია ვიმღერო? — ჰკითხა მოუთმენლად ამონ-რას.

— დიახ, ქალბატონო.

და მაშინვე ავგუსტამ დიდი ოთახის დავიწყებულ კუთხეს მიმართა. აქ უკვე საბი წელია უქმად დევს მისი ოქროს არფა. დიდი ხანია დაკარგა იმედი, რომ იგი ოდესმე კვლავ დასჭირდებოდა. ოჰ, რამდენი მტკერი დასდებია! ავგუსტამ სათუთად გაწმინდა არფა, ხმები გაუსინჯა, ააწყო. შემდეგ ამონ-რასა და იუსტინეს წინ დაჯდა და სიმღერისათვის მოემზადა.

— ამონ-რა, რომ ვერ შევძლო? ხმამ რომ მილაღატოს?

— ნუ შიშობთ, ქალბატონო, თქვენ კიდევ უფრო უკეთესად იმღერებთ, ვიდრე ადრე! — რწმენით უპასუხა ამონ-რამ.

ავგუსტამ ფრთხილად მოსინჯა არფის სიმები. თითები უფრო და უფრო თამამად ათამამდნენ არფაზე. ოთახი ჯადოსნური ბგერებით გაივსო.

იუსტინე დაძაბული ელოდა ავგუსტას ხმას. ნუთუ მართლა კიდევ მოისმენს ავგუსტას ღვთიურ სიმღერას?

და აი ავგუსტამ არფის ბგერებში თავისი ხმა ჩააქსოვა. ჯერ ფრთხილად შეარხია ჰაერის ნაკადი და, როგორც კი იგრძნო, რომ ხმა ემორჩილებოდა მის ნებას, ველარ მონთმინა და მკერდიდან, გულისა და სულის სიღრმიდან დაგუბებულმა სიხარულმა ამოხეთქა. მღეროდა ავგუსტა. მღეროდა მაღლიერებისა და სიყვარულის სიმღერას, უფლის საგალობელს. ეს იყო მისი მხურვალე ლოცვა, უფლისადმი აღვლენილი. სახეს სიხარულის ცრემლები უსველებდა. დიდ ოთახში მისი სიმღერა ვერ დაეცია, სარკმლებიდან გაიჭრა, კედლები გაკვეთა, კარები ჩამოიღო. სიმღერამ მოიცვა მთელი სასახლე, ბაღი, ქუჩა, სადაც ოთხი დღის წინ იესო ქრისტემ გაიარა. ბულები აჰყვნენ ავგუსტას სიმღერას, წყარო გაჩერდა და გაისუსა, უხილავმა ხელმა ღრუბლები ცაზე ხატებად ჩამოქნა. ქუჩაში ხალხი შეიკრება და სმენად იქცა. ოთახში კი იუსტინეს ღაპალუპით ჩამოსდიოდა ცრემლები, იწმინდებოდა და ფაქიზდებოდა მისი სული.

გულის ცეცხლისაგან დაცლილი და დასუსტებული ამონ-რა ავგუსტას სიმღერისგან იკრებდა ძალას.

ამონ-რამ აღასრულა ღვთის ნება.

ავგუსტამ სიმღერა-ლოცვა-საგალობელი დაასრულა.

არფის ბგერებში ჩაქსოვილი მისი ხმა მარადიულობად იქცა.

— ავგუსტა, ჩემო ქალღმერთო! — შეჰყვირა აღტაცებისგან იუსტინემ, როგორც კი ავგუსტამ სიმღერა დაასრულა.

ბედნიერ, გახარებულ ავგუსტას თავი სიზმარში ეგონა. რა თქმა უნდა, იგრძნო ავგუსტამ, რომ მისი უფლის სადიდებელი სიმღერა ყველა ადრინდელ სიმღერას აჭარბებდა. ავგუსტას სიყვარული და მაღლიერება, ერთგულება და თავდადება ამოჰქონდა გულიდან და ამ გრძნობებს სამყაროს ჰყენდა, მაღლა აგზავნიდა — ღმერთთან, დაბზავებულთან,

შემოქმედთან. ავეუსტას სახე ასხივებდა, მისი ღიმილი ცისფერ ალად თამაშობდა მის მშვენიერ სახეზე.

— ავეუსტა, ავეუსტა, ჩემო ქალღმერთო! — ვერ ისვენებდა იუსტინე. იგი მეუღლეს მიეჭრა და ისევე, როგორც ათენში ხუთი წლის წინ, ხელში აიტაცა და დაატრიალა. ავეუსტა იცინოდა, იცინოდა და მისი სიცილიც სიმღერას ჰგავდა.

იუსტინემ ავეუსტა ფრთხილად დაუშვა და ახლა ამონ-რას წინ დაიჩოქა, ხელები დაუკოცა, ჩაიხუტა.

— რა გავაკეთო შენთვის, საკვირველო ბიჭო, რითი დაგასაჩუქრო! შენ ავეუსტა გადამირჩინე, რითი გადაგიხადო ღირსეული ვალი! — აღმოხდა იუსტინეს.

იუსტინე დარწმუნდა, რომ ამონ-რას ვერ მოხიბლავდა ვერავითარი ქონება — ოქროთი სავსე სკივრები თუ ძვირფასეულობანი. მზად იყო დაესაჩუქრებინა იგი გულუხვად, მაგრამ რა უნდა ყოფილიყო ასეთი საჩუქარი? აი, თუნდაც ამ სასახლეს აჩუქებს, თვითონ კი ახალ სასახლეში გადავა, როგორც კი იაკობი მშენებლობას დაასრულებს. უბოძებს ღიდ საფლობელოს, სადაც მეფესავით იცხოვრებს. მაგრამ მიიღებს განა ამონ-რა ამ საჩუქარს? მოისურვებს განა მეფესავით ცხოვრებას? იუსტინეს ახსოვდა, რა უთხრა ამონ-რამ ერთი კვირის წინ, როცა ის ავეუსტასკენ მოჰყავდა. მაშინ იუსტინე დაპირდა: მეუღლეს თუ გადამირჩენ, შენს წონა ოქროს მოგცემო. ამონ-რამ მიუგო: მე არაფერი მინდა თქვენგან, მაგრამ თუ ინებებთ და ერთ კეთილ საქმეს შეასრულებთ, თქვენსავე ღირსებას დაამშვენებთო. იუსტინე მზად იყო ყველაფერი გაეკეთებინა, რასაც ამონ-რა ეტყოდა.

— მითხარი, ამონ-რა, რითი გადაგიხადო ვალი? — შესთხოვა იუსტინემ.

— ბატონო, — მიუგო ამონ-რამ, — ავეუსტა ღვთის ნებით განიკურნა, მე მხოლოდ აღვასრულე უფლის ნება. თქვენ ჩემს წინაშე არ გაქვთ ვალი. უფლისგან კი ყველანი მარადიულად დავალებულნი ვართ.

— ამონ-რა, რა გავაკეთო უფლისათვის?

— ბატონო, გაიღეთ ხარჯები ტაძრის მშენებლობისათვის ახალი სასახლის წინ, იორდანის მეორე ნაპირას. მშენებლობა კი უცნობ ხუთორმოძღვარს მიანდეთ. — უპასუხა ამონ-

რამ, — ეს კეთილი საქმე თქვენი ღირსების შესაფერისი იქნება.

იუსტინე არც დაფიქრებულა.

— თანახმა ვარ! აშენდეს იქ ტაძარი დიდებული, როგორც არსად აშენებულა!

და უმაღლვე დაუმატა:

— მაგრამ არ არის ეს საკმარისი უფლის სამსახურად. რა შემიძლია კიდევ გაეაკეთო?

— გული გეტყვით, ბატონო.

— გული მეტყვის, მაგრამ ვიდრე მე გულის ენას ვისწავლი, დრო გაეა! შენ მირჩიე!

— ბატონო, რაკი ასეა, მოგახსენებთ, — ამონ-რა წამით დაფიქრდა, — ბატონო, რად გინდათ თქვენ ახალი სასახლე? განა საკმარისი არ არის, რაც გაქვთ? მიეცით ახალი სასახლე ავგუსტას, რომ გამოიყენოს უფლის დავალებისამებრ. ის ხომ უდედოთა დედაა და უნათლოთა ნათელი. ავგუსტა უფლის ანგელოზია.

იუსტინე შეცბა.

რამდენი ხანია ელოდება ახალ სასახლეს. ახალი სასახლით აპირებდა სახელის განთქმას და იუდეაში თავისი ღიღების დამკვიდრებას. „აი ჩემი გამოცდაც, — გაიფიქრა იუსტინემ, — მე ან ის მდიდარი თავადი ვარ, რომელმაც არ ისურვა იესოს მცნების შესრულება, ან ის, ვინც ნემსის ყუნწში გაძვრება, რათა დაიმკიდროს ცათა სასუფეველი.“

და იუსტინეს სახე გაუნათდა.

— ავგუსტა, ჩემო ქალღმერთო, შენია ახალი სასახლე! შენ ხარ დედა უდედოთა და ნათელი უნათლოთა, ანგელოზი უფლისა! გამოიყენე, როგორც საჭიროდ სცნობ!

ავგუსტას თავში უცბად გაიელვა ქვაწერილის საიდუმლომ — „დედა უდედოთა, ნათელი უნათლოთა,“ ხაზების კონა ქვაზე... ახალი სასახლე... რას უნდა ნიშნავდეს ყოველივე ეს?

იუსტინემ კი ისევ ამონ-რას მიმართა:

— არც ეს არის საკმარისი უფლის სამსახურად...

— დამიანი უფლის სამსახურს ვერასდროს დაასრულებს. — უპასუხა ამონ-რამ იუსტინეს.

— მე ვიწყებ ამ სამსახურს, საოცარო ბიჭო, ამიტომ იქნებ გავყიდო მთელი ჩემი ქონება და ღარიბებს გაუუნაწილო?

ამონ-რამ იგრძნო, რომ იუსტინესთვის უცხო ხდება საკუთრების განცდა, მისთვის ძალას კარგავს ქონება და მაღალი მღვდმარეობა, გული მისი სიკეთის ქმნისათვის ემზადება. არა, იუსტინემ არ უნდა გაყილოს ქონება და დაარიგოს. ასე სიმდიდრე გაუბარაქოვდება. მან თავისი ქონება კეთილ საქმეთა ქმნას უნდა მოახმაროს.

— ბატონო, ძველ სიბრძნეს მოგახსენებთ, — მიუგო ამონ-რამ, — ერთხელ მოწაფეებმა ჰკითხეს კურთხეულს: „როგორ გავიგოთ მცნება, რომელიც მოგვიწოდებს, რომ უარი ვთქვათ საკუთრებასა და ქონებაზე? ერთმა მოწაფემ მიატოვა ყველა ნივთი და მთელი ქონება ღარიბებს დაურიგა, შენ კი მაინც უსაყვედურებ მას მესაკუთრეობას. მეორემ არ მიატოვა არაფერი, მაგრამ შენი საყვედური არ დაუმსახურებია.“ კურთხეულმა უპასუხა: „მესაკუთრეობის გრძნობა განიზომება არა ქონებითა და ნივთებით, არამედ აზრებით.“ ამრიგად, თუ ადამიანი გათავისუფლდება საკუთრების მომწამვლელი სუნთქვისაგან, მაშინ ქონება ხელს არ შეუშლის დაიმკიდროს ცათა სასუფეველი. ქონების დახმარებით იგი უფლის საქმეებს გააკეთებს: ტაძრებს და ხილებს ააგებს, გზებს გაიყვანს, ჭებს გათხრის.

იუსტინემ გაიხარა.

— ამონ-რა, მე უკვე ვუგებ ჩემს გულს! გული მეუბნება, როგორ ვიცხოვრო! მე ავგუსტას, უფლის ანგელოზს, ამოვუღებ გვერდში და მასთან ერთად ვიღვანებ!

იუსტინემ შვებით ამოისუნთქა: ასეთი ბედნიერი და ნათელი დილა არასოდეს დამდგარა მის ცხოვრებაში.



ოცდამეთვრამეტე თავი

სასახლეში დიდი წვეულება დიდი გლოვით დასრულდა

— ქალბატონო, ქალბატონო, მამათქვენი მობრძანდა! — დაიძახა კარების მიღმა მოსამსახურე ქალმა.

— მამა! — შესძახა ავგუსტამ და განხარებული გაიქცა გარეთ მამის შესახვედრად. ავგუსტას აღარ სჭირდებოდა ამონ-რას ხელი.

იუსტინე ფეხზე წამოდგა და იგრძნო, როგორ გამსუბუქდა და ამაღლდა ამ დილით: ირგვლივ ყველაფერს უკვე სხვა თვალთ შეხვდა, გულიც სხვანაირად უძგერდა.

— გმადლობთ, ამონ-რა! შენ ცხოვრების გზა მაპოვინე! ახლა კი შეხვდები ჩემს მეგობარს და სიმამრს!

ავგუსტა მამას ყელზე ეხვეოდა, კისკისებდა. მამას არ ენახა ავადმყოფი ავგუსტა, მხოლოდ იცოდა, რომ ქალიშვილი ძალიან ცუდად იყო და მკურნალები მის გადარჩენას შეუძლებლად თვლიდნენ. ახლაც იმიტომ მოიჩქაროდა, რომ ქალიშვილი ცოცხალი ენახა. იუსტინემ ის წვეულებაზე მოიწვია, მაგრამ იფიქრა: მიმაღავენ ავგუსტას მდგომარეობასო. მამა ბედნიერიც იყო და გაკვირვებულიც, როცა თავისი ქალიშვილი კიდევ უფრო მშვენიერი იხილა, ვიდრე ათენიდან გამოისტუმრა.

— წვეულება გვაქვს, მამა, დიდი წვეულება!

— წვეულება იმის გამო, რომ ავგუსტა გადარჩა, განიკურნა! — დაუმატა იუსტინემ.

— მკურნალები საიდან მოიყვანეთ? — იკითხა ავგუსტას მამამ.

— მკურნალი ერთია, მამა, პატარა ბიჭი, ამონ-რა! გიჩვენებთ მას, ჩვენს ამონ-რას! — ავგუსტამ მოსამსახურეებს სთხოვა ამონ-რასთვის დაეძახათ.

— მალე სტუმრები მოვლენ, მოემზადე! — უთხრა იუსტინემ ავგუსტას, თვითონ კი სიმამრი ბაღში მიიწვია.

ავგუსტა თავის ოთახში გაიქცა და ჩაიკეტა.

მალე სტუმრებმა იწყეს მოსვლა. მოვიდნენ იუდეის პროვინციათა რომაელი მმართველები, მხედართმთავრები, იუდეველი წარჩინებულები, მღვდელმთავრები. ბევრი მოვიდა მეუღლითა და ქალიშვილით. სასახლის ბაღი მოწვეულებით გაივსო. რა ენაზე არ ლაპარაკობდნენ ისინი: რომაულად, არამეულად, ბერძნულად, არაბულად.

— მობრძანდა იუდეის პროკურატორი პილატე პონტოელი თავისი მეუღლით! — გამოაცხადეს მსახურებმა.

იუსტინე მიეგება მათ და პატივი მიაგო.

ცოტა ხანში ისევ გამოაცხადეს:

— მობრძანდა მეოთხედმთავარი ჰეროდე ანტიპა!

იუსტინე მასაც პატივისცემით შეხვდა.

ყველამ იცოდა, რომ პროკურატორ პილატეს და ჰეროდე ანტიპას მტრობა ჰქონდათ ერთმანეთში. ამიტომ გაიკვირვეს, მეგობრულად რომ შეხვდნენ ისინი ერთმანეთს.

სტუმრები ავგუსტას ბაღში დასეირნობდნენ და ყველაფერი უკვირდათ, რასაც ხედავდნენ: ირმები თავს უხრიდნენ პატივცემულ ღიღებულებს, ვარდები უხვად აფრქვევდნენ სურნელს, წყარო უცნაურად იქცეოდა — რაკრაკებდა და ხტოდა, მხეფებით ესალმებოდა მათ, ბულბულები მხრებზე ასხდებოდნენ ქალბატონებს და საგალობლებს უგალობდნენ, ლამაზი პატარა ღრუბლები ქოლგებად ეფარებოდნენ მზეზე მოსიარულეებს.

მონებსა და მსახურებს ლამაზი თასებით ნაირ-ნაირი სასმელი და ხილი დაჰქონდათ.

ყველა ავგუსტას გამოჩინას ელოდა. იცოდნენ, რომ ავგუსტა ძალიან ავად იყო, სილამაზე ჩაუქრა, ძალა გამოეღია, ბნელი ოთახიდან არ გამოდიოდა და არც არავის უჩვენებდა სახეს. სტუმრების ცნობისმოყვარეობა ზღვარს იყო მისული: როგორ გამოიყურება ახლა ავგუსტა, ვინ განკურნა იგი.

და აი, ავგუსტა სასახლის კიბეებზე გამოჩნდა; და თუმცა არავის გამოუცხადებია, ქალბატონი ავგუსტა მობრძანდებო, ყველამ უცბად გაიხედა კიბეებისკენ და დაინახა სრულყოფილი მშვენიერება. ავგუსტას თეთრი აბრეშუმის კაბა ეცვა, მხრებზე ღრუბლის მოსასხამი ჰქონდა, შუბლიდან წაყროთა მარგალიტი ფერად სხივებს ისროდა. მისი სახე სიკეთესა და სათნოებას აფრქვევდა. ავგუსტას ირემი მიეგება და მის წინ ლამაზი რქები დახარა, ხოლო ნაცნობი ბულ-

ბული მარცხენა მხარზე დააჯდა და გალობა წამოიწყო. ღრუბელთა ჯგუფმა ავგუსტას თავზე კოხტა საჩრდილობელი შექმნა და ავგუსტას გაჰყვა. ავგუსტამ კიბეები ჩაიარა და სტუმრებისაკენ გაემართა.

მასთან პირველი პროკურატორი პილატე პონტოელი მიიჭრა, ხელზე ეამბორა და მისი მშვენიერებით აღტაცებულმა წარმოთქვა:

— ო, ავგუსტა, შენი სილამაზე აფროდიტეს შეშურდება!

იქვე მეოთხედმთავარი ჰეროდე ანტიპა გაჩნდა. იგი აქამდე იუსტინეს ბალით იყო მოხიბლული და, ცოტა არ იყოს, შური აღეძრა. ავგუსტას ხილვამ კი წონასწორობიდან გამოიყვანა. იგი პირველად ხელავდა მას, გაგებული ჰქონდა მისი სილამაზის შესახებ, მაგრამ ასეთ სრულყოფას იგი არ ელოდა. ავგუსტას წინაშე მდებლად დახარა თავი, ხელზე ეამბორა, იუსტინეს მიმართ შური გაუორკეცდა და ბოროტგანზრახული ხუმრობით უთხრა:

— ქალბატონო, თქვენი გულისათვის მზად ვარ გავწირო ჩემი მეოთხედი სამთავრო...

ავგუსტას ირგვლივ სწრაფად შეიკრა მამაკაცების წრე. ულოცავდნენ გამოჯანმრთელებას, უძღვნიდნენ ქების სიტყვებს. ქალთა ერთი ჯგუფი გაწყრა, ქმრებმა რომ მიატოვეს და ავგუსტასკენ გაქანდნენ. სხვები ავგუსტას სილამაზეს ნატრობდნენ.

ავგუსტამ მამაკაცთა წრე გაარღვია და ქალებთან გადაინაცვლა. ყველას ღიმილით მიესალმა და მადლობა მოახსენა მობრძანებისათვის, ზოგი მოიკითხა. ვინ ავგუსტას წამოსასხამით დაინტერესდა და არ იჯერებდა, რომ იგი ღრუბლისგან იყო შექმნილი და ღრუბლებმა უძღვენეს. ერთმა ქალიშვილმა გააკვირვებით ჰკითხა:

— ავგუსტა, რა სამკაული გაქვს შუბლზე?

ავგუსტამ შუბლიდან მარგალიტის მარცვალი მოიხსნა და ხელის გულზე დაიდო.

— ნახეთ, რას იზამს ეს წყაროს მარგალიტი! — უთხრა ცნობისმოყვარე ქალებს.

და რაოდენ დიდი იყო მათი გაოცება, როცა მარგალიტის მარცვალი მყისვე დაიძრა ხელისგულიდან, გაიარა ავგუსტას მკლავი, ყელი, საფეთქელი და თავის ადგილს დაუბრუნდა.

— ჩვენი ბალის წყარომ მიძღვნა ეს მარგალიტი! — განუმარტა ავეუსტამ ქალებს, მაგრამ მათ ვერც ის დაიჯერეს, რაც საკუთარი თვალთ იხილეს, და ვერც ის, რომ ეს იშვიათი ქმნილება წყაროს საჩუქარი იყო.

ისევ პროკურატორმა პილატემ გამოიჩინა სითამამე.

— ამბობენ, — თქვა მან, — ავეუსტა მხოლოდ ღმერთებისთვის მღერისო. იქნებ ჩვენთვისაც იმღეროს ავეუსტამ?

საერთო თხოვნამ ავეუსტა წააქეზა. სასწრაფოდ მოუტანეს მოსამსახურებმა ოქროს არფა. ავეუსტა კიბის საფეხურზე ამალდა, არფა მოიმარჯვა და სიმები მოზიდა. მალლა მისწრაფებულმა არფის ბეგრებმა მალე ავეუსტას ხმაც გაიყოლეს. ავეუსტა უფლის საგალობელს მღეროდა. ახალი ღოცვა-სიმღერა-საგალობელი იმწამსვე იბადებოდა ავეუსტას გულში და უფლისკენ მიქროდა — მალლა, ხოლო გზადაგზა სამყაროთა მბრძანებლების ყურს ატკობდა. მღეროდა ავეუსტა თავდავიწყებით, მისი არსებიდან აღმომხდარმა ხმამ, არფის ბეგრებში ჩაჩუქურთმებულმა, ყველას გული აუბგერა, ვის ნეტარება მოჰგვარა და სიხარულით აატირა, ვინ — შეამფოთა და საგონებელში ჩააგდო.

ავეუსტას სიმღერამ მოსვენება დაუკარგა პილატესაც და ჰეროდესაც. ავეუსტას ხმა თითქოს სულის განწმენდას სთხოვდა მოწვეულებს, ცოდვათა მონანიებისკენ მოუწოდებდა. ცოდვა კი, რომელიც გუშინ პილატე პონტიელმა და ჰეროდე ანტიპამ ჩაიდინეს, ავეუსტას სიმღერამ მტანჯველ განცდად გადაუქცია.

სწორედ გუშინ იუდეველთა მღვდელმთავრებმა და მედავითნეებმა პილატეს, იუდეის გამგებელ-პროკურატორს — შეპყრობილი, ნაცემი და შეურაცხყოფილი იესო მოჰგვარეს და მისი სიკვდილით დასჯა მოსთხოვეს. პილატემ დაკითხა იესო, მაგრამ ვერ ჰპოვა მასში დანაშაული. მაშინ ჰკითხა მღვდელმთავრებს:

— განა გალილეელია ეს კაცი?

— ნაზარეელია! — მიუგეს მღვდელმთავრებმა.

ნაზარეთი მეოთხედმთავარ ჰეროდე ანტიპას სამთავრობოში შედიოდა.

პილატემ იფიქრა: „გაუგზავნი იესოს ჰეროდეს, მან გამოიძიოს მისი დანაშაული და დასაჯოს. ამით მტრობის ნაცვლად მეგობრობას გამოვუცხადებო.“

ჰეროდე ანტიპამ, როცა იესო დაინახა, გაიხარა, რადგან დიდი ხანია ესმოდა მის შესახებ და უნდოდა ეხილა. იმედი ჰქონდა, რომ იესო რამე სასწაულს უჩვენებდა. მაგრამ რამდენიც არ ეცადა, იესომ არც მის კითხვებს უპასუხა და არც სასწაული უჩვენა. მაშინ განრისხებულმა ჰეროდემ გააჯოხინა იგი თავის ჯარისკაცებს, რომლებიც სიდეც დასცინოდნენ და აფურთხებდნენ მას. შემდეგ ჩააცვა ბრწყინვალე სამოსი და უკან გაუგზავნა პილატეს. ამან პილატე და ჰეროდე გუშინ ერთმანეთთან დაამეგობრა. თუმცა მანამდე ერთმანეთის მტრები იყვნენ.

პილატეს არ უნდოდა იესოს დასჯა. ცოლმაც გააფრთხილა: „არაფერი უყო მაგ მართალს, ვინაიდან მე დღეს სიზმრად ბევრი ვიტანჯე მაგის გამო.“

პილატემ მღვდელმთავრებს გამოუცხადა:

— თქვენ მოიყვანეთ ჩემთან ეს კაცი როგორც ხალხის წამქეზებელი, და აჰა, მე თქვენს წინაშე გამოვიძიე და ვერავითარი დანაშაული ვერ ვიპოვე მასში. არც ჰეროდე ანტიპამ სცნო დამნაშავედ და უკან გამოგვიგზავნა იგი. სიკვდილის ღირსი არაფერი ჩაუდენია მას. ამიტომ ჭკუას ვასწავლი და გავუშვებ!

მღვდელმთავრები, მელავითნეები და მათ მიერ წამქეზებული ხალხი კი გაიძახოდა:

— ჯვარს აცვი! ჯვარს აცვი!

პილატემ გადაწყვიტა შეესრულებინა მათი მოთხოვნა და გადასცა იგი დასასჯელად.

იესო გოლგოთას მთაზე აიყვანეს და ჯვარს აცვეს.

წუხელვე ერთმა კეთილმა და მართალმა კაცმა გამოთხოვა პილატეს იესოს გვამი და დაასვენა სამარხში. დღეს კი პროკურატორი პილატე და მეოთხედმთავარი ჰეროდე ანტიპა იუსტინეს ეწვივნენ და ახლა ავგუსტას უფლის საგალობელს ისმენდნენ.

„მაინც რანაირი ხმა არის ეს, რომ გულში მწვდება და ყველაფერს მიფორიაქებს?!“ — ფიქრობდა გაოგნებული პილატე.

ჰეროდე ანტიპაც შეძრა სიმღერამ, მაგრამ შურმა და ბოლმამ მას სხვა ფიქრები აღუძრა: როგორ ჩამოემორებინა იუსტინე და დაესაკუთრებინა ბაღიც და ავგუსტაც. „მაშინ მე

ამ ქალს სხვა სიმღერებს ვამღერებ, ისეთებს, რომლებიც გამართობენ,“ — გაიფიქრა ჰეროდე ანტიპამ.

ავგუსტამ კიდევ ერთხელ ჩამოჰკრა არფის სიმებს და ლოცვა-სიმღერა-საგალობლის ბოლო ბგერები ცაში აიჭრა. ავგუსტას სიმღერამ მარადიულობაში გადაინაცვლა.

წუთიერი ღუმილის შემდეგ ბაღში ოვაციამ იფეთქა და როცა ტაშისცემა ჩაცხრა, პროკურატორმა იუსტინეს ჰკითხა:

— ვინ არის ის მკურნალი, ვინც მშვენიერი ავგუსტა განკურნა?

პროკურატორს იმ აზრმაც გაუელვა, რომ ეს უცნობი მკურნალი, რომელმაც ასეთი სასწაული ჩაიდინა და ავგუსტა გადაარჩინა, სასახლის მკურნალად გაეხადა.

იუსტინემ ირგვლივ მიმოხედა. ეგონა, რომ ამონ-რა სადმე ავგუსტას სიახლოვეს იქნებოდა, მაგრამ ვერსად შენიშნა.

— ამონ-რა! — დაიძახა იუსტინემ, მაგრამ ამონ-რა არ გამოჩნდა, — ავგუსტა, სად არის ამონ-რა? — ჰკითხა მეუღლეს.

ავგუსტაც აქეთ-იქით იყურებოდა და ამონ-რას დაეძებდა, მაგრამ ამაოდ.

მოსამსახურეებს დაავალეს მოეძებნათ მკურნალი და ბაღში მოეყვანათ. მაგრამ ვერც მათ იპოვეს იგი. იუსტინე შეწუხდა. ძალიან უნდოდა დიდებულებისთვის ეჩვენებინა ცხრა წლის საოცარი ბიჭი, რომელიც უსაზღვრო ცოდნას ფლობდა, წინასწარმეტყველებდა და რომელმაც სასწაული მოახდინა: შვიდ დღეში ავგუსტა სიკვდილს გამოსტაცა.

— ბატონო, ვერ ვპოულობთ მკურნალს! — უთხრა იუსტინემ პროკურატორს, როცა ამონ-რას ძებნა უშედეგოდ დასრულდა.

პროკურატორმაც და მეოთხედმთავარმაც გაიკვირვეს.

— როგორ, — თქვა ჰეროდე ანტიპამ დაცინვით, — მკურნალი გაქრა?

იუსტინეს არაფერი ჰქონდა სათქმელი.

— ის მაინც გვითხარი, რა მეცნიერებით იმოქმედა მკურნალმა! — მიმართა პილატემ იუსტინეს.

— მან ავგუსტა უფლის ნებით განკურნა! — უპასუხა იუსტინემ.

— როგორ თუ უფლის ნებით?! — გაიკვირვეს დიდებულებმა.

— ვინ არის მისი უფალი? — იკითხა ჰეროდე ანტიპამ.

— მისი უფალი იესო ქრისტეა! — თქვა იუსტინემ და დაუმატა, — იესო ქრისტე ავგუსტას და ჩემი უფალიც არის!

— არ მესმის, რას ამბობს იუსტინე. იქნებ ავგუსტამ აგვიხსნას? — ისევ დაცინვით თქვა ჰეროდემ, თან გაიფიქრა: „რა კარგი მიზეზი მეძლევა ხელთ, რომ იუსტინე დავაჭერი-ნო“.

იუსტინემ იგრძნო დაცინვა, არ შეიმჩნია, რომ სტუმრისთვის შეურაცხყოფა არ მიეყენებინა.

ავგუსტამ ხალისით განუმარტა:

— მეოთხედმთავარო, ამონ-რამ კითხვა და მეცნიერება იცის, დიდ ცოდნას ფლობს და წინასწარმეტყველების ნიჭი აქვს. იგი ცხრა წლის ბიჭია და ქრისტეს მიერ არის ნაკურთხი. მან კარგად იცის იესო ქრისტეს მოძღვრება ცათა სასუფეველის შესახებ და ჩვენც გაგვანდო. ამ ოთხი დღის წინ იესო ქრისტემ ჩვენი სასახლის წინ ჩაიარა, იერუსალიმისკენ მიდიოდა. ჩვენს თვალწინ სნეულები განკურნა, დავრდომილები ფეხზე დააყენა, ბრძებს თვალი აუხილა. როცა ამონ-რა დაინახა, თავის მოწაფეს უთხრა — აი, უფლის ანგელოზიო — ავგუსტამ არ თქვა სრულად, რაც იესოსგან მოისმინა, რომ ვინმესთვის ავყოობის საბაბი არ მიეცა, — მან მე მიმკურნალა და მიხსნა თავისი გულის ცეცხლით, რასაც იგი უფალ იესო ქრისტესგან ღებულობდა!

პროკურატორის მეუღლე დაძაბული ისმენდა ავგუსტას ნათქვამს, სახეზე ფერი შეეცვალა, პილატეს მივარდა და მკერდში მუშტით დაუწყო ცემა.

— რატომ დაღუპე უცოდველი კაცი, უფალი! — ატირდა იგი, — ხომ შემოგიტოვალე: სიზმრად ვნახე მეთქი მისი ნათება და ამაღლება. ის ნამდვილად იყო ძე ღვთისა! რატომ გადაეცი იგი გაბოროტებულ მღვდელმთავრებსა და უგუნურ ბრბოს ჯვარცმისათვის!

ქალს გული წაუვიდა.

წვეულები შეჩოჩოლდნენ. სასწრაფოდ გამოჩნდნენ სასახლის წვეროსანი მკურნალები, რომლებმაც მოასულიერეს ქალბატონი.

ავგუსტამ და იუსტინემ იფიქრეს — ალბათ, კარგად ვერ გავიგეთ, რაც ქალბატონმა თქვაო. ავგუსტა დაბნეულ პროკურატორს მიადგა.

— ბატონო, მიბრძანეთ, ვის ჯვარცმაზეა ლაპარაკი? პროკურატორმა არ უპასუხა.

ახლა იუსტინემ იკითხა:

— პროკურატორო, თქვენ იესო ქრისტე აცვით ჯვარს?

პროკურატორმა ხელები გაშალა, თითქოსდა მე რა შუაში ვარო, და მის ხმაში თავის მართლება გაისმა:

— ხალხმა მოითხოვა ასე!

პროკურატორის მეუღლე, რომელიც ცრემლებს ვერ იკავებდა, კიდევ უფრო აღშფოთდა და ისევ მუშტებით მივარდა ქმარს.

— შენი უფლება იყო... შენ შეგეძლო არ დაგესაჯა... შენ პროკურატორი ხარ... მაგრამ მშიშარა ხარ, შენ... მღვდელმთავრების შეგეშინდა... — ამას პილატეს მეუღლე ნაწყვეტ-ნაწყვეტ და ტირილით გაიძახოდა, თან მუშტებს არ აჩერებდა, ურტყამდა და ურტყამდა ქმარს, სადაც მოხვდებოდა.

ჰეროდე ანტიპა პილატეს დამცველად გამოვიდა.

— დასასჯელი იყო და დაისაჯა! — განაცხადა მან, — მღვდელმთავრებმა და ხალხმა მოითხოვეს, რა უნდა ექნა პროკურატორს, ვიღაც ცრუსწინასწარმეტყველის გამო მთელ იუდეას და ისრაელს ხომ არ ავაჯანყებთ?

იუსტინე და ავგუსტა გაერკვნენ, რომ სწორედ იესო ქრისტეს ჯვარცმაზეა ლაპარაკი. ჰეროდე ანტიპას სავექილო სიტყვამ ავგუსტა მოთმინებიდან გამოიყვანა და ჰეროდე ანტიპას შეუტია:

— ის ჭეშმარიტად ღვთის ძე იყო, უფალი ღმერთი! იესო ქრისტეს არ შეეძლო დანაშაულის ჩადენა. სნეულებს კურნავდა, სიკეთესა და სიყვარულს ასწავლიდა, ხალხს ცათა სასუფეველის საიდუმლო გაანდო! როგორღა გამოვისყიდოთ ცოლვა მისი ჯვარცმის გამო?!

— პილატეს და მე გამოსასყიდი ცოლვები არ გვაქვს! — ბოლმით დაილაპარაკა ჰეროდე ანტიპამ, — თუ იესო მართლა ქრისტე და სასწაულმოქმედი იყო, რატომ არ გადაარჩინა საკუთარი თავი, რატომ არ მიეშველა მას მისი ზეციერი მამა? — ჰეროდე ანტიპას თვალწინ ეხატებოდა გუშინდელი სცენები — როგორ ამცირებდნენ მისი ჯარისკაცები იესოს,

სცემდნენ და ეძახოდნენ: „მოიმოქმედე სასწაული, თუ მართლა უფალი ღმერთი ხარ, მოიხმე მამაშენი ციდან, რომ დაგესაჯოს შენი ცემისათვის!“ განა არა, შეაწუხა ჰეროდე ანტიპა სინდისმა, რატომ მოვექეცი იმ უბედურს ასე დაუნდობლადო, მაგრამ დანაშაულს მაინც ვერ გრძნობდა.

და ამ დროს ჰეროდე ანტიპას გაახსენდა, როგორ მოატყუეს მისი ლეგიონერები ვილაც მაწანწალა ბავშვებმა, შემდეგ კი ქალაქის მოედანზე აიგდეს მასხრად, რალაც დათვის მეშვეობით ლეგიონერებს იარაღი აჰყარეს და მიწაში ჩაარჭეს. უფროსს კი კისერზე ერთი სულელი ბიჭი დაასვეს. ამ ბავშვებიდან ერთ-ერთს სწორედ ამონ-რა ერქვა. აჰა, აი ვინ მაწანწალა ყოფილა ავგუსტას მკურნალი!

— იუსტინე, რა ერქვა თქვენს პატარა მკურნალს? ვერ მოვისმინე მისი სახელი! — გამოსაცდელად იკითხა მეოთხელმთავარმა.

მაგრამ იუსტინე უკვე აღარ იყო მასპინძელი. მან არც იმას მიაქცია ყურადღება, რომ პროკურატორი და მეოთხელმთავარი თანამდებობებით მასზე მაღლა იდგნენ. იუსტინემ საჯაროდ გამოაცხადა:

— ჩვენს სასახლეში აღარ არის დღეს ზემი! გლოვაა! ავგუსტა და მე ვგლოვობთ უფლის იესო ქრისტეს სიკვდილს! გთხოვთ დაგეტოვოთ!

დიდებულებმა ერთმანეთს გადახედეს — ეს რა ხდებაო.

— თქვენ გინდათ იგლოვოთ ვილაც იესოს სიკვდილი? — დაცინვით ჰკითხა ჰეროდე ანტიპამ იუსტინეს, — ამიტომ მომიწვიეთ თქვენთან და ორი დღის გზა გამომატარეთ? ეს დიდებულნიც გლოვისათვის მოიწვიეთ?

მაგრამ პასუხი ვერ მიიღო, რადგან იუსტინემ ავგუსტას ხელი მოჰკიდა და ორივემ სტუმრები ბაღში მიატოვა.

წვეულები დაიბნენ. „მამ წავიდეთ?“ — ეკითხებოდნენ ერთმანეთს.

არავინ ამართლებდა ავგუსტასა და იუსტინეს მოქმედებას, მაგრამ ვერც იმაში გარკვეულიყვნენ, ვინ იყო იესო ქრისტე და რატომ აცვეს ჯვარს. მოწვეულთაგან არავის სჯეროდა ჰეროდე ანტიპასი, რომელიც იესოს დამნაშავეს უწოდებდა; არც პილატეს ამართლებდა ვინმე, მართალი კაცი ჯვარზე საცემელად რომ გაწირა. მაგრამ არც იმის რწმენა ჰქონდათ, რომ იესო ნამდვილად ქრისტე იყო, ძე ღვთისა.

მეოთხედმთავარი გახარებული იყო მომხდარით, უკეთეს მიზეზს იგი ვერც ინატრებდა, რომ შეატყობინოს რომში კეისარს: იუსტინემ ვილაც ცრუ მესია იწამა და მის გამო შეურაცხყოფა მიაყენა რომაელ და იუდეველ დიდებულებსო. განა ეს საკმარისი არ იქნება, რომ კეისარმა იუსტინეს დაპატიმრება ბრძანოს? მაშინ სად გაექცევა მას მშვენიერი ავგუსტა თავისი ზღაპრული ბალით?

მეოთხედმთავარმა სასწრაფოდ დატოვა სასახლე და მის თანმხლებ ლეგიონერებს უბრძანა ცხენებით დაწოდნენ ფეხით მიმავალ პატარა ბიჭს, დაეჭირათ და დაუყოვნებლივ მასთან მიეყვანათ. მას ეჭვიც არ ეპარებოდა, რომ ამონ-რამ სასახლე დატოვა.

სხვა დიდებულნი, უკმაყოფილნი და შეურაცხყოფილნი, გაბოროტებულნი და განრისხებულნი, ნელ-ნელა გადიოდნენ ბალიდან და თავიანთი სასახლეებისკენ მიიჩქაროდნენ.

იუსტინეს სასახლეში არ შედგა დიდი წვეულება. სასახლეში დიდმა გლოვამ დაისადგურა.



მკრად გაჯოხეთ და დილეგში ჩაგდეთ

ამონ-რა სასახლიდან ისე გამოვიდა, რომ არავის შე-
უნიშნავს.

რაღა საჭირო იყო მისი იქ ყოფნა? ავეუსტამ ჯანმ-
რთელობა დაიბრუნა და მალე მთლიანად ამოიცნობს ქვაწე-
რილის აზრს. იუსტინემ უფლის გზა და სამსახური აირჩია
და ავეუსტასთან ერთად ბევრ კეთილ საქმეს გააკეთებს. წვე-
ულებაზე კი ისეთი ხალხი შეიკრიბა, რომელთა ყურები ჯერ
ვერ მიიღებენ და შეისმენენ ცათა სასუფევლის მოძღვრებას.
თუ კაცს გულისყური დაეხშო, რაც არ უნდა ხმამაღლა ელა-
პარაკო, ვერაფერს გააგებინებ, და რაც არ უნდა ბრძნული
აზრები უბოძო, ახლოს არ გაიკარებს.

ამონ-რა მაშინ გამოვიდა სასახლიდან, როცა ავეუსტა
მამის შესახვედრად გაიქცა. ამონ-რა სასახლის მშენებლობი-
საკენ გაემართა.

ცხელოდა. კარგახნის სიარულის შემდეგ ამონ-რამ
წყაროსთან შეისვენა, პირზე წყალი შეისხა და ხის ქვეშ
ჩრდილში წამოწვა. იფიქრა, ცოტა გადაიგრილებს და მერე
გავაგრძელებ გზასო. წყაროს წყნარი რაკრაკი და ჩიტების
ჟღურტული ნანასავით ეფინებოდა იქაურობას და ამონ-რას
ჩაეძინა, დასუსტებულმა სხეულმა ძალთა მოკრება განიზრახა.

გააღვიძა იგი ცხენების მოულოდნელმა თქარათქურმა
— გზაზე ლეგიონერებმა ჩაიჭოლეს. შუადღე საკმაოდ
გადასული იყო. ამონ-რა წამოდგა, ისევ დაიბანა პირი და
წასვლა დააპირა. კვლავ გაისმა ცხენების თქარათქურის ხმა
— ლეგიონერები უკან მოაგელვებდნენ ცხენებს. ამონ-რა დაე-
ლოდა — ჩაივლიან და მერე გავაგრძელებ გზასო. ლეგიონე-
რებმა კი მის წინ მსწრაფლ შეაყენეს ცხენები და გარს
შემოეხვივნენ.

— შენ, ეი, რას დაწანწალებ? ვინ ხარ?

ამონ-რამ ვერ მოასწრო რამე ეპასუხა, რომ მეორემ
წამოიძახა:

— ვიცანი, ვიცანი... ეგ არის!

— არ შეგეშალოს, თორემ ხომ იცი, რა დღეც და-
გადგება! — გააფრთხილა უფროსმა.

— ეგ არის, ეგ! ჰკითხეთ, რა ჰქვია!

— რა გქვია შენ, ბიჭო!

ამონ-რა მშვიდად შეჰყურებდა ლეგიონერებს, თუმცა
მათგან კარგს არაფერს მოელოდა.

— ამონ-რა, — უპასუხა უფროსს.

— აი, ხომ გითხარით, ვიცანი მეთქი!

— ძლივს არ ვიპოვეთ... კიდევ კარგი, შენიშნე და უკან
დაგვაბრუნე! — შეაქო უფროსმა ლეგიონერი, რომელმაც ამონ-
რა იცნო.

— შეკარით და წავიყვანოთ... გავახაროთ მეოთხედმთა-
ვარი! — ბრძანა უფროსმა.

სამი ლეგიონერი სწრაფად ჩამოხტა ცხენიდან. თვა-
ლის დახამხამებაში მათ ამონ-რას ხელები გაუკრეს, ისევ
შეხტნენ ცხენებზე და ერთმა მათგანმა ამონ-რას დაუყვირა:

— აბა, მომყევი! — და თოკი მოსწია.

ცხენები დაიძრნენ და თოკზე გამობმული ამონ-რა
სირბილით გაიყოლეს.

— ათისთავო, დაგეასაჩუქრებს მეოთხედმთავარი, ამ
ბიჭს რომ მიუყვანთ? — ჰკითხა იმან, ვინც ამონ-რა იცნო.

— რომ გაუხარდება, ნამდვილად ვიცი... საჩუქრებზე კი
რა მოგახსენო! — უპასუხა ათისთავმა.

კარგახანს ატარეს ცხენები ჩორთით. ამონ-რას შეკრუ-
ლი ხელები წინ ჰქონდა გაშვებული და სირბილით მისდევდა
ლეგიონერებს.

— უფროსო, — თქვა იმან, ვისაც ხელში თოკი ეჭირა,
— ცოტა ნელა ვიაროთ, თორემ ვიდრე მივაღოთ, ამ ბიჭს სუ-
ლი ამოხდება!

— მართალი ხარ, — ბრძანა უფროსმა, — შეანელეთ
სელა!

— რა უნდათ ამ ბავშვისაგან, რას ერჩიან? — იკითხა
რომელიღაც ლეგიონერმა, — რა ჩაიღინა ისეთი, რომ მაგის
გამო მთელი დღე გვარბენინეს?

— როგორ ვერ გაიგე, შე ბრიყვო, — გამოეპასუხა
სხვა, — სწორედ ეს იყო, ჩვენი უფროსი რომ მოატყუა —
იესო არც მოსულა ზეთისხილის მთასთანო. ამ ბიჭისთვის
რომ არ დაგვეჯერებინა, მაშინ იესოს დავიჭერდით!

— ეჰ! შენ ისიც თქვი, რა დღე დაგვაყარა მაგისმა დათვმა...

— ბიჭო, სად არის შენი დათვი? — გაღმოსძახა ზემოდან ვილაცამ.

ამონ-რამ არაფერი უპასუხა.

— დაანებე თავი, ძლივს სუნთქავს...

— რა ქნა მაგისმა დათვმა? — იკითხა ცნობისმოყვარე ლეგიონერმა, რომელსაც ამხანაგები ბრიყვს ეძახდნენ.

— რა ქნაო... მე ხეზე შემსვია, ამას ყბაში გააწნა... მოკლედ, ათივე, ჩვენი უფროსიანად, კულამოძუებულები გამოგვრეკა...

— ჩვენი შუბები და მახვილები იმ დათვმა ისე ჩაარჭო მიწაში, რომ ვერავინ ამოაძრო. დღესაც იქვეა ჩარჭობილი და იცინის ჩვენზე ხალხი...

— ეგ არაფერია... თქვენ ყველაზე სასაცილო თუ სატირალი გამოტოვეთ! — თქვა წინ მიმავალმა, — იმ დათვმა ჩვენს უფროსს კისერზე ერთი ნაბიჭვარი დაასვია... დაგავიწყდათ?

ყველამ გულიანად გადაიხარხარა.

— გვახსოვს რომელია... — გამოეპასუხა სხვა, — ნაბიჭვარს შიშისაგან ფეხები მოეკაკვა, ერთი კვირა ფეხებს ვერ შლიდა, ლამის დაახრჩო ათისთავი...

— აბა, აბა, ჩემს მეგობარზე ასეთი ლაპარაკი არ გავიგონო! — ვითომდა მკაცრად, სინამდვილეში დაცინვით დაიძახა უფროსმა და გადაიხარხარა.

— მერე? — იკითხა ბრიყვმა.

— რა მერე... ვერ ხსნიდა ის უბედური ბიჭი ფეხებს, მოკაკვული ჰქონდა მუხლები უფროსის ნიკაბთან... ვერა და ვერ გამოაძვრინა თავი უფროსმა მისი ფეხების მარჯულისგან...

— ხა-ხა-ხა... — ხარხარებდნენ ლეგიონერები.

— მერე?

— მერე და, მეტი რა გზა ჰქონდა, დადიოდა უფროსი და ნაბიჭვარი კისერზე ეჯდა...

— ეგ როგორ?! — გაიკვირვა ბრიყვმა.

— როგორ და თუ გინდა შეგაჯღები ახლავე კისერზე და გაიგებ...

— მერე, კაცო, იმ ბიჭს მოფსმა რომ სდომებოდა?

— კიდევ მოუნდა და კიდევ კისერში აფსამდა ჩვენს უფროსს. ხა-ხა-ხა...

— ხა-ხა-ხა... — ხარხარებდნენ ლეგიონერები.

— იმ ნაბიჭვარს ერთ დღეს კუჭიც აეშალა...

— რაო-რაო?!

— რაც გაიგე... ხა-ხა-ხა... კუჭი აეშალა... გამოვიდა ჩვენი ათისთავი ყაზარმაში. კისერზე ის ცინგლიანი აზის, ჩამომსვითო, ბლავის. ფეხები კი გაშეშებული აქვს და ყელში უჭერს, ათისთავი ძლივს ხროტინებს...

— ხა-ხა-ხა...

— უფროსი გაიძახის, როცა ჩამოგვამ, იმ დღეს შენი სიცოცხლეც დამთავრდებაო...

— მაშ ჩემს კისერზე გერჩივნოს ჯდომაო?

— ასე გამოდიოდა. გვიბრძანა ათისთავმა — გამომყევითო და წინ გაგვიძღვა. ნაბიჭვარი მალლიდან გვიყურებს და იგრიხება, ხა-ხა-ხა... თურმე მუცელი აქვს გაბერილი და სტკივა... მიშველეთო, გაიძახის...

ლეგიონერები ხარხარებდნენ და ხარხარებდნენ.

— ბიჭმა ველარ შეიკავა თავი და უცბად იმისთანა გაისროლა, გვეგონა, დაიქუხაო...

— ხა-ხა-ხა-ხა...

— უფროსი ვერ მიხვდა, საიდან იქუხა... შეშინდა... ხა-ხა-ხა... გაიქცა...

— ხა-ხა-ხა...

—... ზემოდან კი ყვითელი ფაფა ესხმის... ამყრალდა... ხა-ხა-ხა...

— მერე, მერე? — არ ისვენებდა ბრიყვი ლეგიონერი, რომელიც სხვებთან ერთად იჭაჭებოდა სიცილით.

— მერე და მერე... მერე ეჭიბაშებმა ასე თქვეს: ან ამ ნაბიჭვარს უნდა მოვაჭრათ ერთი ფეხი მაინც, რომ ათისთავი გამოვათავისუფლოთ, ან ათისთავს უნდა მოვაჭრათ თავიო, ეგენი ისე არიან ერთმანეთში გადაგრეზილნი, რომ სხვანაირად ვერ გავაცალკევებთო...

— რას ამბობ?!.. მერე?..

— მერე ეს ამბავი ასისთავს მოახსენეს. იმან კი იხუმრა: მაგის თავი რაში მჭირდება, შიგ ტვინი მაინც არა აქვს, და თუ რამე აქვს, ისევ სისულელეებითაო, მოაჭერით და გადაადგეთო...

- ხა-ხა-ხა...
 - საწყალ ათისთავს მართალი ეგონა და თავის ჩამოხრჩობა გადაწყვიტა, ხეს თოკი მოაბა და ჩამოეკიდა...
 - აუპ, რას ამბობ... – შეიცხადა ბრიყვა ლეგიონერმა,
 - თავი ჩამოიხრჩო?
 - ვერა, ვერ მოახერხა... ხა-ხა-ხა... იმ ბიჭმა თოკი კბილებით გადალრღნა... უბედურმა იფიქრა, ამ ათისთავთან ერთად მეც მიწაში ჩამდებნო...
 - მართლა, კაცო... მერე?
 - მერე ორივე მიწაზე დაებურტყა და ბიჭმაც ფეხები გაშალა...
 - მერე, მერე? – ვერ ისვენებდა ბრიყვი.
 - წამოხტა უფროსი, ახლა კი ვიყრი შენს ჯავრსო, ცოცხალი ვერ გადამირჩებიო... ბიჭიც წამოხტა და გაიქცა... ხა-ხა-ხა... გამოეკიდა უფროსი, მთელი ღლე სღია, ენა ძაღლივით გადმოუვარდა, ვერა და ვერ დაიჭირა...
 - მაშ არაფერი გამოუვიდა?
 - როგორ არა, ამ სირბილში წაიქცა და ფეხი მოსძვრა... ცხვირიც აეგლიჯა... ფეხი ცალკე ეგლო და ცხვირი ცალკე იპოვეს...
 - ერიჰა... ახლა უფეხო და უცხვიროა?
 - სჯობდა კი მაგრე ყოფილიყო...
 - რათა ვითომ?
 - იმიტომ რომ ექიბაშებს შეეშალათ და... ხა-ხა-ხა... მოტეხილი ფეხი... ხა-ხა-ხა... შებრუნებით მიაბეს... ტერფი წინ კი აღარ აქვს, უკან აქვს ტერფი...
 - ცხვირი?
 - ცხვირიც... ხა-ხა-ხა... უკულმა გამოუვიდათ და ნესტოები ზემოთ მოექცა. ახლა ზემოდან სუნთქავს და ზემოდან გამოსდის ცინგლი, ჯერ ვერ ისწავლა, როგორ მოიწმინდოს... ხა-ხა-ხა...
 - შებრუნებული ფეხით როგორ დადის?
 - როცა ფეხზე ადგება, მაგას მაშინ გეტყვი...
 - სად არის ახლა?
 - სად და წვეს და კენესის და იმ ბიჭის ნახვას ნატრობს... ყველაფერი კი, აი, ამისგან დაიწყო, ძლივს რომ დავიჭირეთ...
- ლეგიონერებმა კიდევ ბევრი იხარხარეს.

უკვე ჩამოლაშქრა, როცა ყაზარმაში მივიდნენ.

ჰეროდე ანტიპას მოახსენეს: ბიჭი, რომელსაც ლაიქებ-
დი, იპოვეს და მოიყვანესო.

— ახლავე მომგვარეთ! — ბრძანა მეოთხედმთავარმა.

ჰეროდე ანტიპამ იცოდა, რომ ეს ბიჭი ანუ ამონ-რა
ცხრა წლის იყო, მაგრამ მასზე ამდენი ლაპარაკის შემდეგ
ისეთი წარმოდგენა შეექმნა, თითქოს მის წინაშე დააყენებდნენ
მალაქ, კუნთოვან, მოჩხუბარ და მოხულიგნო ბიჭს. ამიტომ
ძალიან გაუკვირდა, ლამაზი და კეთილი სახის ბავშვი რომ
დაინახა, დაბალი და გამხდარი.

— ხომ არ შეგეშალათ, ნამდვილად ის არის? — უყვი-
რა მეოთხედმთავარმა ლეგიონერებს.

— ჰკითხეთ, ბატონო, თავად გეტყვით! — მოახსენა
ათისთავმა.

— რა გქვია? — ჰკითხა ჰეროდემ ბიჭს.

— ამონ-რა, — სუსტი ხმით უპასუხა ამონ-რამ, დაქან-
ცულმა და ძალადაკარგულმა.

— მამ შენ ხარ, ვისაც ვეძებ?

ამონ-რამ არაფერი უპასუხა.

— რატომ მოატყუე ლეგიონერები, იესო ქრისტე ზე-
თისხილის მთასთან არც მოსულაო?

პასუხი ვერ მიიღო.

— შენ განკურნე ავგუსტა?

არც ახლა უპასუხა ამონ-რამ.

მეოთხედმთავარი გაბრაზდა, დამცინის ეს ცინგლიანიო.
მაგრამ რადგან უკვე გვიანი იყო, ათისთავს უბრძანა: მაგრად
გაჯოხნეთ და დილეგში ჩააგდეთ, მე კი დილით დავეკითხავო.

ათისთავმა ამონ-რა წაიყვანა და თავის ლეგიონერებს
დაუძახა.

— ეს ბიჭი კარგად უნდა გაეჯოხნოთ, რომ ჭკუა ის-
წაელოს, ასე ბრძანა ჰეროდე ანტიპამ!

ლეგიონერებმა არ დააყოვნეს: სწრაფად მონახეს მოქ-
ნილი ჯოხები, ამონ-რა გააშიშვლეს, მიწაზე დააწვინეს და
რიგრიგობით და გამეტებით დაუწყეს ცემა. ამონ-რას არ
დაუკენესია, არ დაუყვირია, თითქოს არც გრძნობდა ტკი-
ვილს, თვალებდახუჭული იწვა და სადღაც შორს იყო წასუ-
ლი.

ლევონერებმა შემდეგ ფეხზე წამოაგდეს და წყალი გადაასხეს — მოსულიერდესო, შემდეგ რიგრიგობით თავში და ცხვირში წკიპურტების რტყმა დაუწყეს, თან სახეში აფურთხებდნენ. ბოლოს ყურებში ჟანგიანი ლურსმნები გაუყარეს — საყურეები მოგიხდებო.

ლევონერები ერთობოდნენ ამ საქმით, იცინოდნენ, ბილწსიტყვაობდნენ.

მხოლოდ ერთი ახალგაზრდა ლევონერი აჯანყდა ყველას წინააღმდეგ: ბავშვია, ცოდოა, როგორ შეიძლება ასე აწამოთო.

ათისთავი გაუწყრა.

— აბა, შენც აიღე ჯოხი და ურტყი მაგ მაწანწალას!
— უბრძანა ახალგაზრდა ლევონერს ათისთავმა.

— შე ბავშვს არ ვცემ! — მტკიცედ უპასუხა მან.

ათისთავი უფრო გადაირია. ის სხვა რამის გამოც ემტერებოდა ახალგაზრდა ლევონერს და საბაბი მიეცა, რომ რამდენიმე დღე დილეგში ჩაეშწყვლია. ათისთავი სხვებს მიუბრუნდა.

— ესეც გაჯოხეთ მაგ მაწანწალასთან ერთად, რომ უფროსის ბრძანების შესრულება ისწავლოს!

ლევონერებმა ეს ბრძანებაც ხალისით შეასრულეს: მაშინვე მისცვიდნენ თავიანთსავე ამხანაგს, გაამიშვლეს და დაუწყეს გაჯოხვა.

— რამ გაგაგიჟათ, რამ გაგაცოფათ! — ყვიროდა ახალგაზრდა ლევონერი, — ან ამ ბავშვს რატომ აწამებთ, ან მე რა დაგიშავეთ?...

მისი ამხანაგები კი იცინოდნენ და ურტყამდნენ, გულმოდგინედ ასრულებდნენ უფროსის ბრძანებას.

გატანჯული და გონებადაკარგული ამონ-რა და კარგად გაჯოხილი ახალგაზრდა ლევონერი მორჩილმა ქვეშეურდომებმა დილეგში ჩაყარეს. მერე უზარმაზარ ქოფაკს მიეფერნენ. ის ჯაჭვით იყო მიბმული დილეგის კარებთან და შეპყრობილებს სდარაჯობდა.



რა მშენიერი ყოფილა ჩემი ვარსკვლავი

ახალგაზრდა ლეგიონერს მთელი სხეული ეწვოდა, მაგრამ წარმოიდგინა, რა დღეში უნდა ყოფილიყო ეს პატარა ბიჭი, და მის გამო გული შეეკუმშა. „ჩემი ბიჭებიც ამხელები არიან, — გაიფიქრა ლეგიონერმა, — ეს ბავშვი ჩემს უფროს ბიჭს მაგონებს!“ სამი დღის წინ ახალგაზრდა ლეგიონერს რომიდან ცოლი და ორი ბიჭი ჩამოუვიდა. შვილებს მამის ნახვა მოენატრათ, ახალგაზრდა ქალსაც მოენატრა ქმარი. ლეგიონერმა ათისთავს სთხოვა, რამდენიმე დღით გამათავისუფლო. ათისთავმა სასტიკი უარი უთხრა. ცოლშვილის სიყვარულით, ბიჭებთან თამაშით ვერ გაიხარა, ახლა კი ათისთავმა დიღეგში ჩააგდო. ახალგაზრდა ლეგიონერს რისხვით ევსებოდა გული.

ათისთავს არ უყვარდა ახალგაზრდა ლეგიონერი, რომელმაც ადრეც არ შეასრულა მისი ბრძანებანი. ახლა კი უხაროდა, რომ დიღეგში ჩააგდო; რაც მისი ლამაზი ცოლი დაინახა, მოსვენება დაკარგა.

ახალგაზრდა ლეგიონერი ახლოს მიუჩოჩდა ამონ-რას, ყურებიდან ჟანგიანი ლურსმნები გამოაძრო, ხალათის სახელო მოიხნია, წყლიან ჯამში ჩაასველა და სახეზე მოუსვა.

ამონ-რა უგონოდ იყო, სიცოცხლის ნიშანწყალი არ ეტყობოდა.

ახალგაზრდა ლეგიონერმა სცადა მოესულიერებინა, სახეზე მოეფერა, ოღნავ შეანჯღრია, — ბიჭო, თვალი გაახილეთ, — ყურში ჩასძახა, მაგრამ ვერაფერს მიაღწია.

და ამ დროს უცნაური რამ მოხდა: ამონ-რას სხეულიდან ცისფერი ცეცხლის ალი ამოსრილდა და თითქოს კედელში შევიდაო, გაქრა. ახალგაზრდა ლეგიონერმა იფიქრა, ნამდვილად მომჩვენაო და ისევ გულმოდგინედ გააგრძელა ზრუნვა, რომ პატარა ბიჭისთვის ეშველა.

ამონ-რას სული კი ცაში აიჭრა და, როგორც ადრე, ჯერ თავისი ძალები მოსინჯა.

აგერ როგორ ციმციმებს სანუკვარი ვარსკვლავი ვარსკვლავთა ჯგუფში. ელვისებურად მიქრის სული მალლა, მალ-

ლა. ვერც გრძნობს სისწრაფეს. დედამიწა კი დაპატარავდა და სანთლის ალის ციმციმს დაემსგავსა. სამაგიეროდ სანატრელი ვარსკვლავი გადიდდა, გადიდდა და თვალწევდენელი გახდა.

„ჩემო ვარსკვლავო! — უხარია ამონ-რას სულს, — რა მშვენიერი ყოფილა ჩემი ვარსკვლავი! იგი უხარმაზარ ლაქვარდოვან ღრუბელს ჰკავს!“

სულმა მიაღწია ვარსკვლავს: „ვაშა! ვაშა!“ — და ლაქვარდოვან ღრუბელში შესრიალდა.

ო, რა ფერებია აქ! რა ფორმებია! რა სილამაზეა ირგვლივ ან რა მუსიკა ჟღერს — სფეროთა მუსიკა!

სად არის სიტყვები, რომლებიც ეტყვიან ამონ-რას სულს — რა ჰქვია ამას, იმას ან იმას და იმას! როგორ უამბოს სულმა ვინმეს დედამიწაზე, რას ხედავს ან რას განიცდის აქ — სანუკვარ ვარსკვლავზე!

მიქრის ამონ-რას სული საკუთარი ვარსკვლავის — საკუთარი პლანეტის ზედაპირისაკენ. როგორები არიან და როგორ ცხოვრობენ აქ ადამიანები? რაზე ფიქრობენ? რას ჰქმნიან? რითი ხარობენ? რას ესწრაფვიან და რას ებრძვიან? აი, თითქოს, სულ ახლოა პლანეტის ზედაპირიც — იგი ზღაპრული სასახლეებით, ლაქვარდოვანი მთებით, ფერად-ფერადი ზღვებით, ტბებითა და მდინარეებით არის მოფენილი. მაგრამ ყველაფერ ამას, რასაც ამონ-რას სული ხედავს და განიცდის, დედამიწის სიტყვებით ვერ აღწერს.

უცბად სული რაღაც ძალამ შეაჩერა. რა ცოტა დარჩა ზედაპირამდე, მაგრამ ველარ მიფრინავს, რაშია საქმე? ამონ-რას სული შემოთოდა. ეს ჩემი სანუკვარი ვარსკვლავია, აქ მინდა ვიცხოვრო, აქ მინდა ვიმროძო და შევქმნა. აქედან მინდა შევუდგე ახალ სრულყოფას. „იყავით სრულყოფილნი, როგორი სრულყოფილიც არის თქვენი ზეციური მამაო,“ — ასე დაარიგა იესო ქრისტემ დედამიწის ადამიანები. მაგრამ განა აქვს ამ სრულყოფას დასასრული? ამ სანუკვარი ვარსკვლავიდან, რომელსაც ამონ-რას სულმა უკვე მიაღწია, მაღლა სხვა ვარსკვლავები გამოჩნდა. მათ დედამიწიდან ვერაეინ დაინახავს. ეს სხვა ცაა, სხვა ცათა სასუფეველია. გავა წლები, წლები, წლები, საუკუნეები, ეპოქები, და ამონ-რას სულს კიდევ გაუჩნდება ახალი სანუკვარი ვარსკვლავი. ის ვარსკვლავი უფრო შორს იქნება, უფრო მაღლა. იმ ვარსკვლავზე

გასაფრენად სხვა ძალები დასჭირდება, სხვანაირი ფრთები, სხვანაირი ფიქრები და სულ სხვა სიწმინდე. ამ ძალებს აქ შეიძენს, ამ სანუკვარ ვარსკვლავზე, და შემდეგ სხვაზე გაფრინდება. რა იქნება მერე? ამონ-რას სულს მიცემული აქვს ცოდნა ცათა სასუფეველის საიდუმლოსი. რა იქნება და ისევ და ისევ ახალი ვარსკვლავები და ზეციერი მამის სრულყოფისაკენ სწრაფვა. საიდან მოფრინდა იესო ქრისტე დედამიწაზე, რომ საცოდავ ადამიანებს უშველოს, გადაარჩინოს თითოეული მათგანის სული, გააგებინოს, რომ დედამიწა სულის განვითარების უსასრულო გზის მცირე მონაკვეთია, სულის ამალღების ერთი საფეხურია. თუ ამ საფეხურიდან ფეხი დაგიცდება, თუ სულის სრულყოფის ბილიკს ასცდები, მაშინ დაბლა დაეშვები, იქ, სადაც სული დაიშლება და განადგურდება როგორც მასალა, რომელიც შემოქმედს არ გამოადგა დიდი სამყაროს მშენებლობისათვის. ამას დაარქვა იესო ქრისტემ გენა, სადაც იქნება კბილთა ღრჭენაო. სხვანაირად როგორ გააგებინოს ადამიანებს, რომ გონს მოეგონ. ცაში დაიუნჯეთ საუნჯეო. აი რა ყოფილა ცაში დაუნჯებული საუნჯე: ძალა, ფრთები, სიძსუბუქე, სიმაღლე და სულის განვითარების ახალი გზა! ცათა სასუფეველში არ ბატონობს უზრუნველობა და განცხრობა, ყველგან შრომა და შემოქმედება, ყველგან ოფლის ღერაა. რომელი საუფლოდან მოფრინდა იესო ქრისტე? ქრისტეს გზა ადამიანებისთვის სიმაღლეების გზაა. ამ გზით სიარული იმას ნიშნავს, რომ იფიქრო ლამაზად და შექმნა სილამაზე, იფიქრო კეთილად და თესო სიკეთე, იფიქრო სიყვარულით და აშენო სიყვარული, იფიქრო გმირულად და გახდე გმირი. ამას სწავლობდა ამონ-რა დედამიწაზე იქნებ მილიონი წელიც. დაიბადა ერთხელ და სულის ფრთებს ერთი ბუმბული გამოაბა, დაიბადა მეორედ და მეორე ბუმბულიც ამოუვიდა, დაიბადა მესამედ, მესამედ, მესამასედ, გაეზარდა ფრთები, შიგ ციური ძალა ჩაუდგა, სულში ცოდნის ნათელი აკაშკაშდა, სანუკვარი ვარსკვლავიც გაიჩინა და სულმა ძალების მოსინჯვა დაიწყო. იესო ქრისტემ ცათა სასუფეველის საიდუმლო გაუმხილა. ცის სასუფეველი კი არა, ცათა სასუფეველიო. ადამიანებს ჰგონიათ, რომ ცა მხოლოდ ერთია, რომ სამყაროც ერთია. ამონ-რას სულმა კი იცის, რომ ცის ზემოთ კიდევ ცაა, იმ ზემოთა ცის შემდეგ კიდევ ცაა და ასე დაუსრულებლივ. ადამიანი უსასრულობის შვი-

ლია, მაგრამ დედამიწიდან თავი ვერ აუწევია, რომ თავისი უსასრულობა იგრძნოს და დაინახოს. ამონ-რას სული ახალ, სხვა სამყაროში შეიჭრა და უნდა, რომ ამ სამყაროს დროებითი მკვიდრი გახდეს. რა ჰქვია იმას, რაც ამ სამყაროშია და რაც დედამიწაზე არ არსებობს? ამონ-რას სულს საიდანღაც საკუთარი კითხვის პასუხი ესმის: „ეს არის ცეცხლოვანი სამყარო. შენ ცისფერ, ლაჟვარდოვან ცეცხლში ხარ გახვეული. იესო ქრისტე ამ ცეცხლით ნათლავს ხალხს, ამ ცეცხლოვანი სამყაროსკენ მოუწოდებს ადამიანებს!“ მილიონწლიანი განვითარების შემდეგ ამონ-რას სული ამაღლდა ცეცხლოვან სამყაროში, მიაღწია ცეცხლოვან სამყაროში სანუკვარ ვარსკვლავს. სულ ცოტაც და დაეშვება მის ზედაპირზე, რომ ცეცხლოვან ცხოვრებას შეუდგეს. ყველაფერს თავიდან დაიწყებს, რადგან ყველაზე უდიდესი დედამიწაზე აქ ყველაზე უმცირესი იქნება, ასე ასწავლის იესო ქრისტე ხალხს. მაგრამ რა უშლის ხელს, რომ დაეშვას? ამხელა მანძილი იფრინა, აქედან დედამიწა სანთლის ციმციმს ჰგავს! ძალაც ჰყოფნის, ფრენაც შეუძლია, რაღა აჩერებს?

„შვილო ჩემო, მე გაჩერებ შენ.“

საიდან მოესმა სულს ეს უხმო ხმა? და როგორი ზრუნვა და სიყვარული ჟღერს მასში.

უხმო ხმამ ამონ-რას სულს უსაზღვრო განცხრობა მიანიჭა.

„შვილო ჩემო! შენ ცეცხლოვან სამყაროს მიაღწიე და შეგიძლია დარჩე აქ. მაშინ გაემართები ზედაპირისკენ, ჩასახლდები კეთილი ცეცხლოვანი არსის საშოში და დაიბადები როგორც ჩვილი ცეცხლოვანი სხეულით. ამით დაიწყება შენი ახალი გზა უსასრულობაში. მაგრამ თუ დაუბრუნდები დედამიწას და ბოლომდე ამოწურავ შენს მისიას, მაშინ ცეცხლოვან სამყაროში შენი გზა უფრო წარმატებული იქნება.“

„ვის ხმას განვიცდი მე? ვინ ხარ შენ?“

„მე შენი მფარველი ვარ.“

ო, დიდებულო სულო, ჩემო დიდო მასწავლებელო! რამდენი საუკუნე და ათასწლეულია მოვილტვი შენსკენ! შენ მზრდიდი, მიცავდი, მეხმარებოდი. ქვაწერილიც შენ გამომიგზავნე. ხომ ასეა?“

ამონ-რას სული სიხარულისაგან თრთოდა.

„ასეა.“

„რატომ ვერ გხვდავ? სად ხარ?“

„შენ ჩემში ხარ და მე შენში ვარ. შენი მზეერა ვერ შესწვდება ჩემს სივრცეს. ეს პლანეტაც ჩემს გულშია, როგორც სამყაროს ეს ნაწილი. შენ ჩემი სულისა და ჩემი ცეცხლის ნაწილი ხარ.“

„შენ მირჩევ, რომ დედამიწაზე დაებრუნდე?“

„მე გირჩიე, მაგრამ ნება შენია.“

„რას უნდა მივალწიო კიდევ დედამიწაზე, რა უნდა მოვიმოქმედო?“

„შენ უნდა ჩასახო ჭეშმარიტების მარცვალი და იქვე გმირად იმ ლეგენდებისა და ზღაპრებისა, რომლებსაც საუკუნეებში შეთხზავენ.“

„ხომ არ იქნება ეს პატივმოყვარეობა და თავის განდიდება?“

„არა, შენში აღარ არსებობს პატივმოყვარეობა და განდიდებისაკენ სწრაფვა, ისევე როგორც შიში არ არსებობს შენში.“

„როგორ უნდა ვიქცე ლეგენდებისა და ზღაპრების გმირად? რა უნდა მოვიმოქმედო?“

„შენ უკვე მოიმოქმედე. ახლა საჭიროა დაასრულო.“

„როგორ დავასრულო?“

„მიჰყევი გულის ხმას.“

„მასწავლებელო, მე ვბრუნდები დედამიწაზე.“

„მახარებს, შვილო ჩემო, შენი გადაწყვეტილება. ჩემი თვალთახედვის არეალში იქნები მუდამ!“

ამონ-რას სულმა მსწრაფლ დატოვა ცისფერი, ლაქ-ვარდოვანი, ენით უთქმელი ცეცხლოვანი სამყარო და დედამიწისკენ გაემართა. ეს იყო ფრენა დროისა და სივრცის გარეშე, სული აზრის სისწრაფით მოჰქროდა.

... ახალგაზრდა ლეგიონერიმა უკვე მობანა ამონ-რას სისხლი სახესა და სხეულზე.

— რა უქნეს ბავშვს, როგორ აწამეს და დაასახინჩრეს! — აღშფოთებით ჩურჩულებდა ახალგაზრდა ლეგიონერი, — რა კარგი ბიჭია, ანგელოზს ჰგავს!

ამონ-რა უმოძრაოდ იწვა.

— ნამდვილად მოკვდა საწყალი, — ჩურჩულებდა ახალგაზრდა ლეგიონერი და თავზე ხელს უსვამდა ამონ-რას, ტირილი უნდოდა, თვალები ცრემლით ჰქონდა სავსე, — რა

ცოტა ხანს იცხოვრა ამ პატარა ბიჭმა და უკვე მოკვდა, მოკლეს... ვინ იცის, როგორი კეთილი და მშრომელი ადამიანი გაიზრდებოდა, ცხოვრებით გაიხარებდა... რა ნახა ამ ქვეყნად?... ადამიანთა უმსგავსება და ბოროტება... შეურაცხვევს და აწამეს...

ახალგაზრდა ლეგიონერს დროდადრო ეჩვენებოდა, რომ მის წინ ვიღაც უცხო ბავშვი კი არა, მისი საკუთარი შვილი იწვა, და ათისთავის მიმართ რისხვა ეუფლებოდა.

— ნამდვილად მოკვდა! — ისევ ჩაიჩურჩულა შეწუხებულმა. ხელები გულზე დაუკრიფა, ფეხები გაუსწორა.

და ამ დროს კედლიდან ცისფერი ნათება შემოიჭრა, ცისფერი ცეცხლის ალი, და ამონ-რას სხეულში ჩაიძირა.

ახალგაზრდა ლეგიონერს შეეშინდა ამ უცნაური ნათების, უკან გადახტა და დილეგის კუთხეში მიიფუჟა. მაშ არც ამ ორიოდ წუთის წინ მოეჩვენა, რომ ცისფერი ალი ბიჭის სხეულიდან გამოვიდა, და არც ახლა, როცა ეს ალი უკანვე დაბრუნდა და მის თვალწინ უსულო სხეულში შევიდა. რა უნდა იყოს ეს?

ცოტა ხანში ამონ-რა შეინძრა, გულზე დაკრეფილი ხელები მიწის იატაკზე გაშალა, და ახალგაზრდა ლეგიონერმა დაინახა ბიჭი, როგორც მიწაზე გართხმული ჯვარი.

ახალგაზრდა ლეგიონერმა გაბედა — ისევ მიჩორდა ბიჭთან და დაბალი ხმით ჰკითხა:

— ცოცხალი ხარ?

ამონ-რამ თვალები გაახილა.



ათისთავის ვერაგული ფიქრები, ქოფაკი ძაღლი და დილეგი

როგორც კი ახალგაზრდა ლეგიონერი და ამონ-რა ათისთავმა დილეგში გაისტუმრა, არ დააყოვნა და იმ სახლისკენ გაემართა, სადაც ახალგაზრდა ლეგიონერის ლამაზი ცოლი და ბავშვები იყვნენ დაბინავებულნი. უკვე შუალამე იყო. ათისთავი ფიქრობდა, რომ ლამაზი ქალი, ალბათ, ქმრის მოლოდინში იქნება, ბავშვებს კი უკვე ეძინებათ. მივა და ეტყვის ქალს: შენი ქმარი დილეგშია დამწყვდეული და თუ მისი გამოხსნა გინდა, მაშინ ჩემს ნებას უნდა დაჰყვეო, თუ არა და ვერ იხილავს შენი ქმარი სინათლეს, შენ კი შვილებით ზვალვე უკან გაგაბრუნებო. მეტი რა გზა ექნება ქალს, ფიქრობდა ათისთავი, დამნებდება, მერე კი ვნახოთ.

ამ ვერაგული ფიქრებით მიაღვა ათისთავი სახლს და კარზე დააკაკუნა.

შიგნიდან ქალის მოლოდინიანი ხმა გაისმა:

— პეტრე, შენა?

ათისთავმა ხმას გაუტკბილა:

— პეტრესგან ვარ გამოგზავნილი, სათქმელი მაქვს! ქალს შეეშინდა:

— რა მოხდა, რა დაემართა პეტრეს?

— ხომ გითხარი, სათქმელი მაქვს! — გაუმეორა ათისთავმა.

ქალი მაინც არ მოეშვა:

— სად არის პეტრე? რატომ თვითონ არ მოვიდა? ვინ ხარ შენ?

— ვერ მოვიდა... მე დამაბარა სათქმელი!

— მითხარი ეგ სათქმელი!

— კარი გააღე და გეტყვი! — განერვიულდა კაცი.

ქალმა კარგად იცოდა, რომ მისი პეტრე ასეთ სისულელეს არ ჩაიდენდა: უცხო კაცს შუალამისას ცოლთან არ გაგზავნიდა და არც რამე სათქმელს დააბარებდა. ამ კაცის

დაშაქრულ ხმაშიც ეჭვი შეეპარა. და ვიდრე რამეს მოიფიქრებდა, უცხო კაცს გასძახა:

— დაიცადე ცოტახანს!

ქალი ბიჭების ოთახში შევიდა. მამის მოლოდინში ბავშვებს ჩასძინებოდათ.

— ალექსანდრე, მიხეილ, გაიღვიძეთ! — უჩურჩულა დედამ.

ბიჭებმა სწრაფად დაჭყიტეს თვალი, ეგონათ, მამა დაბრუნდა.

დედამ თითოთ ანიშნა — ჩუმაღო, და უჩურჩულა:

— შეიღებო, რალაც უბედურებაა ჩვენს თავს. ვილაც უცხო კაცი მოგვადგა და შეუბნება, რომ პეტრესგან ვარ გამოგზავნილიო. მამათქვენი ამას არ გააკეთებდა. ამ კაცს რალაც ბოროტი აქვს გულში. როგორ მოვიქცეთ!

ბიჭებს ძალიან უყვარდათ მამა და ამაყობდნენ, რომ ის მამაცი ლეგიონერი იყო. თვითონაც სულ ლეგიონერობანას თამაშობდნენ, ვაჟკაცობასა და გამბედაობაში, მონერხებულობასა და მიხვედრილობაში ვარჯიშობდნენ. ცხრა წლის ალექსანდრეს და რვა წლის მიხეილს ტოლებში წინ ვერავინ დაუდგებოდა, ისე კარგად ხმარობდნენ შუბს, მახვილსა და ფარს, სხვა იარაღებსაც.

ბიჭებს არ შეეშინდათ, უცხო კაცი რომ მიადგა მათ სახლს. ჩაფიქრდნენ, რა მოვიმოქმედოთო. დედას დიდი იმედი ჰქონდა, რომ ალექსანდრე და მიხეილი მასაც დაიცავდნენ და მამასაც.

— არ გავუღოთ კარი, არ შემოვუშვათ! — თქვა ალექსანდრემ, მაგრამ გადაიფიქრა: არ ივარგებს ასე, რადგან ვერ გავიგებთ, რა შეემთხვა მამასო.

— შემოვუშვათ და გვითხრას, რა უნდა და სად არის მამა! — თქვა მიხეილმა.

— მამას დახმარება სჭირდება, შეიღებო, რალაც ამბავია მის თავს! — წუხდა ბიჭების დედა.

ალექსანდრემ სხვანაირად მოიფიქრა:

— თუ ის კაცი ჩუმაღ გველაპარაკებოდა, მაშ არ უნდა ვინმემ გაიგოს მისი აქ მოსვლა...

— ჰო... — დაეთანხმა მიხეილი.

— და არც ის უნდა, რომ ჩვენ გავიღვიძოთ... დედასთან მოვიდა ჩუმაღ... ასე გვიან...

— ჰო... — ისევ დაეთანხმა მიხეილი.

— თუ არ შემოვუშვებთ, მაშინ ვერ გავიგებთ, სად არის მამა...

ათისთავმა ისევ დააკაკუნა კარებზე — ფრთხილად და ნერვიულად.

— ნუ გეშინია, დედა, — თქვა მიხეილმა, — შენ გაუღე კარები, ჩვენ აქედან მოვუსმენთ, რას გეტყვის. თუ ბოროტებას დააპირებს, მაშინ ჩვენ ვიცით, რასაც ვიზამთ!

— ქალო, გააღე კარები, სასწრაფოა! — დაისისინა ათისთავმა.

— თქვენი იმედი მაქვს, შეილებო! — უჩურჩულა დედამ ბიჭებს და კარების გასაღებად გაემართა.

ათისთავი ჩუმად, უხმაუროდ შევიდა ოთახში.

ქალმა სანთელი მიანათა. ჩაცმულობით მიხვდა, რომ ლეგიონერი იყო.

— სად არის პეტრე? ვინ ხარ? რა სათქმელი გაქვს? — თავშეკავებით ჰკითხა ქალმა.

— ბავშვებმა არ გაიღვიძონ! სადმე კუთხეში მივდგეთ და გეტყვი! — ჩუმად თქვა ათისთავმა.

— ბიჭები შინ არ არიან, პეტრეს ძმამ თავისთან წაიყვანა! — იტყუა ქალმა.

ათისთავს გაუხარდა. სწორედ ღმერთმა მომიგვარა საქმეო, გაიფიქრა.

— მაშ თუ ეგრება, გეტყვი! — ათისთავი თამამად ჩამოჯდა საწოლზე, — მოდი, დამიჯექი აქ და ყველაფერს გიამბობ!

— აქედანაც გავიგებ! — უთხრა ქალმა, — თქვი, ბოლოს და ბოლოს, სად არის პეტრე, რა სათქმელი გაქვს!

ბიჭები მეორე ოთახში ისმენდნენ, რას ლაპარაკობდა უცხო კაცი.

— არ გინდა გვერდით დამიჯდე? აი, რას გეტყვი. შენი ქმარი პეტრე ჰეროდე ანტიპამ დღეს დილეგში ჩააგდო. დიდი დანაშაული ჩაიდინა, პატარა ბავშვს ისე სცემა, რომ სიკვდილამდე მიიყვანა. ანტიპა ხვალ პეტრეს თავს მოჰკვეთს. მე შემიძლია ვთხოვო მეოთხედმთავარს და აპატიებს. გინდა?

— მერე რა გიშლის?

ქალი მიხვდა, რომ ეს კაცი მართალს არ ლაპარაკობს, და რომ პეტრე ტყუილუბრალოდ დაუმწყვდევიათ დილეგში.

— მოდი, დამიჯექი გვერდით და გეტყვი, რაც მიშლის. შენ შეგიძლია გადაარჩინო შენი ქმარი, ან ხვალ თავმოჭრილს იხილავ!

ქალი ცოტახანს გაიტრუნა, თითქოს კარებს იქიდან ბიჭების ფარულ რჩევას ელოდა. ბიჭებმაც ურჩიეს, და დედა მიუხვდა მათ.

— მამ პეტრე დილეგშია? — ჰკითხა შეწუხებული და უიმედო ხმით.

— ჰო — მეთქი, ხვალ ანტიპა თავს მოჰკვეთს!

— ვაიმე, როგორ ვუშველო ჩემს პეტრეს, როგორ ვუშველო! — ტირილი დააპირა ქალმა.

— ხომ გითხარი, როგორ უნდა უშველო!

— იქნებ მატყუებ? — დაეჭვდა ქალი.

— არაფერსაც არ გატყუებ... თუ არ დაიჯერებ, შენს თავს დააბრალებ! — კიდევ უფრო დააშინა ქალი ათისთავმა.

ქალი ცოტახანს შეწუხებული იდგა. თითქოს ვერ გადაწყვიტა, როგორ მოქცეულიყო. ათისთავს კი უფრო და უფრო იმედი ეძლეოდა, რომ ცოტაც და ქალი მის ნებას დაჰყვებოდა.

— თუ შენთან მოვალ, ქმარს გადაამირჩინ? — ჰკითხა ქალმა ათისთავს.

— სხვა ვერავინ გადაგიჩინებს პეტრეს! მოდი, რაღას აყოვნებ! — ვეღარ ითმენდა ათისთავი.

ქალი ისევ ჩაფიქრდა.

— ჯერ გადაამირჩინე პეტრე და მერე შევხვდეთ! — უთხრა ქალმა, თითქოს კიდევ შეეხვეწა.

— არა! — გადაჭრით მიუგო ათისთავმა, — თუ არ მოხვალ ჩემთან, ხვალ თავმოჭრილ ქმარს იხილავ!

— შუალამეა გადასული, ვერ მოვასწრებთ! — ისევ გაიბრძოლა ქალმა.

ათისთავს გაუხარდა, ქალი დათანხმდა.

— მოვასწრებთ, მოვასწრებთ! — ათისთავმა ისიც კი იფიქრა, ქალს ძალიან მოეწონვარ და ამიტომ გაბედულად უთხრა, — ეხლაც და მერეც შევხვდებით... მოდი ჩქარა...

— კარგი, — მორჩილად უთხრა ქალმა, ისეთი ხმით, რომ კაცს ეტყვი არ აელო მის გულწრფელობაში, — ოღონდ პეტრე გადაამირჩინე და თანახმა ვარ!

„ასეც ვფიქრობდი, — გაბედნიერდა ათისთავი, — ეს ლამაზი ქალი ამაღამაც და მერეც ჩემი იქნება... რისი პეტრე, რა პეტრე!“

— მაშინ გაიხადე და მოვალ... წყალს მოვიტან დასაბანად! — ჩუმად უთხრა ქალმა, — იარაღი და ტანსაცმელი აქ დააწყვე! — და კუთხეში დადგმულ სკივრზე მიუთითა. როცა ვითომდა წყლის მოსატანად მიდიოდა, შეჩერდა და ზრუნვით ჰკითხა, — საჭმელიც ხომ არ მოგიმზადო, მშვიერი იქნები!

— მერე, მერე, ქალო, ჯერ მოდი ჩემთან! მოიტანე წყალი, თუ მოგაქვს, და დაბანე!

ათისთავი გაჩქარებით იხდიდა ტანსაცმელს. მახვილი სკივრზე დადო, ზემოდან ტანსაცმელი დაყარა.

ქალს ხელში სანთელი ეჭირა და მოუთმენელ ლეგიონერს უნათებდა. შიშველი ათისთავი სანთლის შუქზე მორევენებას ჰგავდა. შემდეგ ქალი ბიჭების ოთახში გავიდა ვითომდა წყლის მოსატანად და სანთელიც გაიყოლა. ათისთავი სიბნელებში დარჩა.

— ახლა ჩვენ ვიცით, დედა! — ჩურჩულით თქვა მიხეილმა.

ალექსანდრეს ხელთ ფქვილისაგან დაცლილი ტომარა ეჭირა, მიხეილს მახვილი ჰქონდა მომარჯუებული.

— ქალო, სადა ხარ? — ათისთავს მოთმინება ელევოდა.

— მოვდივარ! — გასძახა ქალმა. თიხის თასში წყალი ააჩრიალა, ვითომდა, აი, ხომ გესმის, მეც ვჩქარობო, — ვაიმე, სანთელი ჩამიქრა! — წამოიძახა.

— მოდი, მოდი, არ გვინდა სანთელი, არც წყალი გვინდა! — ლამის შეიშალა ათისთავი.

და უცბად რა მოხდა, ათისთავმა ვერ გაიგო.

ჯერ ეგონა, ქალიც ჩემსავით მოუთმენლობამ შეიპყრო და გულში მიხუტებსო. მერე ეგონა, საწოლზე მაწვენსო. მერე — საბანს მაფარებსო. მაგრამ ვერ ხვდებოდა, რატომ ასე უცნაურად იქცეოდა ქალი.

საბოლოოდ კი ის მოხდა, რომ ალექსანდრემ ფქვილის ტომარა ათისთავს თავზე ჩამოაცვა და კისერზე თოკით შეუკრა; ბიჭებმა ერთობლივი ძალებით ხელები ზურგზე გადაუგრიხეს და მაგრად გაუკრეს.

— ქალო, რას მიშვრები! — სისინებდა ათისთავი, — ქალო, გამიშვი, თორემ ქმარშვილს ამოგიწყვეტ!

ქალი კი არაფერ შუაში იყო, ამას ალექსანდრე და მიხეილი აკეთებდნენ.

მიხეილმა ათისთავს გულზე მახვილის წვერი დააბჯინა.

— ბოროტო, — მკაცრად უთხრა მიხეილმა, — თუ არ გინდა ახლავე გაგათავო, მითხარი, სად არის პეტრე? — და მახვილი მიაჭირა.

ახლა კი მთლად გაერკვა ათისთავი, რომ საქმე ძალიან ცუდად ჰქონდა. გაბრიყვდა, გასულელდა, ქალმა მოატყუა, სახლში სხვებიც ყოფილან.

— არ მომკლა, არ მომკლა! — ატირდა ათისთავი, — დილეგშია პეტრე!

მიხეილმა კიდევ მიაჭირა მახვილი.

— არ მომკლა... არ მომკლა... — ისევ შეევედრა ათისთავი.

— ვინ იცავს დილეგს?

— ქოფაკი ძალლი, მეტი არავინ!

— ვინ ჩააგდო პეტრე დილეგში? — და კიდევ მიაჭირა მახვილი.

— მე, მე... — ტიროდა დაფუთებული ათისთავი, — გამიშვი და გაგითავისუფლებ პეტრეს...

— რატომ ჩააგდე პეტრე დილეგში?

— ჩემი ბრძანება არ შეასრულა...

— რა ბრძანება?

— გაჯოხე — მეთქი ერთი ბიჭი და არ გაჯოხა, შეეცოდა...

— ის ბიჭი სადლაა? — მიხეილი უფრო და უფრო აჭერდა გულში მახვილს ათისთავს.

— ისიც დილეგშია... არ მომკლა... გამიშვი და ორივეს გაგათავისუფლებ! — ტიროდა შემინებული ათისთავი.

— მარტო მაგიტომ ჩააგდე დილეგში პეტრე? თქვი მართალი!.. — და მახვილი ისე მიაჭირა, რომ მკერდი გაუჩნველიტა.

— არ მომკლა...

— მართალი თქვი — მეთქი! — გაბრაზდა მიხეილი.

— თუ არ მომკლავ, გეტყვი...

— თქვი — მეთქი მართალი! — გაბრაზდა მიხეილი. მახვილმა ათისთავს დიდი საშიშროება აგრძნობინა.

— გეტყვი... გეტყვი... არ მომკლა ოღონდ... პეტრეს ცოლი მომეწონა...

— მერე? — დაჰყვირა მიხეილმა...

— იმიტომ დავიჭირე ერთი ღამით...

— წამოდექი ფეხზე! — უბრძანა მიხეილმა.

თოკით შეკრული ათისთავი, რომელსაც მუცლამდე ტომარა ჰქონდა ჩამოფარებული, მუცლის ქვემოთ კი შიშველი იყო, ალექსანდრემ და მიხეილმა წინ გაიგდეს.

— მომხსენით ტომარა, გამიხსენით ხელები! — ეხვეწებოდა ათისთავი.

მიხეილმა ღუნღულებში შუბის წვერი შეუჩხირა.

— მიშველეთ, მიშველეთ! — აყვირდა ათისთავი.

— შეილებო, პირი შეუკართო! — გააფრთხილა დედამ ბიჭები.

ალექსანდრემ ტომარა ჩამოფარებულ ათისთავს პირში ლაგამივით ამოსდო თოკი და კეფასთან გაუკვანძა. ათისთავს ყვირილი აღარ შეეძლო, მხოლოდ ზმუოდა და ყმუოდა.

ბიჭებმა იცოდნენ, სადაც იყო დილეგი... ამ სამი დღის განმავლობაში, რაც მამასთან ჩამოვიდნენ, იმდენი ირბინეს ყაზარმაში და მის გარშემო, რომ ყველაფერი შეისწავლეს.

ნახევარმთვარე უნათებდათ გზას.

დილეგთან მართლაც იწვა ჯაჭვით ხეზე მიბმული ქოფაკი ძაღლი. დაინახა თუ არა, ვილაცეები მოდიანო, ყფა ატეხა.

— მიდი, მიეფერე ქოფაკს! — უბრძანა მიხეილმა ათისთავს, ალექსანდრემ კი ისევ მიაჭირა ღუნღულებზე შუბის წვერი.

ათისთავმა ფეხი ააჩქარა და ქოფაკისკენ გაემართა. ქოფაკიც გამოიქცა მასთან შესახვედრად. ძაღლი სუნით მიხვდა, რომ ეს მისი უფროსი იყო, მაგრამ გაშიშვლებული არასოდეს ენახა. ჯერ ერთი-ორჯერ ბრაზით შეჰყეფა, რატომ ხარ ასე უსირცხვილოდო. ათისთავმა დაიზმუილა. უკნიდან ისევ იგრძნო შუბის ჩხვლეტა. ძაღლმა ხმაც იცნო და პატრონს ფეხებზე დაუწყო ლოკვა. მერე სამი დღის უჭმელმა მოულოდნელად კბილები ჩაასვა, ხორცი გამოუგლიჯა.

— მმმმ... — აზმუილდა სიმწრისაგან ათისთავი და მიწაზე გაიშხლართა.

ქოფაკმა ჩამოგლეჯილი ხორცის ნაჭერი მიწაზე დააგ-
დო, გვერდით მიუწვა და დიდხანს ყნოსა, შემდეგ კი ნაწილ-
ნაწილ დაუწყო ყლაპვა. ძალლი ძალიან ბედნიერი იყო და და-
ავიწყდა, რომ დილეგთან არავინ უნდა მიეშვა და არც იქიდან
გამოეშვა.

ამასობაში ბიჭებმა დილეგი გახსნეს.

— მამა, ჩქარა გამოდი გარეთ და ეგ ბიჭიც წამოიყვან-
ნე! — შესძახა სიბნელებაში ალექსანდრემ.

პეტრე მიხვდა, რომ შეილები მის სახსნელად მოვიდ-
ნენ. ბიჭიც ფეხზე წამოაყენა და გარეთ გამოიყვანა.

იმის დრო არ იყო, რომ ვითარება გაერკვიათ.

— უნდა გავიქცეთ, მამა! — გააფრთხილა მიხეილმა.

— ძაღლმა შეიძლება დაგლიჯოს ეს ბოროტი! — თქვა
ალექსანდრემ.

ვიდრე ქოფაკი თავისი საქმით იყო გართული, ბიჭებმა
დილეგში შეათრიეს ათისთავი და გარედან ურდულით გადა-
კეტეს.

ქოფაკი უკანასკნელ ლუკმას ყლაპავდა და არც ადარ-
დებდა, რომ პატიმრები გაიპარნენ. მარტო მაშინ მიმოიხედა
ირგვლივ, როცა მიწაც გალოკა და დარწმუნდა, რომ თურმე
ყველაფერი გადაუსანსლავს, მიმოიხედა, რომ ვინმე დაენახა
და მისგანაც მოეთხოვა გემრიელი საჭმელი.

მარტო მთვარემ დაიხსომა, საითკენ გაემართნენ პეტ-
რე, მისი ლამაზი ცოლი და გაბედული ბიჭები — ალექსანდრე
და მიხეილი, რომლებიც მხრებში ედგნენ ძალადაკარგულ თა-
ნატოლ ბიჭს და სიარულში ეხმარებოდნენ. მთვარე კი იმი-
ტომ არის მთვარე, რომ იცის ღამის საიდუმლოებათა შენახ-
ვა.



ღმერთი დასაჯა, ყაჩაღი კი გაათავისუფლა

დიდ ბიჭს აერ-დაერია ღრო: აღარ იცოდა, რამდენი თვე გავიდა მას შემდეგ, რაც ათისთავს გამოექცა. იმის შიშით, რომ ლეგიონერებმა არ დამიჭირონო, ქალაქში ველარ გაბედა მისვლა, ვერც სხვაგან სადმე ჩნდებოდა. როგორღაც ხევის პირას ქონმახვიით საცხოვრებელი მოიწყო და იქ იძინებდა.

ამონ-რასა და მის „ავან-ჩავანთა“ ბოლმა აღრჩობდა დიდ ბიჭს. ყველა თავის უბედურებას მას აბრალებდა და შურის საძიებლად ემზადებოდა. მოუძებნი, სადაც არ უნდა იყოს, და მაშინ ნახოსო. ფილოსოფოსის გამოქვაბულებში ასვლას ბუნგლოს შიშით, რა თქმა უნდა, ვერ გაბედავდა, მაგრამ იმედი ჰქონდა სხვაგან სადმე მოიხელთებდა თავის მტრებს.

ხევში წყალი მოჩხრიალებდა. დიდ ბიჭს უყვარდა წყალში ბანაობა და თევზის ჭერა. თევზი და გარეული ხილი მისი მთავარი საკვები გახდა. მთელ დღეებს იმაში ატარებდა, რომ ბანაობდა და უთავებოლოდ ხეტიალობდა. თან სულ ბოროტ ფიქრებში იყო ჩაძირული. თავის წარმოდგენებში ათასჯერ მაინც დაიჭირა ამონ-რა და მისი მეგობრები. მათზე ცდიდა საკუთარ ძალას: აწამებდა თითოეულს, ისინი მის ირგვლივ მუცლებზე ხოხავდნენ, ფეხებს უკოცნიდნენ, ევედრებოდნენ შეგვიბრალო. დიდი ბიჭი მათ თავდაყირა კიდებდა ხეზე, თვალებს უშანთავდა, თავს სჭრიდა...

ზოგჯერ ისე გაერთობოდა ხოლმე თავისი წარმოდგენებით, რომ ყველაფერი სინამდვილედ ეჩვენებოდა.

ბოროტმა აზრებმა სულ დაუმახინჯეს სახე. ცხვირი წაუგრძელდა და ნესტოებმა მალლა აიწიეს. მარჯვენა თვალი კაკლისხელა გაუხდა, ბუდეში ველარ ჩაეჭია და გადმოეკარკლა. მარცხენა თვალი კი დაუვიწროვდა, გაეწეა და სიღრმეში ჩაემალა. ნიკაპი ყელისკენ შეუბრუნდა. ყველაფრის შიშმა მარცხენა ყური ერთი მტკაველი გაუხადა, მარჯვენა კი როგორც საყვირი, ისე დაუგრიხა. ერთი უკანა კბილი ისე გაეხარდა, რომ პირში ველარ დაეჭია, მარცხენა ყბა გახვრიტა და გარეთ გამოვიდა. თმები სულ გასცვივდა, თავი

აგურივით გაუხდა, ზედ შავი ლაქები დაედო; მარცხენა მხარეს თანდათან პატარა წვეტიანი რქა ამოეზარდა. მარცხენა ხელი მარჯვენაზე გრძელი გაუხდა, ხოლო ხელის მტევნებზე ნეკთან ახლოს თითო ახალი თითი ამოეზარდა. მარჯვენა ფეხი აშკარად დაუპატარავდა, მარცხენა მხარი წაუგრძელდა.

ასე აისახა მის სხეულზე მისი ფიქრები და ზრახვები.

დიდი ბიჭი ვერ ამჩნევდა, როგორ იცვლებოდა მისი გარეგნობა, რადგან არ იყო ირგვლივ რამე, რომ სარკედ გამომდგარიყო. მდინარის მთელ სიგრძეზე, რაც მან გამოიკვლია, გაქრა ყოველგვარი ანარეკლი. დიდი ბიჭი მხოლოდ მაშინ აღმოაჩინდა ხოლმე ცვლილებებს თავის სხეულზე, როცა ხელით მოისინჯავდა ან ხელს წამოსდებდა. კიდევ გაუხარდა, როცა თავზე მისმა ხელმა პატარა რქა იპოვა, მაგრამ სწყინდა, რომ მეორე რქა იგვიანებდა. ერთხელ ხელი გაიკაწრა კბილით, გარეთ რომ გამოეზარდა, და ესეც ძალიან გაუხარდა; მაგრამ გული ეტკინა, როცა ასეთივე კბილი მეორე ლოყაზე ვერ იპოვა.

დიდმა ბიჭმა თავი მთელი ხეობისა და მის ბინადართა მბრძანებლად წარმოიდგინა, მაგრამ ღამით საიმედოდ ეძაღუბოდა თავის ქოხმანში საკუთარ ქვეშევრდომებს, ვაი თუ თავს დაძვინდებდა და შეეშამონო.

ერთხელაც ხეტიალის დროს დიდი ბიჭი დიდი გზის წინ აღმოჩნდა. ჯერ იფიქრა, გზაზე ჩემი ყოფნა სახიფათოა — ვინმე შემნიშნავსო. მაგრამ მაშინვე გული დაიმშვიდა: ალბათ, ძალიან დიდი დრო გავიდა, რაც დაკარგული ვარ და ლეგიონერებსაც და ჩემს შმობლებსაც ნამდვილად მკვდარი ვგონივარო, მკვდარს კი ვინ დაუწყებს ძებნასო. გზის პირას ქვაზე ჩამოჯდა და გზას გახედა: ვნახოთ, ვინ გამოჩნდებაო.

დიდხანს მოუხდა ლოდინი. სხვა რა საქმე ჰქონდა. ცხვირწინ ჭიანჭველების ბუდე შენიშნა. ჯერ ჭიანჭველების თვლა დაიწყო, შემდეგ ჩხირი აიღო და ბუდეში დაუწყო ჩიჩქნა. საწყალი ჭიანჭველები დაფეთებულები გამორბოდნენ ბუდიდან და ერთმანეთს ეხეთქებოდნენ.

დიდი ბიჭი კი ჩხირით სულ უფრო ღრმად იჭრებოდა ბუდეში და ემუქრებოდა, ყველაფერს დაეინგრევითო. ბოლოს ჭიანჭველების მეფის სამყოფელსაც მიაღწია. მეფე განრისხდა, გამოეარდა ბრძოლის ველზე და უხმოდ, თავისი უღვა-

შებით რაღაც დაუყვია თავის ქვეშევრდომებს. ათასობით აქეთ-იქით გაქცეული ჭიანჭველა დაუყოვნებლივ შემობრუნდა და თავის დამჩაგრავს შეესია. ჭიანჭველები შეუძვრნენ ყურებში, თვალებში, პირში, ნესტოებში, დაერივნენ მთელ სხეულს. ყველგან ურჭობდნენ და ურჭობდნენ შხაშიან ნემსებს. დიდმა ბიჭმა ცოფიანივით დაიღრიალა და მდინარეში გადაეშვა.

როცა, როგორც იქნა, მოიცილა ჭიანჭველები და მოსულიერდა, ისევ გზაზე გავიდა და ახლა სხვა ქვაზე ჩამოჯდა. ამ დროს შორს ვიღაც მგზავრი დაინახა.

თანდათან გაარკვია დიდმა ბიჭმა, რომ კაცი ვირზე იჯდა. ვერ იფიქრა, ვთხოვ, იქნებ რამე საჭმელი ჰქონდეს და მაჭამოს, ან იქნებ თავისთან წამიყვანოს და შემიფაროსო. მაგრამ რაც უფრო უახლოვდებოდა მგზავრი დიდ ბიჭს, მით უფრო ბოროტი ზრახვები უჩნდებოდა. გზიდან გადავიდა და ბურჩებს ამოეფარა. ხელში მოხერხებული ქვა მოიმარჯვა.

ვირზე მოხუცი კაცი იჯდა და რაღაც მცირე ტვირთი ვირის ზურგზე ჰქონდა გადაკიდებული. თავს ისე აკანტურებდა, თითქოს თელემსო. არც მოხუცს და არც ვირს დიდი ბიჭი არ შეუნიშნავთ. ვირმა ჩაქჩაქით ჩაიარა ბურჩების წინ, და დიდ ბიჭს მოხუცის ჩუმი ღიღინი შემოესმა. „ახლავე გაგაჩუმებ!“ — გაიფიქრა დიდმა ბიჭმა, ბურჩებიდან ჩუმად გამოვიდა და მგზავრს უკნიდან წამოეწია, ახლოს მივიდა და ქვის წვეტიანი მხარე თავში გამეტებით ჩასცხო. მოხუცს ხმაც არ გაუღია, ნელა გადმოწვა ვირიდან და გზაზე დაეცა. ვირმა ზურგზე სიმსუბუქე იგრძნო; ალბათ ჩუმი პატრონი ფეხით აპირებს გამომყვესო და უკან მოიხედა, რომ თავისავით მოხუც მეგობრისთვის თვალებით მადლობა ეთქვა. მაგრამ როცა დაინახა, რომ პატრონი დაბლა ეგდო, მის ზურგზე კი ვიღაც თავხედი აპირებდა შეჯდომას, ძალიან გაწყრა და გაგულიხდა, ერთი საშინელი დაიფროყინა და დიდ ბიჭს იმისთანა დაუნდობელი ტყუბი ტლინკი მიაყარა, რომ კარგა მალა აისროლა და გზიდან გადააგდო.

დიდი ბიჭი გვიან მოვიდა გონს. მუცელი ეწვოდა, ალბათ ორიოდ ნეკნი ჩამტვრეული ჰქონდა. ძლივს გაიხსენა, რა დაემართა და რატომ ეგდო თხრილში. ვაი-ვაგლახით წამოიწია და გზისკენ გაიხედა.

მოხუცი ისევ ეგდო გზაზე, ვირი კი თავს ეღგა და იმედს არ კარგავდა, რომ პატრონი თვალს გაახელდა და

ზურგზე შეაჯღებოდა. დიდ ბიჭს იმ ტომარაში, ვირს რომ ჰქონდა გადაკიდებული, რაღაც ეგულებოდა. ფოფხვით მივიდა გზასთან, კვნესით წამოდგა ფეხზე და ვირს გვერდიდან მიადგა. ვირი თითქოს ვერ ხედავდა უცხოს, უძრავად იდგა და პატრონს დაჰყურებდა. მაგრამ როგორც კი დიდმა ბიჭმა ხელები გაიწვდინა და ტომარას შეეხო, ვირმა ისევ საშინლად დაიყროყინა და დიდ ბიჭს თავისი მაჯის სიმსხო და ორადლიანი კუდი ღონივრად მოქნეული მათრახივით გადაუჭირა ზურგზე.

დიდ ბიჭს ნამდვილად ჩაემტვრა კიდევ ორი ნეკნი და მაშინვე გონება დაკარგა.

როცა ცნობა დაუბრუნდა და თვალი გაახილა, დაინახა, რომ თავს ვილაცხები ედგნენ, რაღაცაზე ლაპარაკობდნენ და მასზე მიუთითებდნენ. დიდმა ბიჭმა იფიქრა, ესენი ნამდვილად ლეგიონერები არიან და მე დამემძებნო. უცბად გაახსენდა, როგორ გადმოაგდო მოხუცი ვირიდან, და თავში გაუელვა, რომ ესენი ამ კაცის მოკვლაშიც დამადანაშაულებენო. შეშინდა დიდი ბიჭი, ლამის ისევ თვალთ დაუბნელდა.

— მე არა, მე არა... — დაიყვირა რაც ძალი და ღონე ჰქონდა. კი არ დაიყვირა, ეგონა დავიყვირო, პირიდან კი რაღაც საცოდავი სისინი ამოუშვა.

მის თავთან ორი ბიჭი დაიხარა.

— კვლები თუ იმქვეყნიდან ბრუნდები? — ჰკითხა ერთმა.

დიდმა ბიჭმა გაარკვია, რომ ესენი ლეგიონერები არ იყვნენ, და გული მიეცა.

— გეხვეწებით, მიშველეთ! — ტურებით უთხრა მან და ბიჭებიც მიუხვდნენ. გზიდან გადაათრიეს, პირში რამდენიმე ყლუპი წყალი ჩაასხეს და მოასულიერეს.

დიდ ბიჭს ტკივილები დაუბრუნდა და კვნესა დაიწყო.

ბიჭები ჩააცივდნენ: ვინ ხარ და რატომ ეგღე გზაზე, რა შეგემთხვა. დიდმა ბიჭმა იფიქრა, ესენი უთუოდ გამცემენ მოხუცის მოკვლის გამო და ლულულად დაიწყო.

— მე არ მომიკლავს... მე არ მომიკლავს... ღმერთს გეფიცებით, მე არ მომიკლავს... მე არ დამაბრალოთ...

ბიჭებმა ერთმანეთს გადახედეს: აშკარა იყო, უკვირდათ, რას ამბობსო.

— ვინ არ მოგიკლავს? — ჰკითხა ერთმა.

— ის კაცი, ვირზე რომ იჯდა... მე არ მომიკლავს...

— სად არის ვირი ან მოკლული? — ჰკითხა მეორემ.

დიდმა ბიჭმა წვალებით მოიბრუნა პირი გზისკენ, სადაც ვირი და მკვდარი მოხუცი ეგულებოდა, მაგრამ გზაზე არავინ ჩანდა.

— ალბათ მომეჩვენა... — ჩაილულლულა. გულში კი გაიფიქრა — გადავრჩიო. მაგრამ სად უნდა გამქრალიყვნენ მოხუცი და ვირი?

ბიჭებმა არ მიატოვეს დიდი ბიჭი. რამდენიმე დღე უვლიდნენ, ასმევდნენ და აჭმევდნენ. სამივემ სწრაფად გაუგო ერთმანეთს.

დიდ ბიჭს ძალიან მოეწონა მათი სახელები — ასე გვეძახის ყველა, განუმარტეს მას.

— მე უზრდელი მქვია, — უთხრა ერთმა.

— მე კი გაუზრდელი, — უთხრა მეორემ.

ბიჭები ძმები იყვნენ.

— ჩვენ ბარაბას შვილები ვართ! — სიამაყით განუცხადა უზრდელმა დიდ ბიჭს.

ბარაბას სახელი მთელ იუდეაში იცოდნენ. ყაჩაღი, მკვლელი და შფოთისთავი იყო. ყველას ეშინოდა მისი. დიდები ურჩ შვილებს ხშირად ბარაბათი აშინებდნენ: მოვა და მოგკლავსო. დიდ ბიჭს კიდეც გაუხარდა და კიდეც შეეშინდა, ბარაბას შვილებს რომ გადაეყარა. შეშინდა იმიტომ, ყაჩაღის შვილებმა რამე არ მიქნანო, გაუხარდა კი იმიტომ, იქნებ ბარაბასთან მიმიყვანონ და ეგება თავის ყაჩაღებში ჩამრიცხოსო.

— სად არის ახლა ბარაბა? — ჰკითხა დიდმა ბიჭმა ძმებს.

— დაჭერილია... სიკვდილით დასჯას უპირებენ, — ჯვარს უნდა აცვან... — უპასუხა გაუზრდელმა.

— რატომ დაიჭირეს ბარაბა? — ისევ ჰკითხა დიდმა ბიჭმა.

— რატომ დაიჭირეს?.. არ გაგიგია, რომ მამარეწი ცნობილი ყაჩაღია... დიდ გზებზე ყაჩაღობდა... რამდენიმე კაცი მოკლა... ზოგს სახლი დაუწვა... მეტი გინდა? — უპასუხა გაუზრდელმა.

დიდი ბიჭი შიშისაგან აიბუხა: თუ გაიგებენ, რომ ვირით მიმავალი მოხუცი მე მოკვალი, მეც დამიჭერენ და

ჯვარზე გამაკრავენო. ეს რომ გაიფიქრა, ამ ბიჭებისგან გაქცევა მოუნდა, მაგრამ ნიკნები ჯერ შეხორცებული არ ჰქონდა, ამიტომ არც სირბილი შეეძლო.

— მამათქვენს არ მიჰყავლით საყარალოდ? — დაინტერესდა ბიჭი.

— მამაჩვენი ახლოსაც არ გვეკარებოდა...

— რატომ?! — გაუკვირდა დიდ ბიჭს.

— ნაბიჭვრები ხართო... თქვენი ნახვაც არ მინდაო, ასე გვეუბნებოდა...

— შინ არ მოდიოდა ხოლმე? არაფერი მოჰქონდა სახლში?

— სად შინ? — უპასუხა უზრდელმა, — ჩვენ სახლი არა გვაქვს, სადაც დაგვილამდება, იქ ვათენებთ...

— მაშ სად მიჰქონდა ბარაბას ნაძარკვი? — ვერ ისვენებდა დიდი ბიჭი.

— არ ვიცით, სად მიჰქონდა...

— არ გიყვართ მამათქვენი?

— შენ რას გადაგვეკიდე... რაში გაინტერესებს ბარაბა!

— ცოტა არ იყოს გაწყრა გაუზრდელი, — რად უნდა გვიყვარდეს, როცა მას არ გუყვარვართ!

დიდი ბიჭი გაჩუმდა. თავში აზრმა გაუელვა. „ეს ბიჭები ჩემზე პატარები არიან და ადვილად დავიყოლებ. განა ჩვენ კი ვერ ვიყარალებთ? კიდეც რამდენიმე უპატრონოს მოვინახავ და ყარალების ბანდას შევქმნი. ბარაბა დაჭერილია... ბავშვების ბანდა ბარაბასას აჯობებს!“ — ეს გაიფიქრა დიდმა ბიჭმა და თავი ყარალების ბელადად წარმოიდგინა. „ყველას შიმის ზარს დავცემ... გამდიდრდები... თუ ამონ-რა და მისი ავან-ჩავანები სადმე მოვიხელთე, მაშინ ნახონ!“ — და თითქოს უკვე ასეც ხდებოდა ყველაფერი, დიდი ბიჭი წელში გაიმართა, ტკივილები დაივიწყა, — ყარალების უფროსს არაფერი არ უნდა სტკიოდესო, — და ბარაბას ბიჭებს ზემოდან დახედა.

ძმებმა გაკვირვებით შეხედეს — ფეხზე წამოდგაო.

— იცით, რას გეტყვით! — ამაყად და ბრძანებით თქვა დიდმა ბიჭმა, — ამ გზის ბატონ-პატრონი მე ვარ! — და დიდი გზისკენ გაიშვირა ხელი, — ვერც ბარაბა და ვერც სხვა ვინმე აქ ვერ შემეცილება! თქვენს გამოჩენამდე ყოველდღე ერთ-ორ კაცს მაინც ვკლავდი... თუ გინდათ, დღეიდან ერთად

ვიყარალოთ. მე თქვენი უფროსი ვარ! თუ თანახმა ხართ, ფიცი ღაველოთ, თუ არა და ახლავე წადით აქედან!

ბიჭები ფეხზე წამოდგნენ. ახლა დაინახეს, რომ ისინი მხრებამდე ძლივს სწვდებოდნენ დიდ ბიჭს. გაუხარდათ ძმებს: თუ ეს ბიჭი ეგრე იოლად ზოცავს ხალხს, ხელმძღვანელადაც ივარგებსო, გაიფიქრეს და შიში გაუჩნდათ მის მიმართ. ყარალობა კი ორივეს ძალიან უნდოდა.

— თანახმა ვართ! — თქვა ორივემ ერთად, — ღაველოთ ფიცი!

ცერის თითები გაიჭრეს და ჭრილობები ერთმანეთს მიადეს, რომ მათ სხეულში ერთმანეთის სისხლი არეულიყო. ფიცი და პირობა შეიკრა.

— ჩვენ ბარაბაზე საშიში და ძლიერები ვიქნებით! — თქვა დიდმა ბიჭმა.

ბარაბას ბიჭები სიამაყით აღივსნენ: მამას აჯობებენ, მამაზე სახელგანთქმული ყარალები გახდებიან!

დიდმა ბიჭმა გზას გახედა და, როცა დარწმუნდა, რომ მართლაც ვიღაც მოდიოდა ცხენით, ბიჭებს ჩუმი ხმით უთხრა:

— ახლა თქვენს გამოცდას მოვაწყობ... მოიმარჯვეთ ქვები და ბურქებში დაიმალეთ...

ძმებმა მსწრაფლ შეასრულეს ბრძანება.

და როცა ცხენზე მჯდარი კაცი მათ გაუსწორდა, დიდმა ბიჭმა ბრძანება გასცა:

— ესროლეთ თავში!... არ ააცდინოთ, თორემ...

რამდენიმე წუთში თავგახეთქილი ცხენოსანი გზაზე ეგდო, ძმებმა კი დიდი ბიჭის ბრძანებით უბე და ჯიბეები გადმოუბრუნეს, ტანსაცმელი გააძრეს, შემდეგ სამივე მიიმალა.

ასე შექმნა დიდმა ბიჭმა ყარალი ბავშვების ბანდა. მალე მონახა ოცდაათამდე უპატრონო და თავზეხელაღებული ბიჭი და ოთხი გოგოც კი და მართლაც დასცა თავზარი ახლომანხლო სოფლებში და ქალაქებში დიდსაც და პატარასაც.

სალამობით ყველა კოცონის გარშემო იკრიბებოდა. იხილავდნენ, ვის, როდის და სად შეიძლებოდა დასხმოდნენ თავს. მღეროდნენ, ცეკვავდნენ და ერთობოდნენ.

— ბიჭებო, იცით, ზვალ რა უნდა მოხდეს? — თქვა ერთმა ყარალმა გოგონამ, — აბა, მომისმინეთ. ასე ამბობენ,

რომაელმა მმართველმა, არ მახსოვს, რა ჰქვია, პილატე თუ პულატე, პრეტორიის წინ პატიმრები უნდა გაასამართლოსო. ბევრი ხალხი შეიკრიბებაო... არ გამოგვადგება ეს რამეში?

დიდმა ბიჭმა ძმებსა და კიდევ რამდენიმე ბიჭს დაავალა შეპარულიყვნენ ხალხში, ყველაფერი კარგად გაეგოთ და ამბავი მოეტანათ. ალბათ ბარაბასაც გაასამართლებენო, ფიქრობდა დიდი ბიჭი და უნდოდა გაეგო, როგორ სჯიან ყაჩაღებს.

გვიან ღამით წარგზავნილები უკან დაბრუნდნენ და ხალისითა და სიხარულით უამბეს დიდ ბიჭს, რაც ნახეს და გაიგეს. განსაკუთრებით უზრდელი და გაუზრდელი ეცილებოდნენ სხვებს, რომ ბელადისთვის ეცნობებინათ, რა სანახაობის მოწმენი გახდნენ.

— თურმე მამაჩვენ ბარაბასაც ასამართლებენ! — სიამაყით თქვა გაუზრდელმა.

— მერე?! — ჰკითხა შეშფოთებულმა დიდმა ბიჭმა. არ იცოდა, რა უნდა გახარებოდა: ის, რომ ბარაბას დასჯიდნენ, თუ ის, რომ გაათავისუფლებდნენ.

— დღეს დღესასწაული იყო და პილატე თუ პულატე ყოველ დღესასწაულზე ერთ ვინმეს ათავისუფლებს ხოლმე...

— ვის?

— ვისა და იმას, ვისაც ხალხი მოითხოვს...

— მერე?

— სულელმა მღვდელმთავრებმა პულატეს...

— პილატეს... — გაუსწორა ძმამ ძმას.

— ჰო, როგორც არის, პილატი-პულატეს ერთი უდანაშაულო კაცი მოუყვანეს: თავს მესიად ასალებს და დასაჯეო...

— მესია რა არის? — ჰკითხა დიდმა ბიჭმა

— მესია, როგორც მივხვდით, ღმერთს ნიშნავს...

— მაშე ის კაცი თავს ღმერთად ასახელებდა?! — გაუკვირდა დიდ ბიჭს.

— ღმერთად ასალებდა და ხალხი ამბობდა, მართლა ღმერთიაო, აღამიანად ქცეული ღმერთიაო...

— მერე?

— მღვდელმთავრებმა და მეღვინეებმა პულატე-პილატეს მოსთხოვეს, გინდა თუ არა, ეს კაცი აცვი ჯვარსო...

— იმ კაცს იესო ქრისტეს ეძახდნენ...

- იესო ქრისტე აცვი ჯვარსო... ღმერთი გააკარი ჯვარზეო...
- ძმები ახარხარდნენ.
- რა გაცინებთ? — განერვიულდა დიდი ბიჭი, — გააგრძელეთ.
- მერე ის მოხდა, რომ მღვდელმთავრებსა და მწიგნობრებს თურმე მამაჩვენის ამხანაგებიც შეუკრებიათ, იმათ ხალხი დააშინეს, ან შეაგულიანეს...
- ხა-ხა-ხა... — იცინოდა უზრდელი.
- და ყველა ერთხმად ყვიროდა: ჯვარს აცვი იესო ქრისტეო...
- ამას რაღა ვუყოვო, ჰკითხა პულატემ...
- პილატემ — მეთქი, შე სულელიო, რამდენჯერ გაგისწორო...
- შენ თვითონ ხარ სულელი... პალატე-პულატემ ხალხს ჰკითხა: ამას რაღა ვუყოვო?
- ვისაო?
- ასე კი არ თქვა პალატემ... პალატემ ორივე ხალხის წინ დააყენა...
- ვინ ორივე? — ვერ გაერკვა დიდი ბიჭი.
- ვერ გაიგე? ერთ მხარეს მამაჩენი ბარაბა დააყენა, მეორე მხარეს ღმერთი, და ჰკითხა ხალხს: ვინ გინდათ გაგითავისუფლოთ — ბარაბა თუ იესო ღმერთიო... ხალხმა... ხალხმა კი არა, მამაჩენის მეგობრებმა ყაჩაღებმა და მათგან დაშინებულებმა თუ მოსყიდულებმა ყვირილი ატეხეს: ბარაბა გაათავისუფლო...
- ამას რაღა ვუყოვო, იესო ქრისტეზე ჰკითხა. ეგ ჯვარს აცვიო, იყვირეს...
- პალატე-პულატესაც მეტი რა გზა ჰქონდა, მამაჩენი ბარაბა იქვე გაათავისუფლა, იესო ქრისტე კი დასასჯელად გადასცა...
- მართლა ჯვარს აცვეს ის ღმერთი? — დაინტერესდა დიდი ბიჭი.
- მაშ, საწყალი, ჯვარს აცვეს... ისიც და კიდევ ორი სხვაც...
- ბარაბა მართლა გაათავისუფლა?

— ვერ გაიგე, რას გეუბნებით ამდენხანს!.. პალატ-პულატემ ღმერთი დასაჯა, ყაჩაღი კი გაათავისუფლა... ხა-ხა-ხა...

ორივე ძმა და სხვებიც, ვინც ირგვლივ იდგნენ და ისმენდნენ, ახარხარდნენ.

— რა კარგი სამართალი ჰქონია მაგ მოსამართლეს!..

— ეხლა სად არის ბარაბა? — ჰკითხა ძმებს დიდმა ბიჭმა.

— სად იქნება? სადმე დიდ გზაზე იქნება ჩასაფრებული თავის ძმაკაცებთან ერთად, რომ ვინმე გაძარცვოს...

— ბარაბა მაშინვე მისმა ამხანაგებმა წაიყვანეს. ერთი იმახდა, უშენოდ არაფერი გამოგვდისო, ველარ ვყაჩაღობთო...

— ბარაბამ თქვენ არაფერი გითხრათ?

— გვინდოდა დავლაპარაკებოდით, მაგრამ მოგვაფურთხა და დაგვეშუქრა — თქვენთვისაც მოვიცილიო...

— იცი რას ვფიქრობ, — თქვა გაუზრდელმა, — მოდი, ჩავუსაფრდეთ ბარაბას, მაგის ძმაკაცების ადგილ-სამყოფელი გავიგოთ და მამარქვენსაც და მის ამფსონებსაც ჭკუა ვასწავლოთ, და რაც ნაყაჩაღარი აქვთ, ყველაფერი წავართვათ...

დიდი ბიჭი კი მოუსვენრობამ შეიპყრო: რას იზამს ბარაბა, როცა გაიგებს, რომ ყაჩაღობაში ბავშვები ეცილებიან, დიდი გზაც წაართვეს და ახლო-მახლო სოფლები და ქალაქებიც. აპატიებს ამას დიდ ბიჭსა და საკუთარ შვილებს? იქნებ კიდევ იცის და იმიტომ მიაფურთხა შვილებს?

„მე უნდა დავასწრო ბარაბას, უნდა ვაჯობო,“ — გაიფიქრა დიდმა ბიჭმა.



კეთილი თესლი ითესებოდა გულებში ნაყოფის აღმოსაცენებლად

დილეგიდან გამოქცეულები და მათი მხსნელები მთელი დღის განმავლობაში შეუსვენებლივ მიდიოდნენ. რა გზით და საით მიდიოდნენ, არ იცოდნენ, მაგრამ ჩქარობდნენ, რომ ყაზარმიდან რაც შეიძლება შორს წასულიყვნენ. შიშობდნენ, ვაი თუ ანტიპამ მღვერები დაგვადვენაო, და მაშინ არცერთს კარგი დღე არ დაადგებოდა. ამონ-რას ძალიან უჭირდა სიარული, ალექსანდრე და მიხეილი ეხმარებოდნენ.

ერთგან გზისპირას წყარო გამოჩნდა. წყურვილი ყველას აწუხებდა. ცოტახნით შეისვენეს და ყელი გაიგრილეს.

— წადით, დამტოვეთ ამ ადგილას, მე თქვენ გაფერხებთ! — უთხრა ამონ-რამ ბიჭებსა და მათ მშობლებს.

მთელმა ოჯახმა ერთხმად განუცხადა:

— მაგას როგორ ვიზამთ!... მარტო არ დაგტოვებთ!

— არ მინდა, რომ ჩემი გულისთვის უბედურება შეგემთხვეთ. დამტოვეთ, მე მოუუვლი ჩემს თავს! — გულწრფელად გაიმეორა ამონ-რამ თხოვნა, მაგრამ არცერთ მათგანს ასეთი რამის მოსმენაც არ უნდოდა.

— ჩვენი უბედურება და სასჯელი ის იქნება, შენ რომ მიგატოვოთ! — უპასუხა მიხეილმა.

ძმებს ძალიან მოეწონათ ამონ-რა, შეუყვარდათ. პეტრე კი იმასაც ფიქრობდა, რომ თუ თავის პატარა ქალაქში მშვიდობით ჩააღწევდნენ, ამონ-რას შეილად აიყვანდა და თავის ბიჭებთან ერთად გაზრდიდა. პეტრემ მარტო სახელი იცოდა ამ ბიჭისა, მაგრამ რა უნდოდა მისგან ჰეროდე ანტიპას და რატომ გადასცა იგი ლეგიონერებს გასაჯოხად და საწამებლად, ამაზე წარმოდგენაც არ ჰქონდა. ამ ბიჭს ისეთი კეთილი სახე და თვალები აქვს, რომ დანაშაულს ვერ ჩაიდენდაო, ფიქრობდა პეტრე.

გზა გააგრძელეს. თანდათანობით მზეც ჩაესვენა. მოსალამოვდა.

— ანა, — მიმართა ცოლს პეტრემ, — შეხედე, რა სიმყუდროვეა ამ ადგილას. მოდი, ღამე აქ გავათიოთ და დილით ადრე გავუდგეთ გზას!

ანასაც და ბიჭებსაც მოეწონათ იქაურობა — მოფარებულებიც იქნებოდნენ და დიდი ხე თავსაფრად გამოადგებოდათ.

ანამ ხის ქვეშ უკეთესი ადგილი შეარჩია.

— ამონ-რა აქ დაეაწვინოთ! — უთხრა შვილებს.

ანამ შალის მოსასხამი გაფინა და ამონ-რა ბიჭებმა ზედ სათუთად დასვეს. ყველამ ამონ-რას გარშემო მოიკალათა. საჭმელი არაფერი ჰქონდათ, გარდა გარეული ვაშლებისა, რომლებიც ალექსანდრემ და მიხეილმა იქვე, ახლოს მოკრიფეს. ამონ-რას წითელი ვაშლები აურჩიეს, — უფრო გემრიელი იქნებაო.

კარგახანს ვაშლებს ახრამუნებდნენ და ბუნების სიმშვიდეს უსმენდნენ. დაღლილები კი იყვნენ, მაგრამ ძილი არავის ეკარებოდა.

— ამონ-რა, — დაარღვია სიჩუმე პეტრემ, — შენ აქაური ხარ?

— მამა ამონელია, დედა იუდეველი, — უპასუხა ამონ-რამ.

— სად ისწავლე ჩენი ენა?

— რა ენაა თქვენი? — ჰკითხა ამონ-რამ.

— როგორ? ჩენს ენაზე გველაპარაკები და არ იცი? — გაიკვირვა პეტრემ, — რომაული!

— მე რომაული არ ვიცი, — მშვიდად უპასუხა ამონ-რამ, — მე არც სხვა ენები ვიცი.

— მაშ როგორ ლაპარაკობ რომაულად?! — კიდევ უფრო გაიკვირვა პეტრემ.

— ალბათ, გვეთამაშება ამონ-რა! — მხიარულად თქვა ალექსანდრემ.

— მე არ ვლაპარაკობ რომაულად, მე ჩემს ენაზე ვლაპარაკობ, — უპასუხა ამონ-რამ.

ყველამ გულიანად გაიცინა.

— ჩვენ არამეული არ ვიცით. შენ კი მშვენიერად ლაპარაკობ რომაულად! — თქვა მიხეილმა.

— გამოდის, რომ შენ არამეუღლად ლაპარაკობ და ჩვენ რომაულად გვესმის, ჩვენ კი რომაულად გელაპარაკებით და შენ არამეუღლად გეყურება. ასეა? — იკითხა ანამ.

— ალბათ ასეა, — უპასუხა ამონ-რამ.

ბიჭებმა ისევ გაიცინეს.

— ასეთი რამ არ ხდება! — თქვა მიხეილმა.

— არ ვიცი, — უპასუხა ამონ-რამ, — მაგრამ მე ახლაც არამეუღლად გელაპარაკებით, თქვენ კი რომაულად გვესმით. თქვენ რომაულად ლაპარაკობთ, მე კი არამეუღლად ვიგებ. არ ვიცი, როგორ ხდება ეს.

ბიჭებმა ვერაფერი გაიგეს. როგორ შეიძლება ასეთი რამ ხდებოდესო, უკვირდა ორივეს. ანას გული რაღაცას უგრძნობდა, მაგრამ ვერ მიხვედრილიყო. პეტრემ ასეთი ახსნა არ დაიჯერა და ამონ-რას ბავშვურ ცელქობას მიაწერა: რომაულად გველაპარაკება, მაგრამ გვიძალავს, რომ რომაული იცისო.

— სად ცხოვრობ, ვინ არიან შენი მშობლები? — გააგრძელა გამოკითხვა პეტრემ.

— მშობლები არ მყავს, — უპასუხა ამონ-რამ, — ვცხოვრობ ფილოსოფოსის გამოქვაბულებში.

— ეგ რაღაა? — გაუკვირდა ალექსანდრეს.

— ჩემს მასწავლებელს ანდრიას ფილოსოფოსს ეძახდნენ, ის კი გამოქვაბულებში ცხოვრობდა. ახლა მე ვცხოვრობ იქ.

— სად არის ეგ გამოქვაბულები? — დაინტერესდა მიხეილი.

— ქალაქთან ახლოს, მთაში.

— შენი მასწავლებელი ანდრია სადღაა, რატომ დაგტოვა მარტო? — შეწუხდა ანა.

— ჩემმა მასწავლებელმა არ დამტოვა, ის არასოდეს დამტოვებს, — თქვა თავისი მშვიდი და კეთილი ხმით ამონ-რამ, — ანდრია იესო ქრისტემ იხმო თავისთან, მისი მოწაფეა ანდრია.

— იესო ქრისტე? — ჩაფიქრდა პეტრე, — იესო ის კაცი ხომ არ არის, მესიას რომ ეძახიან, ცათა სასუფეველს რომ უქადაგებს ხალხს?

— ის არის. იესო ქრისტე — ღმერთია, — თქვა ამონ-რამ და იგრძნო, რომ ჩვეული ძალა და ენერგია უბრუნდე-

ბოდა. კეთილი, გულისხმიერი ადამიანები თავიანთ გულის ცეცხლს უნაწილებდნენ ამონ-რას და მის ჭრილობებსა და ტკივილებს კურნავდნენ.

— მაშ შენ გეცოდინება, რატომ აცვეს იესო ქრისტე ჯვარს, რა დაამავა? მე გაგებული მაქვს, ის სნეულებს კურნავდა და ხალხს მოუწოდებდა ერთმანეთი გიყვარდეთო, ხალხმა კი ჯვარზე საცმელად გაიშეთა! — პეტრე ცნობისმოყვარეობით დაელოდა პასუხს.

იესო ქრისტე ჯვარს აცვეს?!

ამონ-რას თვალთ დაუბნელდა და თავი გადაუვარდა.

... რა ხდება ეს? სად მიჰყავთ გაბოროტებულ მღვდელმთავრებსა და გაბრიყვებულ ბრბოს იესო ქრისტე — ხელშეკრული და ნაცემი?

მღვდელმთავრები და ბრბო პრეტორიის წინ გაჩერდნენ.

— განმგებელო, განმგებელო... პროკურატორო! — ყვირის, ღრიალებს ბრბო.

აივანზე იუდეის პროკურატორი პილატე გამოდის.

— აჰა, მოგიყვანეთ კაცი, რათა ჯვარს აცვა... იგი ხალხს აბუნტებს და ამბობს — იუდეველთა მეფე და ღმერთის შვილი ვარო!.. — ეუბნებიან პილატეს მღვდელმთავრები.

— ვინ გსურთ, რომ გაგითავისუფლოთ: ყაჩაღი ბარაბა თუ უდანაშაულო, ქრისტედ წოდებული? — ეკითხება პილატე ბრბოს.

— ბარაბა, ბარაბა!.. — ღრიალებს ბრბო.

— იესოს რაღა ვუყვით? — ისევ ეკითხება პილატე.

— ჯვარს აცვი... ჯვარს აცვი... ჯვარს აცვი... — ისევ ღრიალებს ბრბო.

პილატე ხელებს იბანს.

— აჰა, მე უბრალო ვარ ამ მართლის სისხლისაგან!..

ბრბო კი, გონთ გადასული, ისევ ღრიალებს:

— ჩვენზე და ჩვენს შვილებზე იყოს მაგის სისხლი!..

ამონ-რას სუნთქვა უჭირს, გული ეკუმშება. რას შერევა ეს გამძვინვარებული ბრბო? რამდენი დაბადება დასჭირდება თითოეულ მოღრიალეს, რამდენი ათასი წლის განვითარება, რომ განიწმინდოს ამ საშინელი ცოდვისაგან და შექმნას მონანიების ღირსი ნაყოფი! დაიხოცებიან და ყოველ მათგანს თან გაჰყვება ცოდვა, როგორც სასჯელი სულისა, დაიბადე-

ბიან და თან გამოჰყვებათ ცოდვა, როგორც წინაპართა წყევ-
ლა და ამქვეყნიური სასჯელი...

... იესოს ჯვარზე აწვენენ, ხელებსა და ფეხებს თოკით
უბამენ.

ჯალათები გრძელ ლურსმებს იმარჯვებენ.

„რაზ... რაზ... რაზ... რაზ... რაზ... რაზ... რაზ...“

ხელებსაც და ფეხებსაც ხეზე აჭკლებენ და ჯვარს
ფეხზე აყენებენ.

— იუდეველთა მეფე, ჰი-ჰი! — დასცინის ვილაც და
აფურთხებს.

— დაუძახე მამაშენს, რომელიც ცაშია, და გიხსნას! —
ღვარძლით ეძახის ვილაც.

არც სხვები აკლებენ დაცინვასა და შეურაცხყოფას.

იესოს ყველაფერი ესმის და მათ გამო სიბრაღულით
იწვის. იგი დაღუპული ცხვრების სახსნელად მოველინა ქვე-
ყანას, მათი სულების გადარჩენას ცდილობს, ამ ცხვრებმა კი
გაწირეს იგიც და საკუთარი სულიც. იესო მაინც მათზე
ზრუნავს, მათ ცოდვას საკუთარ თავზე იღებს, ადამიანთა
მოდგმის ცოდვას იღებს იესო ქრისტე საკუთარ თავზე.

— მამაო, მიუტყვევ ამათ, ვინაიდან არ იციან, რას აკე-
თებენ! — ევეღრება ჯვარცმული იესო ზეციერ მამას.

სხვები კი ტირიან და სასოწარკვეთით შესცქერიან
მესიას.

ტირის, ქვითინებს ანდრია.

ტირის მარიამ მაგდალინელი.

ტირის მათე.

ტირიან ქრისტეს მიერ თვალახილულნი.

მარიამს კი, იესოს დედას, ცრემლები დაუშრა. ხელები
შვილისაკენ აქვს გაწვდილი და ჩურჩულებს:

— იესო, შვილო... იესო, შვილო... იესო, შვილო...

იესოს ეცოდება დედა. ვინ ანუგეშებს მას, ვინ იზრუ-
ნებს მასზე?

ქვემოთ საყვარელ მოწაფეს ხედავს.

— დედაკაცო, აჰა, შენი ძე! — სუსტი ხმით ეძახის
მაღლიდან დედას და იქვე მდგომ მოწაფეზე მიუთითებს.

შემდეგ მოწაფეს ჩამოსძახებს:

— აჰა, დედაშენი!..

... იესო ჯვარს აცვეს!

მოდინ იესოს მოწაფეები, ცხედარს ხსნიან, თეთრ ტილოში ახვევენ და ახალ სამარხში ასვენებენ. სამარხთან პილატეს ყარაულები ღვებიან, რომ ცხედარი არავენ მოიპაროს. მესამე დღეს იესო მკვდრეთით აღსდგა.

— უფალი წაუღიათ სამარხიდან! — იდახის მარიამ მაგდალინელი და იესოს მოწაფეებისკენ გარბის.

— მარიამ! — ჩაესმის ყურში იესოს ხმა.

— მოძღვარო! — და მარიამი ესწრაფვის მუხლებზე მოეხვიოს აღმდგარ უფალს.

— არ შეშინო, რადგან ჯერ არ ავსულვარ მამასთან! — აფრთხილებს იესო.

მალე იგი თავის მოწაფეებს ეცხადება.

— მშვიდობა თქვენდა! რატომ შეგეშინდათ? ეს მე ვარ თვითონ! — ამშვიდებს გაოცებულ მოწაფეებს.

მოწაფეებს უხარიათ.

იესო ასწავლის და უხსნის მათ ცათა სასუფეველის ბევრ საიდუმლოს. ჩაბერავს სულიწმიდას და ეუბნება:

— ამოვეთ ჩემი ცხვრები! მოიმოწაფეთ ყველა ხალხი! მე თქვენთან ვარ ყოველდღე წუთისოფლის აღსასრულამდე.

უფალი მათ თვალწინ მიემართება მაღლა, მაღლა, ტოვებს ნათელ კვალს და უჩინარი ხდება...

... იესო ჯვარს აცვეს...

— ამონ-რა, ამონ-რა! — ჩაესმა ყურში ალექსანდრესა და მიხეილის ხმები.

ბიჭები წყალს ასხამენ სახეზე და ცდილობენ მოასულიერონ.

ამონ-რამ თვალები გაახილა.

— ცოცხალია, ცოცხალია! — სიხარულით წამოიძახეს ბიჭებმა.

— გმადლობთ, უფალო, ამ ბიჭის გადარჩენისათვის! — აღმოხდა პეტრეს.

ანა ცრემლებს იწმენდა.

— თვალები გაახილა? ცოცხალია? — დედური სიყვარულით დაიჩურჩულა ანამ, ახლოს მიიწია, შუბლზე ხელი გადაუსვა, აკოცა.

ამონ-რამ თვალები კი გაახილა, მაგრამ ღვარად წამოუვიდა ცრემლი.

ეს არ იყო ტირილი. ამონ-რა არ მისტიროდა იესო ქრისტეს. ეს იყო ტანჯული სულის ოფლი იმათი შეწყალე-ბისათვის, ვინც ბნელი და გაქვავებული გულით მიიღო უფა-ლი. პატარა ბიჭი, რომელსაც მიცემული ჰქონდა ცათა სასუ-ფეველის ცოდნა, გლოვობდა დაღუპულ სულებს, რომელთა ხსნისა და გადარჩენისათვის მოველინა ქვეყანას მესია. მოსთ-ქვამდა ამონ-რას სული ცათა სასუფეველის ძახილს: „ადამიანო, გაუფრთხილდი საკუთარ სულს! აღაშენე და აღამაღლე, სრულყავი და განაგითარე იგი! ეძებე საკუთარი ქვაწერილი, რომელიც დიდმა მასწავლებელმა გამოგიგზავნა, ამოიცანი მი-სი აზრი და ნებითა და ხალისით მიჰყევი მინიშნებულ გზას! ადამიანო, გაკვალე შენი ბილიკი შორეული ვარსკვლავებისა-კენ და ნუ გაიხდი თავს წუთისოფლის შვილად, რადგან უფალმა მარადიულობისთვის შეგქმნა და უსასრულობაში დაგასახლა!“

ამონ-რამ თვალები მოიწმინდა და ყველას გაუღიმა. მისმა ღიმილმა მთელი ოჯახი გაახარა. ალექსანდრე და მი-ხეილი წამოხტნენ, ზტუნვა დაიწყეს და რაც ძალი და ღონე ჰქონდათ, ვარსკვლავებიან ცას და ბუნების სიჩუმეს გასძახეს:

— ამონ-რა იღიმება... ამონ-რამ გაიღიმა...

ის კი დაავიწყდათ, რომ გამოქცეულები იყვნენ და იმალებოდნენ.

პეტრე ველარ ბედავდა ეკითხა ამონ-რასთვის, რატომ შეგაშფოთა ქრისტეს ხსენებამო.

ბიჭებსაც და მათ დედასაც უნდოდათ გაეგოთ, ვინ იყო იესო ქრისტე და რატომ ტიროდა ამონ-რა.

ამონ-რა კიდევ გრძნობდა და კიდევ ხვდებოდა, რომ ოთხივეს გულისყური მიმართული იყო სახარების მისაღებად; ისინი უზმოდ შესთხოვდნენ: „გვითხარი, რაც იცი, ამონ-რა, ჩვენ გისმენთ!“ რალაც უხილავმა ძალამ შეკრა ყველას ფიქრი და მისწრაფება, ოთხივე უნებლიეთ უფრო ახლოს მიჩოჩდა ამონ-რასთან და გაიტრუნა.

გულაღმა გაწოლილმა ამონ-რამ ვარსკვლავებიან ცას მიაპყრო მზერა და, თითქოს თავის თავს ელაპარაკებო, ანდრიასეული სიმშვიდით დაიწყო ჩურჩული.

დაბადა დედამ შვილი და დაარქვა მას კაენი.

დაბადა მეორე შვილი და დაარქვა მას აბელი.

გაიზარდნენ ძმები და გაუყო მამამ შვილებს ქონება.

შურით აღივსო კაენი აბელის მიმართ: მას მეტი შეხვ-
დაო.

გაიტყუა ძმა უდაბურ ადგილას და მოკლა.

შემდეგ კაენიც მოკვდა.

აბელის სულს არ ამძიმებდა ცოდვები,
და რადგან აბელმა კეთილად იცხოვრა დედამიწაზე,
ამიტომ მიეცა მის სულს ძალა და აფრინდა ცაში.

კაენის სულს ამძიმებდა ცოდვები,
და რადგან კაენმა ბოროტად იცხოვრა დედამიწაზე,
ამიტომ არ მიეცა ძალა და ვერ აფრინდა მაღლა.

გავიდა ბევრი წელი.

იუდა. დაბადა დედამ შვილი კაენის სულით და დაარქვა მას
ილია.

დაბადა მეორე შვილი აბელის სულით და დაარქვა მას

ილია.

გაიზარდნენ ძმები.

იშრომა ბევრი ილიამ, მიეცა ბარაქა მის შრომას,

მაღლი შესწირა ილიამ ღმერთს და აღაშენა ღვთის

სადიდებელი.

არ იშრომა იუდამ, მითთვისა ძმის ნაშრომი,

შერისხა ღმერთი და დაანგრია ღვთის სადიდებელი.

მიიცვალა ილია.

მოკვდა იუდა.

აბელის სულს ილიას კეთილი ცხოვრების გამო მიეცა
ძალა და ამიტომ აფრინდა მეორე ცაზე, სადაც მეტი იყო სი-
ნათლე.

კაენის სულს იუდას ბოროტი ცხოვრების გამო დაელო
ცოდვა, წაერთვა ძალა

და ამიტომ დაეშვა დაბლა,

სადაც მეტი იყო სიბნელე.

გავიდა ბევრი, ბევრი წელი.

დაბადა დედამ შვილი აბელის სულით,

რომელიც იყო ილია,

და დაარქვა მას ანდრია.

დაბადა მეორე შვილი კაენის სულით,

რომელიც იყო იუდა,

და დაარქვა მას ჰეროდე.
 გაიზარდნენ ძმები.
 იცხოვრა ანდრიაჲ, ჰქმნა ბევრი სიკეთე და ძმასაც
 ძმობა გაუწია.
 იცხოვრა ჰეროდემ, არ ისურვა სიკეთის ჰქმნა, ჩაიდინა
 ბევრი ბოროტება და ძმასაც ბოროტება უყო.
 მიიცვალა ანდრია.
 მოკვდა ჰეროდე.
 აბელის სულს
 ილიასა და ანდრიას კეთილ ცხოვრებათა გამო კიდევ
 მიეცა ძალა,
 ამიტომ აფრინდა მესამე ცაში,
 სადაც მეტი იყო ნათელი, სილამაზე, და ჟღერდა სფერო-
 როთა მუსიკა.
 კაენის სული
 იუდასა და ჰეროდეს ბოროტ ცხოვრებათა გამო უფრო
 დამძიმდა,
 ამიტომ ქვემოთ ჩაიძირა.
 იქ კი იყო სიბნელე და სულის ხრწნა.

გავიდა ბევრი, ბევრი, ბევრი წელი.
 დაბადა დედამ შვილი აბელის სულით,
 რომელიც იყო ილია და რომელიც იყო ანდრია,
 და დაარქვა მას იაკობი.
 დაბადა მეორე შვილი კაენის სულით,
 რომელიც იყო იუდა და რომელიც იყო ჰეროდე,
 და დაარქვა მას ლოთი.
 იცხოვრა იაკობმა კეთილად, აღაშენა ხიდები, გათხარა
 ჭებო

და უთხრა აღამიანებს: „თქვენი იყოს,“
 და აღამიანებმაც კეთილით მიუგეს.
 იცხოვრა ლოთმა, კვლავ არ ისურვა სიკეთის ჰქმნა,
 თესა შური და ბოროტება,
 შურდა ძმისაც.
 მიიცვალა იაკობი,
 მოკვდა ლოთი.
 აბელის სულს

ილიას, ანდრიას და იაკობის კეთილ ცხოვრებათა გამო
მიეცა კიდევ ძალა
და აფრინდა მეოთხე ცაში,
სადაც უფრო მეტი იყო სინათლე და უფრო ამაღლე-
ბული მუსიკა ჟღერდა
და სრულყოფილი სილამაზე სუფევდა.
და ეს იყო ღვთის წყალობა.
კაენის სული
იუდას, ჰეროდესა და ლოთის ბოროტ ცხოვრებათა გა-
მო კიდევ დაძვივდა
და წყვდიადში ჩაიძირა,
იმძლავრა იქ სულის ზრწნამ და იყო იქ კბილთა
ღრჭენა,
და იყო ეს ღვთის რისხვა.

გავიდა ბევრზე ბევრი წელი.
დაბადა დედამ შვილი აბელის სულით,
რომელიც იყო ილია, რომელიც იყო ანდრია და
რომელიც იყო იაკობი
და დაარქვა მას მოსე.
დაბადა მეორე შვილი კაენის სულით,
რომელიც იყო იუდა, რომელიც იყო ჰეროდე და რო-
მელიც იყო ლოთი,
და დაარქვა მას სავლე.
და იმრავლეს ქვეყანაზე აბელის სულის ადამიანებმა
და ჰმნიდნენ სიკეთეს.
კიდევ უფრო იმრავლეს სავლეს სულის ადამიანებმა
და ჰმნიდნენ ბოროტებას.
და აღმოჩნდა ადამიანთა სული დაღუპვის წინაშე.
მაშინ მოავლინა შემოქმედმა ძე თვისი ადამიანთა
სულის გადასარჩენად.
აუწყა უფალმა ადამიანებს ცათა სასუფევლის საიდუმ-
ლო,
მისცა მათ ცხოვრების მცნებები,
მოიმოქმედა სასწაულები: განკურნა სნეულები და
დაურდომილები, ბრმები და ყრუები,
და აცვეს ადამიანებმა იგი ჯვარს.

ხმა უღაბნოსა შინა:

ადამიანებო, აღიღეთ უფალი და გააჰყევით მის გზას,
ადამიანებო, ნუ დაჰყვებით წუთისოფლის ცდუნებას,
ადამიანებო, შექმენით მონანიების ღირსი ნაყოფი.

ამას ჩურჩულებდა ამონ-რა ნელა, მშვიდად, სვენებსვენებით და ღიღხანს, ვიდრე ვარსკვლავებიანი ცა მილიანად არ შემობრუნდა. ამონ-რას სიტყვები, როგორც კეთილი თესლი, ითესებოდა მიხეილის, ალექსანდრეს, ანასა და პეტრეს გულებში ნაყოფის აღმოსაცენებლად.

ჩურჩულში ჩაეძინა ამონ-რას.



ერთ ბიჭს ვეძებთ, ამ გზაზე უნდა გაველო, ხომ არ შევინიშნავთ

გათენდა და დრო იყო გზა გავეგრძელებინათ, მაგრამ ამონ-რას ეძინა და არავის მისი გაღვიძება არ უნდოდა. მთელი ღამე არც ძმებს მოუხუჭავთ თვალი და არც მათ მშობლებს. ამონ-რას ჩურჩულმა თითოეულ მათგანს საკუთარი ფიქრები აღუძრა. იწვნენ ბალახზე ჩუმად, უყურებდნენ ვარსკვლავებს და ცდილობდნენ გარკვეულიყვნენ აბელისა და კაენის სულთა აღმავალ და დაღმავალ გზებში, ცათა სასუფევლის საიდუმლოში და ცხოვრების მცნებებში, რაც იესო ქრისტემ აუწყა ხალხს. ბიჭებს მოთმენა არ ჰყოფნიდათ ესაუბრათ მშობლებთან, რომ უფრო მიხვედრილიყვნენ, რა იჩურჩულა ამონ-რამ, მაგრამ თავს იკავებდნენ — ამონ-რა არ გავალვიძოთ.

ანამ ერთ ნათელ ვარსკვლავს მიაჰყრო მზერა და თითქოს მისგან ითხოვდა პასუხს თავის კითხვებზე, ვარსკვლავი კი მის სულში იჭრებოდა და ანას სულის სიღრმიდან ამოძახილი ესმოდა: „ადამიანებო, აღიღეთ უფალი და გაჰყევით მის გზას... ადამიანებო, შექმენით მონანიების ღირსი ნაყოფი.“

პეტრეს მთელი ფიქრები ამონ-რას უტრიალებდა: ვინ არის ეს ბიჭი, საიდან იცის ამდენი და რა კავშირი აქვს იესო ქრისტესთან. როცა ყაზარმაში თქვეს — იესო ქრისტე ჯვარს აცვესო, პეტრეს გული ეტკინა, რადგან გაგებული ჰქონდა, რომ ეს კაცი სასწაულებს ახდენდა და სიკეთეს ქმნიდა, ადამიანებს ეხმარებოდა. ამონ-რას წუხანდელი ჩურჩულის შემდეგ კი პეტრე მიხვდა, რომ იესო ქრისტე ადამიანთა სახსნელად მოვიდა ქვეყნად, ადამიანებმა კი არ მიიღეს იგი. ადამიანთა მთელი დანაშაული, ადამიანთა ცოდვა პეტრემ, ამონ-რას ჩურჩულის შემდეგ, საკუთარ ცოდვად განიცადა და გული დაუმძიმდა „მონანიების ღირსი ნაყოფი,“ — განუწყვეტლივ იჭრებოდა მის ფიქრებში ეს სიტყვები და თითქოს მომავალი ცხოვრების გააზრებაში ეხმარებოდა.

ძმები წყნარად წამოდგნენ და მამას ანიშნეს — აღვილს დავზვერავთო.

ბიჭები გზისპირს გაჰყვნენ და გარემოს ყურადღებით აკვირდებოდნენ. ფრთხილობდნენ კიდევ, რომ ისინი ვინმეს არ შეენიშნა. მალე მდინარის ხმა მოესმათ და იქითკენ გაიწიეს.

— ეს დიდი მდინარე, — თქვა ალექსანდრემ, როცა მის ნაპირს მიადგნენ, — იორდანი უნდა იყოს, სხვა ასეთი მდინარე იუდეაში არ არის!

— ხომ შეიძლება აქ თევზი დავიჭიროთ? — თქვა მიხეილმა, — საუზმედ გამოგვადგება!

მდინარის მეორე მხარეს, ოდნავ მოშორებით, ხალხის ფუსფუსი შენიშნეს. პატარახანს უყურეს.

— ბევრი ხალხია, — თქვა ალექსანდრემ, — თითქოს რაღაცას აშენებენ...

ბიჭებმა ფრთხილად გადაინაცვლეს მდინარის აღმა და მოფუსფუსე ხალხს გაუსწორდნენ. ბურჩებს ამოეფარნენ და სანახაობით გაერთნენ. ხალხი გაცხოველებით მუშაობდა: თხრიდნენ, ეზიდებოდნენ. ბიჭების ყურამდე მათი ხმაც აღწევდა.

— რას აშენებენ? — თქვა მიხეილმა.

— რაღაც დიდს, ხედავ, რამდენი ხალხია... — ჩუმად უპასუხა ალექსანდრემ.

ბიჭებმა ვერ შენიშნეს, როგორ გაჩერდა ამ დროს გზისპირას ცხენოსანთა ჯგუფი.

— ბიჭებო! — შემოესმათ ალექსანდრესა და მიხეილს ვილაციის ძახილი, — ახლოს მოდით, რაღაც უნდა გკითხოთ!

ბიჭები წამოხტნენ და გაქცევა დააპირეს.

— არ გაიქცეთ, ბიჭებო, არაფერს გერჩით! — დაუძახა უცხომ, რომელიც თეთრ ცხენზე იჯდა. მის გვერდით ასევე მშვენიერ ცხენზე ლამაზი ქალი ამხედრებულიყო. აქეთ-იქიდან ცხენოსანი მცველები ედგნენ.

ბიჭები მიხვდნენ, რომ მცველებს ვერსად გაექცეოდნენ. კეთილმა ხმამ კი ისინი ოდნავ დაამშვიდა.

— ახლოს მოდით, რაღაცას გკითხავთ! — გაუმეორა უცნობმა. მის გვერდით ახალგაზრდა ლამაზი ქალი ალერსიანად იღიმებოდა.

ალექსანდრე და მიხეილი რამდენიმე ნაბიჯზე მიუახლოვდნენ ეტლს და შეეითხვას დაელოდნენ.

— ერთ ბიჭს ვეძებთ, თქვენი ტოლი იქნება, ამ გზაზე უნდა გაევიდეს. ხომ არ შეგინიშნავთ?

ალექსანდრესა და მიხეილს არც მოსვლიათ აზრად, რომ ეს მდიდარი ბატონი ამონ-რას დაეძებდა, ამიტომ მიხეილმა ალაღად უპასუხა:

— არა, არავინ ჩვენი ტოლი ბიჭი ამ გზაზე არ დამინახავს!

მაგრამ ბატონმა გააგრძელა:

— თქვენი სიმაღლისა იქნება, შავი თმები და ლამაზი ნათელი სახე აქვს. ფეხზე თეთრი სანდლები აცვია... იქნებ დაინახეთ სადმე?

ახლა კი მიხვდა ორივე, რომ ეს კაცი ამონ-რაზე ელაპარაკებოდა, მას დაეძებდა. მიხეილმა დაუყოვნებლივ უპასუხა:

— არა, არა, ასეთი არავინ გვინახავს!

— მაშ როგორი ბიჭი გინახავთ, სად შეგხვდათ? — არ მოეშვა მათ ბატონი.

— არაფერი ვიცი... არავინ გვინახავს! — გაიმეორა მიხეილმა.

ბატონმა და ქალბატონმა იგრძნეს, რომ ბიჭები რაღაცას მალავდნენ.

— იუსტინე, მაგათ ნამდვილად იციან და არ გვეუბნებიან! — უჩურჩულა ქალბატონმა ბატონს, — სთხოვე, შეეხვეწე, მართალი გითხრან!

— მეც ასე ვფიქრობ, ჩემო ქალღმერთო! — ჩუმიად უპასუხა იუსტინემ ქალბატონს და ბიჭებს მიუბრუნდა, — ბიჭებო, იმ ბიჭს ამონ-რა ჰქვია. ჩვენ მისი მეგობრები ვართ და გვიყვარს იგი. გატყობთ, რაღაც იცით, არ დაგვიმალოთ!

— ჩვენ არაფერი ვიცი! — გადაჭრით უპასუხა ალექსანდრემ, — წავედიოთ აქედან! — ძმას ხელი მოჰკიდა და თავისკენ გასწია.

— ბიჭებო, თუ მართალს არ გვეტყვით, ცუდ სამსახურს გაუწევთ ამონ-რას! — ისევ გამოსძახა ბატონმა, მის ხმაში ხეყვნა იგრძნობოდა, — ვკითხართ და კარგად დაგასაჩუქრებთ!

ალექსანდრესა და მიხეილს ვერ მოხიბლავდა ვერავითარი საჩუქარი. ბიჭი დილეგიდან დაიხსნეს, შეიყვარეს, დაუმეგობრდნენ, ძმად გაიხადეს! ეს კაცი კი ეუბნება მათ: გაეცით თქვენი მეგობარი და დაგასაჩუქრებთო! ვინ არიან ეს კაცი და ეს ქალბატონი, ეს დიდებულები, რომ მათ ამონ-რას ასავალდასავალი უთხრან? წაიყვანენ და ისევ დილეგში დაამწყვდევნენ, იქნებ გააჯოხინონ კიდევ!

ძმები შებრუნდნენ და გაიქცნენ, მაგრამ არა იქითკენ, საითაც თავისიანები ელოდებოდნენ, არამედ სულ სხვა მხარეს. უკნიდან ისევ მოესმოდათ უცნობი ბატონის ხმა:

— ბიჭებო, თქვენ, გატყობთ, რომაელები ხართ! თუ ნახავთ ამონ-რას, გადაეცით, რომ ჩვენ — ავგუსტა და იუსტინე — შშენებლობაზე ველოდებით!

ბიჭები კი გარბოდნენ და მხოლოდ მაშინ შეანელეს ნაბიჯი და ამოისუნთქეს, როცა დარწმუნდნენ, რომ ცხენოსნები თვალს მიეფარნენ. უკან შებრუნდნენ და მათკენ მომავალი პეტრე დაინახეს.

— თქვენს სამებნელად წამოვედი, — უთხრა მამამ შეილებს, — და ისიც მოვისმინე, რასაც რომაელი დიდებული გეუბნებოდათ. წავიდეთ და ამონ-რას ვუთხრათ, რაც გავიგეთ!

— იუსტინე და ავგუსტაო! — თქვა იმ ბატონების სახელები მიხეილმა.

— მამა, მდინარის იქით მართლაც რაღაც დიდი მშენებლობაა, ბევრი ხალხი მუშაობს. მაშ ეს ბატონები იქ წავიდნენ? — დააზუსტა ალექსანდრემ.

— ჰო, მეც შევნიშნე, — უპასუხა პეტრემ შეილს და დაუმატა, — შეილებო, რაღაც საჭმელი უნდა ვიშოვოთ, ამონ-რა შშიერი გვყავს და ჩვენც მშვივრები ვართ. იქნებ თევზი დავიჭიროთ მდინარეში?

— ჩვენც ვიფიქრეთ ეგ! — თქვა მიხეილმა.

სამივენი მდინარისკენ შებრუნდნენ.



მე უკვე აღარ მჭირდება დაცვა, მინდა, რომ მედალიონი შენ ატარო

ამასობაში ამონ-რამ გაიღვიძა.

— როგორ გეძინა, შვილო? როგორ გრძნობ თავს? — ჰკითხა ანამ დედური აღერსით.

— კარგად, აღარაფერი მტკივია! თქვენმა ზრუნვამ მიშველა! — ხალისიანად უპასუხა ამონ-რამ კეთილ ქალს, რომლის ღიმილმაც მარას ღიმილი გაახსენა.

— მალე პეტრე და ბიჭებიც მოვლენ და გზას გავაგრძელებთ! — თქვა ანამ, — იქნებ საჭმელიც იშოვონ!

ამონ-რა მოხიბლა პეტრეს ოჯახმა, შეიყვარა ყველა. კარგად ახსოვდა, როგორ გაწირა პეტრემ თავი მისი გულისთვის და როგორ უვლიდა დიღეგში. ახლა კი თითოეული მათგანი იცავს ამონ-რას, ზრუნავს მასზე, მის ძილსა და სიმშვიდეს უფრთხილდება.

— წყალს ხომ არ დაღვევ, შვილო? — ჰკითხა ანამ.

ამონ-რამ თავი დაუქნია. ანა წყაროსთან მივიდა, პემვით ამოიღო წყალი და ფრთხილად მიუტანა ბიჭს ტუჩებთან. წყალი ძალიან ყსიამოვნა ამონ-რას, როგორც მაცოცხლებელმა ძალამ, ისე ჩაუარა მთელს სხეულში.

ანამ სველი ხელი თავზე გადაუსვა და ზრუნვით, თავისთვის ჩაილაპარაკა:

— ჩემი ბიჭი, ჩემი საკვირველი ბიჭი!

ამონ-რას ჟრუანტელმა დაუარა. ასე ემართებოდა ხოლმე, როცა დედა ეფერებოდა და რაღაც სააღერსოს ჩურჩულებდა. დედა მოუნდა ამონ-რას, მისი ღიმილიანი სახე, ხმა, მასთან საუბარი. რამდენჯერ სთხოვა დედამ: შვილო, მითხარი, რას გასწავლის ანდრიაო, მაგრამ ვერ მოასწრო ამონ-რამ აეხსნა დედისათვის — რა არის სამყარო და როგორ არის იგი აგებული, რა არის სული და როდის განდება იგი უკვდავი, როგორ მოიპოვებს აღამიანი ცათა სასუფეველს. თუმცა მარას ცხოვრება ისე მიემართებოდა, მისი გული ისე

იღწვოდა სიკეთითა და სიყვარულით, რომ მისი სული ცათა სასუფეველში ნამდვილად დაიმკვიდრებდა უფლის წყალობას.

ანაც დედასავით ეფერებოდა ამონ-რას. როგორი კეთილი თვალები აქვს ანას, რა ლამაზია, მისი ხმაც რა მშობლიურად ჟღერს.

— მომეფერე, დედა, კიდევ მომეფერე! — თხოვა ამონ-რამ ანას და ახლა ანას დაუარა სხეულში სიხარულის ყრუ-ანტელმა: ამ საოცარმა ბიჭმა მას დედა უწოდა.

— ჰო, შვილო, ჩემო კარგო, ჩემო ჭკვიანო! — ანას ხმა უთრთოდა. ამონ-რას თავი მუხლებზე დაიდო, წარბები გაუსწორა და თმები თითებით დაუვარცხნა.

„ეს ბიჭი ნამდვილად ღვთის შვილია, — გაიფიქრა ანამ, — რამდენი რამ სცოდნია! და რა კარგად გვიამბო ცათა სასუფეველზე, ქრისტეზე! უნდა ვთხოვოთ, რომ კიდევ გვასწავლოს.“

ამონ-რამ პერანგი გადაისხნა.

— დედა, მომხსენი ეს მედალიონი.

ანამ ამონ-რას მკერდზე უმშვენიერესი მედალიონი დაინახა.

— ეს ოქრომჭედელმა ზაქარიამ მაჩუქა და მითხრა: გაჭირვებაში დაგიცავსო. როცა ლეგიონერები მცემდნენ, ეს მედალიონი მშველლოდა და ვერ ვგრძნობდი ტკივილს. მიკვირს, როგორ ვერ შენიშნეს და არ წამართვეს.

— ძალიან ლამაზია, შვილო! — თქვა ანამ, მედალიონით მოხიბლულმა, — ალბათ, კეთილმა სულმა გაჩუქა!

— ძალიან კეთილი კაცია ზაქარია, დედა... მაგრამ შე უკვე აღარ მჭირდება დაცვა. მინდა, რომ ეს მედალიონი შენ ატარო.

ანა თვალს ვერ აცილებდა მედალიონს: ამომავალი მზე სხივებით და სხივებში ჩაქსოვილი ძვირფასი თვლებით თითქოს მოძრაობდა და ანათებდა. საჩუქარი მეტად უცხო და ძვირფასი იყო, და, რაც მთავარია, ამონ-რას ავი ძალებისაგან იცავდა, და ანამ იუარა.

— არა, შვილო, შენ გაჩუქეს და შენთან უნდა იყოს ეს ქმნილება!

— დედა, — სთხოვა დაბეჯითებით ამონ-რამ, — მომხსენი მედალიონი და დამანახე ის შენს მკერდზე. მარტო შე კი არ გთხოვ ამას, ასე სურს მარას, ასე სურს ოქრომჭედელ

ზაქარიას და ასე სურს მედალიონსაც. იქცეს ის თქვენი ოჯახის მფარველად. მომხსენი მედალიონი, დედა.

ანამ იგრძნო ამონ-რას თხოვნის ძალა. მედალიონი მოხსნა, ჩამოიკიდა და სულაც არ გასწენია იოტის ოდენი განცდა, რომ სამკაული აჩუქეს.

— შვილო, ტვირთი დამაკისრე დიდი! — დაფიქრებით თქვა ანამ.

— ჰო, ასეა, — დაუდასტურა ამონ-რამ.

ამ დროს ამონ-რას გვერდით რალაც ყრუდ დაეცა და დაიჭყვიპინა.

ამონ-რამ ბარტყი შენიშნა. სამი-ოთხი დღის იქნებოდა ბარტყი, გრძელი კისერი, დიდი თავი და დიდი მუცელი ჰქონდა, პანაწკინტელა ბუსუსებით იყო დაფარული, თავი გვერდზე ჰქონდა გადაგდებული, თითქოს კისერი აქვს გადატეხილიო. ფეხებს საცოდავად ჭიმავდა და დიდ პირს ალებდა.

ამონ-რამ ხეზე აიხედა და საემაოდ მაღალ ტოტებში ბუდე აღმოაჩინა, ბარტყი იქიდან იყო გადმოვარდნილი. მალე დედა და მამა ჩიტებიც გამოჩნდნენ და საცოდავი ჭყვიპინი ატეხეს: ბუდიდან გადმოვარდნილ ბატყს უტრიალებდნენ, ტიროდნენ და ამონ-რას ეხვეწებოდნენ, შვილი გადაგვირჩინეო. ამონ-რამ ბარტყი ფრთხილად აიყვანა ხელში. საცოდავს ტკივილისაგან შავი ფერი დასდებოდა.

— ფეხი მოსტეხია! — შეწუხდა ანა.

ამონ-რამ ბარტყს ფეხი გაუსწორა, შემდეგ ბარტყი ხელისგულებში მოიქცია, თვალები დახუჭა და გულის ცეცხლი გაუგზავნა. ორი-სამი წუთის შემდეგ ხელები გადახსნა და ანამ გაკვირვებისაგან შეჰკივლა კიდევ:

— შვილო, შენ ბარტყს ფეხი გაუმთელე?!

ამონ-რამ მხოლოდ გაიღიმა.

დედა და მამა ჩიტები ისევ საცოდავად ჭყვიპინებდნენ. ამონ-რამ მათ შვილი დაანახა და ფეხზე წამოადგა.

— რას აპირებ? — შეშფოთდა ანა.

— ბარტყს ჩავსვამ ბუდეში.

— ხეზე უნდა ახვიდე?! — შეიცხადა ანამ, — არ შეიძლება! აი, მოვლენ ბიჭები და ისინი ჩასვამენ ბარტყს ბუდეში!

— რატომ? მეც შემიძლია ხეზე ასვლა. — წყნარად უპასუხა ამონ-რამ, — ნუ გეშინია, დედა, არ ჩამოვკარდები.

— არა, არ გავიშვებ! — ღაიჟინა ანამ, — შენ ჯერ სუსტად ხარ... აი, ბიჭების ხმაც მესმის... ისინი მოუვლდიან ბარტყს.

და მართლაც ერთად მოცვივდა ყველა: ბიჭებიც და მათი მამაც. სამივე მეტად შეშფოთებული ჩანდა.

— სასწრაფოდ უნდა გავიქცეთ! — სულმოუთქმელად თქვა პეტრემ.

— რატომ, რაშია საქმე?! — შეშინდა ანა.

— ნუ მეკითხები... გავიქცეთ, თორემ ცული ამბავი ხდება! თუ მოვასწრებთ და იორდანს გადავლახავთ, იქნებ გადავრჩეთ!..

ბიჭებმა ამონ-რას ხელი მოჰკიდეს, ეგონათ, ისევ ჩვენა დახმარება დასჭირდებაო და უნდოდათ მხრებში ამოსდგომოდნენ.

ამონ-რას ხელის მტევნებში უსუსური ბარტყი ჰყავდა ჩამალული.

— მე არ წამოვალ, ვიდრე ბარტყს ბუდეში არ ჩავსვამ, — მშვიდად თქვა და ბიჭებისგან გათავისუფლდა.

— რა ბარტყი?!.. რა დროს ბარტყია?! ამონ-რა, ვილაც ყაჩაღი ბიჭები შენს კვალს მოსდევენ, სადაც არის აქ იქნებიან! გავიქცეთ, რომ გაღმა გავასწროთ... შენ დაგვძებენ, გესმის? — მიხეილი გაჩქარებით უხსნიდა ამონ-რას ვითარებას და გასაქცევად ეწეოდა.

— წადით თქვენ. მე ვიდრე ბარტყს ბუდეში არ დავაბრუნებ, აქედან არ წავალ... — თქვა ამონ-რამ გადაწყვეტილით.

— ამონ-რა, დასვი აქ ბარტყი, ჩვენ კი გავიქცეთ...

და ამ დროს გაიგონეს, როგორ ყვიროდა ვილაც:

— ამ ხესთან არიან, არ გაუშვათ!

„დიდი ბიჭი,“ — გაიფიქრა ამონ-რამ.

— გავიქცეთ, გავიქცეთ... — იძახდა მიხეილი.

მაგრამ უკვე ველარსად გაიქცეოდნენ.

— ხეს ამოფარეთ და დაწექით! — უთხრა ამონ-რამ ყველას.

მაგრამ ანა გვერდით დაუდგა მას.

მხეცური ღრიალი მეხივით დაატყდათ თავს.

— აი, ხომ გეუბნებოდით! — ყვიროდა დიდი ბიჭი, — აი, ეგ არის, ამონ-რას რომ ეძახიან... სხვებს თავი დაანებეთ, მაგას ესროლეთ!

ორმოცამდე გააგებული ბიჭი ამონ-რას შორიახლოს გაჩერდა.

— არ გაბედოთ! — განწირულად დაიყვირა ანამ.

— ქალო, გადექი განზე! — დაულრიალა დიდმა ბიჭმა.

ანამ ხელები ასწია მაღლა:

— არ გაბედოთ!

— ესროლეთ! — ბრძანა დიდმა ბიჭმა.

ბავშვების ბრბომ ერთდროულად აღმართა ხელი და ამონ-რასა და ანასკენ მუშტისხელა ქვებმა გაიზუზუნეს.

ანამ შეჭკივლა და ამონ-რას გადაეფარა.

ყაჩაღ ბავშვთა ბრბომ ქვები სეტყვასავით დააყარა.

ქვებს უბედან იღებდნენ და ზუსტად ესროდნენ მიზანს. ამონ-რას ქვები ხვდებოდა თავში, მუბლში, მკერდში, წელში, მუცელში, მუხლებში. ორმოცი ქვა, კიდევ ორმოცი ქვა, კიდევ, კიდევ, კიდევ...

სისხლში ამოისვარა ამონ-რა, მუხლები გადაუტყდა, მაგრამ არ წაიქცა, ქვებს ზურგი შეუშვირა და მთელი სხეულით ხელის მტევენებში მოქცეული ბარტყი დაიცვა. ქვების სეტყვა არ წყდებოდა. ამონ-რას ქვებმა ხერხემალი შეუნგრია, ბიჭი ნელა ჩაიკეცა და მიწაზე ისე დაწვა, როგორც, ალბათ, დედის საშოში იწვა, ვიდრე ქვეყანას მოევილინებოდა.

ქვების ნაწილი ანას ხვდებოდა, მაგრამ ანა ვერ გრძნობდა ტკივილს. მისი თავიდან გაქრა ყველაფერი, გარდა ერთი განწირული აზრის: დაეცვა ამონ-რა, გადაერჩინა შვილი. და როცა შვილი მიწაზე მოკეცილი დაინახა, მაშინვე, მუხლებზე დადგა და ზემოდან გადაეფარა.

ალექსანდრე და მიხეილი მიწაზე გაწვნენ, პეტრეც შვილებს გადაეფარა. ისინი კარგად ვერ ხედავდნენ, რა ხდებოდა ხის მეორე მხარეს. იქ კი საშინელება ხდებოდა: ქვა ქვაზე ეცემოდა, ჭახა-ჭუხი გაჰქონდა, ერთმანეთზე იმსხვრეოდა. მალე ქვების საკმაოდ დიდი გორა აღიმართა. ქვების შხუილი და ზუზუნის კარგახანს გაგრძელდა. პატარა ყაჩაღებმა ის ქვებიც დახარჯეს, რაც უბეში ეწყობოდა, და ისიც, რაც ირგვლივ უხვად ეყარა. რამდენიმე ქვა პეტრეს ზურგში, თავში, ფეხებში მოხვდა. პეტრემ გონება დაკარგა.

გააგებული ბავშვები კიდევ დიდხანს არ დაცხრებოდნენ, მაგრამ დიდმა ბიჭმა დაჰყვირა:

– გეყოფათ! სასწრაფოდ დავიმალეთ, თორემ ვილაც მოგვისწრებს!

ყაჩაღების ბრბო წამში გაუჩინარდა. დიდი ხის ძირში ქვების დიდი გორა დარჩა. მის ქვეშ ამონ-რა და ანა იყვნენ ჩაქოლილები.

ქვების გორის თავზე დედა და მამა ჩიტები დასხდნენ და მოთქმით ატირდნენ.



ბარტყი გადარჩება

ავგუსტამ და იუსტინემ ვერ მოისვენეს.

— სადღაც ახლოს არის ამონ-რა! — დარწმუნებით ეუბნებოდა ავგუსტა იუსტინეს, — უნდა მოვძებნოთ!

მშენებლობაზე იუსტინემ იაკობი გამოიძახა და სთხოვა რამდენიმე კაცი გამოეყო, რომ ამონ-რა ეპოვათ. ბავშვებმაც გაიგეს, ამონ-რას ეძებნო და უფროსებს დაასწრეს. ოცაოდე ბიჭმა იორდანი გადალახა და მდინარისა და გზის მიდამოებს შეესია. მათ მახვილ თვალს არ გამოეპარა არცერთი ბუჩქი და ხის ძირი, არცერთი მოფარებული ადგილი.

ყველაზე პირველად ფილიპემ დაინახა ქვების გორა დიდი ხის ქვეშ და იქვე წაქცეული კაცი. მიირბინა და საცოდავი სურათი დახვდა: კაცი ორ ბიჭზე იწვა ზემოდან, ცდილობდა გადაბრუნებულიყო და ბიჭები გაეთავისუფლებინა, მაგრამ ვერ ახერხებდა.

სხვა ბავშვებმაც მიირბინეს. ერთობლივი ძალებით კაცი ხელში აიყვანეს და გვერდით დააწვივნეს. პეტრეს ორივე ფეხი და მარჯვენა მკლავი ჰქონდა მოტეხილი.

— მამა, როგორ ხარ? — ერთდროულად ჰკითხეს შვილებმა.

პეტრემ ძლივს დაილაპარაკა:

— დედას და ამონ-რას მიხედეთ, იქნებ ჯერ კიდევ ცოცხლები არიან!

ბავშვები აღექსანდრესა და მიხეილის გარშემო შეგროვდნენ. ძმები მიხვდნენ, რომ ესენი არ იყვნენ ყაჩაღები და არც ცუდი განზრახვა ჰქონდათ. ყოველ მათგანს სახეზე ეწერა თანაგრძნობა და დახმარებისათვის მზადყოფნა.

— ვინ ხართ თქვენ? — ჰკითხა მიხეილმა ფილიპეს, რომელიც ყველაზე წინ იდგა და პირველმაც მიირბინა.

— ჩვენ ამონ-რას მეგობრები ვართ, მას ვეძებთ! — მიუგო ფილიპემ.

— ამონ-რა და დედაჩვენი ამ ქვების გროვაშია! გვიშველეთ გამოვათავისუფლოთ ისინი! — მიხეილი და აღექსანდრე უკვე სათითაოდ იღებდნენ ქვებს და გვერდით ყრიდნენ.

ბავშვები მაშინვე შეუდგნენ ქვების გროვის დაშლას.

მოვიდნენ მუშებიც იაკობთან ერთად. მათ ილია და იორამიც ახლდნენ.

უფროსები ბავშვებს მიეხმარნენ, იაკობმა კი პეტრე გამოჰკითხა. პეტრემ თავს ძალა დაატანა, რომ იაკობისათვის ეთქვა, როგორ დაადგა მას და მის ბიჭებს თევზაობის დროს ვიღაც აყლაყულა ბიჭი და ჰკითხა: სად გყავთ დამალული თქვენი სულელი ამონ-რაო. არავინ გასცა პასუხი აყლაყულას. იმას სხვა არაფერი უკითხავს, მე თვითონაც მივაგნებო, თქვა. „ჩვენ სასწრაფოდ დავბრუნდით ამ ხესთან და ვთხოვეთ ამონ-რას გაექცეულიყავით. გვინდოდა იორდანის გაღმა გაგვესწრო. იქ ბევრ ხალხს ვხედავდით და ვფიქრობდით, რომ ისინი დაგვიცავდნენ. მაგრამ ამონ-რა ვერ დავიყოლიეთ. მას ხელში ბუდიდან გადმოვარდნილი ბარტყი ეჭირა. ვიდრე ბარტყს ბუდეში არ ჩავსვამ, არ გამოგყვებით, გვითხრა. ვეხვეწეთ, მაგრამ არაფერი გამოვიდა. ამასობაში ყაჩაღების ბრბო დაგვესხა. ბევრნი იყვნენ. აყლაყულამ უბრძანა მათ, რომ ქვები ამონ-რასთვის ესროლათ. მეც და ჩემს ბიჭებსაც გვესროდნენ ქვებს. იმ ქვების ქვეშ კი ამონ-რა და ჩემი მეუღლეა... ნეტავ ცოცხლები იყვნენ“... ამას ლულულუღებდა პეტრე და ტიროდა. იქვე ჩაცუსტული იორამი ამ დროს მას ყურებს, ხელებსა და სხეულს უსინჯავდა, მალამოს ადებდა და უხვევდა.

ამ დროს ავგუსტა და იუსტინე მოვიდნენ.

იაკობმა მათ ვითარება განუმარტა.

ავგუსტა ატირდა, და იუსტინემ ვერ შეძლო მისი დამშვიდება.

ყველა შფოთიანი მოუთმენლობით ელოდა ქვის გროვის დაშლას და იმედს არ კარგავდა, რომ ჩაქოლილები გადარჩებოდნენ.

— გამოჩნდა, — წამოიძახა ფილიპემ, როცა ქვებში ფეხის ტერფი შენიშნა.

მალე ზურგიც გამოჩნდა — ეს ანა იყო.

— დედა, დედა, დედა!.. — წუხილ-სიხარულით იყვირეს ალექსანდრემ და მიხეილმა.

უცნაურ მდგომარეობაში იხილეს ანა. ქალი გაშხლართული კი არ იყო მიწაზე, არც დამტვრეული და დასისხლიანებული იყო. არამედ იდგა ოთხზე და აშკარა იყო, რომ თავისი სხეულით ამონ-რას იცავდა. ამონ-რა კი მის ქვეშ თა-

ვისუფალ სივრცეში უნდა ყოფილიყო მოქცეული. ქვების მთელი გროვა ანას ზურგს ემყარებოდა. ყველას გაკვირვებას საზღვარი არ ჰქონდა: როგორ დაიჭირა ამ სუსტმა ქალმა თავისი ზურგით სიმძიმე, რომელსაც სპილოს გაჭყლელტა შეძლო.

იქნებ გადარჩა ამონ-რაო, ფიქრობდნენ ადამიანები. მაგრამ მხოლოდ მაშინ, როცა ანა ფრთხილად გადააწვინეს პეტრეს გვერდით, დაინახეს ის, რაც არასდროს არავის ენახა: იმ ადგილას, სადაც ამონ-რა უნდა ყოფილიყო, მიწაზე ცისფერი ცეცხლის ენები თამაშობდნენ და გარს ევლებოდნენ ხელის მტკვნებს, ნიჟარასავით რომ იყვნენ ერთმანეთთან შეკრულნი. სხვა იქ არაფერი იყო.

დუმილით, ჩაფიქრებით, რალაც უცნაური ზეიმით შეკყურებდნენ ღიღებიც და პატარებიც საოცარ სანახაობას.

ფილიპემ ცეცხლის ენებთან ჩაიჩოქა, ხელები გაიშვირა და ცისფერი ცეცხლიდან ხელის მტკვნების ნიჟარა აიღო. ნიჟარას ცეცხლის ენებიც გამოჰყვა. ისინი ფილიპეს სახეზე ელიცილიცებოდნენ, მაგრამ არ სწვავდნენ. ფილიპეს გულში ნათელმა გაიელვა.

— ეს ამონ-რას ხელებია, მე ვიცნობ ამ ხელებს... ამ ცეცხლსაც ვიცნობ, ამონ-რას გულის ცეცხლია... — ჩუმად თქვა ფილიპემ და ნიჟარა ფრთხილად გადახსნა. შიგ ბარტყი დაინახეს: თავიღდა, გრძელკისერა, მუცელგაბერილი.

ბარტყმა დაიჭყიპინა.

ზემოდან დედა და მამა ჩიტებმაც დაიჭყიპინეს — გაიხარეს, შვილი უვნებელი რომ დაინახეს.

ილიამ ბარტყი ხელში აიყვანა, ბევრი არ უფიქრია, უბეში ჩაისვა და ხეზე აცოცდა. ყველა ჩუმად ადევნებდა თვალს, როგორ მიიწევდა მაღლა, ტოტიდან ტოტზე გადადიოდა. ბოლოს მიაღწია ათასწლოვანი ხის კენწეროს, უბიდან ბარტყი ამოიყვანა, ნისკარტში აკოცა და ბუდეში ჩასვა.

ფილიპეს ამონ-რას ხელის მტკვნები ისევ ხელის-გულზე ეწყო. უნდოდა გულში ჩაეხუტებინა, ეკოცნა, მოფერებოდა, მაგრამ ვერ მოასწრო. ყველას თვალწინ ცისფერი, იისფერი, რიჟარაჟისფერი ცეცხლის ენები უცბად ერთად შეჯგუფდა, შეერთდა, დამრგვალდა. ცეცხლოვანი სფერო ელვისებურად აიჭრა ცაში და მალე გაუჩინარდა.

— იუსტინე, რა იყო ეს?! — ისე ჩაიჩურჩულა გაოცებულმა ავგუსტამ, რომ მისმა ხმამ იუსტინეს ყურამდე ვერ მიაღწია.

ცას გაჰყურებდნენ ბავშვები, ცას გაჰყურებდნენ დიდები და საღღაც უსასრულობაში ეძებდნენ გზას, რომლითაც უჩინარი ბურთი თუ ამონ-რას ცეცხლოვანი სული მიქროდა. ცაზე კი არაფერი ჩანდა.

— ცათა სასუფეველი... ცათა სასუფეველი... ცათა სასუფეველი... — იმეორებდა თავისთვის ამ სიტყვებს ფილიპე. იაკობი მუხლებზე დაეშვა და ხელები ცისკენ აღაპყრო.

მუხლებზე დაეშენენ სხვებიც და ხელები ცისკენ გაიწვდინეს.

ცაში, უსასრულობაში ადამიანებმა ამონ-რას სულს უხმო ლოცვაში ჩაქსოვილი გულის ცეცხლი და სიყვარული დაადევნეს.

მხოლოდ იორამი ხელავდა ცაში აღმავალი ლოცვის მკრთალ ცისფერ ენებს, რომლებიც ერთმანეთისკენ ისწრაფვოდნენ, ერთდებოდნენ და სვეტად მიემართებოდნენ მაღლა, იქითკენ, საითკენაც ამონ-რას სული გაფრინდა. იორამს არ უკვირდა, რასაც ხელავდა, და მთელ ამ ცეცხლის ნაკადს უმურველად ადევნებდა საკუთარი გულის ცეცხლსაც. „მაღლა, მაღლა, ამონ-რა, მაღლა“... — მისძახოდა მიხი სული მასწავლებლისა და მეგობრის სულს.

მხოლოდ ავგუსტამ შენიშნა კიდევ ცისფერი ცეცხლის აღმავალი სვეტი და გაოცდა. ეგონა, იუსტინეც ხელავსო, სხვებიც ხელავენო, და ალტაცებით, ჩუმად, ჩურჩულით ჩაილაპარაკა:

— რა ნათელი სვეტია ...რა მშვენიერი ცეცხლის ბილიკია...

იუსტინემ ყური მოკრა ავგუსტას ჩურჩულს, მაგრამ ვერ მიხვდა, რა სვეტსა და ბილიკზე ლაპარაკობდა ავგუსტა.

ზურგზე მწოლარე ანაც ცას გასცქეროდა და თვალეზიდან ცრემლის ნაკადი სდიოდა. რამდენი ქვა მოხვდა ანას ზურგში, თავში, ვერცერთმა ვერაფერი ავნო. ქვების გროვას იჭერდა ზურგით და არ ემძიმებოდა. უვნებლად რომ გადაარჩა, ანასთვის ეს არ იყო სასწაული. მისთვის სასწაული მაშინ დაიწყო, როცა, ქვების გროვასა და წყვილიაღში მოქცეული,

ამონ-რას ჩასჩურჩულებდა: „ოღონდ შენ არაფერი გეკნოს, შვილო... ოღონდ შენ გადაძირჩე, შვილო...“ და ამ ჩურჩულში მოესმა ანას ამონ-რას მშვიდი, კეთილი, წყნარი, უშფოთველი, ალერსიანი, სიყვარულით სავსე ხმა: „ბარტყი გადარჩება.“ შემდეგ ანამ ქვების წყვლიაღში დაინახა, როგორ განათდა ამონ-რა, მთელმა მისმა სხეულმა ცისფრად დაიწყო ნათება. ზემოდან ქვა ქვაზე იმსხვრეოდა, ბოროტება და სიძულვილი მძვინვარებდა, ანას სხეულის ქვეშ კი ამონ-რა ისე იწვა, თითქოს დედის საშოში ყოფილიყოს, ცისფრად ლიცლიცებდა და სახე უსაზღვრო განცხრომას გამოხატავდა. „ამონ-რა, შვილო, ამონ-რა!“ — ჩურჩულებდა ანა სასოებით. ამონ-რა აღარაფერს ამბობდა, აფრქვევდა ქვების წყვლიაღში ცისფერ ცეცხლს და ანას თვალწინ იღეოდა. მხოლოდ ნიჟარასავით შეკრულ ხელებს არ ეკარებოდა ცეცხლი. იქ ბარტყი იჯდა და დროდადრო წამოიჭყვიპინებდა. ცისფერი ცეცხლის ენები ანას მუცელსა და მკერდს ვდებოდა, მაგრამ ცეცხლი არ სწვავდა მას, ცეცხლი ეფერებოდა და ამშვიდებდა მას.

ტიროდა მიწაზე მწოლარე ანა, მაგრამ ეს არ იყო სიბრაღულის, მწუხარების, უბედურების ცრემლები. ანას ცრემლები გზას ულოცავდნენ ამონ-რას სულს; სიხარულის ცრემლებით მიაცილებდა ანა თავის საყვარელ ბიჭს იქ, საითკენაც ის ისწრაფვოდა. მისი ცრემლების სხივებიც, როგორც უსაზღვრო სიყვარულის განცდა, უერთდებოდა ცეცხლოვანი გზის ერთიან ნაკადს, რომელიც დედაბიწიდან უსასრულობისკენ მიემართებოდა და რომელსაც მხოლოდ ორი ხელავდა. ანამ წამოიწია, მუხლებზე უნდოდა დამდგარიყო, და კაბის ჭრილიდან ამომავალი მზის მედალიონი გამოძერა. „აი, რამ გადამარჩინა მე, — გაიფიქრა ანამ, — ამომავალი მზის მედალიონმა გადამარჩინა! — მედალიონი ტუჩებთან მიიტანა და აკოცა, — ამან გადამარჩინა ჩემი ქმარი და შვილები“. ახლა აღა შენიშნა მედალიონზე მშვენიერი ქალის სახე. მარამ ბიჭი მიწიერი ცხოვრებისათვის გააჩინა. ანამ კი მარადიულ ცხოვრებაში გააცილა იგი.

ხალხი თანდათან წამოიშალა.

იუსტინე არ ჩქარობდა წამოდგომას. არც იაკობი ჩქარობდა.

— იაკობ, — ჩურჩულით თქვა იუსტინემ, — ახლა მაინც მიჩვენე უცნობი ხუროთმოძღვარი, რომ უმშვენიერესი,

დიდებული ტაძრის პროექტი შეგვიქმნას. ტაძარს აქ ახალი რელიგიის დასამკვიდრებლად ავაშენებთ!

იაკობმა მშვიდად უპასუხა:

— ბატონო, უცნობი ხუროთმოძღვარი აქვია და ტაძრის პროექტიც მზად არის! — და თორმეტი წლის ბიჭზე, თავის „მოსამსახურეზე“ მიუთითა. ბიჭი მუხლებზე ადგა მათ წინ და ცას გასცქეროდა. მისი სული ამ დროს ამონ-რას სულს მისდევდა.

— ეს?! — გაუკვირდა იუსტინეს, — ამ ბავშვზე შეუბნები?!

— დიახ, ბატონო, მაგან შექმნა თქვენი სასახლის პროექტი, და ეგ ხელმძღვანელობს ჩემი მემშვეობით მშენებლობას!

ღაჩოქილმა იუსტინემ ხელი გაიწვდინა და ილიას მხარზე დაადო.

ილია შეკრთა, მოიხედა.

იუსტინე უღიმოდა მას.

— ღარჩი უცნობ ხუროთმოძღვრად, სამაგიეროდ საქმე იჭება ცნობილი!...

ხალხი მშენებლობისკენ გაემართა. პეტრე საკაცით მიჰყავდათ. გვერდით ანა და შვილები მიჰყვებოდნენ.

მიდიოდნენ ადამიანები, და ყველას თან მიჰქონდა საკუთარი ტვირთი — ეს იყო დიდი ჭემმარიტების ხილვით გამოწვეული განცდა. და რადგან არავის შეეძლო მთლიანი ჭემმარიტების ზიდვა, თითოეულმა თან გაიყოლა ჭემმარიტების ის ნაწილი, რაც მისმა სულმა ჩაიტია და გულმა განიცადა.

ვერავენ იტყოდა, ვინ უფრო მეტად ან ვინ უფრო ნაკლებად იყო აღესილი ჭემმარიტების ნათლით, ვის უფრო მეტი სინათლე მიჰქონდა — მამას თუ შვილს.

მიდიოდნენ ადამიანები, თავ-თავიანთი ჭემმარიტებებით, როგორც სათავეები ათასი ლეგენდისა და ზღაპრისა ერთ პატარა ბიჭზე, რომელმაც თავისი სიცოცხლე პაწაწკინტელა ბარტყს ანაცვალა, თავად კი უსასრულობისაკენ მიმავალ ცეცხლოვან ბილიკად იქცა.

სასწაულის ადგილას ორი ღარჩა — ფილიპე და იორამი.

იორამი ჩაცუცქდა და იმ ერთ მტკაველ მიწას მოუხვია ხელი, სადაც სულ ცოტა ხნის წინ ცისფერი ცეცხლის უნები ლიცილიცებდნენ: იქნებ ამონ-რას ფერფლი დარჩაო. ფერფლი ვერ აღმოაჩინა, მაგრამ ხელმა მიწაზე ერთი ბრტყელი ქვა იგრძნო. აილო ქვა და დახედა — ზუღ მკრთალად ანათებდნენ რალაც ასობები და ხაზები.

„ამონ-რას ქვაწერილი“, — გაიფიქრა იორამმა. წამიც და ქვაზე ყველაფერი პირწმინდად წაიშალა. „აღველინა! — გაუელვა ბიჭს თავში. მან ფრთხილად დადო ქვა ადგილზევე, — ტაძრის მშენებლობას გამოადგება.“

იორამი ფილიპესაკენ შემობრუნდა.

— მე და შენ ფილოსოფოსის გამოქვაბულებში უნდა წავიდეთ. იქ სალომე და ბუნგლო გველოდებიან. ჩვენ ბევრი საქმე გვაქვს გასაკეთებელი. ამონ-რამ შენი თავი მე ჩამაბარა! ფილიპეს თვალებში ნაპერწკლებმა იელვეს.

— მაშ, შენ ჩემი მასწავლებელი იქნები?

ისინი წამოდგნენ და გზაზე გავიდნენ.

მაგრამ მათ უკან კიდევ ორნი დარჩნენ — დედა და მამა ჩიტები. ისინი ათასწლოვანი ხის კენწეროზე ისხდნენ და მიმავალი ბიჭების კვალდაკვალ გარემოს სიმღერით ავსებდნენ. გალობდნენ ისინი ჭეშმარიტების იმ ნამცეცხე, რაც დღეს მათ გულებმა ჩაიტყეს.

სიმღერა მათი იყო დიდებული.



სარჩევი

ბიჭი კაკასიის მთათა ღრუბლებიდან	5
<i>პირველი თავი.</i>	
დაბადების დღე	8
<i>მეორე თავი.</i>	
თუ გინდა გადარჩე, გამარჯვებაზე იფიქ- რე	12
<i>მესამე თავი.</i>	
გეყოფა ტირილი, დროა საქმეს შეეუღ- გეთ	19
<i>მეოთხე თავი.</i>	
სამყაროს არა აქვს დასასრული, ყველგან ყველაფერია	24
<i>მეხუთე თავი.</i>	
რა საინტერესო ქვაა, თითქოს ზედ რა- ღაცეები წერია	28
<i>მექექსე თავი.</i>	
შენ რომ გიყვარს სალომე, მოარჩინე, გან- კურნე	34
<i>მეშვიდე თავი.</i>	
უებარი მალამო	39
<i>მერვე თავი.</i>	
მკურნალო, ახლა შენი თავი გექნება სამ- კურნალო	44
<i>მეცხრე თავი.</i>	
აღბათ ბიჭები ექიმობანას თამაშობენ ან მეხუშრებიან	51
<i>მეთე თავი.</i>	
თუ არ გინდათ ნუ დაიჯერებთ: ისინი ცაში დაფრინავენ	54
<i>მეთერთმეტე თავი.</i>	
ბოროტი საკუთარ ქვაწერილს ვერაფერს გაუგებს	58
<i>მეთორმეტე თავი.</i>	
ვინც კითხვა და მეცნიერება იცის, ის ბავშვი აღარ არის	60
<i>მეტამეტე თავი.</i>	
ღამეხმარე, ქვაწერილო, გამიხსენი საი- ღუმლო	66
<i>მეთოთხმეტე თავი.</i>	
სული შრომობს და კეთილშობილებით მღიდვდება	71
<i>მეთხუთმეტე თავი.</i>	
ორივეს ღიმილი რაღაც საიდუმლოს ფა- რაუდა	76
<i>მეთექვსმეტე თავი.</i>	
თუ შენ გაოცება არ შეგიძლია, გასაოც- არს ვერაფერში დაინახავ	81
<i>მეჩვიდმეტე თავი.</i>	
უკვე რვა წლის გახდი, შვილო, როგორ გაიზარდე	88
<i>მეთვრამეტე თავი.</i>	
შენ უნდა მოარჩინო მამაშენი	99
<i>მეცხრამეტე თავი.</i>	
ელთან თუ არა შენგან სიკეთეს—ჰქმენ სიკეთე	106

<i>მეოცე თავი.</i>	შენ ხარ ვენახი უფლისა	113
<i>ოცდამეერთე თავი.</i>	პირველი გაკვეთილი მოწაფეებთან	126
<i>ოცდამეორე თავი.</i>	ეს იყო ღიმილი სინანულის, ბოღიშისა და იძელის	138
<i>ოცდამესამე თავი.</i>	სილამაზეს სიყვარულით საესე გული ბა- ღებს	144
<i>ოცდამეოთხე თავი.</i>	დაიწვი, ცუდო, და აღარასოდეს დამბი- რუნდე	150
<i>ოცდამეხუთე თავი.</i>	უნდა გაგახაროთ: ჩვენთან სტუმარი მო- დის	155
<i>ოცდამეექვსე თავი.</i>	უცნობი ზურთმობღვარი	160
<i>ოცდამეშვიდე თავი.</i>	საქმე უბრალოდ გადაწყდა	165
<i>ოცდამერვე თავი.</i>	დღეღმინაზე ნაირნაირი და უთვალავი ქაა.....	171
<i>ოცდამეცხრე თავი.</i>	დიდ დათვზე სხედან და ისე მოდიან	177
<i>ოცდამეათე თავი.</i>	ყველამ იძელისა და სიყვარულის თითო ნაპერწყალი ესროლეთ	187
<i>ოცდამეთერთმეტე თავი.</i>	ყველას მოექცი ისე, როგორც გინდა, რომ შენ მოგექცნენ	194
<i>ოცდამეთორმეტე თავი.</i>	თქვენი მეუღლე მორჩება, შე კი ოქრო არ მჭირდება	200
<i>ოცდამეცამეტე თავი</i>	ამას ჯერ ის ყურები არა აქვს, რომ ისმინოს	204
<i>ოცდამეთოთხმეტე თავი</i>	შე მხოლოდ აღვასრულებ უფლის ნებას ..	212
<i>ოცდამეთხუთმეტე თავი</i>	მათ შორის ყველაზე პატარა ყველაზე დიდი იყო	219
<i>ოცდამეთექვსმეტე თავი</i>	შე უკვე მყავს მამა, რომელიც მეხმარება საუნჯე დავიმკვიდრო ზეცაში	229
<i>ოცდამეჩვიდმეტე თავი</i>	ავგუსტა უფლის ანგელოზია	234
<i>ოცდამეთვრამეტე თავი</i>	სასახლეში დიდი წვეულება დიდი გლო- ვით დასრულდა	243
<i>ოცდამეცხრამეტე თავი</i>	მაგრად გაუოხეთ და დიღუფში ჩააგდეთ ..	253
<i>მეორმოცე თავი</i>	რა შშვენიერი ყოფილა ჩემი ვარსკვლავი	260
<i>ორმოცდამეერთე თავი</i>	ათისთავის ვერაგული ფიქრები, ქოფაკი ძალი და დიღუფი	266
<i>ორმოცდამეორე თავი</i>	ღმერთი დასაჯა, ყაჩაღი კი გაათავი- სუფლა	274

<i>ორმოცდამესამე თავი</i>	კეთილი თესლი ითესებოდა გულებში ნაყოფის აღმოსაგენებლად	284
<i>ორმოცდამეოთხე თავი</i>	ერთ ბიჭს ვეძებთ, ამ გზაზე უნდა გავე- ლო, ზომ არ შევინიშნავთ	295
<i>ორმოცდამეხუთე თავი</i>	მე უკვე აღარ მჭირდება დაცვა, მინდა, რომ ეს მუღალიონი შენ ატარო	299
<i>ორმოცდამეექვსე თავი</i>	ბარტყი გადარჩება	305